

# Шарқ ўлдуси

Адабий-бадиий, илмий, ижтимоий-сиёсий журнал

1931 йилдан чиқа бошлаган

## ЖАМОАТЧИЛИК КЕНГАШИ

Муҳаммад Али	Абдулла Орипов
Эркин Воҳидов	Умарали Норматов
Кенгесбой Каримов	Хайриддин Султонов
Наим Каримов	Сирожиддин Сайид
Иқбол Мирзо	Мехрибон Абдураҳмонова
Абдуваҳоб Нурматов	Йўлдош Солижонов
Бахамдулло Нурабуллаев	Шухрат Маткаримов
Нурбой Жабборов	Адҳамбек Алимбеков
Ислом Ёқубов	Жамолиддин Муслим

Бош мухаррир в.б. — Сирожиддин Рауф  
Масъул котиб — Шавкат Валиев  
Наср бўлими мудири — Рисолат Ҳайдарова  
Назм бўлими мудири — Икром Отамурод  
Адабиётшунослик бўлими мудири — Аъзамхон Қозихўжаев



## **УШБУ СОНДА:**

*Сироожиддин САЙЙИД*

*ҲАЗМ*

*ПУНГИ БИЛА ПОНГ*

*Тўртликлар силсиласи*

*Ватан матонатдир, шижсоат – Ватан,  
Бутун эл тиклаган иморат – Ватан!  
Үйгоқ кўнгиллару беором қалблар,  
Бедор юраклардан иборат Ватан!*



*Кулман ОЧИЛ*

*ҲАСР*

*САВДО*

*Хикоя*

Опа ҳеч кимдан, Сафардан ҳам хафа бўлмайди.  
Ичидан куяди. Умри бўйи нашриётда мухаррир бўлиб  
ишлаган бу аёлнинг одати шунаقا: “Бандасидан хафа  
бўлмасликка ўрган, ука, – дейди. – Шунда яшашинг  
осонроқ бўлади. Аламзадалиқда яшаш – азоб...”



*Абдулла УЛУГОВ*


*ЖАҲОН АДАБИЁТИ ТАҲЛИЛИ*

*АФСОНАЛАРНИНГ  
БАДИИИ ТАЛКИНИ*

Чингиз Айтматов асарлари марказида оддий одамлар туради. Адаб кундалик турмушда дуч келаётган муаммоларини кўрсатиш орқали бугунги куннинг долзарб масалаларига эътибор қаратади. Ушбу муаммолар барча кишиларга бирдай дахлдор эканлигини таъкидлайди.



*ҲИЧПИМАС МЕНИ БОҒИМ*



*Омон МУХТОР*

*СИЗДА АЙЛАДИЛАН  
ҶАПЛАРИМ*

*Шеърлар*

*Менга бўйсунмасдан тичирлар,  
Сизнинг исмингизни лабларим.  
Шунда еру кўкни қучарлар  
Сизга айтадиган гапларим.*

*АДАМИЁТШНОСЛИК*



*Машхура ШЕРАЛИЕВА*

*ИЗТИРОБСИЗ ОДАМ ОБРАЗИ*

Самаднинг онгига ҳам шунга ўхшаш психологик ҳимоя механизми шаклланган. Самад шунчалик тубан кетгани билан барибир ўзини яхши кўради, пасткашилиги учун ўзини айблашини истамайди, бошқа бирорни айблаб қўя қолади.

*ҲАСР*



*Зухра МАМАДАЛИЕВА*

*ПАНРИПЛОҚҚА  
ЎРЛАЁПТАН ЎФЛОН*

*Ҳикоя*

Истамин мақсадга етганини англади. Бу ёғдуларга чўмган юрт Уструшона эди. Тўғри, Уструшонага бормаслик ҳақида хоконлик билан аҳдлашув бор. Лекин ошиқ қалби чегараю деворларни, аҳдлашуву битимларни тан олармиди? Унга тоғнинг икки томони эмас, икки, уч дунё бир қадам-ку, ахир.

МУНДАРИЖА	
ПУБЛИЦИСТИКА	
<b>Тоштемир Турдиев.</b>	Муаззам юрт.....5
<b>НАЗМ</b>	
<b>Сирожиддин Саййид.</b>	Тун била тонг .....11
<b>Гулистон Матёкубова.</b>	Ҳаёт ишонч тўла юракдир. ....31
<b>Гулом Мирзо.</b>	Жавобсиз саволлар. ....36
<b>Оллоёр Бегалиев.</b>	Ҳаёлларим юклантган қайик. ....97
<b>Ҳафиза Эгамбердиева.</b>	Ёднингни ёд олган лаҳзаси. ....102
<b>Турсун Али.</b>	Туйгулар. ....106
<b>Ойдин Нисо.</b>	Ўзимники эди менинг мазмуним. ....165
<b>Шойим Шерназар.</b>	Рухимни ҳулволар мусаффо этар. ....170
<b>Икром Нарзулло.</b>	Согинчга айланган кўзларим. ....174
<b>НАСР</b>	
<b>Қулман Очил.</b>	Ҳикоялар. ....18
<b>Абдуқаюм Йўлдош.</b>	Роман (давоми). ....41
<b>Дилбар Маҳмудова.</b>	Ҳалима. Эссе. ....80
<b>Зухра Мамадалиева.</b>	Ҳикоялар. ....148
<b>МУНОСАБАТ</b>	
<b>Ахмаджон Чориев.</b>	Улуғ сиймо ҳакида китоб. ....138
<b>АДАБИЁТШУНОСЛИК</b>	
<b>Машхура Шералиева.</b>	Изтиробсиз одам образи. ....178
<b>АДАБИЙ МЕРОС</b>	
<b>Жалолиддин Жўраев.</b>	Ўзбек адабиётидаги илк марсия...128
<b>БУЛОҚ КЎЗ ОЧДИ</b>	
<b>Дилрабо Мингбоева.</b>	Исминг ишқми? .....185
<b>БУ БЎСТОН САҲНИДА</b>	
<b>Гулбахор Сайдганиева.</b>	Жон кушин ул шамъфаки парвона кил. ....144
<b>МУШОИРА</b>	
Умр ўтаверар дақиқа сайин.	.....189
<b>УНУТМАС МЕНИ БОҒИМ</b>	
<b>Омон Мухтор.</b>	Сизга айтадиган гапларим. ....196
<b>Наим Каримов.</b>	Отахон шоир. ....200
<b>ЖАҲОН АДАБИЁТИ ТАҲЛИЛИ</b>	
<b>Абдулла Улугов.</b>	Афсоналарнинг бадиий талқини. ....111
<b>Исломжон Ёқубов.</b>	Адабий танқид – давр барометри. ....120
<b>БОЛАЛАР ДУНЁСИ</b>	
<b>Хабиб Рахмат.</b>	Турна кўзли булокча. ....205
<b>Адабий ҳаёт</b>	.....207

# Шарқ ўлдузи

2015

6-сон

Муассис:  
**ЎЗБЕКИСТОН ЁЗУВЧИЛАР  
ЮШМАСИ**

\* Муаллифлар фикри таҳририят ижодий жамоаси нуқтаи назаридан фарқланши мумкин. Таҳририята юборилган материаллар муаллифларга кайтарилмайди.

Журнал ОАК эътироф этган нашрларнинг 10.00.02 "Ўзбек адабиёти" ихтиосслиги бўйича рўйхатига киритилган.

\* Журналга обуна даврий нашрларни етказиб бериш билан шугууланувчи барча ташкилотлар орқали амалга оширилади.

**Обуна индекси – 911**

**Манзилимиз:**

100127, Тошкент шаҳри,  
"Ўзбекистон" кўчаси, 16-а уй.  
Телефонлар:  
227-00-81, 245-22-99, 245-27-87  
www.sharyulduzi.uz  
e-mail: sharyulduzi1931@mail.ru

Босишига руҳсат этилди

30.12.2015 йил.

Қоғоз бичими 70x108  $\frac{1}{16}$ .

Офсет босма усулида тип.

№ 1-қоғозга босилди.

Босма тобоги 11.

Шартли босма тобоги 15,4.

Нашриёт хисоб тобоги 17,2.

Адади 1550 нусха.

Буюргта №

Журнал Ўзбекистон Матбуот ва ахборот агентлигига 16.09.2010 й. 0562-рәқам билан рўйхатга олинган.  
Ўқитувчи НМИУ босмахонасида чоп этилди.

**Корхона манзили:**

Тошкент шаҳри, Юнусобод тумани,  
Янги шаҳар кўчаси, 1-үй.  
Журнал иккى ойда бир марта  
чоп этилади.

Мусаххих:

**Дилғузा Маҳмудова**

Саҳифаловчи-дизайнер:

**Мадина Абдуллаева**

Copyright © "Шарқ ўлдузи"



*Тоштемир ТУРДИЕВ*

Ўзбекистон Республикасида хизмат кўрсатган маданият ходими. 1942 йилда тугилган. Бухоро давлат педагогика институтини тугатган. Унинг “Фозил Йўлдош ўғли”, “Субҳидам қалдиргочи”, “Мингбое жамоли”, “Талтин, юрак”, “Муддао: янгича яшаши, кураши” “Чагониён тараннуни” каби китоблари нашир қилинган.



## МУАЗЗАМ ЮРТ

Эътиқодсиз инсон елканисиз кемага ўхшайди. Бекарор тўлқинлар, бетаин оқимлар уни мўлжалдан адаштириб, беармон сарсон-саргардон қиласди. Бизнинг етмиш йил, янада тўғрироғи, бир юз эллик йил тарихимиз, миллий бойликларимиз, қадриятларимиз топталди, азиз китобларимиз ёқилди, бу кечмишлардан юракда чукур жароҳатлар қолди.

Истиқлол даврида топталган қадриятларимиз тикланди. Маянвиятиз дунё юзини кўрмоқда. Сумалак қайнаётган қозонни эскилик сарқити деб тепганлар мустамлака даврида қолди. Ўрмонга ўт кетиб, хўлу куруқ баробар ёнса-да, миллий қадриятларимиз халқимиз хотирасидан ўчмади, бугунги фаровон ҳаётимизда муносиб ўрнини топди.

Инсоният тарихи икки қисмдан иборат: Буюк Тўфонгача бўлган давр ва ундан кейинги асрлар. Биринчи қисм тафсилотларини аввало муқаддас Куръони каримдан сўнг бошқа қадимий битиклардан ҳам билиб олишимиз мумкин. Иккинчи қисм Нуҳ алайҳиссалом кемаси қирғоққа чиққанидан бошланади. Биз Нуҳ алайҳиссаломнинг учинчи ўғли Ёфас зурриётларимиз.

Оллоҳ хоҳласа тош устида гул ўсади. Инсон ақли бундай мўъжизаларни англашга қодир эмас. Бобил минорасини қуриб, Яратганинг ғазабига йўлиққан одам боласи тадбир билан тақдирни ўзгартириб бўлмаслигини англаши учун минг йиллар ҳам етмади.

Тарихни ўрганиш масаласида “Шажарайи турк” учун Абулғозий

Баҳодирхон олдида бутун туркий халқлар то қиёматгача қарздор. Надоматлар бўлсинки, бундай ноёб манбалар жуда кам. Дунё тарихида Геродот, Плутарх каби тарихчилар ўтган ва улар барча тафсилотларни ипидан игна-сигача ажойиб қилиб ёзив қолдирган, ваҳоланки, ўша замонларда, ҳозирги Сурхондарё вилоятида ўз ёзувига, пул бирлигига эга давлат мавжуд бўлиб, улар ҳайкаллар, заргарлик буюмлари, тақинчоқлар ясаганларки, бу ноёб на-муналарни кўрганда ҳозир ҳам мусаввиру ҳайкалтарошлар ҳайратда қолади.

“Тўғри гап түкканингга ёқмас”, деган мақолни билсан-да, Монтескьенинг “Шарқда буюк шаҳарлар қурадилар-у, аммо унинг тарихини ёзмайдилар” деган гапини шу ўринда келтириб ўтмоқчиман. Ҳолбуки, Соҳибқирон доим ёнида зукко тарихчиларни олиб юрган, меҳнатларига яраша рағбатлантириб турган, аммо ёзма манбаларда аниқ тафсилот ўрнига ҳамду сано ва тасанно-ларнинг кўпайиб кетиши ҳақиқий манзарани билишга соя солади.

Академик Галина Фёдоровна Пугаченкованинг олтмишинчи йиллари Тошкентда чоп этилган “Холчаён” номли китоби бор. Китоб милоддан аввалги III-I асрларда тараққий этган, ҳаттоқи гуллаб-яшнаган, гавжум бир шаҳар ҳақида маълумотлар беради. XX асрдаги халққа қўшилиб бу шаҳарнинг номини “Холчаён” деб атаган муаллиф тафсилотларини баён қиласкан мелоддан аввал ёзилган биронта ёзма манбага суюнмайди. Муаллифнинг асосий манбаси – археологик қазишлар чоғи топилган тангалар, тақинчоқлар, уй-буюм жиҳозлари, хумдон, қабристонлар, устунларнинг таг курсилари, пойдеворлар, хуллас, йигирма уч асрдан бери тупроқ тагида ётган ашёлар. Олим топилган ашёларга қараб, тарихни, ижтимоий-сиёсий ҳаётни, диний урф-одатлар, истиқоматчиларнинг касб-кори, умуман, турмуш тарзини ва бошқа жуда кўп тафсилотларни хаёлан тиклади. Қарант, ёзув бор, зарб қилинган тангалар бор. Уларга қирра бурунли хукмдорнинг тасвири туширилган, демак, маданият, санъат юксак даражада ривожланган. Аммо Геродот, Плутархнига ўхшаган манба – китоб йўқ.

Энди, Холчаёнинг қаерда жойлашгани ҳақида икки оғиз сўз: у Денов шаҳрининг кун чиқиши тарафида, Сурхон дарёсининг қирғоғида. Ҳозиргидек ўтган замонларда ҳам сув ҳаёт манбаи бўлган. Олимлар Холчаёнинг қўйироғида Сурхон дарёсининг Қизилсув дарёсига қўшилиш жойида Будрач деган қадимий шаҳар қолдикларини топишиди. Мутахассислар Будрачни Буддага нисбат бердилар. Демак, милоддан илгари бу ўлкаларда будда-вийлик алоҳида мавқега эга бўлган. Бу манзилдан Қизилсув дарёси бўйлаб юқорига юрилса, Денов тупроққўрғонининг қуи қисмидан чиқлади. Олимлар дарё тошқинлари ювиб кетиши натижасида ўпирилишлар чоғи чиққан ашёларга қараб, бу Тупроққўрғон милоднинг III-IV асрларида бар-по этилганлигини тахмин қилмоқда.

Икки дарё оралиғидаги З нуқта бирлаштирилса катта учбурчак ҳосил бўлади. Академик Василий Владимирович Бартольд: “Қадимги, яъни милоддан илгари дунёга келган Чагониён давлатининг пойтахти ана шу учбурчакнинг ичидаги жойлашганд”, дейди ва фикрини муаррих Махмуд ибн Валининг “Худуди Чагониёнки имruz ва дехинав машхур аст” деган сўzlари билан далиллайди. Чагониён дав-

латининг маркази ҳозирги Денов шаҳрининг ўрнида, Тупроққўрғон жойлашган ерда бўлган, деган фикр назаримизда ҳақиқатга яқинроқ.

Бундан ташқари, Бартольд тадқиқ қилган бошқа манбаларда ҳам Чагониён давлатининг маркази Термиздан 24 фарсах узоқликда жойлашганлиги, ундан Чогонруд (Сурхон дарёси) оқиб ўтиши алоҳида таъкидланганлигига эътибор қаратиш ҳам Маҳмуд ибн Валининг юқоридаги сўзларини тасдиқлади.

XX асрнинг олтмишинчи йилларида Холчаён қисман тадқиқ қилинган милоддан илгариги тарихий обидалар устига ҳозир туар жойлар қурилган. Будрач харобалари эса экинзорларга айлантириб юборилган.

XX асрнинг охирларида ташки қалъаси ер билан яксон этилган Тупроққўрғон эса деярли тадқиқ қилинмаган. Бир ярим минг йил илгари қурилган мўътабар тарихий обида ўтмишга нисбатан нафрат туйғусини яққол ифодалаш учун узоқ йиллар мол бозори қилиб қўйилди. Тупроқ хомашё сифатида аёвсиз совурилди, лойсувоқ учун ишлатиб юборилди. Ўтмишнинг бу ноёб меъморий обидасини худди каламушдай кемириш ишлари мустақилликкача давом этди.

Кўп йиллар на Холчаёнда, на Будрачда ва на Тупроққўрғонда археологлар хеч қандай иш олиб бормади. Ваҳоланки, бу улкан учбурчак ичida археологлар тадқиқот олиб борганларида денгиз қаърига чўккан кема сингари тупроқ қаърида ётган ўтмишни ер юзига олиб чиқар эдилар.

Икки минг уч юз йил давомида Қизилсув ва Сурхон дарёларидан кўп сувлар оқиб ўtdи. Бошқа жойлардаги сингари бу икки дарё оралиғидаги Чагониён давлати неча марта гуллаб, неча марта ер билан яксон бўлди. Мунгайган ғариб тепалар одамларга ўтмишдан ҳасратли ҳикоялар сўзлайди.

Қадимги Чагониён милоднинг иккинчи минг йиллигига ҳам муаззам юрт сифатида барқарор эди. Нақшбандия тариқатининг намояндаси Хўжа Алоуддин Аттор ҳазратларининг Бухорий шарифдан келиб, Деновни ихтиёр этишлари ва умрининг сўнгти кунларигача бу кутлуғ масканда қолишлари Оллоҳнинг иродаси билан бўлди. Бу табаррук зотнинг “Атрофимдаги 18 фарсахни асрашга қафилман” деган нидолари доим қулоғимда жаранглаб тургандай бўлади.

Херман Вамбери: “Мўғуллар истилоси юртни ва унга қўшиб маданиятни ҳам хароб қилди, шунинг учун, Марказий Осиёда тасаввуф ривожланиб кетди”, – деган фикрни айтган.

Низомий Арузий “Мажмаъун-наводир” номли китобида мана буларни ёзади: “Фаррухий сейистонлик Халиф ибн Бону хизматидаги Ғулом Жулугнинг ўғли эди. Истеъоди юксак, шеърни яхши ёзарди, чанг ҳам чаларди. У сейистонлик дехқонлардан бирининг мулкида ишлар, дехқон эса унга ҳар йили беш манлиқдан икки юз қайл ғалла, юз дарҳам нуҳий кумуш пул берар эди. Булар унинг сарф-харажатларини қоплаб туар эди.

Фаррухий уйлангач бўйнига олахуржун тушиб, факирлашиб қолади.

У келиб-кетувчилардан бошқа ерда бирорта мўътабар киши бор ёки йўқлиги ҳақида суриштира бошлайди. Охири Чагониёнда амир Абдулмузаффар Чагоний борлиги, бу хилдаги кишиларга ҳадя ҳамда қимматбаҳо

совғалар инъом этиши, ҳозирги пайтда аср подшолари ичида унга тенг келадигани йўқлиги ҳақида хабар топади. Фаррухий бир қасида ёзди-да, ўша томонга қараб равона бўлади:

*Либос карвони билан жўнадим Сейистондан,  
Либосим или дилим, матоси эса жондан...*

Ҳақиқатан ҳам бу қасида ниҳоятда чиройли ёзилган эди. Чагонийлар саройига етиб келган вақтда баҳор фасли бўлиб, далада ҳар бир биянинг орқасида тойчоғи эргашиб юради. Амир ҳар йили даштга чиқар ва тойчоқларни тамғаларди.

Амирнинг қадхудоси Амид Асад саройда қолган бўлиб, амирга зиёфат ҳозирлар эди. Фаррухий унинг хузурига келиб қасидасини кўрсатади. Ҳожа Амид Асад фозил киши эди ва шоирларни ёқтиарди. Фаррухийнинг шеърлари латиф, ёқимли, чиройли ёзилгани, аммо унинг ўзи беўхшов, либосининг орқа-олди йиртилган, бошида сейистоний салла, ковуши эски, оёғи кир, шеъри эса юксак эканини кўриб, мазкур шеърларни сейистонлик ёзганига ишонмади. Уни синаб кўриш мақсадида: “Амир ҳозир даштда, мен хузурига бормоқчиман, сени ҳам даштга олиб кетаман, сен унда бошқа дунёни кўрасан, ҳамма ёқда чайлалар. Чодирларнинг ҳар биридан руд овозлари келади, дўстлар жам бўлиб, базму жамшид қилишади. Амир чодири олдида осмонга ўрлагудек гулхан ёқилади. У ерда тойчоқларга тамға босишади. Подшо одамларга от инъом қиласи. Шу ҳолда мослаб қасида ёз, даштни васф қил, сўнг сени ҳам ўзим билан бирга амирнинг хузурига олиб кетаман!” дейди.

Фаррухий чиқиб кетади ва тунда ажойиб қасида ёзиб, тонг сахарда Ҳожа Амид Асад хузурига келади. Ўша қасида мана будир:

*Кўк ҳарирдан юзига ёпгач рўмолни сабзазор,  
Етти хил ранг парнаёни бошга солди кўҳзор.*

Ҳожа Амид Асад бу қасидани эшитиб ҳайрон қолади. У барча ишини йиғишириб, Фаррухийни отга миндиради-да, амир сари равона бўлади. Амир хузурига келиб: “Эй олампаноҳ, сенга бир шоирни олиб келдим. Дақиқий юзини тупроқ яширгандан буён ҳеч ким бундай шоирни кўрмаган!” дейди-да, бўлган воқеани айтиб беради.

Амир Фаррухийни хузурига киришига рухсат этади. Фаррухий кириб таъзим қиласи, амир ўтириш учун жой кўрсатади, ҳол-аҳвол сўраб, эъзозлайди, илтифотлар кўрсатади. Фаррухийнинг кўнглида умид учқунларини ёндиради. Фаррухий ўрнидан туриб, ҳазин, аммо ёқимли овоз билан бу қасидани ўқыйди:

*Либос карвони билан жўнадим Сейистондан...*

Шеърни яхши тушунадиган ва ўзи ҳам ёзиб юрадиган амир бу қасидага лол қолганини айтади. Амид Асад: “Эй, олампаноҳ, сабр қил, ҳали бундан ҳам яхшироғини эшитасан!” – дейди.

Шундан сўнг Фаррухий ўрнидан туриб, дашт ҳақидаги қасидасини ўқиб беради. Амир қаттиқ ҳайратга тушади ва Фаррухийга қараб дейди: “Минг тойчоқ олиб келишган. Сенга ихтиёр бердим, сен Сейистонийсан, қанча тутсанг ўзингники бўлади!”.

У ташқарига чиқади, бошидан салласини олиб, ўзини от уюрига уради, бир гала тойчоқларни олдига солиб дашт томон қувиб кетади. У ўнгу сўлга югурап, тойчоқларни тинимсиз қувар, аммо бирортасини ҳам тута олмас эди. Охири ўрда ёнидаги вайронга работга дуч келади. Тойчоқлар ўзларини работ ичига уришади. Фаррухий қаттиқ чарчагани учун боши остига салласини қўйиб работнинг йўллагида қаттиқ уйқуга кетади.

Тойчоқларни санашса, улар қирқ иккита экан. Буни амирга хабар қиладилар. Амир роҳат қилиб кулади, сўнг таажжубланиб дейди: “Толеи кулган киши экан! Унга ҳамма тойчоқларни беринглар! Уйғониши билан менга хабар беринглар!”

Эртаси қуёш чиқиши билан Фаррухий уйқудан туради. Амир ундан олдинрок уйғониб, бомдод намозини ўқиб бўлган эди. У Фаррухийни қабул қилиб, меҳрибонликлар кўрсатади. Амир Фаррухийга ясатилган от, иккита чодир, учта хачир, бешта қул, кийиш учун лиbos ва гилам инъом қиласди. Унинг хизматида Фаррухийнинг ишлари юришиб кетади ва аъло даражага етади.

Бу тафсилотлар Чингизхон босқинидан олдинги чағониёнликларнинг ҳаёти уларнинг қандай умргузаронлик қилганини бир кўз олдингизга келтиришингиз учун баён этилди.

Умуман, чағониёнликлар қандай одамлар бўлишган?

Муаллифи аниқланмаган, 982 йили ёзилган “Худуд ул-олам” китобида: “Чағониён” – (бир) обод ноҳия, (бироқ) катта ноҳия, экинзорлари кенг. Дехқонлари ишчан, ноз-неъматлари кўп. Одамлари жанговар ва ботир. Бу ноҳиянинг ҳавоси яхши, ери ҳосилдор ва сувлари шифобаҳш, у ерда йилқи боқилади, чакмон, гилам-тўшак ва кўплаб зафарон тайёрланади. Бу ноҳиянинг подшоси мухторият (хукуқига эга) ҳокимлардан ҳисобланади ва уни Чағониён амири дейдилар!”, деган маълумот бор.

Яна шу китобдан: “Чағониён – катта шаҳар, тоғ этагида жойлашган. Ушбу ноҳиянинг бош ва марказий шаҳри, Оқар сувли ва хуш ҳаволи бир жой, одамлари дарвеш”.

Шоир Меликул Ханжаровнинг Шоҳ Машраб билан Сўфи Оллоҳёр ҳазратларининг Чағониёнда дийдорлашгани ҳақида алоҳида тадқиқоти эълон қилинди. Бунга мен заррача шубҳа қилганим йўқ. Чунки иккалалари ҳам Ҳак дийдорига етишган валиуллоҳлар эди.

Манбаларда Мавлоно Яъкуб Чархий ҳазратларининг бир муддат Деновда яшаганлари ҳақида маълумотлар бор.

Денов яна шундай шону шавкат билан эсон-омон XXI асрга қадам қўйди. Донишларнинг айтишича, ҳар қандай азamat дараҳтнинг бўйи унинг томирига баробар бўлар экан. Деновнинг бугунги салобатини ҳам унинг қадимий тарихи билан изоҳлагим келади.

Тоғнинг устида турган одам унинг юксаклигини ҳис қилмагани сингари, Деновда яшайтган киши бу шаҳарнинг ноёблигини доим ҳам англаб етавермайди. Унга бошқаларнинг кўзи билан ёки четдан туриб қараш керак, шунда у бутун салобати ва бекиёслиги билан намоён бўлади. Мен бу ҳақда кўп ўйлаганман. Биласизми, Деновда аллақандай жозиба бор, кўп кузатувлардан сўнг бунга иқрор бўлганман. Унда нопок, номард, ёлғончи одамнинг иши юришмайди, амал-тақал қилган тақдирда ҳам топганида барака, турмушида ҳаловат бўлмайди, яхши одамни эса Денов бошига кўтаради.

Мамлакатимиз истиқоли қадимги Чагониён – Деновни ҳам катта йўлга олиб чиқди. Кун сайин бу ерда тараққиётнинг ёрқин изларини кузатасиз. Енгил машиналарнинг кўплигидан ҳатто йўллар ҳам торайиб қолаётганга ўхшайди. Мустақиллик шарофати билан тадбиркорликка йўл очилган қисқа пайт ичидаги шундай иморатлар қурилдики, шўро замонида уларни орзу ҳам қилиб бўлмас эди.

Сурхандарё вилоятидаги бирдан-бир машина бозори Деновда жойлашган. Бу ерда ҳатто Фарғона водийсидан келган харидорларни ҳам учратиш мумкин.

Жамоа хўжалиги раислигидан катта жамоат арбобига айланган Ўзбекистон Қаҳрамони Иброҳим Файзуллаевни нафақат Сурхондарёда, балки Ўзбекистонда ҳамма билади. 300 бош қорамоли бор “Лочин” фермер хўжалиги 100 та иш ўрни яратди. Бу хўжаликда ғалланинг ҳосилдорлиги 90 центнерни ташкил этса, пахтанинг ҳосилдорлиги аллақачон 60 центнердан ошиб кетган. Рентабеллилик даражаси эса 90 фоиз. Бундай кўрсаткични қишлоқ хўжалиги энг тараққий этган биронта мамлакатдан топа олмайсиз.

“Бор мақтанса топилур”, деган мақол эса Аҳмад Нарзуллаев сингари одамлар ҳақида бўлса керак, чунки бу қаҳрамон фермернинг юргдошлари, ҳамкишлоқларига кўрсатган ҳимматни бир-бир тилга оладиган бўлсан, ҳар қандай одамнинг ақли шошади. Шунинг учун ҳам вилоят, мамлакат миқиёсидағи энг катта совринлар ҳеч адашмасдан Аҳмад Нарзуллаевни топиб олади.

Юқорида Чагониён амири Абдулмузаффар Чагонийнинг назмни яхши тушуниши ва ўзи ҳам гўзал шеърлар ёзишини эслаган эдик. Буни қаранг-ки, бу анъана давом этмоқда. Бугун зиёлилар орасида “Денов адабий муҳити” деган ибора эҳтиром билан тилга олинади.

Сафар Кокилов, Чоршанби Дехновий, Хуррам Раимов, Искандар Музазифарзода, Холбиби Эргашева кабилар Деновнинг таниқли ижодкорлари бўлса, Фарида Тошпўлатова, Дилрабо Норқулова Зулфия мукофоти совринини қўлга киритган ёш истеъдодлардир.

Яқинда бутун умрини Далварзинтепа билан Холчаённи ўрганишга бағишилаган академик Эдвард Ртвеладзе билан археолог Баҳодир Турғунов Деновга келишди. Қизғин сұхбатларнинг бирида Деновнинг ўтмиши милоддан аввалги III асрга бориб тақалиши, балки, ундан ҳам қадимиюроқ эканлигини далиллар билан исботлаб беришди.

Зотан, мамлакатимиздаги ҳар бир гўша, хусусан, ўтмиши қадим Деновга ҳам бундай тўйлар муносибидир. Чунки тарихий хотира келажакнинг метин пойдевори эканлиги бугун ҳаммага аён ҳақиқатдир.



*Сирожиддин САЙЙИД*

Ўзбекистон халқ шоури. 1958 йилда тугилган. Тошкент давлат университетининг (ҳозирги ЎзМУ) журналистика факультетини тамомлаган. “Қалдиригочларга бер айвонларингни”, “Яшасин ёмғирлар”, “Диг фасли”, “Сўз йўли”, “Бугдойбўй Ватан”, “Юз оҳ, Заҳирийдин Муҳаммад Бобур...” сингари шеърий ва бадиий публицистик китоблари нашр қилинган.



## **Тун била тонг**

### **Тўртликлар силсиласи**

*Менинг фироқиму онинг висоли тун била тонг.*

**Алишер НАВОИЙ**

\* \* \*

Одамзот ҳаёти жон ва тандадир,  
Тан қанда – жон анда, Ватан андадир!  
Ёру диёrsиз, лек, хордир жон ва тан,  
Тан – Ватангага тандир, жон – Ватандадир!

\* \* \*

Не сирлар тонг ичра ё шом ичрадир,  
Инсон замон ичра, айём ичрадир.  
Токи айланаркан фалак косаси,  
Умринг бир пиёла ё жом ичрадир.





\* \* \*

Ўзингдан ўзингга назарлар қилгил,  
Ўзингни енггину зафарлар қилгил.  
Бир буюк сафардир асли ҳар кунинг,  
Ўзингдан ўзингга сафарлар қилгил.

\* \* \*

Бир томчи атирга ўралган санам,  
Тун икки томчидир – бир томчиси шамъ.  
Сенга тутқазганим – шамъ соясида  
Бир гул япроғиу бир томчи шабнам.

\* \* \*

Кўзлар қаро эди, кечалар қаро,  
Кездим узун-узун мижгонлар аро.  
Жайронлар ҳолимга ҳайрон боқдилар,  
Охир қолиб кетдим ҳижронлар аро.

\* \* \*

Ҳазрат Заҳириддин Мұхаммад Бобур,  
Ҳасрат, Заҳириддин Мұхаммад Бобур.  
Сиз буюк хилқатсиз, ҳикматсиз буюк,  
Ҳайрат, Заҳириддин Мұхаммад Бобур.

\* \* \*

Самарқанд – мозийнинг улуғ дарсидай,  
Мангу шон-шавкатинг қутлуғ васлидай.  
Минорлар ортидан гумбазлар келар  
Соҳибқирон бобо дубулғасидай.

\* \* \*

Ерга бир ёнар тош – бир хатар тушди,  
Фарқи йўқ кеч пайтми ё сахар тушди.  
Олис самолардан сенга, эй, инсон,  
Буюк хавф-хатардан бир хабар тушди.

\* \* \*

Айланар давр ила айём косаси,  
Ҳар кунинг умрнинг бир жом, косаси.  
Кўнглинг пиёласи синмасин ҳаргиз,  
Кўлингдан тушмасин Хайём косаси.



\* \* \*

Тун била тонг ўтди, субху шом ўтди,  
 Умр айланур бир мисли жом ўтди.  
 Бу маълум ва номаълум фалак остида  
 Кимдир ном қолдириб, ким гумном ўтди.



\* \* \*

Кўнгил гоҳи қуёш, гоҳ мунглуғ ойдир,  
 Гоҳи тошқин дарё, гоҳ сокин сойдир.  
 Тун-кун ўтар бундан ҳасрату шодлик,  
 Кўнгил тун-кун очик карвонсаройдир.

\* \* \*

Отабек, кетдингиз айта-айта, бек,  
 Бу миллат туғилди қайта-қайта, бек.  
 “Ўткан кунлар”нику ўқиб турибмиз,  
 Ўтмаган кунлари қайда, қайда, бек?

\* \* \*

Азалий йўлидан дунё равондир,  
 Бу кўхна работу кўхна айвондир.  
 Икки эшик аро беш кунлик йўлда,  
 Инсон ҳайрондиру инсон сарсондир.

\* \* \*

Икки қошу, икки зулфу икки хол,  
 Икки қаттол, икки баттол, икки зол,  
 Икки қилич, икки сиртмоқ, икки ўқ,  
 Икки кўздин топгум охир мен завол.

\* \* \*

Бойчечак унибди, армонинг шудир,  
 Интизор ҳар кунинг, ҳар онинг шудир.  
 Давру давронингга рангу рўй бериб,  
 Баҳор келибдими давронинг шудир.

\* \* \*

Бир юлдуз бу оқшом жомингга тушди,  
 Бир ҳадик жон ила шомингга тушди.  
 Бехабар бўлмагил, эй, сен бехабар,  
 Бир хабар ул сенинг номингга тушди.



\* \* \*

Гул фасли – не титрок Гулбадандадир,  
 Сен гул ишвасин кўр, гул, бадандадир.  
 Нозик ҳарир ичра оқ гул кўрингай,  
 Бадан гулдами ё гул бадандадир?

\* \* \*

Шафаклар ранг олмиш талошларимдан,  
 Дил тубига ботган қуёшларимдан.  
 Кўнгил ёнар тошдай сув бўлди тунлар,  
 Шабнамлар дарс олди кўзёшларимдан.

\* \* \*

Хотирот йилларнинг такрорлигидай,  
 Олис кўчаларнинг бедорлигидай.  
 Бир шаҳар қолмишdir йироқларда ёр,  
 Олис севгимизнинг ёдгорлигидай.

\* \* \*

Қуёш ичиб бўлгач фалак жомидан  
 Аста тушиб кетди осмон томидан.  
 Худойим ҳар оқшом эслатур сенга  
 Айём анжомидан, умр шомидан.

\* \* \*

Кимнингдир кўксида кўмирлар ўтди,  
 Эй, дил, боғларингдан қумрилар ўтди.  
 Фасллар кечдилар бир дўст ҳажрида,  
 Бир сўз хижронида умрлар ўтди.

\* \* \*

Яна хуш келибсан такрор ва такрор  
 Менинг кўксимдаги боғларга баҳор.  
 Кўнглингга олмагил, унда доғларга  
 Айланган андалиб, қумриларим бор.

\* \* \*

Она, дардларингиз, ташвишларингиз  
 Барин айтиб берса болишларингиз,  
 Мен ўғил бўлдимми – мендан-да қўпроқ  
 Сизга хизмат қилмиш калишларингиз.



\* \* \*

Дилга элтар йўллар менинг йўлимдир,  
 Дарди бор ҳар кўнгил менинг кўнглимдир.  
 Муштипар ҳар аёл онамга ўхшар,  
 Кўнгли ярим ҳар қиз менинг синглимдир.



\* \* \*

Менинг дафтарларим – заъфарондирсиз,  
 Мунглуг қўнглим ёзган дастурхондирсиз.  
 Онам хаёлидай зору музтариб,  
 Онам хотиридай паришондирсиз.

\* \* \*

Оlam яралгандай такрор янгидан,  
 Баҳор ранг талашур гуллар рангидан.  
 Тириклик ногаҳон янграб кетгайдир,  
 Лола жарангидан дил жарангидан.

\* \* \*

Мен – даштлардан кетган даштнинг боласи,  
 Бағримда соғинчлар доғи, жоласи.  
 Ҳар бир чечагингга суйкалай, баҳор,  
 Мен – фироқ лоласи, ҳижрон лоласи.

\* \* \*

Биронни соғинмай яшамоқ оғир,  
 Соғиниб яшамоқ ундан-да оғир.  
 Бу ҳам етмагандай, уч кундан бўён  
 Ёмғиру ёмғир. Ёмғиру ёмғир.

\* \* \*

Эй, дил, саволинг ҳам хитобингдаман,  
 Ҳар лаҳза минг ранжу азобингдаман.  
 Бир умр мен сенинг орtingдан чопдим,  
 Бир умр мен сенинг шитобингдаман.

\* \* \*

Вақтнинг тандири – тун била кундир,  
 Кимдир ўт бўлса гар, кимдир тутундир.  
 Кимдир бағри бутун, ким – кўнгли ярим,  
 Бу мангу оловда барча ўтиндир.



\* \* \*

Тунлар айландилар, кунлар эврилди,  
Энг гўзал онларим елга соврилди.  
Кўнгил гули сўлди айриликлардан,  
Менинг оҳларимга булбул қоврилди.

\* \* \*

На тонгдир, на шомдир бу фасл номи,  
Ғуборга чулғанмиш юлдузли томи.  
Бир ёни тумандир, бири ёни – гумон,  
Синиқ заркосадай ярим ой жоми.

\* \* \*

Бу – манзил-маконинг, дала-даштингдир,  
Умр – беш кечалик сайру гаштингдир.  
Бошиングдан кечгани – туш билан хаёл,  
Дилингдан кечгани – саргузаштингдир.

\* \* \*

Дўстлар, бир замонлар биз тўргай эдик,  
Зангор самоларга ўзни урғайдик.  
Осмонда тупроқни соғиниб, ерда  
Самони соғиниб бизлар улғайдик.

\* \* \*

Арузий, самовий ҳар ғамингдаман,  
Тонг чоғи баргдаги шабнамингдаман.  
Шивирларинг келар фазо қаъридан,  
Эй, дил, ерга тушгил, мен заминдаман.

\* \* \*

Олис болаликда қолган қайрагоч,  
Эй, Сирож, бир лаҳза қабоғингни оч.  
Сени елпиб туарар бир жуфт мусича,  
Сенга сув томизгай бир жуфт қалдирғоч.

\* \* \*

Сенинг излаганинг ўшал ердадир,  
Ўзлигинг ўшалдир, ўшал ердадир.  
Сен – ўшал ердирсан, ўшал ер – сенсан,  
Ўшал ер сендаю ўшал ердадир.



\* \* \*

Хайрли тун сенга, қирмиз қуёшим,  
Фақат күнгил бўлди менинг талошим.  
Борган сари чойим лоларанг ўлмиш,  
Борган сайин қизғиши тус олмиш ошим.



\* \* \*

Баҳор бўлгайдирсан, қиши бўлгайдирсан,  
Шундай азоб чекиб иш билгайдирсан.  
Устоз демишларки: Рустам Мусурмон,  
Лойинг пишиб-пишиб ғишт бўлгайдирсан.

\* \* \*

Қушлар ишқ боғидан кўчиб кетгайлар,  
Тушлар ёдимииздан ўчиб кетгайлар.  
Бир тонг сенинг ҳам оқ шиппакларинг, ёр,  
Бир жуфт кабутардай учиб кетгайлар.

\* \* \*

Ватан матонатдир, шижаот – Ватан,  
Бутун эл тиклаган иморат – Ватан!  
Үйғоқ күнгиллару беором қалблар,  
Бедор юраклардан иборат Ватан!

## ҲУКМАТ

**Дунё (юрт) ободлиги тўртта  
нарса сабабидан: раҳбарлар аго-  
лами, олимлар илми, бойлар са-  
ховами, мухтоҷлар дуоси.**

**Абу Ҳомид ал-ҒАЗЗОЛИЙ**



### *Кулман ОЧИЛ*

1957 йилда түгилган. Тошкент давлат университетининг (ҳозирги ЎзМУ) журналистика факультетини тамомлаган. “Жайдари фалсафа” ҳикоя ва очерклар тўплами нашр этилган.

## ИККИ ҲИҚОЯ

## **САВДО**

Риэлторлик компаниясининг агенти – Жўра бошлиб келган навбатдаги эр-хотин харидорлар жуда маҳмадона экан. Етти қаватли уйнинг иккинчи қаватида жойлашган тўрт хонали квартирини обдон кўришиди, текширишиди. Уларнинг хатти-харакатларини юрак ютиб кузатиб турган уй эгаси – Сафар лабларини бот-бот тишлашдан ўзини тия олмади. Кўрган кунинг курсин, дейдиган одам йўқ.

Эрга, қалин кулранг свитери, чоклари ситилиб кетгудай таранг тортилган қора жинсиси янада семиз кўрсатиб турган калтабақай ва тепакал йигитга гўё ҳамма нарса маъкул бўларди:

- Полининг паркетлиги яхши, – деди у пишиллаб.
- Яхшию, лекин ғичирлар экан, – қўшиб кўйди хотини.

Қомати шамшоддек тик, ҳаракатлари дадил, қора соchlари эркакларни кидек калта кузалган, кўzlари катта-катта, қизғиш кўйлаги ўзига ярашган бу чиройли аёлда ўн йигитнинг ғайрату шижаоти борлиги сезилиб турарди.

– Мижозларга маъкул бўлмаслиги мумкин. Биласиз-ку, европаликлар инжиқ бўлади.

“Маҳмадонагина экан, – ўйлади Сафар. – Европаликлар инжиқ бўлишини айтиши шартмиди?”

Иддаоси аён. Демоқчики, кўриб қўйинг, ақа, биз чакана одамлар эмасмиз. Уй-жойимиз, мол-дунёмиз бисёр. Сиз сотиш учун илҳак бўлиб, юз-кўзимизга жавдираб турганингиз мана шу квартирангизни биз кириб яшаш

учун эмас, бирор чет элликка, иложи борича, тоза-озода, пулдор бирор европаликка ижарага бериш учун оляпмиз. Шу замонда ақлли одам уйжойини кўпайтиради. Уй ҳам пулни банд қилиб туради, ҳам дурустгина даромад олиб келади. Беташвиш ва беғалва бизнес. Пулни пул топади. Буни Сафар ҳам яхши билади. Сафар ҳам бу дунёга кеча келгани, ё осмондан оёғини осилтириб тушгани йўқ. Майли, сингил, омадларингни берсин. Фақат, қўлинг пул кўриб, сал шошилиб, ҳовлиқиб қолганга ўхшайсан-да. Шуниси чатоқ. Шунисига ачинасан, киши. Қўй кўрмаган қўй кўрса, қувақува ўлдирап. Охири баҳайр бўлсин, ишқилиб!..

– Ёғочдан ясалган ҳар қандай полнинг баъзи жойлари ғирчиллаши табиий, – эътиroz қилган бўлди Жўра. – Қалинроқ гилам тўшалса, ғирчиллагани умуман сезилмайди.

Аёл Жўранинг гапига жавоб қилмади. Даллол билан тортишиб ўтиришни ўзига эп кўрмади, шекилли. Кулранг жемпери ориқ елкасида осилиб турган, ҳали қирқقا кирмаган бўлса-да, юзини қалин ажин боса бошлаган Жўра уй эгасига қараб, “тапирсангиз-чи” дегандек имо қилди. Сафар ерга қаради. Даллол ўтган куни Сафарга қаттиқ танбех берган эди: “Ака, сиз харидорнинг олдида муллаваччага ўхшаб соме бўлиб турманг. Тортинманг! Уйни мақтанг. Нима? “Алдаш қўлимдан келмайди?” Ё, тавба! Мен сизга бирорни алданг деганим йўқ-ку. Сиз борини айтинг”. У бармоқларини навбати билан букиб, санай кетди: “Уйингизнинг шаҳар марказида, метронинг биқинида жойлашганини, деворлари қишида совуғу ёзда жазирамани қайтариши мушкул бетондан эмас, қулинг ўргилсин пишиқ ғиштдан эканини, маҳсус лойиҳа бўйича курилганини айтинг. Ишонмаса, мана, балконни кўрсатинг: балкон эмас, стадион! Эни – иккию қирқ, узунлиги – нақд ўн тўрт ярим метр. Бемалол футбол ўйнаса бўлади, денг. Гапимга ишонинг, ака, шаҳарда бунақа кенг, бунақа пишиқ-пухта қурилган уй кам. Қўни-қўшнингиз жамиятнинг энг сара гуллари, – шу жойга келганда Жўра сийрак қошларини айёrona учириб туширди ва ишшайди. – Киборлар – элита эканини айтинг. Раҳматли қайнотангиз академик бўлганини ҳам қистириб ўting. Уялманг. Тагингизда, биринчи қаватда – истеъфодаги генерал, рўпарангизда – профессор, тепангизда катта бизнесмен, катта амалдор яшашини bemalol писанда қилаверинг. Уйнинг атрофи темир панжара билан ўралгани-ю, дарвозасида коровул туришини, тўғри келган қаланғи-қасанғи ичкарига кира олмаслигини айтишни ҳам унутманг. Буларнинг ҳаммаси пул, ака, пул! Нархини оширади. Оғзингизга толқон солгандай сўппайи-иб турсангиз, уйингизни тўрт кило пиёзнинг пулига ҳам сотолмайсиз!..”

– Ҳаммомнинг кафелини устаси фаранг терган экан, – деди эр. – Текислигини қаранг. Қойил!

– Устаси фаранг терганми ё устаси булғор, билмадим, лекин кафель саветский, майдалигини кўрмаяпсизми, – деди аёл ҳаммомга менсимайгина назар ташлар экан. – Ҳозир ўзимизда, Ўзбекистонда бундан минг баробар чиройлилари чиқиб кетган. Бунинг ранги ҳам қорамтири, маллами-ей... Чироқнинг каттароғидан осишга тўғри келади. Бу ҳам қўшимча харажат.

“Ўткир экан! – деб хаёлидан ўтказди бу гал Сафар. – Бир тийиннинг устида ўмма туради! Манави қоринбойнинг бахти-да. Қизик, хонларга хотин бўлишга арзидиган бу гулни юз кило гўштга ким, нима мақсадда қўшиб қўйди экан? Бирор корчалоннинг арзанда ўғлимикин? Ё синглимиз ўтирганни – ўпок, турганни – сўпок, деб инжиқлик қиласвериб, вақти-соатида эрга теголмай, қариқиз бўлиб қолганидан кейин ноилож шу қоринбойнинг этагидан тутдимикин?.. Нима бўлганида ҳам, укамиз гўшангага кирган кечаси жиловини хотинининг қўлига ўз ихтиёри билан тутқазгани аниқ. Шундай қилмаса, бундай ўктаам аёл билан яшашнинг ўзи бўлмайди”.

Кейинчалик Сафар уйига харидор бўлиб келган бу икки киши ҳақида хаёлидан кечган ҳар хил шубҳа-гумонлару тахминлардан узоқ йиллар ўзи уялиб, хижолат чекиб юради. “Нима қиласай, ўша кунларда кўзимга ҳеч ким, ҳеч нарса кўринмас, фикру зикрим фақат уйни сотишда эди, – деб ўзини оқлади у. – Лекин, ичимдагини сиртимга чиқарганим, қилиғини ёқтирганимни ўзларига сезидирганим йўқ”.

Булар кейинчалик бўлган гаплар. Шу топда эса Сафар ўз хотинини – мудом эрининг соясига кўрпача тўшашга тайёр, қош-кўзи қоп-кора, юзидан табассум аримайдиган мулойимгина аёлни эслади. Уни соғинганини ҳис қилди. “Манави овқатни еб олинг, дадажониси. Манави кийимингизни кийиб олинг, дадажониси, кўча бугун сал салқинроқ. Пайпоқларингизни дазмоллаб, жойига тахлаб қўйдим, дадажониси...” Йўқ, Сафар, ҳар куни ўн кило тилло туғиб берса ҳам, мана бу хонимчадай ҳукмдор аёл билан бирга яшай олмаган бўларди. Эр амри – вожиб. Эр хотинининг соясига айландими, тамом, рўзғордан барака қочади.

– Ошхонаси тоза-озода экан! – деди эр. – Газ плитанинг ялтирашини қаранг! Келинойимизнинг баҳоси – “беш”!

– Ялтирагани яхшию, лекин бу плитанинг заводдан чиққанига камида йигирма йил бўлган, – деди хотини. – Чақмоқ тоши йўқ. Олов ёқиши учун ҳар гал гугурт чақиши керак... Мижозларга бу ҳам маъқул бўлмаслиги аниқ. Демак, янги газ плита олишга тўғри келади...

Сафар эр-хотиннинг бу алфозда уй кўришини нимага ўхшатишини билолмай турган эди. Ёдига тушиб, мийифида кулди. Аёл – янги қурилган обьектни қабул қилиб олаётган нуфузли комиссиянинг раиси, эри – унинг котиби. Раис обьектнинг кам-кўстини топиб айтади, котиб йўғон бўйнига қўшилиб кетган кичкина бошчасини иргаб маъқуллайди. Ўнгайсизгина илжаяди.

Ётоқхонада дераза ойнасининг бир қавати сингани, роми пластик эмас, ёғочлиги, болаларнинг хонасида эса деворларга “ажи-бўжи” расмлар чизиб ташлангани ҳам “комиссия”нинг назаридан четда қолмади.

– Булар майда-чуйдага ўхшаб кўрингани билан мижозларнинг ғашига тегиши аниқ, – деди “раис”. – Тўғрими, Жўрабек?

Жўранинг жони кирди. Квартира сотилса, унга пулнинг уч фоизи тегади.

– Ижарага қўймоқчи бўлсангиз, келинойи, – деди даллол. – Мен сизга чет элликнинг кўнгли кенгроқ, пули мўлроғидан топиб бераман. Ташвиш чекманг!..

Эр-хотиннинг “қилдан қийиқ топиб” “гулдай квартира”ни ерга уриши Сафарнинг жонини ҳалқумига келтирди. Бошқа пайт бўлганида “Бор-ей, тошингни тер! Сенга сотадиган уйим йўқ”, деб иккаласини ҳам ҳайдаган бўларди. Аммо ҳозир ҳаммасига чидашга мажбур: уйни кўтарган нархига тезроқ сотиб, пулини қўлига олиши билан шаҳарнинг четроғидан арzonроқ бошқа квартира харид қилиб, қолганини қўлтиқлаб опасининг олдига югуриши керак. Икки буйраги ҳам ишдан чиқиб, беш ойдан бери диализда жони узилай деб ётган жияни Жавоҳирни кутқариши керак.

Кўриш навбати меҳмонхонага келганида гўё мўъжиза рўй берди: аёл ҳайқириб юборди:

– Вой-бў-ўй!.. Китобларнинг кўплигини қара-анг!..

Аёл бутун деворни – полдан шифтгача эгаллаган жавонлардаги рангбаранг китобларни катта ҳайрат ва ҳавас билан тирноқларига тўқ қизил лак суртилган дўмбоққина қўлчалари билан силаб-сийпаб томоша қила бошлиди.

– Шу китобларнинг ҳаммасини ўқиганмисиз, Сафар ака?

– Китобни олиб, ўқимаслик – гуноҳ.

– Орасида мабодо Ўқтам Усмоновнинг “Гирдоб” романи йўқми?

– Бор. Нима эди?

– Бир куни телевизорда роса мақташди. Бирорта ҳам китобини ўқимаган эканман.

– Бошланди, – деди эри. – Уй кўрди тугади!

– Таниш-билишларим, магазинлардан суриштириб, тополмадим. Менга ишонсангиз, ўқиб чиқишим билан қайтариб берардим...

– Бемалол...

Сафар жавондан қалингина қўқ китобни олиб, аёлга тутқазди.

– Нози, сен бу ерга китоб ўқигани келганмисан ё уй кўргани? – деди хотиннинг ҳаракатларини норози қузатиб турган эри. – Тавба! Китобни кўрса, ўзини томдан ташлайди-я бу хотин!

– Ташласам нимаси ёмон, Собир ака?

– Ёмон жойи йўқ, – деб тўнғиллади эр. – Лекин ҳар ишнинг ўз вақти-соати бор-да.

– Сафар ака, кечирасиз, Юлдуз опам ҳозир қаердалар? – деб сўради аёл.

– Қайси Юлдуз опангиз? Хотинимми? – ҳайрон бўлди Сафар.

Аёл ширин жилмайди. Жилмайиш асносида унинг юзи ғоят мулойим тортиб, янада чиройли бўлиб кетар экан. У тасдиқ маъносида бош ирғади.

– Қорақалпоғистонда. Кеча “Саломатлик поезди”да Нукусга жўнаб кетди. Нима эди? Сиз Юлдузни қаердан танийсиз?

Аёл унга бир парча қоғоз узатди:

– Китобнинг орасидан чиқди.

*Менинг қўлим етмаган юлдуз,  
Тушларимда сени кўргайман.*

Сиёҳли ручка билан ёзилган ушбу сатрлардаги “юлдуз” сўзининг тагига чизилган эди.

– Сиз ёзганимисиз шу хатни?

– Ҳа-а! – деб кулди Сафар. – Ёшлик йилларимизнинг шўхликлари-да. Китоб ҳам келинойингизники. Юлдуз шифохонада амалиёт ўтаб юрганида раҳматли Ўқтам Усмонов ўз кўли билан дастхат ёзиб берган. Қаранг, ўчиб кетмагандир?

– Йўқ, мана! “Барча орзуларингиз ушалсин! 1990 йил”. Демак, китобни ўқиб, албатта қайтариб беришим шарт экан.

– Балли! Йўқса, келинойингиздан бошим балога қолиши аниқ!

– Иккалантгизнинг ҳам хотиндан омадингиз келган экан, – деб кумуш тишларини кўрсатиб кулди эшик кесакисига суюниб турган Жўра. Бу гапни у киноя билан айтдими ё ҳавас билан, ҳеч ким эътибор бермади. – Қойил!

– Нозима, уйни кўрайлик, ахир! – деди Собир бетоқат бўлиб. Чамаси, унинг рашки кела бошлаган эди. – Китобхонлар конференциясини бошқа пайт ўтказарсан!

– Уй менга маъқул! Всё! Оламиз! – Нозима ўзини юмшоққина оромкурсига ташлади. – Нархини келишинг!

– Худога щукр-ей! – деди эри унинг ёнидаги курсига чўкар экан. – Уч ойдан бери оёғимда оёқ қолмади-я! Қани, Сафар ака, энди нархидан гапиринг. Қанча деяпсиз ўзи?

“Рахмат, Ўқтам ака! Минг раҳмат! – деб пицирлади Сафар. – Охиратингиз обод бўлсин! Шу ишларим эсон-омон ҳал бўлиб, мушкулларимизни осон қиласа, бир эмас, икки томлик китобингизни ўзим чиқарганим бўлсин!..”

– Нега ўйланиб қолдингиз, ака? Нархини сўрайяпман!

– Жўра айтмадими? – сўради Сафар харидорларни чўчитиб юборишидан хадиксираб ва савол назари билан даллолга қаради. Жўра “дадилроқ бўлинг” дегандек, бош иргади. – Нархи – эл қатори...

– Қанча? – деб сўради Нозима.

Аёлнинг овози ҳам, шахти-шиддати ҳам анча мулойимлашиб қолган эди.

– Бир юз эллик.

– Бир юз эллик? Ҳазиллашаяпсизми, ака?

– Унақа одатим йўқ, – деди қизариб Сафар. – Лекин дуппа-дуруст уйни тўрт кило пиёзнинг пулига олиб бўлмаслигини ҳам биламан.

– Сиз қизишманг, ака, – деди жилмайиб Нозима. – Савдода қизиққонлик кетмайди. Мижоздан айриласиз.

“Ақлли экан, – деб ўйлади Сафар. – Ўзига ром қилишниям биларкан. Узоққа боради”.

– Қизишаётганим йўқ.

– Унда нархини сал келиштиринг, – деди Собир. – Олайлик. Бизнинг пулимиз тайёр. Хоҳласангиз эртагаёқ санаб беришимиз мумкин.

– Мен ўзимнинг сўзимни айтдим. Энди навбат – сизга.

Эр хотинига қаради.

– Юз, – деди аёл.

Сафарнинг “Худога шукр-ей!” деб юборишига сал қолди. Чунки беш ойдан бери бирор харидор тўқсондан ошмаган эди. Тўқсонга берай, деса, операцияга, йўл харажатлари, квартирага етмайди. Ҳиндистонга бориб, операция қилдириб келишнинг ўзи бўладими?

– Ука, ўзларинг мол-дунё кўрган палаги тоза одамларга ўхшайсизлар, – деди Сафар ичидаги ҳаяжонни босишга ҳаракат қилиб. – Келинглар, бозордаги чайқовчиларга ўхшаб ортиқча тортишиб, майдалашиб ўтирамайлик.

“Палаги тоза” деган мақтov Нозимага мойдек ёққани сезилди. Жойидан бир кўзғалиб олар экан, Сафардан:

– Ўзингиз нима иш қиласиз, ака? – деб сўради.

– Мен босмахонада ишлайман. Инженерман. Сизлар-чи?

– Бу ноёб китобларнинг ҳаммаси дехқончилик экан-да? – деди Нозима. – Қарийб ҳамкасб эканмиз. Мен ҳам бир пайтлар газетада мухбирлик қилганман.

Сафар “Қайси газетада? Қачон ишлагансиз?” деб сўрагиси келди, лекин сўрамади. Шу топда бу эрка хонимнинг таржимаи ҳолини билишдан кўра уйни сотиши мухимроқ.

– Бизнинг ўз бизнесимиз, дўконларимиз бор, – деди Собир.

– Баракалла! Энди бундок қилайлик: сизлар нархни секин-аста қўтаринглар, мен эса туширай. Қарабизки, муросаи мадора, деганларидек, бир қарорга келамиз. Хўпми?

– Хўп. Ана, бир юз беш! – деди эр.

– Собир ака, бунча тез!

– Сен жим тур, Нози!

– Ўтган ҳафта Сафар ака бир харидорга юз йигирмага ҳам бермаганлар, – гап қўшди Жўра.

Бандасининг мушкулини осон қиласан деса, жавонда йигирма беш йилдан бери турган китобу етти ёт бегона даллолнинг беозор ёлғони ҳам иш бераверар экан: бир юз ўттизга савдо пишди.

Жўра ҳужжатларни тўлдиришга киришди.

– Қанча бай пули берасизлар? – деб сўради у харидорлардан.

– Қанча бериш керак?

– Беш фоизини, – деди Жўра ва Сафарга қараб муғамбirona кўз қисиб қўйди.

Аёл тасмаси тилларанг қизил сумкачасидан пул чиқарди. Сафар ундан бай пули олгани ҳақида тилхат ёзиб берди. Икки эркак қўл ташлашди: баракасини берсин!

Жўра никоҳни қайд қилаётган ЗАГС ходимиdek, огохлантиришга тушди: “Уй-жой олди-сотди қоидасига биноан Сафар ака уйни сизга шу келишилган нархга сотишдан бош тортса, олган бай пулинин икки баравар қилиб қайтариб беради. Сиз квартирани олиш фикридан қайтсангиз, мана бу пулдан умидингизни узасиз. Қайтариб олмайсиз! Тушунарлим!”

– Биламиз! Худога шукр, биринчи марта уй сотиб олаётганимиз йўқ, – деди Собир.

– Узоги билан бир ҳафтада нотариуснинг хонасида учрашамиз, – деди Жўра. – Хужжатлар тайёр бўлиши билан ўзим сизга телефон қиласман...

Лекин орадан икки кун ўтгач, у харидорларга эмас, Сафарга сим қоқди:

– Ишлар чатоқ, ака. Анави икки гўрсўхта айнимоқчи!

– Қанақасига айнимоқчи? Шунча бай пули берди-ку?

– Барibir айнимоқчи! Пулни қайтариб берманг. Сизга она сутидек ҳалол.

– Тавба!..

– Бугун оқшом уйингизда бўласизми?

– Ҳа...

Сафарнинг кўз олдига одамлар елкама-елка кўтариб бораётган тобут, ортидан зор қақшаб йиғлаб қолаётган опаси, ёлғизгина опаси келди. Ароқ ичишдан бошқа ишга ярамайдиган пиёниста поччаси, отасига қўшилиб, соғ бошига сақич ёпиштириб ўтирган бетайн жияни Жавоҳир учун Сафар узатган оёғини ҳам йиғмасди. Лекин опаси учун сатаётган эди бу уйни. Ота-онасидан эрта етим қолган Сафарни шу опа ўқитган, шу муштипар уйлантирган, шу бечора аёл одам қилган эди. Сафар ўтган куни, уйнинг бай пулинни олдим, деб суюнчи олганида опаси қанча хурсанд бўлган, қанча дуолар қилган эди. Иккинчи қаватдаги квартирасига аранг чиқиб-тушиб турган, пулфланган шардек шишиб кетган Жавоҳир, синглиси, келин, опа – ҳаммаси йиғлаган эди. Қувончдан йиғлаган эди. Харидорлар айниганини эшитса, яна йиғлайди. Чорасизликдан йиғлайди. Жияни эса узокқа бормайди...

“Жавоҳирга бир гап бўлса, – деган эди опаси. – Келин уйимизда бир ҳафта ҳам ўтирамайди. Тавба деб гапирайину, кўзи ўйнаб, оёғи ликиллаб қолган, Сафаржон... Ҳам ўзини, ҳам шу икки гўдакни хор қиласди...”

Шўрлик опасининг пешонасига бир умр етим боқиши ёзилган экан-да!..

Опа ҳеч кимдан, Сафардан ҳам хафа бўлмайди. Ичидан куяди. Умри бўйи нашриётда муҳаррир бўлиб ишлаган бу аёлнинг одати шунақа: “Бандасидан хафа бўлмасликка ўрган, ука, – дейди. – Шунда яшашинг осонроқ бўлади. Аламзадалиқда яшаш – азоб...”

Кечқурун уйга яна эр-хотин, уларга қўшилиб қишининг совуғи кириб келди. Нозима узр сўраган бўлди. Мўлжаллари ўзгариб қолган эмиш.

– Инсоф қилсангиз, пулимизни қайтариб берарсиз, – деди Собир. – Ҳеч бўлмаганда ярмини.

– “Инсоф қилсангиз?” Лафз-чи? Лафз қаерда қолади, ука? – деди Сафар. – Эркак одамнинг гапи битта бўлмайдими?

– Тўғри, ака, лекин, вазият ўзгариб қолди-да! – Собир ерга қаради.

– Очифини айтами? – деди хотини. – Биз сал нарироқдан бошқа квартира топдик. Худди шундай. Нархи анча арzon. Шароити анча яхши. Бу – савдо, ака. Ҳаётда нималар бўлмайди, дейсиз.

Диванда ранги қути ўчиб ўтирган Сафарнинг хўрлиги келди. Бошидан ўтмаганнинг қошидан ўтма. Бу энағарларни уриб бўлмаса, сўкиб бўлмаса, мажбурлаб бўлмаса. У шартта ўрнидан туриб, жавоннинг ғаладонидан пулни олди.

– Мана! – деди. – Санаб олинг. Ҳаммаси!

– Сафар ака, нима қиляпсиз? – деб қичқирди Жўра. – Эсингиз жойидами? Айниса, баттар бўлсин! Пулни нега қайтариб берасиз ахир! Мана бу эркақ, айнисам, пулимни қайтариб олмайман деб сўз берган!.. Тўғрими, Собир ака? Тилингизга чечак чикқанми, гапирсангиз-чи?

– Сиз аралашманг!

– Нега аралашмас эканман? Нега?!.. Эркакмисиз ўзи?

Собир пулни олиб, ярмини хотинининг қора сумкаласига солди, қолганини стол устига қўйди.

– Йўқ! – деди Сафар. – Мен ҳаромдан ҳазар қиласан. Ҳаммасини олингда, даф бўлинг!..

– Кечирасизу, Сафар ака, нега бизни ҳақорат қиласиз? – деди Нозима. – “Ҳаром” дейсиз? “Даф бўлинг”, дейсиз. Нега ҳаром бўларкан? Биз шунча пулни бирор жойдан ўмариб келганимиз йўқ, ака. Пешона теримиз билан, заҳмат чекиб топганмиз!

– Сиз мени кечиринг, сингилжон! – Лабидан тупук сачраб кетди Сафарнинг. – Инсоннинг эти ҳаром, лафзи ҳалол. Шунақа гапларни эшитганмисиз?

– Эшитганмиз, жуда кўп эшитганмиз!

– Эшитган бўлсангиз, билиб қўйинг: лафзида турмайдиган одамнинг пули ҳам, моли ҳам ҳаром бўлади. Баракаси бўлмайди! Мен бола-чақамга ҳаром луқма едириб ўрганмаганман!

– Алам қилаётган бўлса, мана, ҳаммасини олинг, – деди Собир ва пулнинг қолганини сумкадан чиқариб, стол устига, лекин ўзига яқинроқ жойга қўйди. Сумкачанинг тилларанг тасма занжири ўртадаги стол ойнасига майданга тангалардек тўкилди.

– Сиз қизишманг, Сафар ака, – деди Нозима бирдан юмшаб. – Бу – ҳаёт. Савдода баъзан ён босишга, баъзан айнишга тўғри келади. Уйингизни биз олмасак, бошқа одамга сотасиз. Фақат сотилиши икки-уч кунга чўзилиши мумкин...

“Кайвонилардек сўлиш олиб гапиришини қаранг! Бунча ҳунарни қачон ўрганди экан бу жувон!”

– Ҳамма гап шунда-да, Сафар ака икки-уч кун кута олмайдилар-да, келиной! – деди алам билан Жўра. Унинг бўйин томирлари ўқлоғдай бўртиб кетган эди. – Жиянлари оғир ётиби. Пул жуда зарур!

Аёл эрига қаради. Эр – пулга.

– Тинчликми? Жиянгизга нима бўлган?

Сафар индамади. Халқумига оғир бир нарса тиқилган, гапирадиган ахволда эмасди. Жўрага қаради. Жўра гапирди. Ўттиз ёшли Жавоҳирга йигирма беш ёшли синглиси битта буйрагини беришга тайёр турганигача айтди.

– Уй сотилса, пул бўлади. Пул бўлса, Сафар акамнинг жияни тирик қолади, – деди Жўра. – Жавоҳирнинг икки фарзанди бор.

– Майли, бу гапларнинг сизларга алоқаси йўқ. Қизишиб кетган бўлсам, узр! Пешонада борини кўрамиз энди.

Сафар “гап тамом” дегандек, ўрнидан турди. Эллик ёшлардаги, новчагина, рангпар ва қотма бу одам шу топда ўзини қадди букилиб қолган чолдек ожиз ва нотавон сезди. Одамда омад бўлмаса қийин экан.

Аёл эрига қаради. Эри елка қисди.

– Сиздан бир нарсани сўрасам майлими? – деди Нозима.

Сафар хафсаласиз бош иргади.

– Уйингизни шундай... нима десам экан, мақсадда сотаёттганингиздан келинойимнинг, болаларингизнинг хабари борми?

– Бор. Сотиш фикри ҳам асли ўзи келинойингиздан чиққан.

– Раҳмат! – деди аёл бирдан қувониб. – Сиз бизни кечиринг, Сафар ака. Уйингизни аввал олмасак ҳам энди оламиз.

– Нозима-а! – деб қичқирди Собир. – Тутуриғинг борми ўзи? Икки кундан бери ўламан саттор, татар чолнинг квартирасини оламиз, деб бошимни қотираётган эдинг. Энди бу гапингни қандай тушунай? Калака қиляпсанми?

– Йўқ, Собир ака! – ўрнидан туриб кетди аёл. – Раҳматилла акам эсингиздами? Йигирма йил аввал акам бечоранинг ҳам куни диализга қолганида ота-онамнинг қўли калталик қилган, ёрдам беролмаган эди. Икки ўғли етим, келинойим бева қолган. Биласиз-ку, Собир ака!.. Пул топилади, одам топилмайди. Ўзингизнинг бошингиздан ўтган ташвишлар-чи?

Эр ерга қаради, тепакал бошини асабий силади. Орага оғир жимлик чўқди.

– Собир акам олий лигада футбол ўйнаганлар, – Нозима эрининг елкалирига икки қўлини қўйди. – Ўнг пайлари узилиб, олти ой қадам босолмай ётганида роса қийналганлар. Дўхтирлар ҳам ҳар хил дориларни беравериб... ишнинг баттар пачавасини чиқаришган...

– Майли, Нози, бу гапларни қўй, – деди Собир ерга қараганча. – Турайлик энди. Вақт ҳам алламаҳал бўп қолди. Сен шу уйни оламиз, десанг, мен розиман. Сен хурсанд бўлсанг, бас!..

“Хотинини ўлгудай яхши қўрар экан, – деган гап хаёлидан ўтди Сафарнинг. – Омадинг бор экан, Собир!..”

– Худо ҳоҳласа, “Гирдоб”ни нотариусга боргунимизча ўқиб тугатаман, – деди Нозима эшик томон юрар экан. Уч эркак унинг ортидан эргашди. – Сўнгги боблари қолди...

## ТЎҒРИ

Ҳасан дарслари тугаб, Қаршининг чеккасидаги автостанцияга етиб келганида қишлоғига қатнайдиган автобус аллақачон кетиб бўлган экан.

– Талабага ўхшайсан, – деди чеккароқда оқ “Нексия”га суюниб турган эллик ёшлардаги қотма киши. – Қаерга бормоқчисан?

– Шўрбозорга.

– Ўҳ-хў! Майли, беш минг бер. Уйинггача ташлаб қўйман. Ўзим Мойлижарга ўтиб кетаман. Уйинг катта йўлдан узоқ эмасми?

- Беш чақиримча бор.
- Анчагина экан. Розимисан?
- Хўп.
- Қайси институтда ўқийсан ўзи?
- Лицейда ўқийман.
- Ҳа-а.

Ҳасан орка ўриндиққа ўтирги. Елкалари осилиб турган кенг яшил пальто, каттакон қора телпак кийиб, ингичка бўйнига тугуни муштдай қизил галстук тақиб олган ҳайдовчи машинасининг олд ойнасини артишга киришди.

“Кийиниши светофорга ўхшаркан”, – деб ўйлади ўспирин ва мийигида кулиб қўйди.

- Ака, мени ҳам олиб кетинг, – деган ҳансираған овоз эшишилди.
- Қаерга борасиз? – ҳайдовчи ҳансираётган йигитга шубҳали назар ташлади.

- Еттитомгача.
- Қанча берасиз?
- Уч минг. Ўн чақирим йўл-да.
- Йўқ, камида ўттиз чақирим келади. Беш минг.
- Майли, келишдик. Кеч тушиб қолди.

Қалин қора жун каллапўшини қошигача бостириб кийган, уч-тўрт кундан бери тиғ тегмаган соқоллари оқ юзига ярашиб турган йигирма беш ёшлардаги тўлладан келган йигит олд ўриндиққа ўтирги. Тамакининг ўткир хиди димоққа урилди.

– Мен бир-иккита нон олиб чиқай, – деди ҳайдовчи. – Қаршиники – мозорбосди.

Ҳайдовчи новвойхонага қараб юриши билан йигит машинанинг фаладонини очди. Икки даста минг сўмликка кўзи тушиб, “ўх!” деб юборди. Шартта чарм курткасининг чўнтағига тиқди ва орқасига ўгирилиб, чап кўли билан Ҳасаннинг кекирдагидан олди:

– “Миқ” этсанг, бошингни сапчадай узиб ташлайман, бола! – курткасининг барини очиб, ҳаво ранг свитерининг этагини кўтарди. Шунда камариға осилган қиндан пичноқнинг қора дастаси кўринди. – Тушундингми?

Бармоқларига “Жора” деб ёзилган кўли муздан ҳам совуқ, омбурдан ҳам каттиқ экан. Нафаси ичига тушиб кетган Ҳасан бош силкиди: “Тушундим!”

– Сенга нима бўлди, йигитча? – деди ҳайдовчи Ҳасанга қараб, қора елимхалтадаги нонларни орқа ойна олдига жойлар экан. – Рангинг ўчиб кетибди? Мазанг йўқми, дейман?

– Укамиз тумов бўпти, – деди Жора ва суюнчиқнинг ёнидан қўлини ўтказиб, Ҳасаннинг болдирини яхшилаб эзди: “Оғзингни оча кўрма!” – Иситмаси борга ўхшайди. Ҳозир тумов айни кўпайган маҳал. Ўзим ҳам икки кун бўлди тўшакдан турганимга. Йўтал деганингиз шиллик куртдай ёпишиди-е! Ҳеч бунақасини кўрмагандим.

Ҳайдовчи бошини тасдиқ маъносида тебратар экан, кулимсирагандай бўлди. Жора бурнини тортди. Машина жойидан аста жилди.

– Шундай кунда Қарши томонларга сизни қандай шамоллар учирди, ака? – деб ҳайдовчини гапга солди Жора. – Таксичига ўхшамайсиз? Ё тирикчиликми?

– Йўқ, таксичилик ҳам, тирикчилик ҳам эмас, – деди ҳайдовчи бир зум ўйланиб тургач. – Мен муалимман, ука. Мактабда адабиётдан дарс бераман. Қаршига бир дард билан келувдим. Ҳарна бензин пулини кўтарар, деб одам олдим.

– Тинчликми?

Ҳайдовчи бу гал узокроқ сукут сақлади.

– Нима десам экан? – деди ниҳоят оғир хўрсингач. – Бу дунёда шундай одамлар бўлади, ука. Худодан ҳам, қонундан ҳам қўрқмайди. Ҳаромдан ҳазар қилмайди. Фақат ўзининг тинчини, жигилдонини ўйлайди.

Шаҳар ортда қолди. Машина қори эрий бошлаган равон йўлга чиқди.

– Ҳаммасидан ҳам, ука, ўз пушти камаридан бўлган норасидаларини хор-зорликка ташлаб кетганларни кўрсам, тепа сочим тикка бўлади. Тутаб кетаман!

Жора индамади. Яна бурнини тортди.

– Бир ҳамсоямиз бор, – деди муаллим. – Исли – Ёрқул. Касб-корининг тайини йўқ. Сўқим-да, бу ёгини айтсан. Тўйга борса, қорни ёрилгунча овқат ейди, ичади, охирида жанжал чиқаради. Ўзи жўжабирдай жон – тўрт боланинг отаси. Хотини оёқдан қолганига анча бўлди. Қишида йиқилган, фалаж. Сўқим эри тўрт боласи, ёши саксондан ошган ота-онасини ташлаб, шаҳарлик бир суюқоёққа эргашиб кетган.

– Вой энағар-ей! – Жора ўрнидан бир қўзгалиб олди. – Уйига кеп турадими, ишқилиб? Бола-чақасидан хабар олгани?

– Илоё, келмайлар кетсин! Келади. Боласидан эмас, чақасидан хабар олгани келади. Янги йил олдидан қораси кўрингандай бўлувди. Худойим инсоф берибди-да, деб ўйладик. Эртаси куни ёқа ушладик: болаларига давлат берган нафақани қулайлаб кетибди. Бунга нима дейсиз?

– Худо урган экан!..

Жоранинг “ҳик” этгани эшитилди. Нимадир “чирт” этиб узилгандай бўлди.

– Шаҳарда нима қилиб юрибсиз? – деди у бирпасдан кейин ҳорғин овозда.

– Шаҳарга, ука, шу сўқимнинг норасидаларига кийим-кечак олгани келувдим. Қариндош-уруғ, қўни-қўшни икки юз мингча пул йиғиб эдик.

– Қанча?!

– Икки юз мингча.

– Кийим олдингизми, ишқилиб?

– Ололмадим-да. Душанба куни кийим бозори ишламас экан. Бола бечораларнинг кийими абгор. Бирининг этиги, бошқасининг телпаги йўқ. Пулни қайтариб кетяпман. Ана, олдингиздаги кутида ётибди.

У Жорага қаради.

– Оббо! – Жора юзига бирор тўсатдан олов пуркагандай бошини илкис орқага ташлади. – Энди нима бўлади?

– Нима бўларди? Индинга – чоршанба. Ургутга бораман. Улгуржи бозорида кийим-кечак мўл, анча арzon, деб эшиитаман.

– Бозор ёпиқ бўлса, нега бунча кеч қолиб юрибсиз? Ё пешиндан кейин келдингизми Қаршига?

– Ўйғ-ей, азонда, сўфи аzon айтмасдан келганман, ука. Бу ерга Ёрқулбойнинг кенжасини олиб келувдим. Саккизга кирган. Гапиролмайди. Гунг. Шу болапақирни карлар мактабига жойлагунимча кеч бўлди.

Машина моторининг бир маромда гувуллаши одамни аллалагандай бўлади. Оппоқ қор босган кимсасиз далаларга оқшом туша бошлади.

– Ўзингиздан сўрасак? Ишлайсизми, ўқийсизми?

– Йўқ, – деди истамайгина Жора.

– Сизга боя бозорнинг олдида қўзим тушгандай бўлувди. Шунга сўрайпман-да...

– Бола бечора йиғлаб қолгандир?

– Қайси бола?

– Карлар мактабида қолган болани айтаман-да.

– Хеч сўрамант, ука. Эрталаб уйидан биғиллаб йиғлаб чикқанди ўзи. Мактабда зор қақшаб қўлимга, оёғимга ёпишди. Мени бу ерга ташлаб кетманг демоқчи-да. Юрак-бағрим хун бўлиб кетди.

Ҳамма жим бўлиб қолди.

– Отингиз нима, домулла? – деди бирпасдан сўнг Жора.

– Ҳайдар. Сизники-чи?

– Меники – Жовли. Лекин, домулла, зўр одам экансиз!

– Нимам зўр, Жовлибой ука?

– Не бир одамлар бор, ўзининг боласига ҳам бурилиб қарамайди, ўладими, қоладими, иши йўқ. Сиз бировнинг гўдакларини деб буйтиб сарсон бўлиб юрибсиз. Қойил, домулла!

– Бир-биrimизни шундай кунда суюмасак, аямасак, бу дунёда нима қилиб юрибмиз, Жовлибой!..

Жора – Жовли индамади. Бурнини тортди.

– Боласини тирик етим қилганинг, етимнинг ҳақини еганнинг кўзларидан фақат ёш эмас, фақат йиринг эмас, ука, қон ҳам оқади. Тўғрими?

– Тўғри! – Жовлининг овози титраётгани сезилди.

Ҳайдовчи йўлчироқни ёқди.

– Чарчадингизми, Жовлибой ука? Ё уйқу босдими? Жим бўлиб қолдингиз?

– Чарчадим, – Жовли бирдан Ҳайдар акага томон ўгирилди. – Бир гап айтсан, мени уришмайсизми, ака? Сўкмайсизми?

– Йўқ. Уришадиган, сўқадиган гап айтмассиз?

– Сизга жуда қалтис ҳазил қилдим, ака!

– Қачон?

– Боя, нонга кетганингизда. Шу кутичадаги пулингизни олиб, – у ғаладонни очди. – Чўнтагимга солдим. “Қани сезасизми, йўқми?” деб ўйладим-да. Хеч замонда одам пулини шунаقا жойга очиқ-сочиқ ташлаб қўядими, а?

– Икковларинг ҳам бинойи йигитларга ўхшайсизлар-ку, – ҳайдовчи аввал ғаладонга, кейин Жовлига қаради. – Нимадан хавфсирайман?

Сўнг қўшиб қўйди:

– Кўяверинг. Шунга шунчами?..

– Мен ҳам етим ўсганман, ака, – деди Жовли синик овозда. Чўнтағидан икки юз минг сўмни чиқариб, ғаладонга солди. – Отам икки укам билан бизни ёлғиз ташлаб кетган.

– Ҳозир тирикми?

– Тирик деб эшиштаман. Лекин қайси гўрларда юрганини билмайман... Мана, Еттитомга келдик. Мени чорраҳага етмасдан туширинг, ака. Чироқчига кетишим керак.

Жовли машинадан тушиб, Ҳайдар муаллимга йўлкирани – беш минг сўмни узатди. Сўнг чўнтағидан бир даста икки юзталик чиқарди:

– Ҳайдар ака! – деди овози титраб.

Ҳайдовчи ички чироқни ёқди. Жовлининг кўзи ҳам, юзи ҳам ёришиб кетган, ҳаяжонда эди.

– Домулла! – деди у эшикнинг очиқ турган ойнасига энгашиб. – Анави сўқимнинг гўдакларига кийим-кечак харид қилганингизда, сиздан илтимос, шу пулгаям бирор нарса қўшиб олинг!..

Жовли пулни ўриндиқча ташлаб, қаддини ростлади. Кейин:

– Сен, ука, – деди орқада кунишиб-қалтираб ўтирган Ҳасанга қараб ва кўзини қисиб қўйди. – Тезроқ соғайиб кет... Раҳмат!

## ҲАКАМАТ

**Жазолашдан қўра қечирмақлиқ мардлиқдир. Өжиз одам қечиролмаётди. Ҳофз этиш қучлилар фразиламиди.**

**Махатма ГАНДИ**

# НАЗМ

*Гулистан  
МАТЁҚУБОВА*

1948 йылда туғилған. Тошкент давлат университетиң (хозирги ЎзМУ) журналистика факультетини битирған. Шоуранинг “Баҳт келтирган баҳор”, “Ҳаяжонниң етти ранги”, “Ойдин остона”, “Севиб қолсın”, “Мен сен учун яшайман”, “Дарёга ботаётган қүёш”, “Излаганларим”, “Ойбалдоқ”, “Мұхаббат юрти”, “Қайтмоқ учун кетмоқдаман”, “Ватан рұхы” каби шеърий ва насрий тұрғыламлари чоп этилған.



## **Ҳаёт ишонч тұла юракдир**

### **Юрак иншоси**

Она тили ўқитувчисидай  
Юрак айтиб турди, мен ёздим диктант.  
Гоҳо қалам билан, гоҳ мониторда  
Жумлалар жамланар ичган каби онт.

Бунча қийин қўйиш тиниш белгиларини,  
Ундов оз, уч нуқта кўпайиб кетар.  
Сўроқ белгилари ундан ҳам ошиб,  
Барча хатоларни ичига ютар.

Диктант баҳосини билаолмадим,  
Ундаги ҳар бир сўз ҳаёт томчиси.  
Дафтарни ҳеч кимга қўрсатолмадим,  
Юрак бўлгандан сўнг ўқитувчиси.





## Эътироф

Декабрь,  
Кечир мени.  
Сени қийнаб қўйдим,  
Ўйлайвериб,  
Рўёбга чиқмаган орзуларимни.  
Шошавериб етолмаган армонларимга.  
Ўйлайман.  
Одамлар олдида фахрлангудек,  
Нима ҳам берди менга табиат?  
Розиман умримга, узоқ йилларга,  
Бергани азиз дўст, ишқ ва садоқат.  
Менга икки эшик очилди:  
Бири –  
Шаффоф нурларига белади.  
Иккинчиси –  
Борса келмас кенгликларидан  
Мени олиб ўтиб,  
Сафарларга йўллади.  
Бугун деразамдан  
Менга термиласан,  
Қайтаролмайсан ўтган кунларни.  
Декабрь,  
Кечир мени.  
Яшамаган,  
Яшолмаган  
Кунларим учун.  
Ҳам сенга бахтиму бахтсизлигимни  
Қисматдан бесўроқ  
Бериб юбораётганим учун  
Кечир!...

## Устюртим

Саховатли, құдратли юрт, она замин устидаги,  
Баланд юртим, Устюртим, деб, улуғлаган боболарим.  
Миллион йиллик хазиналар ер ости, ер устидами,  
Сени омон сақлаб келган оталарнинг дуолари.

Тарих тилга кирса айттар – ҳар тошдаги ҳикматингни,  
Белда пўлат, камарингда метиндейн қудратингни,  
Дунё ҳавас қиласи бугун хазинангда ҳимматингни,  
Бойлигингдир ҳар бир гиёҳ, дардга дармон ҳаволаринг.

Сен – қадрли, сен – ғуурули тупроғимнинг бир танисан,  
Бир ҳовуч тупрок ичинда қимматбаҳо маъданимсан,  
Тош деворлар чизигида сирли сўзим – маталимсан,  
Аждодлардан авлодларга етказган эл донолари.



Мустабидлик заҳарларин ўз бағрингга яширганинг,  
Бу заҳардан даминг қайтиб, сабр косанг тоширганинг,  
Вақти келди ҳаммасини халқ ҳукмига топширганинг,  
Мустакиллик – Озодликдан еру кўкда садоларинг.

Сени ишғол қилолмаган на бир ёғий, на-да бир ёв,  
Кўксинг очсанг арслондай кўкка сапчир зангор олов,  
Бугун сенга таъзим ила ҳилпирайди ўнлаб ялов,  
Бу байроқлар Юартбошининг сенга ишонч-номалари.

Сургул кони дунё-дунга хазинангни кўз-кўз қиласар,  
Сонлар етмас бойликларинг келажакка зар из бўлар,  
Тупроқларинг қат-қатидан олтин сандикларинг тўлар,  
Жайрону охулар билан созга ўтар саболаринг.

Кенг кўчалар, сўлим боғлар, кўркам уйлар безар сени,  
Фавворалар шиддатидан кўкда булат сезар сени,  
Янги авлод – фарзандларинг боғларингда кезар сени,  
Янги шаҳар, янги ҳаёт бошинг узра хумоларинг.

Эй, Устортим, зўр бўласан, истиқболинг юксакдадир,  
Юартбошимиз назаридан иқболинг келажақдадир,  
Халқ ишончи, муҳаббати, кўксингдадир, юракдадир,  
Шуҳратингдан сенга қуёш мукофоти – зиёлари.

## Томчилар

Бир, икки уч...  
Ёмғир томчиларин санайман,  
Кўкда булатларга қарайман.  
Булатларнинг ортида само,  
Самога туташар коинот.  
Юлдузларни санаш мумкинми?  
Чўлларда қумларнинг доначаларин  
Санаб бўларми?  
Рўёбга чиқмаган  
Орзулардан қолган алам, доғларни,  
Қуриган боғларда тўқилган япроқларни  
Ёки синган кўнгил парчаларини  
Умр бўйи юзга томган ёш доначаларин  
Ким санаб чиқкан?  
Бир, икки, уч...  
Ёмғир томчиларин санайман.



## Менинг ота уйим

Болалигим ўтган менинг ота уйим –  
Кечиксам, жон қадар мени кутган олам –  
Тунлари қайғуриб,  
Кундузлар тинмай  
Уйим, деб, болам, деб, ўзини унуган онам.

Сочи қирқ ўрилган қўғирчоқларнинг,  
Кўп ўйинчоқларнинг севинчин уйган  
Уй – бу орзуларнинг туғилган макони,  
Асал, туз, қалампир таъмини, туйган.

Уй – бу деразадан майнин ҳид таралиб:  
Сабзи, пиёз қовурилаётган палов қозони.  
Музлаткич гоҳ тўлиб, гоҳида бўшаб,  
Туғилган кунларнинг совға-саломи.

Ота уйини ҳеч севмасдан бўлмас,  
Унда ёстиқларда қолган тушларинг.  
Унда ҳеч кетмасдан яшагинг келар,  
Унда онанг айтган алла-қўшиқлари.

Ота уйин эшиги ҳамиша очик,  
Баъзан кузатганинг, баъзан кутганинг.  
Мехмонлар келганда очилиб дилинг  
Бору йўғингни бирдай ўртага тўкканинг.

Бу уй бурчагида болта ва арра,  
Чеккада ювилган кирлар учун дор.  
Жажжи чақалоқнинг кийимчаларин  
Дорга илаётган муnis онаизор.

Уй – бу баъзан дарддан эзилсанг  
Бўғзингга тиқилган алланималар.  
Уй – бу қулфланган тутқин муҳаббат,  
Ўспирин орзиқиб интилган дийдор.

Ота уйинг – бу сен ётган бешик,  
Деразанг остида ўсган атиргул.  
Сен илк бора кашф қилган эшик,  
Дунёларга очилган кенг йўл.



\* \* \*

Тақдирдан нолиган эмасман,  
Тақдирнинг ҳукмида яшадим.  
Мен аниқ биламан. Мен севдим.  
Мен аниқ биламан. Яшнадим.

Ўзига қул қилмади ҳаёт,  
Менга учқур қанот берди у.  
Кўнглим менинг эркин ва озод,  
Қанотларим қудрати орзу.

Хотиралар қийнамас мени,  
Бахтли онларимдан дарақдир.  
Неки бўлса, бари меники,  
Ҳаёт ишонч тўла юракдир.



## ҲУҚМАТ

**Дунёдан адолатлироқ нарсани  
кўрмадим: унга хизмат қиласанг,  
сенга хизмат қиласади, уни тарқ  
этсанг, у ҳам сени тарқ этади.**

**Абу Абдуллоҳ МАГРИБИЙ**



## Гулом МИРЗО

1964 йилда тугилган. Тошкент давлат университетининг (хозирги ЎзМУ) ўзбек филологияси факультетини тугаллаган. Шоирнинг “Яшии ҳам сиз борсиз”, “Унутилган ҳур”, “Офтобга қайтаман”, “Қалб томчилари” каби шеърий китоблари чоп этилган.



## Жавобсиз саволлар

### Манзара

Уфққа туташиб ётар дашт.  
Чексиз темир излар –  
йўқ бош-адоги.  
(Чексизлик ҳам  
юракни сиқаркан гоҳи.)

Йўловчи  
рельсга чўнқайған чоғи:  
“Пича жилинг”, дея, қисилиб, бешашт  
ёнига чўқади ҳорғин  
ҳамроҳи...

\* \* \*

Сени кундай соғиндим офтоб.  
Сени тундай соғиндим моҳтоб.  
Тезроқ ўқисайдим  
хижжалаб,  
боб-боб –  
сени шундай соғиндим...

\* \* \*

Капалак боғига бир ҳафта  
қатнаш учун топсанг ҳам имкон,  
таниш ва қадрдон  
капалагингни  
урчатмайсан  
унда ҳеч қачон...



\* \* \*

Настаринлар кечикдими ё  
Унудими тақвимни қўклам?  
Март ўтмоқда. Гуллар бунча кам.  
“Юпун чиқма”, дея, ҳали ҳам  
Чимчилайди ҳар тонгда сабо.



Шивалаган тунги ёмғирдан  
Борлиқ – намчил, умидлар – қуруқ.  
Қалдираса булулгар бир дам  
Ёғардия қўқдан замбариқ.  
Борлиқ – намчил, умидлар – қуруқ.

Шошмаётган балки баҳормас,  
Яшаш учун шошган мендирман.  
Бошим тоғу сочдаги қормас –  
Эллик бир йил уюлган хирмон.  
Унудими қалбимни қўклам?

Мойчечакнинг тўзғоги гўё,  
Бир пуф десанг, бу олам – ғойиб.  
Демак, Ғулом айтгил салламно,  
Кечикса ҳам қандай ажойиб –  
Настаринек нозланган дунё...

\* \* \*

Дуч келсангу кимгадир, қайда,  
Кўргинг келиб қолганда тағин,  
Ўша вақтда ва ўша жойда  
Хозир этар сени оёғинг.  
Учрашувга бўлмаган ваъда,  
Бинобарин, бари бефойда...

\* \* \*

Тан – бир камон:  
тортилар,  
эгилар,  
титилар.  
Рух – найзаки,  
айни  
шу он  
чексизликка интилар...



\* \* \*

Дока рўмолнинанг  
қурисин  
қайдан?  
Муттасил  
кўзёшга  
чайганинг-чайган...

\* \* \*

Юрагим – олмахоним:  
гоҳо пойимга тушган,  
гоҳида ҳадик билан  
томиримга чирмашган  
бағримдаги пинҳоним.  
Юрагим – олмахоним...

## Отамнинг боғи

Демоқчими, хайр, дараҳтлар,  
Қўлларин силтаюр дараҳтлар?  
Ё осмоннинг мовий қаърига  
Бармоқларин чаюр дараҳтлар.

Лайлаклардек битта оёқда  
Гоҳ тин олгай тайр – дараҳтлар.  
Тушларига, ухлаган чоғда,  
Киргай фақат сайр, дараҳтлар.

Ўтсанг, олма отиб қолади –  
Хам филмон, хам ғайир дараҳтлар.  
Баъзан ўйга ботиб қолади –  
Файласуфми, шоир дараҳтлар?

Сен кетсанг ҳам шу ерда ўсар –  
Оқибатли, чайир дараҳтлар.  
Лек, барибир, йўлингни тўсар –  
Демоқчими, хайр, дараҳтлар?..



\* \* \*

Жавобсиз саволлар қийнагани дам:  
гоҳ тафсир,  
гоҳ такбир  
ё кўллаб тадбир,  
мақбул жавоблардан дур тизган одам,  
саволсиз жавобга дуч келса, не дер?..



\* \* \*

Қиши бўйи  
қаҳратон захасини еб,  
Қор-киров  
ва ёмғир сувида ивиб,  
Бошида:  
“Чикмаган жондан умид”, деб,  
Сўнгра куртакларга  
бир-бир жой бериб,  
Кўкламда хазонни  
бизга эп кўриб,  
Дув-дув тўкилади  
чинор барглари...

\* \* \*

Малларме хақ: “Китоб дегани –  
Ғужғон ҳарфлар босқини”, бешак,  
Шуурингни ишғол қилгани  
Сахфаларда шай туарлак-лак.

Дарвозадек муқова очиқ –  
Демак, бари қолиб кетади –  
Бу ҳарфлардан бўлмайди қочиб,  
Улар сени олиб кетади

Осмонга...  
Юксакка...  
Ватанга...  
Халққа...



\* \* \*

Ўзинг тикла  
ўзинг бузган  
кўприкларни.  
Киприкларинг билан сила  
умид узган  
киприкларни...

\* \* \*

Кўнгилга ғамлар меҳмон,  
Кўнгил ториқиб қолди,  
Шодликлар келар қачон,  
Кўнгил зориқиб қолди?  
Кўнгил ҳам, асли, меҳмон  
Ва шуни уқиб қолди...

\* \* \*

Мени икки қошинг – камонинг отди,  
Узун киприкларинг – мижгонинг отди.  
Қалбинг авайлади, қалбинг яхшийкан,  
Аммо, нигоҳларинг – ёмонинг отди.

Дилимни чулғайди ойдин азоблар,  
Дилингдан дилимга қуигин гулоблар.  
Ахир, қиласидирсан қачон савоблар,  
Сўрасам, дилингда гумонинг отди.





*Абдуқаюм ЙҮЛДОШ*

## **ДАРЁ**

*Роман<sup>1</sup>*

Ростакамига хавотирга тушиб қолган Гулноза сумкасига нарсаларини жойлаб бўлгач, ётоқقا бўйлади. Эри хириллаб-пишиллаб ухларди.

Гулноза филдиракли чамадони тутқицидан ушлаганча йўлакка ўтди. Кўлида китоб билан хонасидан чиқиб келган Ноила онасини бу аҳволда кўриб ҳайрон қолди:

- Тинчликми, ойижон?
- Бобонгнинг мазалари қочиб қолибди. Кўнғироқ қилишди.
- Вой, нима бўпти?
- Шамоллаш дейишди.
- Бир ўзингиз кетяпсизми? Адам-чи?

Гулноза аввал иккиланиб туриб қолди, сўнг ростига кўчди:

- Аданг... ҳали анча ухлайди. Безовта қилмай кўя қолай.

Ноила типирчилаб қолди:

- Менам жон деб сизга қўшилиб борардим-у, лекин сессия пайти...
- Сен дарсингдан қолма. Боргандан ўзим кўнғироқ қиласман, қизим.
- Хўп, ойижон, телефонингизни кутаман. Яхши етиб боринг. Уйдаги-ларнинг ҳаммасига салом айтиб қўйинг. – Бир муддатлик мулоҳазадан сўнг Ноила ўз режасини айтди: – Мен яххиси, агар унгача қайтиб келиб қўймасангиз, шанба куни тушдан кейин йўлга чиқаман. Якшанба куни бирга-бирга қайтамиз. Хўпми?

– Майли. Дарсга кетишинг олдидан адангга нонушта тайёрлаб қўй. Устидан сочиқ ёпиб қўйсанг, совиб қолмайди.

– Биласман, ойижон. Эртага бемалолман. Имтиҳон тушдан кейин. Адамни овқатлантириб, кейин кетаман. – У чамадонга қўл чўзди: – Ёрдамлашвораман. – Ўзим.

Ноила ойисининг икки юзидан чўлпиллатиб ўпди:

- Хайр, ойижон.

<sup>1</sup> Давоми. Боши ўтган сонда.



\* \* \*

Дарё бўйида ўсган одам оқимнинг қаерда кенгайиб, қаерда торайишини, инчунун, фалон жойда ташланган сувда чўқмас нарсани пистон жойда бемалол тутиб олиш мумкинлигини жуда яхши билади.

Қаххорнинг эскироқ “Жигули”си бор экан. Бердиқул билан Самад йўл кўрсатиб туришди. Ишқилиб, учовлон бирпасда дарё торайган жойга етиб келишди-да, сувдан кўз узмай, сабр билан ўлжаларини кута бошлишди.

– Бердиқулжон, – деб қолди Самад хушомадомуз оҳангда. – Анави абраҳими бопладингиз лекин. Бир яйрадим, бир яйрадим.

Бердиқул бепарво қўл силтади:

– Гапирманг. Бу бошланиши ҳали. У билан ўзимнинг алоҳида ҳисобитобим бор.

Ногоҳ Қахҳор қичқириб юборди:

– Ана! Ана!

Дарҳақиқат, ой ёғдусида дарё сатҳида оҳиста оқиб келаётган қайиқ кўзга ташланди.

Бердиқул Қахҳорга қаради. Бунинг маъносини тушунган Қахҳор дарҳол ўзини оқлашга тушди:

– Мен сузишни билмайман. Чўкиб кетаман!

Бердиқул нигоҳини Самадга тикди. Самад ҳам ўзини олиб қочишга уриниб кўрди:

– Хайр қилсанг бутун қил, деганлар, Бердиқулжон. Бу ёғиниям ўзингиз тўғрилаб берасиз-да, а?

Бердиқул унга ўқрайиб қаради:

– Балифингизни бозорга опчиқиб сотиб, пулиниям опкелиб беришим керакдир балки? Бўлди, тушинг!

Ноилож қолган Самад ечина бошлади:

– Нима бўлса Самад, Самад! Ўлмаган жоним!

– Мендан битта яримта! – таклифини айтди Қахҳор.

Самад хурсанд бўлиб кетди:

– Бу бошқа гап!

Самад ўзини сувга ташлади, уҳ-ухлаганча пишқириб сузиб бориб, қайиққа чиқиб олди. Кейин қалт-қалт титраган ҳолида бир амаллаб эшкак эшиб, яқин келди. Бердиқул билан Қахҳор қайиқни қирғоққа тортиб олишиди. Қайиқда балиқлар ҳам, тўр ҳам, Тоҳирнинг қайифидан олинган эшкаклар ҳам бус-бутун турарди.

Шоша-пиша кийинаётган Самад Қахҳорга буюрди:

– Қопларни опке!

Энди машинага қараб югурмоқчи бўлаётган Қахҳор дарёга кўз ташлади-ю:

– Анавини қаранглар! – дея бақириб юборди.

Бердиқул билан Самад шу томонга қарашди. Сувда оғзи боғланган қоп оқиб келарди.

Самад ҳайрон бўлди:

– Чўкмапти.

– Ичи тўла пул бўлса-я! – ширин тамшанди Қахҳор.

– Пул бўлса чўккан бўларди, каллаварам! – шеригини жеркиб ташлади Самад.

Ўз тахмини ўзига маъкул туюлиб кетган Қахҳор бўш келмади:

– Салафанга солинган бўлса-чи?

Бу сафар Самад иккиланиб қолди.

– Нима бўлсаям қизик... – иягини қашлади Бердиқул ва Самадга маънодор қаради.

Энди кийиниб бўлган Самад тўнғиллай-тўнғиллай ечина бошлади:

– Нима бўлса Самад, Самад! Бу дунёда мендан бошқа одам йўқдай.

– Мендан яна битта яримта! – ҳаяжонланиб хитоб қилди Қахҳор.

Самад дарҳол мулоим тортиб, рози бўлди:

– Майли, қўймадиларинг-қўймадиларинг-да.

Самад сузаб бориб, суриб келган қопни Бердиқул билан Қахҳор қирғокка тортиб олиб чиқишиди.

Қахҳор ҳансираф қолди:

– Оғир экан. Ишқилиб, овора бўлганимизга яраша нарса бўлсин-да.

Бердиқул ерда ётган қоп шаклига қараб қолди:

– Менимча, бу одам.

Самад кийинаётган жойида такқа тўхтади:

– А?

– Тўғрироғи, одам мурдаси, – мулоҳазасини давом эттириди Бердиқул. –

Каранглар, мана боши, мана гавдаси, мана оёқлари.

Қахҳор бир қадам ортга чекинди:

– Бердиқулжон ука, қайтариб ташлаб юбора қолайлик дарёга.

– Ҳа, шундай қилайлик, – дарҳол рози бўлди Самад. – Ҳов бир йили далада ўра қазиётганимда бир сүяқ чиқиб қолганида милиса қанча овора қилганди. Кейин аниқлашди, у эшакники экан. Бу одам бўлса.

Қахҳор гапни илиб кетди:

– Оч қорнимиз – тинч қулоғимиз, Бердиқулжон ука.

– Қани, аввал кўрайлик-чи, бу эркакми, аёлми? – Бердиқул шерикларига тик қаради: – Балки қулоғида зирағи бордир. Балки оғзида тилла тиши.

Самад шошиб ўзини четга олди:

– Йўқ, йўқ, унақа нарсадан Худонинг ўзи асрасин.

Қахҳор титраб кетди:

– Мен унақа нарсалардан қўрқаман, Бердиқулжон ука.

– Мен барибири очаман.

Бердиқул қоп оғзидаги ипни еча бошлади. Самад билан Қахҳор яна бир неча қадам орқага чекинишиди.

Ип ечилиб бўлгач, Бердиқул коп ичига қаради ва хуштак чалиб юборди.

– Бердиқулжон, – сўради Самад. – Эркакмикан ё аёлми?

Бердиқул бош чайқади:

- Ҳм-м... Менимча... хунаса.
- Йўғ-э?
- Бемалол яқин келаверинглар. Кўрқманглар, бу тишлаб олмайди.
- Барибир Самад яқинлашмади:
- Бердикулжон, укажон, менинг кўришим шарт эмасдир. Ўзи юрагим слабийроқ.
- Мен ўликдан кўрқаман, – унга жўр бўлди Қаххор.
- Бердиқулнинг жаҳли чиқди:
- Нима, мен сизларга ғассоллик қилинглар деяпманми? Келиб кўринглар деяпман. Балки танирсизлар. Нимагадир менинг кўзимга жуда иссиқ кўриняпти, лекин қаерда кўрганимни эслолмаяпман.
- Самад билан Қаххор кўрқа-писа қопга яқинлашиди.
- Бердиқул тантанавор тарзда қопни ағдарди. Қопдан бўйи ўртача одамга тенг полиз қўриқчиси чиқди. Калла ошқовоқдан қилинган. Гавда, қўллари ва оёқлари одамнига ўхшаш.
- Мана сизларга тирик мурда!.. Танидиларингми?
- Ўзини босиб олган Самад қўриқчига дикқат билан қаради:
- Бир нарса дейиш қийин. Олтибой бобонинг даласида шунақаси турарди шекилли.
- Йўқ, менимча бу Каромат опанинг томорқасидан, – билағонлик қилишга уринди Қаххор. – Яна билмадим.
- Болалар... ҳазиллашишган шекилли, – тахминини ўртага ташлади Самад.
- Ҳа, ўшаларнинг иши бу! – деди Қаххор ишонч билан. – Бироннинг юрагини ёриб қўйишдан ҳам тоймайди шумтакалар!
- Бердиқул дикқат билан қоп ичини кўздан кечирарди:
- Ким билади, балки бу катталарнинг ишидир... Тажрибаси йўқроқ шекилли. Қопга тош ўрнига кесак солганга ўхшайди. Кесак сувда эриб кетган. Шундан кейин қоп сув юзасига чиқиб қолган.
- Полиз қўриқчисини чўктириш кимга зарил кепти? – сўради Самад.
- Менам шуни айтаман-да... Қани, сизлар балиқларни жойлайверинглар-чи.
- Самад билан Қаххор “Жигули” юхонасидан қопларни олиб келиб, қайиқдаги балиқларни сола бошлашди. Бердиқул ҳамон сирли полиз қўриқчисига тикилиб турарди.
- Қаххор шеригига шивирлади:
- Ошнасини кўриб қолдими дейман укангиз?
- Қўявер, – кўл силтади Самад. – У ёқдан сал анақароқ бўлиб қайтган ўзи бу.
- Бизга ёрдами тегди. Ишқилиб, беғаразмикан?
- Самад сассиз кулди:
- Мушук текинга офтобга чиқармиди, Қаххорбой. Униям бир улушга қўшамиз-да. Майли, унгани фойда. Бизга така бўлсин – сут берсин. Шунча балиқни бирор йўлимизга чиқариб қўярмиди?
- Буям тўғри лекин.

– Хўш, гап бундай, акалар, – деб қолди ногоҳ Бердиқул. – Мени кишилоққа ташлаб ўтасизлар. Ўзларингиз тӯғри бозорга бораверасизлар. Мен орқаларингиздан тез етиб бораман.

Самад қўлини қўксига қўйди:

– Хўп, ука, хўп.

\* \* \*

Дадаси кийимининг у ер-бу ери куйган, юзига қоракуя чапланган ҳолда кириб келганини кўрган Дилмурод анграйиб қолди.

– Нима бўлди, дада?

Тоҳир кулимсираб, хотиржам жавоб берди:

– Бандитлар ўқи. Шунинг учун сени ўзим билан олиб кетмоқчи бўлгандим-да.

– Жиддий сўраяпман, дада.

Тоҳир келиб ўғлининг ёнига ўтириди:

– Э, арзимаган нарса. Қайиқ ёниб кетди.

– Шундай, ўз-ўзидан ёниб кетдими?

– Анави қисқа туташув... кейин бензин оққан экан, қарамабман. Қисқаси, Равшан ака топиб айтганидай, давлат мулкига масъулиятсизларча муносабатда бўлгандигим оқибати бу.

– Охири нима бўлди?

– Нима бўларди, яна битта ҳайфсан-да. Қайиқни таъмирлаш учун кетадиган пулни ойлигимдан олиб қоладиган бўлишди.

Сал ўзига келиб олган Дилмурод истехзо қилишдан ўзини тийиб туролмади:

– Демак бу ой ҳам ойликсиз қоларкансиз-да.

– Бир амаллармиз, ўғлим. Жон саломат қолди, шунгаям шукр. Майли, мен бир ювиниб олай-чи.

Тоҳир ўрнидан турди.

– Дада, шу ишингизни ташласангиз бўлмайдими? – деб қолди тўсатдан Дилмурод.

Тоҳир ювиниши хонаси томон кетаётган маҳали жойида тўхтади:

– Бу нима деганинг?

– Инспекторнинг қайифида бензин ўз-ўзидан оқиб ётмаслигини мен ҳам биламан. Демак буни уюштиришган, тўғрими?

Тоҳир аниқ жавобдан ўзини олиб қочди:

– Ёмонлар жазосини олади, ўғлим.

– Қачон? – асабий равишда сўради ўғил. – Қайиқ билан қўшилиб ёниб кетганингиздан кейинми?

– Нафасингни иссиқ қил-э!

– Буни бегоналар қилмаганини ўзингиз ҳам билиб турибсиз-ку. Шу дара-жага боришибдими... Дада, нима қиласиз ҳамманинг кўзига ёмон кўриниб?

– Мен ўз ишимни бажаряпман, – ўғлининг таънаси нафсониятига теккан

бўлса-да, иложи борича совуқкон бўлишга уринди Тоҳир. – Бирорга ёқиш учун ишламаяпман, ўғлим. Буни сенга айтганман.

– Хўп, шу иш сизнинг жону дилингиз экан, шу ишсиз яшай олмас экан-сиз, ҳеч бўлмаса бошқа жойга бориб инспекторлик қилинг.

– Бу ер-чи?

– Ахир... – фикрини тушунтиришга уринди Дилмурод. – Ахир қишлоқнинг ярми қариндош-урұғларимиз. Гоҳ унисини ушлайсиз, гоҳ бунисини. Акт ту-засиз. Жарима соласиз. Қайиқларини, тўрларини олиб қўясиз.

– Қонун шуни талаб қиласи, ўғлим, мен эмас.

– Ахир, дада, қонунниям одамлар ёзгандир, роботлар ёзмагандир.

– Ўғлим, – Тоҳир қайтиб Дилмуроднинг ёнига ўтириди. – Бугун биттаси-га тоғам деб кўзимни юмсан, эртасига бошқасига жияним деб... Унда бир-икки йил ичидаги дарёда балиқ зоти қолмайди-ку.

– Вахиманиям қиласиз-да. Саккизта одам овлагани билан катта дарёда балиқ қолмас эканми?

– Одамнинг нафси ёмон, ўғлим. Одамнинг ўзи тўйгани билан кўзи тўймайди. Дарё нима экан, денгиз, уммонниям шип-шийдам қилиб таш-лайди. Ахир балиқ етти хазинанинг бири деб айтгандим-ку сенга.

– Хазина эмиш! Ундан кўра ўзингизни ўйласангиз яхши бўларди.

– Менга нима қипти?

Хис-туйғуларини ортиқ яшира олмай қолган Дилмурод титраб-қақшаб га-пирди:

– Дада, ахир кўр эмасман, ҳаммасини сезиб-билиб турибман. Одамлар кейинги пайлари сизни тўй-маъракаларгаям чақирмай қўйишиди-ку.

– Ҳамма эмас, айримлар. Аламзадалар.

– Нима, энди иш деб яккамоховга айланиб қолмоқчимисиз? Ахир... Иш, иш деб... – товуши титраб кетган Дилмурод ўрнидан сакраб турди: – Агар... агар шу ишингиз бўлмаганида эди, балки ойижоним... ойижоним... ҳозир тирик юрган....

Дилмурод хўнграб йиғлаганча ўзини ташқарига урди.

– Ўғлим!

Тоҳир боласининг ортидан интилган ҳолида гандираклаб кетиб, пойгак-ка ўтириб қолди, бошини қўллари орасига олиб чангллади, кейин беҳол ўрнидан туриб дераза ёнига, деворга осилган рамкали суратлар ёнига борди. Мана, ўртадаги сурат. Унда қайиқда учовлон: ўзи, рафиқаси, матросча кўйлак кийган Дилмурод.

Тоҳир суратга узоқ тикилиб қолди, кейин деразадан ташқарига бўйлади. Тонг ёришиб келмоқда эди...

## II боб

Ноила ойисига берган ваъдасининг устидан чиқди: адасининг уйғонишига қўймоқ ҳозирлаб қўйди. Аммо қўзлари киртайиб қолган адасининг дастур-хонга иштаҳасиз тикилиб ўтирганини кўргач, қахва тайёрлай бошлади.

– Қанча шакар солай, ада? Сут-чи?

– Керак эмас. А-аччиқ бўлсин, – қийналиб гапирди Файзулла.

– Шакар спиртни ўзига ютиб олади дейишарди-ку.

Файзулла кулган бўлди:

– Э, қанақасига ютади? Спирт деганинг ўзи шакардан тайёрланса.

– Ўзингизни қийнаб зарилми, ада. Ичманг-қўйинг ўша зормандани. Эрталабдан бош тарс ёрилиб кетай деяпти, кўнгил айниган, иштаҳа йўқ. Шуунча ташвишни пулга сотиб оласизлар-а. Мана.

– Опке-чи, – Файзулла чашкадаги қаҳвадан хўплаб кўрди. – Бунча иссик, лабимни куйдириб олдим-ку.

– Лабим куймасин десангиз шошмасдан ичинг-да, адажон. Ёв кувляяптими?

– Бўлди, бўлди, сенга гапир-у, қоч. Ойинг қани?

– Хайрият-эй, ахийри сўрадингиз-а. Кечаси хабар келди, бобомнинг мазалари бўлмай қопти. Шунга тонг сахарда жўнаб кетдилар.

Файзулла номаълум нуқтага тикилган кўйи бир муддат ўйланиб қолди, кейин алам билан гапиришга уринди:

– Шунаقا, бизнинг хоним эр деган жонивордан бир оғиз сўрамайди,xoҳлаган маҳал xoҳлаган жойига кетаверади.

Ноила бош чайқади.

– Ўхшамадими?

– Ўхшамади, адажон. Лоқайдлигингизни билдириб қўйяпсиз.

Файзулла ўзини оқлашга уринди:

– Бу ичкиликнинг таъсири бўлса керак.

Ноила адасига ён босди:

– Эҳтимол.

Файзулла девордаги соатга қаради:

– Кетмайсанми энди дарсингга? Тураверасанми бошимда қаққайиб?

Ноила мийигида жилмайиб кўйди:

– Адажон. Бўлди, айтганингиздай ойимларга телефон қилиб, бобомларнинг аҳволини сўрайман, уларга сизнинг қизғин саломингизни етказаман, “Бирон нима керакми? Бемалол айтавераркансиз”, дейман. Кейин ойимларга тезроқ қайтишларини тайинлайман. Сизнинг номингиздан, албатта. Агар шанбагача келолмай қолсалар, ўзим бориб қолишим мумкинлигини ҳам айтиб қўяман. Яна бошқа топшириқлар борми?

– Ўзимнинг ақлли қизгинамдан! – Тўлиқиб кетган Файзулла ўрнидан туриб, қизининг пешонасидан ўпиб қўйди. – Ҳаммасини шундай қил... Хўп, мен кетдим бўлмаса.

– Аввал қаҳвани ичиб олинг, адажон.

Файзулла тик турган ҳолида шошиб финжонни қўлига олди.

\* \* \*

Овул кўринмайдиган қирғоқ бўйида машинасидан тушган Дилшод атрофга алантлади. Орқадан эски “Москвич” етиб келди. Дилшод ҳовлиқиб унга пешвоз чиқди:

– Нима гап?

– Ҳаммаси жойида, ўртоқ. Атай ўзим бориб келдим ресторанга. Ҳаммаёқ тинч. Тиланчи хотин йиқилган жойни фаррош супуриб юборибди. Қон доғини кўрган бўлса ҳам, маст-алаастлар ёқалашган бўлса керак деб ўйлагандир-да.

Дилшод “Москвич”га караб қолди. Мансур ўртоғининг нима демоқчилигини тушунди.

– Йўғ-э, ўртоқ! Нима, ёш боламанми? Буни уч соат ювдим. Шампунлаб... Ресторанга таксида бориб, қайтишда автобусда келдим.

Дилшод қизариб кетди, ерга қаради:

– Тўғри... тўғри қипсан. Эҳтиёт бўлиш керак.

– Жуда ўзингни олдириб қўйибсан-ку. Ўртоқ, бўлди, бу ҳақда қайтиб бошқа оғиз очмайман. Ўша келишганимиздай: бирон милиса-пилисами, терговчими сўрамаса, мен “миқ” этиб оғиз очмайман, аммо-лекин сўраб қолсаям айни юз фоиз ўзимнинг бўйнимга оламан.

Дилшод бошини кўтарди:

– Нима бўлса бирга бўламиз!

– Уф-ф, бунақа гапни бас қил дедим-ку! Токи танамда жоним бор экан, бир нарса бўлиб қолган тақдирдаям сени бу ишга аралаштирамайман.

– Раҳмат... – аранг шивирлай олди ўпкаси тўлган Дилшод. – Раҳмат, ўртоқ. Яхши кунларингда хизматингда бўлай.

Мансур гап мавзуини ўзгартиришга шоҳди:

– Хўш, бугунги режа қалай?

– Режами? Ҳа, бир жойга мен билан бирга бориб келсанг дегандим.

– Ҳозирми?

– Ҳа.

– Кетдик бўлмаса. Ҳар қалай, мени ёмон жойга обормассан, ўртоқ?

Дилшод иккиланиб қолиб, “Москвич”га ишора қилди:

– Иложи бўлса... бундан кейин буни... минмасанг...

– “Мерс”имними? – ҳайрон бўлди Мансур. – Роса ўрганиб қолганман-да аммо-лекин... Майли, сен нима десанг шу. Ўйда эскироқ велосипедим бор. Ўшани созлаб оламан. Буни бўлса шу ҳафтанинг ўзида бозорга опчиқаман.

– Кетганига сотовер.

– Хўп, ўртоқ. Бўлмаса ҳозирам бориб эшигини қулфлаб келай. Айтган жойингга сенинг машинангда бора қоламиз.

– Бирор тегинмайдими бу ерда қолса?

– Э, эшигини очиқ ташлаб кетганимда бирор қарамаган-у...

Мансур чопиб бориб машинасининг эшикларини қулфлаб келди. Кейин Дилшоднинг машинасига чиқди. “Нексия” шиддат билан олдинга интилди.

\* \* \*

Шифохонага “Тез ёрдам”да олиб келинган икки ҳайдовчи қуёш терак бўйи кўтарилигунга қадар қотиб ухлашди.

Биринчи бўлиб Акбарали кўзларини очди. У қаддини ростлаб ўтириди, атрофга аланглади. Ярмигача парда тутилган дераза ортида дараҳт шохлари кўриниб турарди. Шифт оппок. Деворлар ҳам. Каравот ёнидаги тумбочка устида турли дорилар, осма укол жиҳози. Акбарали яланғочланган билагига қаради. Укол изи.

Акбарали енгини тушириб, шошиб ўрнидан турди, жон ҳолатда пишиллаб ухлаб ётган шеригини уйғота бошлади:

– Фиёс! Фиёс! Тур дейман!

Фиёс кўзларини очди, Акбаралига жилмайиб қаради, керишди:

– Бирпасда тонг отдими?

– Тур, жўра, балнисага тушиб қолганга ўхшаймиз.

– А?

Фиёс шошиб қаддини ростлади, атрофга аланглади, сўнг Акбаралига ваҳима билан қаради:

– Дипломат қани?

– Билмадим. Машинани қулфлашга кетаётганимда хонада турганди.

– Хонада? Мехмонхонада, а?

Акбарали бош силкиди.

– Қизлар қани?

Акбарали елка қисди.

Фиёс ўрнидан турасола каравот ёнида ётган туфлисини кийди-ю, эшикка отилди. Эшик ёнида, шундоққина йўлакда стул кўйиб ўтирган милиционер учуб ўрнидан турди-да, Фиёснинг йўлини тўсди:

– Мумкин эмас.

Сержант йигитча Фиёсни ичкарига киритиб, унинг ортидан эшикни ёпди. Фиёс гарангсиб, бошини чангллаб қолди:

– Ўлдик! Аввал ўлмасак ҳам энди ўлдик.

Бу пайтда меҳмонхонага қўшни уйда истиқомат қилувчи терговчи Жавлон Сулаймонов ўз кабинетида Дилобарни сўроқ қиласарди.

Киз саволларга шошмасдан жавоб қайтарар, дераза ёнидаги столда ўтирган катта сержант Асқарали компьютерда сўров баённомасини ёзишга бемалол улгуради.

– Демак, тўйдан чиқиб “КамАЗ”га ўтиридиларингиз. Шундайми?

– Ҳа. Биз уларни маданиятли, инсофли йигитлар деб ўйлагандик-да. Лекин одамнинг оласи ичидаги бўларкан.

– Давом этинг.

– “Дарёга боряпмиз, йўлимиз бир экан”, дейишди. Биз хурсанд бўлиб, ҳеч қандай ёмон хаёлга бормай келаверибмиз. Исмингиз нимайди, ака?

– Бунинг аҳамияти йўқ. Мен ҳозир сиз учун ўртоқ терговчиман, холос. Давом этаверинг.

– Йўғ-э, сизни “ўртоқ терговчи” дейманми? Ноқулай-ку!

– Марҳамат қилиб давом этинг, Одилова.

Дилобар тагдорроқ оҳангга ўтди:

– Милицияда ҳам яхши-яхши акахонларимиз ишлайди... ўртоқ терговчи. Бир қўнғироқ қилиб қўйсам...

Бунақанги илмоқли гапларни эшитавериб, эти ўлиб бўлган терговчи писанд қилмади:

– Бунга улгурасиз.

Аммо Дилобар дарров таслим бўлиб қоладиганлардан эмасди:

– Нурхўжаевни танисангиз керак, а? Бетонкада турадиган ГАИларнинг бошлиғи. Ўша киши бизнинг яқин кишиларимиздан бўлади. Танийсиз-а?

Жавлон қизга диққат билан қараб тураверди:

– Бундай бахтга мушарраф бўлмаган эканман. Энди чалғимасдан, гапингизда давом этинг.

– Дарёга етиб келдик. Ҳайдовчилар олиб келиб қўйганлари эвазига ҳақ талаб қила бошлашди. Биз пул берамиз десак, кўнишмади. “Озроқ бирга ўтирамиз”, дейишди. Биз ноилож кўндинк.

– Нима, улар мажбурлашдими? Кўнмасликларингиз ҳам мумкин эди-ку.

– Қандай қўнмаймиз? Ярим кечаси бўлса. Кўзига қон тўлиб турган иккита барваста эркак. Мажбур бўлдик-да.

– Унда... деразадан ошиб ўтишга ҳам мажбур бўлдиларингизми?

– Ҳа. Мажбур бўлдик. Биттаси жаҳл билан ҳадеб қўлини чўнтағига обораверди. Менимча у ерда пичоқ бор эди.

– Кейин-чи?

– Кейин едик, озгинадан ичдик. Мен ўзим ичмайман. Лекин мажбур бўлдим бир қултум ичишга.

– Кейин-чи?

– Кейин нима бўларди? Эркак зоти ичгандан кейин кутуриб кетади-ку. Бизга тирғала бошлашди. Биз илтимос қилдик. “Ҳой акалар, сизларнинг ҳам сингилларингиз, опаларингиз бордир. Кўлларингизга эрк берманг”, дедик. Лекин бунақа пайтда маст одамнинг қулоғига гап киармиди?

Терговчи кулимсираб қўйди:

– Одилова, мени бир нарса қизиқтиряпти. Ўзингиз айтгандай иккита барваста эркак. Бор-йўғи биттагина ароқ ичилган. Унинг ҳам ҳаммаси эмас. Бунинг устига сизлар ҳам оз бўлса-да, ҳисса қўшгансизлар. Наҳотки иккита кап-катта одам икки юз грамм ароқ ичиб, ўзини билмайдиган дараҷада маст бўлиб қолса?

Дилобар бу саволга киприк қоқмай жавоб қайтарди:

– Ўртоқ терговчи, ахир улар йўл бўйи ҳам ичиб келишди-да.

– Рулда-я?

– Э, бунақалар ичаверади. Тўхтатиб қолишса, пул билан кутулиб кетишади.

– Уларнинг йўлда ичиб келганлигини айтмагандингиз.

– Эсимдан чиққан экан, – қиз кўзига ёш олди. – Ахир ўзингиз тушунасиз-ку қанақа аҳволдалигимни.

– Хўш, кейин нима бўлди?

– Қаерга келиб тўхтагандим?

- Уларнинг тирғала бошлашганига.
- Ҳа. Кейин “Бизга тегманглар, деб илтимос қилганимиз сайн улар ҳаддиларидан ошиб кета бошлашди. Қарасак, уларнинг нияти ёмон.
- Ўшангача уларнинг нияти ёмонлигини билмаганмидингиз?
- Йўқ. Озгина ўтирамиз, кейин ака-сингиллардай хайрлашамиз деб ўйлагандик-да.
- Кейин нима бўлди?
- Кейин биттаси танца баҳона мени маҳкам қучоқлаб олди. Иккинчиси Тамарчикни. Қўрқиб кетдик.
- Демак аввал сиз рақсга тушгансиз. Шундайми?
- Мажбур бўлдим, ўртоқ терговчи. Айтдим-ку, уларнинг қандай аҳволда эканлигини.
- Давом этинг.
- Мен шундаям ўзимни қучоқлаб олганга яхши гапириб, инсофга чақириб турдим. Қарасам, шериги Тамарчикнинг кўйлаги ёқасини мана бундай қилиб йиртиб юборди. Мана бундай қилиб.
- Қизишиб кетган Диlobар беихтиёр бу қандай бўлганини кўрсатмоқчи бўлдими, ёқасини тортиб, ҳақиқатан ҳам озгина йиртиб юборганди, кўпчиб турган сийнаси кўриниб кетди.
- Тўхтанг! – жон ҳолатда қўлини кўтарди терговчи. – Шарт эмас! Тўхтанг! Кўрсатиш шарт эмас.
- Баённома ёзаётган Аскарали оғзини очганча анграйиб қолганди.
- Бекитинг-э! – деди қўзларини олиб қочган терговчи.
- Қиз шошиб ёқасини бекитаркан, йифламсиради:
- Шунақа қилишди яшшамагурлар! Биз уларни одам десак...
- Ёқа жойига келганига ишонч ҳосил қилган терговчи яна қизга диққат билан қаради:
- Келинг, аниқлаштириб олайлик, демак улардан биттаси сизнинг эмас, Маратованинг... ёқасига ёпишди, шундайми?
- Ҳа, лекин биз Тамарчик билан битта одаммиз. Унга ёпишгани – менга ёпишгани. Шундай деб ёзаверсангиз ҳам бўлади. – Диlobар ёқасига ишора қилди: – Энди Нурхўжаевни чақирмасангиз бўлмайди. Бу аҳволда қандай кетаман?
- Бунинг йўли топилар. Давом этинг, Одилова. Фақат ўзингизни босиб, хотиржам.
- Диlobар ҳиқиллади:
- Уларнинг бундай қилиқларидан кейин хотиржам гапириб бўладими?
- Шундай қилиб, ҳайдовчилардан бири дугонангизнинг ёқасини йиртди. Улардан қайси бири эди?
- Қорачадан келгани.
- Уларнинг иккаловиям қорачадан келган. Мўйлови борими ёки йўғими?
- Мўйловлиси. Аблаҳ! Ўзи шуниси бошидан менга ёқмаган эди.
- Одилова! Ҳис-ҳаяжонга берилмасдан нима бўлганини аниқ, қисқа қилиб тушунтириб беринг.

– Буни кўрган экан, мени қучоқлаб олганиям... мени тўшакка торта бошлади. Улар бизни зўрламоқчи бўлганини сезиб қолдик. Тамарчик иккаламиз дод солиб ёрдамга чақира бошладик. Зўравоннинг қўлидан бир амаллаб чиқиб эшикка борсам, эшик қулфланган. Деразага борсам, дераза қулфланган. Шунда битта стулни олиб деразага бир ургандим, дераза синиб кетди. Ёрдам сўраганимизни эшитган одамлар чопиб келиб, бизни зўравонларнинг қўлидан кутқариб қолишиди. Дунёда шундай яхши одамлар ҳам бор экан. Ўшаларга раҳмат.

– Гувоҳ Ибодуллаев хонага бостириб кирганида сизларни зўравонларнинг чангалида эмас, ваннага яшириниб олганча ёрдамга чақираётган ҳолда кўрган. Шундайми?

– Ҳа, биз бир амаллаб уларнинг қўлидан чиқдик-да, ваннага яшириниб олдик.

– Демак, ҳайдовчи Мўминов ва Умиров томонидан сизларни зўрлашга уриниш бўлган. Шундайми?

– Э, афти қурсин уларнинг! – нафратланиб гапирди Дилобар. – Эркак эмиш. Садқаи...

– Ҳар қалай, саволимга аниқ жавоб бермадингиз.

– Агар эшикни бузганлар яна озгина кечикканида эди...

– Ваннага яшириниб олдик деяпсиз-ку.

– Ванна эшиги ичкаридан қулфланмас экан.

– Тушунарли. Яна нима қўшимча қилишингиз мумкин?

– Ўртоқ терговчи, ўша хонада менинг шахсий косметикамдан у-бу нарсалар, кийимларим солинган сумкам тушиб қолибди. Ўшаларни бориб олишим мумкинми, шуни сўрамоқчидим.

– Албатта олишингиз мумкин. Фақат ҳозир эмас. Ҳозирча хона муҳрланиб турибди. Тергов тугаган заҳоти сизга хабар бераман.

– Унча қиммат эмас-у, лекин мен учун жуда азиз нарсалар-да.

– Хўп, Одилова, буни эътиборга оламиз. Баённома билан танишиб, имзо қўйиб беринг.

– Майли.

Дилобар ёқасини тутамлаганча ўрнидан турди ва милиционер Асқарали принтердан чиқариб турган қофозларни дикқат билан ўқишига тутинди.

Жавлон иш дафтарига бир нималарни қайд эта бошлади.

– Ўртоқ терговчи, сиздан бир нарса сўрасам майлими?

– Марҳамат, Одилова.

– Нега Тамарчик билан мени алоҳида-алоҳида хоналарда ушлаб туриб-сизлар?

– Бу саволингизга жавоб беришим мумкин. Тергов манфаати шуни тақозо қилади. Лекин сиз чўчиманг, ҳозир дугонангиз билан сухбатлашиб олайлик, кейин яна бирга бўласизлар.

Бу жавобдан энсаси қотган Дилобар елка учириб қўйганча баённомани ўқишида давом этди.

\* \* \*

Маърифат хола мудраб ётган чолининг оёқларини уқалаб ўтирган маҳал ташқаридан машина сигнали эшитилди.

Турғунбой отанинг кўзлари “ярқ” этиб очилиб кетди:

– Қизинг келди.

– Йўғ-э, – ишонмади Маърифат хола.

Отанинг сал жаҳли чиқди:

– Сигнал чалди, эшитмадингми, Раҳмонқул чегачининг қизи?

Маърифат хола барибир ён бермади:

– Кўча тўла машина бўлса.

– Кўча тўла машина бўлса бордир, лекин бу қизинг. Ё ўзим чиқиб очаинми дарвозани?

– Ётаверсин. Ўзим.

Маърифат хола ҳовлига чиқди. Дарҳақиқат, кия очик дарвоза ёнида та-ниш “Нексия” кўринди. Шошиб эшикдан кириб келаётган, кўлида каттаги на сумка тутган Гулноза онасини кўрган заҳоти:

– Энажон! – дея бақириб юборди.

Она-бала бир-бирининг бағрига отилишиди.

– Отам! Отам яхшими? – ҳовлиқиб сўради Гулноза.

– Яхши, болам, яхши. Сенинг келганингни мендан бурун билиб ўтирибди.

Гулноза онасини бағридан бўшшатасола, сумкани ҳам қолдирган кўйи ичкарига чопди.

Турғунбой ота қизини бошқача меҳр билан яхши кўрарди. Буни тушунгани боисми, бироз ҳаяллаб, сўнг ичкарига кирган Маърифат хола ота-болнанинг энтикиб гурунглашиб ўтиришганини кўрди.

– ...Неварангиз алламбало қиз бўлган, – мақтанарди Гулноза. – Мен туғул, адасига ҳам гап бермайди. Бирам пишиқ, бирам пухта. Уйга келган меҳмонлар билан ҳам тил топишиб кетади. Билмайман, кимга ўхшади экан?

Турғунбой ота кўзлари чақнаб кулимсиради. Кўрпача четига ўтирган кўйи қизи олиб келган ширинликларни сумкадан олиб, дастурхонга қўяётган Маърифат хола гурунгга қўшилди:

– Қиз бола ўзи шунаقا бўлади. Сенам ёшлигингда шундай эдинг. Қизимнинг феъл-хўйи кимга тортган дейсан. Кимга бўларди, қизим, ўзингга тортган-да, ўзингга.

– Ишқилиб, тақдири менга ўхшамасин.

Бу гап Гулнозанинг оғзидан беихтиёр чиқиб кетди. Маърифат хола лаб тишлаб, бош чайқади. Турғунбой ота ялт этиб қизига қаради, безовталаниб қолди, изтироб билан шивирлади:

– Қизим...

Дарров ўзига келган Гуноза ўқтам овозда жавоб қайтарди:

– Лаббай, отажон.

– Ё... ё ажрашиб қўя қоласанми, а?

Маърифат хола тиззаларига шапатилади:

– Вой, бу нима дегани? Бошида арслондай эри, ёнида гулдай қизи...

Шу маҳал хонага қўлида каттагина сумка тутган Ўқтабр ота кирди.

– Ие, ие! Ўзингмисан, Гулноз?

Гулноза ирғиб ўрнидан турди:

– Ассалому алайкум, Ўқтабр амаки. Келинг, келинг.

– Ваалайкум асалом. Бемор тузалгиси келса табиб ўз оёғи билан келади деганлари шу-да, қизим.

– Тўрга ўтинг, амаки.

Ўқтабр ота тўрга ўтиб ўтирди, фотиха қилиб, ҳол-аҳвол сўрагач, изоҳ берди:

– Кўчадан ўтиб бораётгандим. Машинага қўзим тушиб қолди. Кўзимга иссиқ қўринди, қарасам, номери Тошкентники. Сенмикансан деб тусмоллаб келавердим. Қара, отанг пишиқ, шаҳри азимдан меҳмон келди деб қўноққа чақирмайдиям.

– Ўзи ҳозиргина келдим, амаки. Энди сизни йўқлаб тургандим.

Турғунбой ота илжайди:

– Чақирмасамам келишингни биламан-да.

Ўқтабр ота пинак бузмади:

– Ҳа, энди, келмай юрган жойиммиди? Келаман-да. Тўғрими, қизим?

– Тўппа-тўғри, амаки. Бу ерни ўз уйингиздай билиб, хоҳлаган пайти эшикни тепиб кириб келаверинг.

Ўқтабр ота бирдан ғамгин тортиб қолди:

– Бошқа қаергаям борардим, қизим. Уй хувуллаб ётибди. Кимсасиз уй худди лаҳадга ўхшаб қоларкан. Одамнинг юраги сиқилиб, нафаси қайтиб кетади-ей...

Гулноза отани ғамгин ўйлардан чалғитишга уринди:

– Амаки, дастурхонга қаранг.

Турғунбой ота ҳам манзират қилди:

– Ол, жўра, ол. Қизим атайлабдан биз учун Тошкентдан олиб келган нознеъматлардан ол.

Ўқтабр ота бир шириналкни оғзига солиб, ҳузурланганидан бош чайқади:

– Воҳ-воҳ-воҳ, оғизда эриб кетади-я! – сўнг Турғунбой отага зингил солиб қаради: – Жўра, кўзинг чақнаб, юзинг қирчиллама йигитларникидай таранг тортилиб қолибди. Роса ичикиб ўтирган экансан-да ўзиям.

– Ичикиш ҳам гапми? – деди Маърифат хола. – Машина овозини эшитиши билан ўрнидан учиб туриб кетгудай бўлди.

Ўқтабр ота кулиб юборди:

– “Чолим” десанг ҳам бўлади-ку, келин. Энди, соқоли оқариб, алиф қадди дол бўлганида ҳам учинчи шахсада гапираверасанми?

Турғунбой отанинг жаҳли чиқди:

– Кимнинг қадди дол бўлибди?

Ўқтабр ота дарҳол иккала қўлини тепага кўтарди:

– Меники, меники! Мен касал бўлиб ётиб олдим, мени шифохонага обормоқчи бўлишди.

Турғунбой ота жўрасининг ёнида ётган хўжалик сумкасига ишора қилди:

– Бозорга отланиб қолибсанми?

– Э, қанақа бозор? Пенсия беришяпти деб эшигдим. Шунга сумкамни кўтариб боряпман-да.

Турғунбой ота пиқирлаб кулди:

– Пенсиянг бир сумка бўладими? Меникидан камроқ эди шекилли?

– Эшигдингми, ҳаммасини юз сўмликларда беришармиш. Шунинг учун сен биратўла иккита сумка оборавер, жўра.

– Меникини уйга опкелиб беришади! – мағрур кўкрак керди Турғунбой ота.

– Тўғри. Почтахонага етиб ололмаётганларникини уйга опкелиб беришади. Менга, Сакега ўхшаган диконглаган ёшларнинг ўзлари борсаям бўлаверади.

Турғунбой ота жўрасига шубҳаланиб қаради:

– Ҳали Сакеям диконглаб қолдими?

– Э, унинг кетганига бир ош пишгулик вақт бўлди. Ҳойнаҳой йўлда келаётгандир пулинни орқалаб.

– Унда... – Турғунбой ота ўйланиб қолди, сўнг қатъий қарорини эълон қилди: – Менам бораман.

– Ота! – деб юборди Гулноза.

– Вой, бу нима дегани?

– Буми, бу пенсиямни ўзим бориб олиб келаман дегани, – кўтаринки оҳангда жўрасининг ўрнига жавоб қайтарди Ўқтабр ота. – Ётаверадими ёш болага ўхшаб харҳаша қилиб. Бунинг ёшида бир ётиб қолса ёмон, кейин пайлари чўзилиб, суягини ер тортади, ўзиям ётонгич бўлиб қолади, ха.

– Ё пирим-ей! – Худди шу гапни кутиб тургандай, Турғунбой ота ўрнидан туриб, пойгакка юрди. – Кампир, бор, қоп опчиқ.

Ўқтабр ота Гулнозага қараб кўз қисди:

– Пулнинг кучини кўрдингми, қизим?

\* \* \*

Қирғоқ бўйлаб ярим соатча юрганлари маҳал Дишоднинг қўл телефони жиринглаб қолди. Рақамга қараган Дишод дарҳол аппаратни қулоғига олиб борди:

– Салом.

У томондан Ноиланинг овози эшитилди:

– Салом. Халақит бермадимми?

– Йўғ-э. Узр, ишлар билан бўлиб телефон қилолмадим...

– Мен узрингизни эшитиш учун қўнғироқ қилаётганим йўқ. Минавваров қанақа домла, шуни билмоқчидим.

– Минаввароми? Зўр домла. Билимингиз бўлса зачёт қўйиб беради, бўлмаса ректорни “танка” қилсангизам қўнмайди.

– Хайрият. Болалар ҳар гап қилиб юришганига чўчиб тургандим.

– Унақа гапларга ишонманг. Ўқисангиз баҳо оласиз. Ўқимасангиз – йўқ. Ўзингиз қандайсиз?

– Яхшиман. Онамларни овулга юбориб, адамлар билан қолдим.

– Тинчликми?

– Бувамнинг сал мазалари йўқ экан.

– Тузалиб кетсинлар.

– Айтганингиз келсин.

– Кенг уйнинг бекаси бўлиб ўтирган экансиз-да.

– Ўтириш қаёқда. Ҳозиргина кутубхонадан чиқдим. Агар ойим эртага қайтмайдиган бўлсалар, имтиҳондан кейин мен ҳам йўлга тушаман.

– Жуда яхши бўпти-да. Келар вақтини аниқ айтсангиз, ўзим кутиб оламан.

Ноила йигитни гап билан чимдиб олишдан ўзини тийиб туролмади:

– Кўйинг, овора бўлманг. Сиз банд одамсиз, вақtingиз бўладими-йўқми...

– Ноила, аччиғингиз чиқмасин. Айтдим-ку, ташвишлар билан бўлиб...

Хали келсангиз, бир гаплашамиз.

Қиз гапни қисқа қилди:

– Хайр унда.

– Хайр.

Дилшод телефонни ўчирди.

– Бунча узр сўраб қолдинг, ким у? – ҳайрон бўлиб сўради Мансур.

– Бирга ўқиганмиз. Онаси Сайхуновулдан. Ўзиям бобоси билан момосини кўргани келиб туради.

– Эсимда йўқ. Кўрсатмаган бўлсанг керак-да. Бирон бойваччанинг қизими?

– Уни қўйиб тур, Мансур. Кеп қолдик. Ҳозир сенга бир нарсани кўрсатаман. Фақат бу орамизда қолади. Вақт-соати етгунча. Майлими?

– Гап бўлиши мумкин эмас, ўртоқ!

Машина тўхтади. Дилшод билан Мансур пастга тушишди.

Ёйилиб оқаётган дарёning янада кенгайган жойи эди бу.

Қирғоқ бўйидаги дарахтга осиб қўйилган рамкали ойна ичига олинган тахтачада “55” Масъулияти чекланган жамияти” деб ёзилган.

Деярли қирғоққа туташ сунъий қўл. Иккита ишчи кичкина қайиқда маҳсус идишдаги эритилган озукани сувга ташляяпти. Қайиқ ортидан тилладай товланаётган майда балиқлар тўдаси сузиб боряпти.

– Ҳорманглар! – деди Дилшод ишчиларга қараб.

Ишчилардан бири, соқол қўйгани бўғиқ овозда жавоб қайтарди:

– Бор бўлинглар, акалар.

– Балиқлар қалай?

Ишчи қайиқдан кичкина тутқичли юмалоқ тўрча чиқариб, сувдан бир неча балиқчани сузиб олиб кўрсатди:

– Ҳақиқий сибир бакрабалифи. Жуда тез кўпаядиган хилидан.

Йигитларга афтини буриштириб қараган иккинчи ишчи рус тилида қўшимча қилди:

– Ленская популяция. Отличные мальки. Чудесная осетра будет. Вот увидите.<sup>1</sup>

Биринчи ишчи гапини давом эттирди:

– Гүштиям мазали, тош босадиган бўлади.

Дилшоднинг юзи ёришди:

– Спасибо, Володя ака. Раҳмат, Абулқосим ака. Айтганларингиз келсин.

Ишчилар балиқларни озиқлантиришда давом этишди. Мансур атрофга ҳайрон бўлиб аланглади. Дилшод ишчиларга ишора қилди:

– Зўр одамлар-да. Увулдирикни атайин ўзлари Россияга бориб, олиб келишди. Мана энди қара...

Шундагина Мансур гап нимадалигини тушунгандай бўлди:

– Э, қойил! Аммо-лекин боплабсан! Бунинг ҳаммаси ўзингникими?

– Шунга ўхшашроқ, – камтарона жавоб қайтарди Дилшод.

– Қойил, қойил... Ишчиларингни айтаман, ойлик олиб ишлашадими?

– Ишига яраша олишади.

– Аммо-лекин мен бунағанги ишларни тушунавермайман-да. Менга така бўлсин-у, сут берсин. Мен икра-пикра, популяция-мопуляция қилиб, бошимни оғритиб юрмайман. Менинг ишим тайёр балиқ бўлса бозорда сотиш, бирдан фойдасини кўриш...

– Оғайнни, сенга бир илтимосим бор эди.

– Хўш-хўш?

Дилшод сунъий кўлга ишора қилди:

– Шу ишни... бирга давом эттирасак.

– Бу нима деганинг, ўртоқ? Анавиларга ўхшаб, – Мансур ишчиларни кўрсатди. – Балиқларга ем бериб юрасан демоқчимисан?

– Йўқ. Бошқа муҳим ишлар бор. Бу ёққа юр-чи.

Дилшод кўл бўйлаб сокин оқаётган дарёга қараб йўл бошлади, Мансур унга эргашди.

– Биламан, ўртоқ, кўпчилик мени отасининг эркатои, такасалтанг, ишёқмас, деб ўйлайди, – деб қолди ҳамон қайфиятсиз Дилшод. – Ҳатто дадам ҳам...

– Гапниям олдинг-да, аммо-лекин. Бир-иккита кўролмаслар айтса айтгандир, эътибор бериб ўтиришгаям арзимайди. Ит ҳуради, ўртоқ...

Дилшод маъюс кулди:

– ...дарё эса оқаверади. Шундайми? Йўқ, гап буни ким айтганида эмас. Гап шундаки, мен тўрт йил бекорга ўқимадим. Иқтисодда у-бу нарсаларни тушунгандай бўлдим.

– Унда яна ўқиб нима қиласан? Кузда бир жойга кетаман деётгандинг шекилли?

– Ҳа, насиб қиласа Англияга. Майли, тинчлик-хотиржамлик бўлса ўқиш бир гап бўлар. Мен бошқа бир нарсани айтиш учун сени бу ерга таклиф қилгандим. Нимагадир қўнглим ғаш. Кечагини ҳеч унуполмаяпман.

– Айтдим-ку, ўртоқ...

– Барibir, ёпиғлиқ қозон ёпиғлигича қолган тақдирдаям... энди яшаш осон бўлмайдиганга ўхшайди.

<sup>1</sup> Лена дарёси турларидан. Майда балиқчалар. Зўр осетра бўлади. Мана қўрасиз

– Шуни айтиш учун чақирғанмидинг мени?

– Йўқ, йўқ. – Дилшод сунъий кўлга ишора қилди: – Мен очган МЧЖдан уйдагиларнинг хабари йўқ.

Бу Мансур учун кутилмаган янгилик эди.

– Ростдан-а?

– Рост. Биринчи бўлиб бу хўжаликни сенга кўрсатяпман. Биласанми нега унга “55” деб ном кўйганман? Кузда дадам эллик беш ёшга тўладилар. Насиб қиласа, ишлар мен режалагандай кетса, шу ердан эллик беш тонна балиқ чиқади.

Мансур ҳайратини яшириб туролмади:

– Эллик беш тонна?

– Ҳа. Камида. Бу шунаقا нав балиқ. Шароит яхши бўлса, жуда тез кўпаяди. Бу менинг дадамга совғам бўлади.

– Э қойилман, аммо-лекин! – ҳаяжонланиб кетди Мансур. – Эллик беш тонна-я! Бу бир олам пул-ку!

– Бу ҳали ҳаммаси эмас, – Дилшод дарё яқинидаги қамишзорни кўрсатди:

– Бизнес-режамга кўра, манави бекор ётган ерни ҳам сотиб олишим керак. Қара, икки қадам нарида шунча сув.

– Буни нима қиласан? Яна балиқ кўпайтиришгами?

– Йўқ. Бу ерга шоли экдираман. Гуруҳимизда бир хоразмлик бола ўқирди. Шундан шоли экиш, уни парваришлаш ҳақида роса сўраб-суриштиргандим, фойда бериб қолди, етмаганини китоблардан ўқиб олдим.

– Ҳа, анча иш бор экан.

– Булар бошланиши, холос. Манави ерда, – Дилшод уйчага ишора қилди. – Консерва цехи қурилади. Ёнида балиқ дудлайдиган цех.

Мансур ҳайрон бўлди:

– Улар нимага керак?

Кўнгли тубида асраб юрган режаларини ниҳоят дўсти билан ўртоқлашаётганидан мамнун Дилшоднинг юзи ловуллаб, кўзлари чақнай бошлади, овози ҳам ўқтамлашди:

– Керак-да. Биласанми японлар нега дунёда энг узок умр кўришади?

– Бир марта ўзинг: “Улар ярим кечаси туриб олиб наҳорги ошга боришмайди-да”, дегандинг.

– Бу мен эмас, бир шоир айтган ҳазил эди. Хуллас, японларнинг узок умр кўришига сабаб битта – улар балиқхўр халқ. Балиқ бўлса витаминнинг кони. Ҳам ҳазми енгил, қанча есанг ҳам организмни зўриқтирмайди, пишиллаб қолмайсан. Бунинг устига семиртирмайди, холестеринсиз...

Мансур ҳам билағонлик қилди:

– Кечаси ёнади, фтори бор.

– Мен атай ўрганиб кўрдим. Кейинги беш йил ичida ўзимизда балиқ овлаш икки баробарга ошибди. Бу ҳали бошланиши. Мен аниқ биламан, яқин уч-тўрт йил ичida балиққа талаб беш, ўн баробар ошибб кетади.

Мансур ишонқирамай бош чайқади:

– Шу нарх бўлса, ҳай билмадим-ов. Ўзинг бориб кўр, бозор тўла балиқ. Саккизта балиқни сотиб бўлганимча тинкам қуриб кетади.

– Бу вактинча. Талаб кўпайса таклиф ҳам кўпаяди, кейин ўз-ўзидан нарх тушади. Буни бозор деб қўйибдилар. Талаб эса албатта кўпаяди. Чунки энди бизнинг одамлар ҳам ўз соғликларининг қадрига ета бошладилар. Қўйруғининг мойини оқизиб ғарчча мой буюртма сомса егандан кўра балиқни афзал кўра бошладилар.

Мансур бозордаги сават кўтарган йигитларга таассубан бақира бошлади:

– Закказ сомса! Уйланмаган қўчкорнинг думбасидан тайёрланган закказ сомса! Сомсанинг додаси!

Дилшод қулиб қўйди:

– Ҳали кўрасан, катта-катта кафеларда, ресторанларда мисол учун “Пайшанба – балиқ куни” деган эълонлар пайдо бўлади.

– Фақат пайшанба эмас, оғайни, – дўстининг гапиини ҳазилга бурди Мансур. – Уйланадиган йигитлармиз-а.

– Мисол учун айтдим-да. Хуллас, ўртоқ, мен бу ишни ота-отамга, яқинларимга билдирамасдан қилдим. Ҳаётда нимагадир фақат ўз кучим била эриша олишимни ўзимга ўзим исботламоқчи бўлдим. Бошланиши ёмон эмас. Агар уч-тўрт ой шу ерда мен билан ишлаб турсанг, Худо хоҳласа, ёмон бўлмайсан. Кейин... агар мабодо ўқишига кетсам, буларнинг барини сенинг номингга ўтказиб кетаман. Фойда элликка-эллик. Яхши ҳисобчи ҳам топиб бераман. Ишни ўзинг юритаверасан. Мен икки йилда қайтаман. Кейин иккаламиз катта корпорация тузамиз. Акция чиқарамиз. Банк очамиз. Ишқилиб, режаларим катта. Келажакда қилинадиган ҳамма ишларимизнинг хамиртуруши эса мана шу дарёда. Бу сув, бу дарё бизга ўхшаганларнинг миллион-миллионтасини боқади. Шунинг учун қийинчиликларга чидаб бўлса ҳам, тўрт-беш ой қаттиқ ишлашимиз керак. Мехнатимизнинг роҳатини кейин биргалашиб кўраверамиз.

– Лекин мен... ўқимаган бўлсам. Бир оддий балиқфуруш...

– Гап ўқишида эмас, ўртоқ, – Дилшод юраги устига кафтини қўйди. – Гап мана бу ерда. Биламан, сен ҳалол ўртоқсан. Садоқатли. Ишни бемалол юрита оласан.

Мансур чиндан ҳам довдираб қолганди:

– Энди бу... кутилмаган таклиф бўлиб қолди.

– Ўйлаб кўр. Ҳали ёшмиз. Катта-катта ишлар қиласидиган пайтимиз. Кунига саккизта балиқ сотиб ҳам ўтказса бўлади тириклиникни. Лекин келажакда саккиз юз миллион сўм соғ фойда келтирадиган иш қилиб ўтказса ҳам бўлади кунни... Ўзинг айт, яшашдан мақсад нима? Одам орзу қилмайдими? Шунга... олисдаги қуйруққа биргаликда интилиб кўрайлик, ўртоқ. Мана кўрасан, ҳали дунёга чиқамиз. Лондон, Дехли, Париж бир қадам бўлиб қолади.

Мансур тамомила эсанкираб қолди:

– Париж. Дехли. Лондон... Бухорони кўрмаганман-у...

Дилшод дўстининг елкасига кўл ташлади, ишонч билан таъкидлади:

– Шундай бўлишига ишониб ишласанг, шундай бўладиям!

Мансур жимирилаб турган сувга тикилганча ўйланиб қолди...



\* \* \*

Фалати бўларкан...

Ўйлаб кўрса, шунча йил яшаб, ҳали бирон марта сўроқ бермаган экан. Ҳали бу гапни Латипов эшишиб қолса нима бўлади, тасаввур этиш ҳам қийин. Роса тутакса керак! Бошидан тутун чиқиб кетишиям ҳеч гап эмас...

Муқаддам бошидан, соchlари орасидан қуюқ тутун чиқаётган эрини кўз олдига келтирмоқчи бўлди, аммо эплай олмади, бунинг ўрнига қархисида худди ичидаги нима гаплар борлигини билиб олмоқчидаётган ўзига дикқат билан тикилиб турган терговчини кўрди.

– Демак, сиз қизларга жой бермайман дедингиз. Шундайми?

– Мен жой сўраганларнинг қизлар эканлигини ҳам билганим йўқ, – тушунтиришга уринарди Муқаддам. – Мўйловли ҳайдовчи яна икки кишига жой берасизми, фақат уларнинг паспортлари уйда қолиб кетибди, деди. Мен кўнмадим. Шу.

– Лекин улар барибир қизларни ўз хоналарига олиб киришган.

– Ҳа, олиб киришган. Лекин, эътиборингиз учун, эшиқдан эмас, деразадан. Яширинча.

– Бу билан агар ҳайдовчилар қизларни эшиқдан олиб келишганида киритмасдим, демоқчимисиз?

– Ўртоқ терговчи. Меҳмонхона ўз номи билан меҳмон-хона. Казарма эмас. Мижозларимиз ўз хоналарига истаган меҳмонларини таклиф этишлари мумкин. Биз буни маън этолмаймиз. Мижоз ҳамиша ҳақ деган коида бизгаям тегишли.

– Бу меҳмонхонанинг эшиги куну тун очиқ дегани эмас-ку. Йўрикномага кўра, агар янглишмасам, меҳмонхонангиздаги меҳмондорчиликларга тунги ўн биргача рухсат этилган. Ана шундан кейин мижозларингиз амалдаги тартибларга риоя қилган ҳолда дам олишлари лозим.

– Биз учун кун билан туннинг фарқи қолмайди. Бунинг устига бизнинг мижозларимиз асосан кечаси келишади. Ҳайдовчилар, балиқчилар, овчилар, савдогарлар. Улар билан бир марта яхши муомалада бўлмасангиз, инжиқликларига чидамасангиз, кейинги гал хусусий меҳмонхонага ўтиб кетишиади. Шу шаҳарчамизнинг ўзида бунақанги мини-меҳмонхоналардан учтаси бор. Норасмийлари қанча! Шу сабабли биз ҳар битта мижоз учун курашишга мажбурмиз. Рақобат катта. Бу воқеяям мижозларимизни чўчитиб қўйиши мумкин. Шуни ўйлаб эзиляпман.

– Шунақа дeng. Энди бир савол. Сиз Диlobar Одилова билан Тамара Маратовани олдиндан танийсизми? Ёки улар билан аввал ҳам учрашганмисиз? Шошилмасдан ўйлаб кўриб жавоб беринг. Бу жуда муҳим.

Муқаддам ўлланиб қолди.

– Анави икки кизми... Ўзбегини қаердадир кўргандайман. Лекин аниқ эсимда йўқ. Наригисини... биринчи кўриб туришим.

– Балки улар меҳмонхонангизнинг доимий... мижозларидир.

Муқаддам сесканиб кетди:

– Уларни келган мижозларнинг қўйнига ўзингиз солиб қўясиз, демоқчимисиз? Сиз анави... кал...

– Фуқаро Ибодуллаев. Вилоят ободонлаштириш бошқармасининг масъул ходими.

– Ҳа, ўша кишининг гапларини тақрорлаяпсиз. Лекин бу бўлмағур сафсата, қуруқ тухмат. Бошқа меҳмонхоналарни билмадим, аммо бизда ҳеч ким бунақанги иш билан шуғулланмайди.

Жавлон стул суюнчиғига суюнди:

– Майли, ўртоқ Латипова, бориб ишингизни давом эттиришингиз мумкин.

– Дераза...

– Деразага ҳозирча тегмай туринг. Эшик ҳам ҳозирча муҳрланган ҳолда туради.

– Хўп.

– Марҳамат қилиб сўров баённомаси билан танишиб, имзо қўйиб беринг.

Муқаддам шаҳар ички ишлар бошқармаси биносидан чиқаркан, “Булар мени бошқа безовта қилишмайди шекилли. Яхшиси тергов берганимни Латиповга айтмай қўя қоламан”, деган қарорга келди. Жим ётган арслонни йўғотишдан нима наф...

Аммо... дарвоза ёнида қовоғи солик, ҳурпайган Дониёр кутиб турарди. Капалаги учиб кетган Муқаддам айборона қиёфада эрининг ёнига борди. Дониёр индамай олдинга юрди, жувон унга эргашди.

– Латипов, бу сиз ўйлаган нарса эмас, – шоша-пиша ўзини оқлашга тушди Муқаддам. – Мени шунчаки, гувоҳ сифатида сўроқ қилишди. Вокеа менинг навбатчилигимда юз бергани учун, холос.

Дониёр тўхтади, хотинига дикқат билан тикилди:

– Нима учун воеа айнан сенинг навбатчилигингда юз беради?

– Бу тасодиф-да, Дониёр aka. Шунча вақтдан бери бунақа воеа рўй бермай келаётганди-ку.

Дониёр яна юра бошлади:

– Кўза кунда эмас, кунида синади.

– Мени ҳамиша қилмаган гуноҳим учун ўзингизнинг олдингизда ўлибтирилиб оқлашга мажбур қиласиз, Латипов. Ахир айбим нима? Навбатчилигим шу кунга тўғри келиб қолганими?

Дониёр ҳужумга ўтди:

– Ҳайдовчиларнинг қони таркибида клофелин чиққани ҳам тасодифми?

Муқаддам ваҳимага тушиб қолди:

– Нима у, қорадорими?

– Уйқу дориси.

– Хайрият-эй. Мен бўлсам... Туф-туф.

– Лекин бу жиноят.

– Уйқу дорининг нимаси жиноят, Латипов? Ичса ичгандир уйқуси келмагандан кейин. Шунгаям мен жавоб бераманми?

Дониёр яна тўхтаб, хотинига қаттиқ тикилди:

– Муқаддам! Бу қасддан қилинган жиноят. Тушуняпсанми? Ўша... қизлар ҳайдовчиларга атайлабдан уйқу дори беришган. Ухлатиб қўйиш учун.

Муқаддам йифлагудай бўлди:

– Қизлар уйқу дори берган бўлса, бунга менинг нима дахлим бор?

– Даҳлинг шундаки, улар bemalol, ўз уйларида ўтиргандай хотиржам ҳаракат қилишган. Демак, улар сенга ишонишган, сенинг... шерикларинг бўлишган. Бу бир. Иккинчидан, менинг сумкамда худди шунаقا доридан бор эди.

– Барака топгур, шунаقا доридан бўлса нима қипти?

– Энди эса йўқ!

Бу сафар Муқаддам эрига узоқ тикилиб қолди:

– Нима дейин, нима десам ишонасиз, Латипов. Ўша клофе... уйқу до-рингизни мен ўғирладим, сменамга келаётиб йўл-йўлакай беш-олтитасини заҳарладим, қолганини сиз айтган ўша шерикларимга бериб, иккала ҳайдовчини ҳам ўлдириб, меҳмонхонанинг ҳовлисига кўмиб ташламоқчи эдим, десам ишонасизми?

– Одамни майна қилма. Мен сенга бор гапни айтаяпман.

– Мен ҳам бор гапни айтаяпман. Ҳеч қанақанги дори-порингизни кўрганим йўқ, сумкангизни титкилаш одатим ҳам йўқ.

– Чўнтакларни титкилаган одам учун сумкани титкилаш нима деган гап!

– Ҳой инсон, – ҳайқириб юборди Муқаддам. – Умримда бир марта чўнтагингизни титкилаган бўлсам... ундаям... ундаям...

Аёл гап тополмасдан, йифлагаб юборди.

– Хўп, гапларинг чин ҳам дейлик, – сал паст тушди Дониёр. – Лекин ўша қизлар қасддан сени шеригимиз эди, йўқ, шерик эмас, раҳбаримиз эди деб туриб олишса нима қиласан, а?

Пиқиллаб йифлаётган Муқаддам ҳайрон бўлди:

– Нега энди бунаقا гапни айтишаркан?

– Айтишади. Дўппи тор келиб қолганда ўзлари қутулиб қолиб, сенга ўхшаган лақмани қамоққа тиқиши учун шунақанга гапларни айтишадики, ўзингнинг тия эмаслигингни исботлаш учун бутун умринг ҳам камлик қиласди!

Шу гапларни айтгандан сўнг Дониёр жаҳл билан ўнгга қайрилиб кетди.

– Қанақа қамоқ? Қанақа тия? Бу... бу нима деганингиз, Латипов?

Бирон саволига жавоб ололмаган Муқаддам юлқиниб, чапга қараб юрди.

\* \* \*

Бозор қайнайди. Тирик балиқларнинг ўзи неча хил, дудланган балиқлару, пивоҳўрлар учун тайёрланган майда шўр балиқчаларгача тур-тури билан бор.

Самад билан Қаҳҳор растадан жой олишди, балиқларни сотишига ўтиришди. Бир четда уларнинг ишини кузатиб ўтирган Бердиқул ёнига

келган фуқаро кийимидағи Тоҳирни кўриб қолди-ю, “дик” этиб ўрнидан турди.

– Бизга нима хизмат, начайник? Балиқнинг қилтиқсиздан бор, берайми, томогингиздан силлиққина ўтиб кетади. Айтишларича, мусодара қилинмай қолган балиқнинг гўшти бошқача ширин бўларкан.

Ғазабдан ранги ўчиб кетган Тоҳир Самад билан Қаххорга ишора қилди:  
– Ўғирлик балиқларини сотишяптими?

– Ҳай-ҳай, унақа деманг, начайник. Туҳмат қилманг. Нима, уларни ўғирлик устида кўлга туширдингизми, қўлингизда ашёвий далил борми, гувоҳларингиз-чи? Эски мақолни унутманг, камандир: ўғри ўғри эмас, қўлга тушган ўғри. Мен бунга кўшимча қилган бўлардим: қўлга тушган эмас, ўғрилиги исботланган ўғри.

– Ҳали кўлимгаям тушиб қоларсан! Бу сафар энди ситилиб чиқиб кетолмайсан!

– Омон бўлсак кўрамиз, камандир.

Тоҳир жаҳл билан ерга тупурди-да, нари кетди. Бердиқул унинг ортидан мазахомуз қараб қолди.

– Ана кибру, ана ҳаво! Отдан тушсаям эгардан тушмайди бу! – деди у сотувчиларнинг ёнига боргач. – Нега бунча имиллайсизлар? Жони бордай бақириб-чақириб, мақтаб-мақтаб ўтказиб юбормайсизларми! На овозларинг чиқади, на...

– Бугун ўзи ҳаммаёқ балиқ экан, – ўзини оқлади Самад. – Ўзи боя улгуржи бериб кетаверсак бўлар экан.

– Сув текинга-я?! Топибсиз аҳмоғингизни!

Қаххор гапга аралашди:

– Лекин бу ахволда кечгача турсак ҳам бунинг кетиши қийин.

Бердиқулнинг росмана жаҳли чиқди:

– Э, оғизларингга чайнаб берса, ютишниям эплолмайсизлар! Ландавурлар! Сал арzon қилинглар бўлмаса! Шуниям ўргатиш керакми?

Самад хавотир ичда ўёқ-буёққа аланглаб, шивирлади:

– Бундан арzon қиломаймиз.

Бердиқул ҳайрон бўлди:

– Нега?

– Йўл қўйишмайди, – яна шивирлади Самад.

– Ким? – таажжубланди Бердиқул.

– Бу ернинг ўз эгалари бор, ука, – энди пичирлашга ўтди Самад.

Бердиқул қаддини керди:

– Ким экан ўша эгалари? Қани, бир эркакча гаплашиб қўяйлик-чи. Мен уларга бировнинг ҳалол йўл билан овлаб келган балиғига хўжайинлик қилиш қанақа бўлишини кўрсатиб қўяман!

Самад жон ҳолатда Бердиқулни елкасидан тутиб, унинг қулоғига шипшиди:

– Бас қилинг. Улар гаплашиб ўтиришмайди. Балиқ-малиғингиз билан қўшиб керакли жойларга топшириб юборишади. Кейин у ердан осонликча қутулолмайсиз.

– Нега энди топширишаркан? Балиқ бизники-ку.  
– Балиқ бизники, лекин бозор уларники. Арбоб билан олишмаган маъқул, ука. Ундан кўра балиқни шундай ташлаб кетган яхшироқ.

Самад дарвоза томонга ишора қилди:

– Ана, яна битта гўшт.

Бердикул шу ёққа қаради. Эллик ёшлардаги, озғин эркак балиқ тўлағилдиракли аравани итариб келмоқдайди. Унга қабариқ қўзойнак таққан, бозор ходими кийимидағи семиз йигит ҳарсиллаб-пишиллаб яқинлашиб, йўлни тўёди:

– Мумкин эмас! Олибсотарларга мумкин эмас!

Эркакнинг жаҳли чиқди:

– Э, қанақа олибсотар? Бу ўзимизнинг ҳовузда кўпайтирилган балиқ! Тушундингми, ўзимизнинг ҳовлидаги ҳовузда! Қишлоқ фуқаролар йифинидан маълумотномам ҳам бор.

– Жа ишондим-да, – сурбетларча тиржайди йигит.

– Сенга ўхшаганлар учун олиб қўйганман ўзи. Мана!

– Қани. – Йигит маълумотномани олди. – Хўш, “...қишлоқ фуқаролар йифинидан шул ҳақдаким... ҳақиқатан ҳовлисида балиқ етиштирадиган ҳовузи бор”.

– Бўлдими, ука?

Йигит маълумотномани қайтариб бераётган маҳал бирдан тўхтаб қолди:

– Лекин масаланинг бошқа томони ҳам бор-да, ака.

Эркак хайрон бўлди:

– Тушунмадим, ука, яна қанақа томони?

– Сиз ўтган ҳафта ҳам балиқларингизни сотиб кеттандингиз. Ҳеч ким ҳеч нима демаганди. Ёқиб қолди шекилли, яна қайтиб келипсиз. Лекин бу ерни бозор деб қўйибдилар. Бозор эса бедарвоза эмас. Манави туфта маълумотномани эса, – йигит маълумотномани йирта бошлади. – Кўпи билан битта лаққа эвазига ёздириб олган бўлсангиз керак. Демак, сиз ҳақиқатан ҳам олибсотарсиз. Мехнат қилмасдан даромад кўрмоқчи бўляпсиз. Бу эса яхши эмас. Яхшиси келишинг. Бўлмаса ишингиз солиққа ўтиб, отнинг калласидай жарима тўлашингизга тўғри келади. Кейинги сафар яна шунақа қиладиган бўлсангиз, текис йўлда келаётган аравангиз чукурга қулаб кетиши мумкин. Нимагадир чукурга қулаган араванинг ичидаги балиқларни шу ернинг ўғрилари бир зумда хомталаш қилиб кетишади. Бир зумда! Одамларда инсоф йўқ-да, ака, инсоф. Кейин араванинг эгаси минг югурсин-елсин – бир тийин: ҳеч нарсани исботлай олмайди. Эришгани бозордан қувилиш бўлади. Бундай одам қайтиб бу ерда қорасини кўрсатмагани маъқул.

Эркак довдираб қолди, ранги қумдай оқарди:

– Лекин, ука...

– Яхшиликча келишамиз-а, ака? Улгуржи ташлаб кета қолинг, йигитларга айтаман, олишади.

Эркак бош эгди.

Бу воқеани кўз остидан кузатиб турган Беридқул тутақиб кетди:

– Э, кетдик-э!.. У-бу нарса еб олайлик.

Бердиқул бозор адогидаги ошхона томон юрди. Ҳайрон бўлган Қахҳор шеригига қараб, балиқларга ишора қилди.

– Буни бўри ермиди! – деди Самад. – Ана, қўшниларга айтамиз, қараб туришади.

– Майли, майли.

Бердиқул чеккароқдаги столда уч косада ош, бир шиша ароқ, бир ликопчада шўр бодринг олиб ўтирган экан. Самад билан Қахҳор қўлларини ювиб келишди.

Бердиқул ароқ шишиасини олифталарча тагига уриб очгач, учта пиёлага тўлдириб қуиди. Самад бир пиёлани нари сурди:

– Биз рулда-ку.

Бердиқул бу пиёлани ҳам ёнига олди, учинчи пиёлани Қахҳорга тутди:

– Ичим ёниб кетяпти.

Самад кулди:

– Ёнаётган ичингизга яна олов қуйиб нима қиласиз?

– Бу нима деганинг? – шеригини жеркиб берди Қахҳор. – Ичмагандан кейин жим ўтир-да, бирорларнинг иштаҳасини бузмай. Аччиқниям аччиқ кесади билсанг. Олдик.

Пиёлалар тўқишиширилди.

– Олдик. Банияти шифо.

Бердиқул аввал биринчи пиёлани, кейин иккинчисини ичиб юборди, Қахҳор ҳам пиёласини бўшатди.

Самад ош солинган косани қўлига олди:

– Қозоқи пиёладай келаркан-а. Каттароқ ошасанг ё бир ошам келади ё келмайди. Чап ичакка ҳам юқ бўлмайди-ку бу.

– Бу ерни шаҳар дейдилар, – илжайди кўзлари ўшланган Бердиқул. – Шаҳарликларнинг ошқозони юпқа бўлади. Ҳалиям бу бутуни, яримта олганимда нима қиласингиз?

– Балиқ бунақа сотилишида кабоб ея олмайдиганга ўхшаймиз, жўралар, – деб қолди Қахҳор. – Қани энди Тошкентга оборсак. Бу ердан уч баробар баланд нархга супуриб олиб кетишаркан.

– У ёқнинг ҳам ўз бўрилари бор, – дарҳол шеригининг попугини пасайтиришга тушди Самад. – Ҳар ерни қилма орзу...

Бердиқул тўсатдан пешонасига бир шапатилади:

– Калла энди ишлаб қолди. Ўзи олдинроқ ичсам бўларкан! – У қўл телефонини олиб рақам терди, аппаратни қулоғига олиб борди. – Тош! Ўзингмисан? Ҳа, бу мен... Раҳмат... Раҳмат... Хизматми? Бироз балиқ бор эди, шуни тузукроқ нархда ўтказиб бероласанми? Ҳа, тирик балиқ... Ўзи Тошкентда килоси қанчадан? Қанча дейсан?.. Бу гапинг ҳам тўғри. Хўп. Етказаман... Хизмат дейсанми? Ҳа, агар имконинг бўлса, бир кичкина илтимосим ҳам бор эди... Ҳа, уч мингча... Келишдик. Раҳмат, оғайни. –

Бердиқул телефонни ўчириб, шерикларига ғуурур билан боқди. – Анави ёқда бирга ўтиргандик. Тошкентнинг бозорлари қўлимда, кел, бирга ишлаймиз, олти ойда тувагингни тиллодан қилиб ташлайман дерди. Телефонини эслаб қолганим яхши бўлган экан.

Самад ҳовлиқиб қолди:

– Нима деди? Килосини қанчадан оларкан?

– Тош унақа майдо йигитлардан эмас. Опкелсанг эллик-олтмиш кило қилиб ўтирмасдан, бир йўла уч-тўрт тонна олиб кела қол. Тузукроқ фойдам кўрасан. Менга сенинг бир тийининг керак эмас, деди.

– Э, қойил! – ҳайратланиб бош чайқади Қаҳҳор.

– Бу гапи тўғри лекин, – бирдан калласи ишлаб кетди Самаднинг ҳам. – Эллик-олтмиш кило оборадиган бўлсак, кўрган фойдамиз бензин пулидан ортмайди. Лекин бунча балиқни қаердан оламиз? Балиқ-ку, топилар. Лекин қайси пулга оламиз?

Бердиқул билан Қаҳҳор худди келишиб олишгандай Самадга тикилиб қолишиди.

– Нега менга қараб қолдиларинг?

– Мен яқинда укамни уйлантиридим, – тушунтириди Қаҳҳор. – Сен бўлса энди келин туширасан. Демак, пулинг бор.

Бердиқул қўшимча қилди:

– Пулингизни бир айлантириб, икки-уч баробар кўпайтириб олсак ёмонми?

Самад иккиланиб қолди:

– Ўзи у одам... ишончлими?

– Унақа одамларга бунақангি саволлар берилмайди. Шартта юзингни тилиб ташлаши мумкин.

Бердиқулнинг бу гапи Самаднинг шубҳаларини тарқатиб юборгандай бўлди.

– Во-ей... Балки насияга гаплашиб кўйармиз. Бу ердан оладиган балиғимизни айтяпман.

– Унақа аҳмоқларни қаердан топасан? – кулди Қаҳҳор.

– Уф-ф!.. Нима бўлса Самад, Самад! Ўлмаган жоним!

Бу Самаднинг рози бўлгани эди. У ўрнидан турди.

– Мен бўлмаса уйга бориб, борини қиртишлаб келай-чи.

– Бир машина балиқка етадиган бўлсин, – тайнинлади Бердиқул. – Машинани ўзим гаплашиб қўяман. Бир-иккита ходка қилайлик, кейин бунақа ишлар учун алоҳида пул ажратиб қўямиз.

Самад кетди. Бердиқул пиёлаларга тўлдириб ароқ қўйди:

– Қани, олдик! Бўлғуси муваффақиятлар учун! Бизнинг кўчамиизда ҳам байрам бўлсин!

– Байрам бўлсин!

Бердиқул ароқни ичиб, пиёлани жойига кўйгач, столдаги нарсаларни Қаҳҳор томон сурди:

– Сиз bemalol. Самад ака қайтгунича бир жойга ўтиб келаман. Бир йўла машинани ҳам гаплашиб келаман.



Шўр бодринг газак қилаётган Қаххор бошини силкиди:

– Хўп, хўп.

Бердиқул шошиб ошхонадан чиқди. Худди шуни кутиб тургандай, эшикдан чиққан маҳали унинг ёнига кўзойнакли бозор ходими ҳарсиллаб-пишиллаб етиб келди:

– Ака, нима бўлди, оптом ташлаб кетаверасизми?

– Боя айтган нархингами?

– Ҳа, ака. Ёмон нарх айтмадим-а.

– Энди... – Бердиқул бош бармоғини кўрсаткич ва ўртанча бармоғи орасига сукиб кўрсатди: – Мана сенга балиқ, бақалоқ!

Кўзойнакнинг ранги ўчиб кетди:

– Ака, ҳаддингиздан ошманг, яхшиликча таклиф қилдим-а. Хўжайинлар эшитса хафа бўлишади. Бунинг оқибати...

– Кўлингдан келганини қил, тўрткўз! – беписанд оҳангда гапирди Бердиқул. – Хоҳласанг, ҳозир мен билан биттама-битта чиқ. Эзид ташлайман! Хоҳласанг чоп, бориб суюнчи ол. Беш йил ўтириб келган биттаси балиғини биз айтган нархда сотмасдан, шаҳарга олиб кетди дегин. Бор!

Кўзойнак жойида анграйиб туриб қолди, сўнг балиқ растаси томон зиппиллаб жўнади.

Ўз-ўзидан мамнун бўлиб бораётган Бердиқул эса бозордан унча узок бўлмаган “Кўз зиёси” хусусий шифохонасига деярли югуриб келди. Деворларига “Барча кўз касалликларини тузатамиз”, “Кўз нурини қайтарамиз”, “Янгилик: лазер жарроҳлиги!” ёзувлари осиб қўйилган шифохонанинг кўз таниш бўлиб қолган ёшгина жарроҳи Бердиқулни мулозамат билан кутиб олди.

– Ўша гап – гап, ака. Худо хоҳласа момойни олиб келасиз, уч кунда кўрмагандай бўлиб, тойис, тамомила тузалиб кетадилар, – дея ваъдани катта бериб юборди шифокор.

– Раҳмат, ука, – қўлини кўксига қўйди Бердиқул. – Бутун умидим сиздан.

– Биз сизга ўҳшаганларнинг умидини оқлаш учун шу ерда ўтирибмизда, ака, – янада баланддан келди шифокор. – Нарх ўша келишганимиз. Олдиндан юз фоиз. Лекин буни бирорвга айтиш шарт эмас.

– Албатта, ака, албатта. Насиб қилса эртага ё индинга бус-бутун қилиб олиб келаман.

– Бу яхши, – Бердиқулнинг қувончига шерик бўлди шифокор. – Лекин ўтган куни бошқача гапиргандингиз. Нима, хазина топдингизми, а?

Бердиқул лаб-лунжини йиғиштиrolмай қолди:

– Э, йўқ. Бир қадрдон дўстимни топиб олдим бугун. Шунинг олдига кетяпман. У хазинадан ҳам авло.

– Унда яхши бориб келинг, ака. Эслатиб қўйай: эрталаб пул, кечкурун операция. Бизники хусусий. Навбат-павбат, дори-пори деб ўтирмаймиз. Пулни олдикми, ишга киришамиз. Натижга гар-рантия!

– Раҳмат, дўхтири. – Бердиқул ўрнидан турди. – Раҳмат.

– Э, раҳматни кейин, момойнинг кўзлари чароғон бўлиб кетганидан кейин айтасиз...

Шундан кейин ҳам одам қувонмай бўладими!..

Мана шу кайфият таъсирида бўлса керак, Бердиқул қолган ишларни жуда енгиллик билан, ҳатто, айтиш мумкинки, ўйнаб-кулиб бажарди: ёнбошига “Тирик балиқ” деб ёзилган машина шопири билан гаплашди, қадрдони Тошга қўнғироқ қилиб:

– Биз йўлга тушяпмиз, – деб айтиб ҳам қўйди.

Бунга жавобан Тош аллақачон бозорни гаплашиб қўйганини, bemalol келаверишлари мумкинлигини айтганида эса ногоҳ босиб келган шодон ҳаяжон пўртанасидан Бердиқулнинг боши айланиб кетгандай бўлди...

\* \* \*

Ҳайдовчилар сўроғи узоққа чўзилмади. Бунинг устига ҳар иккалови жойида типирчилаб, учиб кетгудай бўлиб ўтиришарди.

– Терговчи ака, – охири ялинишга ўтди иккинчи бўлиб терговчининг олдига кирган Акбарали. – Энди, агар саволларингиз тугаган бўлса, бизга жавоб берсангиз. Тез гастинсага бормасак бўлмайди. Уйимиз куяди!

– Бунча ваҳимага тушяпсиз? Машинангиз турибди, пломбалар жойида.

– Ахир биз почтачилик ҳам қилиб турамиз-да.

Терговчи жойлашиброқ ўтириб олди:

– Тушунтириброқ гапиринг, Мўминов. Қанақа почтачилик?

– Фиёснинг тоғаси бор. Кабир ака деган. Ўша кишининг укаси Тошкентда ҳовли сотиб олаётган экан. Кабир ака “Нексия”сини сотиб биздан укасига пул беруб юборганди. Жигарига ёрдам-да. Тошкентда ҳовли олишнинг ўзи бўладими?

– Қанча?

– Ўн тўрт миллион сўм.

Терговчи хуштак чалиб юборди:

– Шунча пул меҳмонхонадаги хоналарингизда турибди, демоқчимисиз?

– Ҳа. Дипломатда. Лекин... – иккиланиб қолди Акбарали. – Менинг қўрқаним...

– Давом этинг.

– Бошим ҳалиям ғувуллаб турибди. Хушимдан кетишдан олдин ўша дипломатни анави қизларнинг қўлида кўргандайман...

– Дипломат қулфланганмиди?

– Ҳа.

– Унда чўчимасангиз ҳам бўлади. Одилова билан Маратова меҳмонхонадан олиб чиқиб кетилаётганида қўлларида ҳеч қанақанги дипломат йўқ эди.

Акбарали енгил нафас олди:

– Хайрият-эй... Лекин, ака, яна бир нарса бор-да. Шундан қўрқаяпман-да.

– Нима экан у?

– Мен қизлар дипломатни очганини кўргандайман.

– Буниси энди қизик. Демак, калитни ўзларингиз бергансизлар.

– Йўғ-э! – жон ҳолатда эътиroz билдириди Акбарали. – Калит Фиёснинг бўйнида осилиб турибди, ўз кўзим билан кўрдим.

– Шунақа дeng. Қизиқ... Одилова билан Маратова машинага чиққанидан кейин сиз шерингиз билан пул ҳақида гаплашмадингизми?

– Йўқ.

– Дипломат қаердайди?

– Ёстиқнинг тагида. Кўринмай турганди.

– Ҳм-м... Сиз чўчиманг. Хона мухрланган. У ерга ҳеч ким киролмайди.

– Лекин барибир, ака, катта пул...

Акбарали баённомага имзо қўйиб чиққач, терговчи савол назари билан ёрдамчисига қаради.

– Ҳайдовчиларнинг кўрсатмалари бир-бирига тўғри келяпти, – деди Аскарали. – Афтидан, бу ерда гапнинг хаммаси аёлларда. Шерше ля фам.<sup>1</sup>

Жавлон бир муддат ўйланиб қолди, сўнг ўрнидан турди:

– Аскаралибек, меҳмонхонага ўтиб келишимизга тўғри келади. Машина чақиринг.

Шахар кичкина эмасми, орадан чорак соат ўтар-ўтмас улар меҳмонхонада эдилар.

Мухрланган хонадан арзирли бирон далилий ашё чиқмади. Хонани тинтийвериб чарчаб кетган Аскарали:

– Уф-ф! – деб юборди. – Бу ерда косметиканинг “к” ҳарфи ҳам йўқ-ку, Жавлон ака.

Қўлқоп кийган терговчи индамай ювиниш хонасига кирди, диққат билан ҳар ёққа қарагач, энгашиб, ванна тагига кўз ташлади-ю, қўл чўзиб, каттаги на дипломатни суғуриб олди

Жавлон дипломатни полга қўйиб, қулфчалар тепасидаги бўртиқларни босган эди, иккала қулф ҳам “ширқ” этиб очилди. Дипломат ичи дасталанган пулларга тўла эди.

– Косметика йўқ, лекин бошқа нарса бор, – дея мийифида илжайиб қўйди терговчи.

\* \* \*

Вақт пешинга яқинлашди ҳамки, “уч оғайни ботир”дан дарак бўлавермади. Хавотирга тушган Гулноза онаси билан дарвоза ёнидаги кўлбола ўриндикка чиқиб ўтириди-да, йўлнинг қарши тарафидаги дарахт соясида майда-чуйда сотиб ўтирган, беўхшов семириб кетган Зухрани ер остидан бироз кузатди.

Ў, бир пайтлар сочи тақимини ўпадиган қиличдай қиз эди Зухра! Мактабнинг қайси бир тадбирида битирувчи синфда ўқиётган Гулнозани спорт залига алдаб олиб кирган ва титраб-қақшаганча: “Тохирни тинч қўй, бўлмаса!..” дея худди бўғиб ўлдириб қўядигандай пўписа қилган шу кўккўз қиз эди. Ўшанда Гулноза мағрур тарзда “Э, бор, пишириб е ўшанингни!” деган, аммо барибир Тохирнинг бу қизга қайрилиб қарамаслигига ишончи комил бўлганидан, бадҳоҳларча қувониб ҳам қўйганди... Ў, ёшлик! Ана,

<sup>1</sup> "Аёлни изланг" (французча)

иккаловига ҳам насиб қилмади-ку Тоҳирбой... Зухраой қўшни қишлоққа эрга чиққанди, аммо турмуши бўлмади: икки боласи билан қайтиб келди.

Галати томони – мактаб давридан бери Зухранинг Гулнозани кўргани кўзи, отгани ўқи йўқ. Бўлмаса қанча сувлар оқиб кетди... Йўқ, барибир, Гулнозага кўзи тушса бас, Зухра бирдан тумшайиб қолади, саломига алик олмайди. Буни кўриб Гулнозанинг энсаси қотади, бир кўнгли тўғри бориб бу аразчи жувонга: “Нима, мен еб, сен куруқ қолдингми? Оч-да энди қовоғингни!” демоқчи ҳам бўлади, аммо шайтонга ҳай беради... Зеро ўзи йўқ пайтлари Зухраой ота-онасининг ёқасидан кириб енгидан чиқишини, елиб-югуриб уларнинг хизматида бўлишини Гулноза яхши билади... Мана, ҳозир ҳам уни кўриб кўрмаганга оляпти, атай шу томонга қарамаяпти. Ў, доғули!..

Қариб қолибди шўрлик... Дарвоҷе, Зухра ундан икки ёш кичик эди. Демак ўзи ҳам олма билан ўрик эмас...

Ёқимсиз ўйлардан тезроқ кутулишни истаган Гулноза онасига ўгирилди:  
– Почтага ўтиб келсаммикан?

Маърифат хола хотиржам эди:

– Кўявер. Учаласи йигилса, гурунглариям тугамайди, баҳслариям. Келиб қолишади.

Дарҳақиқат, қайрилишда гурунглашиб келаётган чоллар кўринишди. Кўлларидаги сумка, қоплари бўш қариялар Зухранинг ёйма хонтахтачаси ёнида тўхтاشди.

Ўктабр ота яшил салафан халтачага солинган, бир бармоқ энлилигидаги носни қўлига олди, қўзига яқинлаштириб, унинг ёнидаги ёзувни ўқиди:

– “Чорсу. Нигинахон”. Бу нима дегани, қизим?

Зухра бажонидил изоҳ берди:

– Чорсуда ишлаб чиқарилган, Нигинахоннинг цехида дегани, амаки. Фирма.

– Ё қудратингдан! – бўш қўли билан қўксини чангллади Ўктабр ота. – Аёллар нос ишлаб чиқаришгаям ўтса-я! Замонанинг зайнини қаранглар.

– Олаверинг, амаки. Ўткиридан бу.

– Жуда ўткирми? – синчковлиги тутди Ўктабр отанинг.

– Жуда.

– Йўқ, жуда ўткири менга тўғри келмайди. – У носни қайтариб жойига кўйди.

Зухра бошқасини узатди:

– Ўртачасиям бор.

Отахон бош чайқади:

– Ўртачасиям тўғри келмайди.

Отахон ўзини майна қилаётганини сездими, сотувчининг жаҳли чиқди:

– Оласизми-йўқми, амаки?

– Жон деб олардим-у, – чин дилдан афсусланиб бош чайқади Ўктабр ота, – ошқозоним бунингга қўшилган оҳакни ҳазм қилолмаса керак-ов. Бўлмаса балодек ишлайди.

Турғунбой ота луқма ташлади:

– Ошқозонинг темирният ҳазм қилиб юборарди-ку. Энди нега ноз қилиб қолдинг?

Ўктабр ота бўш келмади:

– Оҳак, жўра, темирният чиритиб юборади.

Зухранинг баттар энсаси қотди:

– Ҳеч нарса олмасангиз, нега менинг бошимни қотириб ётибсиз?

Ўктабр ота унга ажабланиб, кўзларини катта-катта очиб қаради:

– Ким ҳеч нарса олмаймиз деди? Оламиз, қизим, оламиз... Саке, невара-чевараларга алсай.

– Казир, – деди Серсенбой ота ва пи chirlab, бармоғида невара-чеваралини санай бошлади.

Буни кўрган Ўктабр ота қутичадаги ширинликларни салафан халтачага ағдарди:

– “Казир-пазир” қилиб ўтирумай ҳаммасини олавер. Ичингда минг хисоблаганинг билан барибир саноғига етолмайсан. Уч-тўртта қўп бўлса ҳеч нарса қилмайди.

– Ўй-баёв...

– Ўй-байлама, Саке. Бугун ақшанг кўп сенинг. Лекин, майли, охирги марта ўзим тўлайман. Фақат невараларингга “Ўктабр бобонгдан” деб айтиш шарти билан. – Отахон чўнтағидан ўнта минг сўмлик чиқарип сотувчига берди: – Етадими?

– Етади, амаки.

Гулнозанинг шу томонга келаётганини кўрган Зухра ранги ўчиб, тез-тез нарсаларини йиғиштира бошлади.

– Хорманглар. Бозорга барака, – деб қўйди жувоннинг бу қилиғидан кулгиси қистаган Гулноза. Сўнг қарияларга қаради: – Ие, қоплар бўш-ку. Пенсия бўлмадими?

Турғунбой ота Ўктабр отага ишора қилди:

– Бу калласи йўқ чол...

– Тўхта, тўхта! – жўрасини гапиргани қўймади Ўктабр ота. – Мана, ўзинг айт, қизим, ўзи аслида йўқ нарсага хато қилган одамни хато қилди деб айтиш мумкинми?

– Йўқ, – иккиланиброқ жавоб қайтарди гап ўзани қаёққа кетаётганини илғамаган Гулноза.

– Маладес, қизим. Шаҳар кўргансан-да, тўғрисини айтасан. Менам аслида йўқ биттагина “нол”га адашибман. Шунга шунча миннат, таъна.

Яйраб кулиб юборган Ўктабр ота қаппайиб турган кўкрак чўнтағига уриб-уриб қўйди:

– Пенсия минг сўмликлар экан, мен бўлсам юз сўмликлар деб эшишибман. Бор-йўғи биттагина “нол”га адашибман. Йўқ нарсага...

Шу лаҳзада отахоннинг ранги оқарди, кўзлари катталашди, нафас олиши оғирлашди. Буни билдири масликка уринган Ўктабр ота шошиб кета бошлади, бироқ ота қандайдир ишончсиз тарзда, сал гандираклаб қадам ташларди:

– Бор-йўғи битта нолга-я! Ўзи йўқ нарсага-я!.. Мен борай. Тезроқ уйга етиб олай...

Гулноза ҳайрон бўлди:

– Амаки. Овқат тайёр. Келишгандик-ку.

Турғунбой ота ажабланиб, жўрасининг ортидан бақирди:

– Ўзи ёмоннинг бир қилиғи ортиқ бўлади-да!.. Ҳой, бу яна нимаси? Қайт!

– Ўй-ба-ёв, наснинг исине маст бўлдингба?

– Ҳа, ҳа, мен... ҳозир...

Ўкрабр отанинг кўлидан сумкаси тушди, отахоннинг ўзи жон алпозда кўкрагини ғижимлади ва шу ҳолида “турс” этиб ерга қулади.

– Амаки!

– Жўра!..

Ўкрабр отани уйга олиб киришди, яқинда Турғунбой ота ётган ўринга ётқизиши. Бир ош пишгулик фурсатда туман марказидан Гулноза чакирган “Тез ёрдам” этиб келди.

Беморни кўриб бўлган шифокор журналга нималарни дир ёзди. Сўнг унинг кўрсатмаси билан ҳамшира Ўкрабр отанинг юмшоқ жойига игна санчди.

– Ҳаммаси жойида. Беморга тинчлик, хотиржамлик керак. Тез-тез хонанинг ҳавосини алмаштириб туринглар.

Йигит чамадонини йиғиширига бошлайди.

– Раҳмат, ўғлим, – деди жўрасидан кўз узмай ўтирган Турғунбой ота.

– Арзимайди, отам... Бўпти, кетдик.

– Дори-пори керак эмасми? – шошиб сўради Гулноза.

– Ҳозирча хотиржамлик ва тоза ҳаводан бошқа ҳеч нарса керак эмас. Мен касалхона журналига ёздириб кўяман, эртага ҚВП врачи келиб хабар олади.

Шу маҳал кўзларини юмиди ётган Ўкрабр ота пичирлаб қолди:

– Касалхона эмас...

– А, нима дедингиз, отам?

Турғунбой ота тушунтириди:

– У “касалхона” деган сўзни ёмон кўради. “Шифохона” бўлса бошқа гап.

Шифокор ўрнидан турди:

– Умуман олганда, Алихўжа-Хўжаали. Лекин, майли, талабларга кўра шифохона бўла қолсин. Омон бўлинг, отам.

– Хайр...

– Жахси барингдар...

Шифокор ҳовлига чиқсан маҳал Гулноза сўради:

– Доктор, диагнозни айтмадингиз.

– Инфаркт. Шунинг учун отахонни иложи борича қимиirlatmanлар, ҳуда-бехудага безовтаям қиласверманлар. Гапирганда эса факат яхши гапларни айтинглар. У кишига ҳаяжонланиш, безовта бўлиш мумкин эмас.

Ғўдайиб чиқиб келган шифокор ҳайдовчининг ёнидан жой олди.

– Сизга катта раҳмат, доктор.

– Арзимайди.

Машина кетди. Ҳовлига қайтиб кирган Гулноза чўнтағидан қўл телефонини олиб, эрига қўнғироқ қилди.

Узун гудоклар. Афтидан, Файзула яна бирон зиёфатда бўкиб ичиб ўтириби...

Пешонаси тиришган Гулноза молхона ёнига ўтиб, қизига телефон қилди.

– Аданг қалай?

– Вой, ҳозиргина гаплашдим, – шубҳали тарзда жудаям тез жавоб қайтарди Ноила. – Соппа-соғлар. Сизни сўрадилар. Кейин кечкурунга бир чўқим ош қилиб қўй, ота-бала биргаликда еймиз дедилар.

– Ундай бўлса яхши, – ноилож қизининг йўриғига юрди Гулноза. Кейин Ўктабр амакининг ётиб қолганлигини айтди.

– Унда сиз яна бир-икки қун қоласиз шекилли, а, ойижон?

– Ҳа, шундай қилмасам бўлмайди.

– Сиз bemalol, ойижон! Бизни ўйламанг. Келишганимиздай мен эртага тушдан кейин йўлга чиқаман.

– Яхши. Айтгандай, телефон қилганимнинг сабаби, мабодо сенда Коммунанинг телефони йўқми?

– Қайси Коммуна?

– Ўктабр бобонгнинг қизини айтяпман. Уч-тўрт йил бурун интернетданми топдим дегандай бўлувдинг-ку.

Ноила эслади:

– Ўшанда топгандим. Почтасига хат ёзгандим. Инглизча жавобам келганди. У пайт Коммуна опа Латвияда эди. Шенген визам бор, яқинда Финляндиягами, Швециягами ўтаман деяётганди. Кейинги хатим ўзимга қайтиб келди. Коммуна опа электрон почтасини ёпиб ташлаган экан. Бошқа очган бўлса керак.

– Яна излаб топсанг бўладими ўша интернетингдан?

– Уриниб кўрса бўлади. Лекин бу энди гарам ичидан игна қидиргандай гап, ойижон. Коммуна опа нимага керак бўлиб қолди?

– Чақирсакми дегандим. Инфаркт билан ҳазиллашиб бўлмайди. Топсанг, ваҳима қилмасдан, ётиғи билан тушунтириб хат ёзиб юбор ё телефон қил.

– Хўп, ойижон.

– Эртагача, қизим. Ошни тирик қилма, аданг ётиш олдидан газ сув ичса кечаси безовта бўлади.

– Биламан, ойижон. Газ сув ошқозондаги гуручни шишириб юборади... Эртагача.

\* \* \*

Қабулхонага ҳовлиқиб кириб келган Дилобар на салом бор, на алик, Муқаддамни шошириди:

– Тез хонани очинг! Нарсам қолиб кетганди, олишим керак.

Муқаддам ҳайрон бўлди:

– Эшик муҳрланган-ку.

Дилобар сумкачасидан бир парча қоғоз чиқариб кўрсатди:

– Манавини терговчи берди. Кейин эшикни меҳмонхонангиз печати билан яна печатлаб қўяркансиз. Бўлинг тезроқ! Шошиб турибман.

Муқаддам терговчи берган қофозни олиб кўрди. Дарҳақиқат, бу фуқаро Д.Одиловага муҳрланган хонадан ўзининг шахсий буюмини олиш учун берилган рухсатнома эди.

Муқаддам бориб эшикни очди. Икковлон хонага киришди.

Дилобар хонани кўздан кечирди, стол-стуллар тагини қараган бўлди:

– Қаерга тушиб қолган экан-а?

Муқаддамнинг синган дераза ёнига келиб, ташқарига қараётганини кўрган қиз тез ювиниш хонасига ўтди-да, сумкасидан каттагина қора салафан халта чиқариб, ванна тагидан суғуриб олган дипломатни халтага жойлади.

– Топдим!

Муқаддам шу томонга ўгирилди:

– Бўлдими?

– Бўлди. Бўпти, мен чопдим!

Дилобар шошиб хонадан чиқди ва шундок йўлакда ўзини кутиб турган Жавлон Сулаймоновга урилиб кетди.

– Хой! Кўзми бу ё пўстакнинг тешигими? – Бирдан терговчини таниб қолган қизнинг нафаси ичига тушиб кетди: – Вой, бу сизми?

– Демак, асосий мақсад дипломат бўлган, шундайми, Одилова?

Дилобар терговчига анграйиб қараб қолди.

– Саволимни қайтараман: демак, асосий мақсад дипломат бўлган, шундайми, Одилова?

Нихоят қиз ўзига келди, иложи борича беписандлик билан гапиришга уринди:

– Нима деяпсиз, тушунмаяпман, ўртоқ терговчи? Қанақанги дипломатни айтяпсиз?

Жавлон қора халтага ишора қилди:

– Манавининг ичидағини. Ҳар қалай, иккита қалам билан битта лаббўёқ бунча жойни эгалламаслигини ўзингиз ҳам тушуниб турган бўлсангиз керак.

Инкор қилиш бефойда эканини англаған Дилобар хужумга ўтди:

– Тўғри, бунинг ичида дипломат бор. Меники! Ўзимники!

– Наҳотки?

– Ҳа. Нима, менинг дипломат тутишга ҳақим йўқми?

Жавлон истехзоли илжайди:

– Ҳали тўйгаям шуни кўтариб борганман дерсиз?

– Кўтариб борганман.

– Қизиқ, бу ҳақда дугонангиз нима деркин?

– У эътибор бермаган бўлиши мумкин. Чунки ҳамиша икки қўзи осмонда бўлади. Бунинг устига худди мана шундай эди, сумканинг ичида эди.

– Эҳтимол, эҳтимол.

– Энди кетсам бўладими?

– Бир дақиқа. Марҳамат қилиб айтсангиз, дипломат ичида нима бор?

Дилобар сира иккиланмасдан жавоб қайтарди:

– Ўзимнинг нарсаларим. Шахсий нарсаларим.

– Ҳар қалай, аниқроқ айтсангиз дегандим. Мана, – терговчи ўзларини ажабланиб кузатиб турган Муқаддамга ишора қилди. – Меҳмонхона ходимаси фуқаро Латипова иштирокида очиб кўрамиз. Тўғри айтсангиз, ўзингизники, ҳалол. Лекин нотўғри айтсангиз, бу ҳақда гувоҳимиз иштирокида далолатнома тузишимизга тўғри келади.

– Дипломатда менинг... – Дилобар чайналиб қолди. – Менинг... қисқаси, озроқ пулим бор.

– Озроқ деганингиз қанча? Қандай қийматдаги купюралар?

– Эсимда йўқ. Лекин бу бир умр йиғиб келаётган жамғармам.

– Уни доим ёнингизда олиб юрасизми?

– Ҳа. Камбағалнинг моли ёнида бўлгани маъқул.

– Унда марҳамат қилиб, дипломатни очсангиз. Гувоҳ иштирокида.

Дилобар ноилож сумкасидан дипломатни олди, очмоқчи бўлди, бирдан ниманидир эслаб қолгандай терговчига қаради:

– Қулфланган.

– Ростдан-а? Ҳойнаҳой, калити тухумнинг ичиди, тухум сандикда, сандик ертўлада, ертўла дарёнинг тагида бўлса керак. А?

– Калит йўқолган, – ўзига келиб улгурган Дилобар пинак бузмасдан жавоб қайтарди. – Шунинг учун буни ўзимам очолмай юрибман. Анчадан бери.

– Балки дугонангизни ёрдамга чақиравмиз. Ахир болалар уйида унинг лақаби “Тамарка қулфбузар” бўлган. Шундайми? У оддийгина соч тўғнағичи билан ҳаттоки инглизча қулфларни ҳам оча олади.

Бунақа гапларни кутмаган Дилобар эсанкираб, аранг:

– Лекин сиз... сиз... – дея олди.

Жавлон жиддий оҳангга ўтди:

– Одилова, сичқон-мушук ўйинини бас қилинг.

Қўллари титрай бошлиган Дилобар ноилож дипломатни очди. У даста-даста эски газета-журналларга тўла эди. Буни кўрган Дилобар эс-хушидан ажralган одамдай анграйиб қолди.

– Яхши жамғарма экан. Энг муҳими – ишончли. Одилова, мен билан боришингизга тўғри келади.

– Қаерга?

Терговчи Муқаддамга қаради:

– Хонани тартибга келтиришингиз мумкин. Келтирилган зарар, яъни синган ойна айбдорлардан ундириб олинади... Марҳамат, Одилова. Ўзингизнинг дипломатингиз билан.

Зўр бериб вазиятдан чиқиб кетиш йўлларини ўйлаётган Дилобар шуурсиз тарзда терговчининг олдига тушди.

Ташқарида уларни машина кутиб турган экан, бир зумда шаҳар ички ишлар бошқармасига етиб келишди.

Терговчининг хонасида иккала ҳайдовчи, Тамара ўтирган экан. Дилобарни бошлиб кирган Жавлон кафтларини бир-бирига ишқалаб олгач, мақсадга ўтди:

– Хонимлар ва жаноблар. Энди бу ишни ёпсак ҳам бўлади. Ўйлашимча, ҳаммаси жой-жойига тушди. Шундай қилиб, Дилобар Одилова, сиз шерингиз Тамара Маратова билан олдиндан жиноий тил бириктириб, Ғиёс Умиров ва Акбарали Мўминов бошқараётган “КамАЗ” юк машинасини овлоқ жойда кутиб тургансиз. Чунки сиз бу ҳайдовчилар катта миқдордаги нақд пулни олиб кетаётганидан хабардор бўлгансиз.

Ҳеч кимни писанд қилмаётгандай гердайиб ўтирган Дилобар пичинг қилди:

– Ўзимда ғойибдан билиш таланти борлигидан бехабар эканман, ўртоқ терговчи. Аммо қайтариб айтаман: биз тўйда эдик. Бизни хафа қилмоқчи бўлишди. Биз қочдик.

– Буниям текшириб кўрдик. Ўша оқшом сизлар турган жойдан ўн беш километр радиусда биронта ҳам тўй бўлмаган. Ундан ортиқ жойдан пиёда келишингизни эса тасаввур этиб бўлмайди. Хуллас, сизлар “КамАЗ”га чиқиб оласизлар. Режангиз бўйича бирон жойда тўхтаб, овқатланишларингиз, ана ўшанда сизлар ҳайдовчиларнинг овқатига клофелин қўшиб беришларингиз керак эди. Ҳайдовчилар ухлаб қолгач, дипломатни олиб кўздан ғойиб бўлардингизлар.

– Бу чўпчагингизга биронта далилингиз борми? – эътиroz билдириди Дилобар. – Ё шундай тўқиб кетаверасизми?

– Давом этамиз. Аммо йўлда ҳайдовчи тўхтамайди. Сизлар ноилож “Кирғоқ” меҳмонхонасиагача бирга келасизлар ва ўз режаларингизни шу ерда амалга оширишга уриниб қўрасизлар. Дарвоке, мен сизга меҳмонхона қаршисидаги уйда яшайман деб айтгандим. Ўша кечаси ҳам сизларнинг меҳмонхона деразасидан ўз ихтиёрларингиз билан, ҳеч қандай пичоқ тирашларсиз ошиб ўтаётганилгингизни кўрганман.

– Балки демидрол сўраб навбатчи аптекага югуриб борибам келгандирман?

– Ўйқ, Одилова, сиз ишни пухта қиласиз. Ахир болалар уйидан сўнг тибиёт коллежини битирган дипломли ҳамширасиз. Дориларни яхши биласиз. Бу сафар ҳам олдиндан сумкангизга солиб олган кичкинагина салафан халтачадаги клофелин моддасининг бир қисмини ҳайдовчи Ғиёс Умирова берасиз, қолганини эса Акбарали Мўминовга. Аммо шошганингиздан салафан халтачани йўқ қилишга улгурмайсиз. Мана, экспертиза хulosаси. Сумкангиздан топилган кичик салафан халтачада ҳақиқатан ҳам клофелин моддасининг юқи қолган. Бу дори эса ҳайдовчилар ошқозони ва қонида топилган уйқу дориси билан бир хил таркибда.

– Вой муғамбир-эй! – деб юборди Ғиёс беихтиёр.

Дилобар бу луқмага парво ҳам қилмади:

– Сизда бунақанги салафандардан йигирматасини сумкамга солиб қўйиш имконияти бор эди. Бу далил эмас, уюштирилган тухмат, холос. Ўртоқ терговчи, менга қарши тўплаган далилларингиз бир пулга қиммат эканлигини ўзингиз ҳам яхшигина билиб турибсиз шекилли. Шундай экан, оғзингизни чарчатиб, ортиқча гап қилишнинг нима кераги бор. Гапбозликни тўхтатиб, уй-уйимизга тарқала қолайлик.

Терговчи, қизнинг ўзини совуққон тутишига қойил қолгандай бош чайқаб қўйди:

– Давом этаман. Фиёс Умиров уйқуга кетган маҳал сиз ҳар эҳтимолга қарши дипломатни текшириб кўришга қарор қилдингиз. Бунинг учун “Тамарка қулфузар”нинг маҳорати қўл келди. Дипломатни очдиларингиз. У ҳақиқатан пулга тўла эди.

Дилобар эътиroz билдиришга уринди:

– Лекин...

Аммо бу сафар терговчи уни гапиртирмади:

– Иш битгандай эди. Аммо машина эшигини қулфлашга кетган Акбарали Мўминовнинг қайтиб келиб қолиши, айниқса унинг сизларни бу ахволда кўриши яна режангизни бузиб юборди. Сизлар дипломатни олиб чиқиб кетмоқчи бўлдингизлар. Аммо Акбарали Мўминов қаттиқ қаршилик кўрсатди. Тўполон кўтарилди, дераза ойнаси синди. Хонага одамлар бостириб киришди. Шунда сиз кўрқоқ олдин мушт кўтарар қабилида иш тутиб ҳайдовчиларни ўзларингизни зўрлашга уринишда айблашга ўтиб, дод-вой кўтардингиз. Дугонангиз сизга қўшилди. Сиз шу тўполон пайти дипломатни ваннанинг тагига яшириб қўйдингиз.

Фиёс ўрнидан ирғиб туриб кетди:

– Вой палакат-эй!

Бесабр ҳайдовчига ўқрайиб кўз ташлаб қўйган Дилобар иложи борича хотиржамлик билан терговчига мурожаат қилди:

– Кейин сиз кўзбойлоғичлик қилдингиз, яъни ўша сумманинг эгасига айландингиз, шундайми? Ўроқда йўқ, машоқда йўқ, хирмонда ҳозир дегандай, а?

Қизнинг нимага шама қилаётганини тушунган Жавлон кулиб қўйди. Ҳа, Одилованинг асабларию, ўз манфаати учун тез фикрлашига қойил қолса бўлади.

– Адашдингиз. Мени сизнинг зўр бериб яна ўша хонага боришга баҳона қидиришингиз шубҳалантирди. Шунда ўзимиз бориб хонани текширидик. Дипломатнинг қулфи бузилганлиги, айниқса унинг ушлагичида сизнинг бармоқ изларингиз борлиги мени ҳайрон қолдирди. Шунда мен ўйлай бошладим.

Бу сафар киз истехзо қилишдан ўзини тийиб туролмади:

– Наҳотки?

– Ҳа, шундай... Биз пулни баённома асосида дипломатдан олиб, ўрнига эски газета-журналлардан солиб қўйдик. Қолгани биз кутгандай бўлиб чиқди. Сиз қопқонга тушдингиз, Дилобар Одилова.

– Асло! – кескин бош чайқади киз. – Агар тўғрисини айтадиган бўлсам, манави тақа мўйлов ҳайдовчи, Фиёсмиди исмингиз, хуллас, шу одам мен сени севиб қолдим, иккаламиз узоқ-узоқларга қочиб кетамиз, мана, топганим сенини, шу кеча мен билан қол, деб ялиниб-ёлвориб туриб олди, тиз чўқди. Дипломатни оёқларим тагига ташлади.

– Ҳой, ҳой, тухмат қилма! – бақириб юборди юзига қон тепчиган Фиёс. – Тухмат қилма!

– Нега энди тухмат бўларкан? Мана, – қиз дугонасига ишора қилди. – Гувоҳим бор. Тўғрими, Тамара?

Одатига кўра шифтга қараб ўтирган Тамара дарров дугонасининг гапини маъқуллади:

– Тўғри.

– Ана, кўрдингизми, ўртоқ терговчи, – тантанавор тарзда гапида давом этди Дилобар. – Биз аёллар бир кўришда муҳаббатга ишонамиз, ҳатто жонимизни курбон қиласиз. Соддамиз-да, соддамиз. Эркаклар бўлса айёр, маккор.

Терговчи эътиroz билдириди:

– “Содда” деган таъриф сизга тўғри келмас-ов.

– Нега энди? – таслим бўлишни хаёлига ҳам келтирмасди Дилобар. – Мана ҳозир бошлиғингиз номига қарсиллатиб битта ариза ёзаман, аслида воеа қандай бўлганини баён қиласан. Гувоҳим бўлса бор. Мен терговчининг кўкнори хаёллари курбони бўлдим деб ёзаман. Шуми хотин-қизларга ҳурмат деб ёзаман! Орада сизнинг обрўйингиз тушгани қолади.

– Менинг обрўйим учун ташвиш чекмай қўя қолинг, Одилова.

Ранги кўкара бошлаган, тез-тез нафас олаётган Дилобар ҳужумга ўтди:

– Сиз ҳам бўлмаса менинг айбимни исботлайдиган тузукроқ далил то-пинг! Тўй бўлмаган эмиш! Бўлмаса нима қипти? Эҳтимол мен у ерга севгилим билан учрашувга чиққандирман. Боши очиқ қиз бўлсан. Кейин уришиб қолганман-у, ўйлга чиқиб кетаверганман. Дугонам билан. Ҳайдовчиларга эса “Тўйдан келяпман” деб қўя қолганман. Бу гўрсўхталарнинг бири бирдан мени севиб қолиб, муҳаббати исботига дипломат совға қилиб юборишини туш кўриб билибманми?

Қизга кўзларини катта-катта очиб қараб турган Фиёс:

– Ўзиям лекин илоннинг ёгини ялаган хотин экансан! – деб юборди бе-ихтиёр.

– Ўзлариям фаришта эмас шекилли, – йигитга мазахомуз қаради Дилобар. – Кечагина “қулингиз бўлай” деб тиз чўкиб турган, ох, бир кўришда севиб қолдим, ёндим-куйдим деб оёқларим тагида эмаклаб юрган ким эди? Дарров ўзгариб қопсиз-да, а?

Фиёс, кап-катта эркак, довдираб, титраб-қақшаганча Жавлонга қаради:

– Ўртоқ терговчи! Мен ҳозир... мен ҳозир бу тухматчи хотинни бир бало қилиб қўяман.

– Ҳеч нарса қилолмайсан! – пинак бузмай ўтираверди Дилобар. – Агар мен ҳақимда яна битта ёмон гап гапирсанг, расмийлаштириб қўяман, кейин бир пок қизга тухмат қилганинг учун маънавий зарар тўлаб юрасан!

Фиёс алам билан қўл силкиди:

– Э, агар сенки пок қиз бўлсанг...

Дилобарнинг туси ўзгариб келаётганани кўрган Жавлон столни уриб қўйди:

– Бас! – Ҳайдовчилардан сўради: – Пул бутми?

– Ҳа. Ўзим санаб кўрдим, – деди Акбарали.

– Унда аввал меҳмонхонага бориб, синган ойна пулини тўлайсизлар. Кейин

эса... кетишиларингиз мумкин... Сизларнинг эса, қизлар, қолишиларингизга тўғри келади.

– Асос?

Жавлон ўзига ўқрайиб қараб турган Дилобарга қалингина папкани кўрсатди:

– Бу ҳайдовчиларнинг аризалари, суд-экспертиза хulosалари. Асос етарли.

Қиз ҳайдовчиларга беписанд қаради:

– Сизлар ҳали менинг совунимга кир ювмаган экансизлар. Ариза ёзганингга шундай пушаймон қилдирайки... Ҳали кўрасанлар, охири бориб ўзларинг айбор бўлиб қоласанлар. Уйларингга бостириб бораман! Хотинларингнинг соchlарини юламан! Бутун эл-юрт олдида шундай шармандаи шармисор қиласанки, бош кўтариб юролмайдиган бўласанлар.

Иккала ҳайдовчи турган жойларида қотиб қолишиди. Ахийри Ғиёсдан садо чиқди:

– Э-э... Ўртоқ терговчи. Кўйинг, шу Худонинг балоси билан тенглабишиб юрамизми? Кўриб турибсиз-ку. Биз иш одами бўлсак. Терговга, судга қатнаб юришга... Келинг, аризани қайтариб ола қолайлик.

Дилобар мамнун илжайди:

– Қовоқ каллангиз энди ишлай бошлади.

Жавлон ҳайрон бўлди:

– Жиддий айтяпсизми?

– Ҳа, ўртоқ терговчи. Кўйинг, оғримаган қулоғимизга олтин исирғанинг нима кераги бор... Кўриб турибсиз-ку... Қайтариб бера қолинг аризамизни. Биз ҳамма даъвойимиздан воз кечдик...

Дилобар терговчига кулимсираб қаради:

– Фуқаролар қалласи ишламай турган пайти ёзган аризаларини, кейин, эсҳушлари жойига қайтганидан сўнг қайтариб олишга ҳақлидирлар. Уларнинг бу ҳуқуқларидан фойдаланишларига қаршилик қилмассиз, ўртоқ терговчи...

Иложсиз аҳволда қолган Жавлон қўлларини икки ёнга ёйди.

Аризаларини қайтариб олишган ҳайдовчилар меҳмонхонага ўтиб, жой, синдирилган ойна ҳақини тўлашгач, шоша-пиша шаҳарни тарк этишди.

### *Давоми бор*



## Дилбар МАҲМУДОВА

Ўзбекистонда хизмат кўрсатган журналист. 1936 йилда тугилган. Ўрта Осиё давлат университетининг (ҳозирги ЎзМУ) филология факультети журналистика бўлимини тугатган. Унинг “Ярим аср ёнма-ён”, “Хар мактубда умр лаҳзаси” китоблари нашр этилган.

# ҲАЛИМА

*Эссе*

## ТАҚДИР

1990 йил. Мен ишлаётган газетага (ҳозир бу газета “Ўзбекистон овози” деб номланади) фарғоналик ногирон аёл Кумушхон Салоҳиддиновадан изтиробли хат келди. Бундан ўттиз йил бурун Кумушхон ая дала шийпонидаги боғчада энагалик қилган экан. Бир қуни боғча биноси бирдан қулай бошлайди. Энага бино ичидағи йигирмата болани бирин-кетин кўтариб ташқарига олиб чиқади-ю, ўзини асрой олмай хари тагида қолади. Умрбод ногирон бўлиб, умри шифохоналарда ўтади.

Яхши одамларнинг кўмаги билан Фарғона шахридаги қўп қаватли уйлардан бирида бошпана топади. Эри ундан хабар олмайди. Ўғил ва қизи ёш бўлишгани учун отаси қарамоғида, ўгай она қўлида қолишади. Кумушхон ая ўттиз йил мобайнида ҳам фарзандлари, ҳам оиласи, ҳам қишлоғидан ажralиб, ўз ёғига ўзи қовурилиб умр кечиради. У ўлимдан қутқариб қолган болаларнинг ота-оналари, ҳамқишлоқлари, қўни-қўшниларининг ҳам хаёлидан кўтарилиб кетади. У олаётган ногиронлик нафақаси уй-жой ҳақи, дори-дармонига, ош-овқатига аранг етади.

Мактубни ўқиб, юрагимга ўт тушди. Кумушхон аяга ёрдам бериш истаги борлиғимни қоплади. Тошкент-Фарғона, Фарғона-Тошкент йўлларида гоҳ самолётда, гоҳ поездда, гоҳ автобусда неча бор йўл босдим. Кумушхон ая масаласида турли ташкилот раҳбарлари эшигига сарғайиб ўтирдим, уларнинг биридан иккинчисига югурдим... Ҳаммадан ҳам мени ая ўлимдан қутқариб қолган болалар, уларнинг ота-оналари билан учрашув ҳаяжонга соларди. Ўттиз йил ўтиб, ўша қизалоқлар, болакайлар бир оиланинг бекаси ва беги бўлиб етилишибди. Лекин уларнинг бирортаси ўз ҳалоскори ҳақида ота-оналаридан ҳеч нима эшлишмаган. Ота-оналарнинг ўзлари ҳам бедарак кетган ҳамқишлоқлари тақдири билан мутлақо қизиқишимагани кўриниб турарди.

Шундай оқибатсизликка дучкелганим сайин Кумушхон Салоҳиддиновага ёрдам бериш истаги кучаяр эди. Лекин бир ўзимнинг қўлимдан нима ҳам келарди?! Шу боис суюнчиғим – газета жамоаси билан биргаликда ҳаракат қилдим.

Тахририят аъзоларининг фикр-мулоҳазалари, маслаҳатлари, кўрсатмалари асосидаги журналистик тадқиқотим орадан бир йил ўтиб, ўз натижасини берди. Ногирон Кумушхон ая Салоҳиддинованинг нафақаси оширилди. У “Москвич” машинаси билан мукофотланди. Ўзи туғилиб-ўсган, меҳнат қилган жамоа хўжалиги чегарасидан саккиз сотих ер ажратилиб, икки хона, бир айвонли уй қуриб берилди. Энг муҳими, бундан ўттиз йил илгариги жасорати учун “Хурмат белгиси” ордени билан тақдирланди.

Кумушхон Салоҳиддиновага аталган орденни унинг олтмиш ёшга тўлиши ва ҳовли тўйи муносабати билан топширишни режалаштиридик.

Ўша куни Тошкентдан республика хотин-қизлар қўмитаси раиси Ҳалима Худойбердиева, Республика “Дугоналар” радио эшиттириши мухаррири Матлуба Исломова, Ўзбекистон телевидениеси “Нафосат” кўрсатуви мухаррири Тамара Тошбоева ва мен Фарғонага жўнаб кетдик. Фарғона аэропортидан тўғри ая ётган шифохонага бордик.

Ҳалима Худойбердиеванинг келишидан хабар топишган чоғи, шифохонада яхшигина тайёргарлик қўрилган эди. Фарғонага Кумушхон ая масаласида ҳар борганимда аяни йўқлаб шифохонага келганимдагидан кўра бу ердаги буғунги ҳолат тамом бошқача эди. Ҳаммаёқ ярақлади. Дераза токчаларига териб қўйилган туваклардаги ранг-баранг гуллар барқ уриб очилган, шифокор, ҳамширалар эгнида оппок янги халатлар.

Кумушхон аяни бошқа палатага кўчиришибди. Буниси кенг ва кўркам, оёқ остига гиламчалар тўшалган. Аяни улуғ айём кунлари билан табриклишни бошлаб юборишган шекилли, стол устида гулдасталар, совғасаломлар.

Ҳалимахон беморни биринчи бор қўриши эди. Кумушхон ая билан қадрдонлардай қучоқлашиб қўришди, ҳол-аҳвол сўради. Олдиндан режалаштирилгандай эртасига Кумушхон ая ҳовлисида тўй-томоша, биз тайёргарлик қандай бораётганини билиш учун унинг қишлоғига шошардик. Шифохона бош врачи ва даволовчи шифокор бизнинг бу режамизга қарши чиқишиди. “Қиши ойи, кун совуқ, ая шамоллаб қолиши мумкин, орденни топшириш маросимини шу ерда ўтказа қолайлик”, дейишиди. Қишлоққа бормасликка аяни ҳам кўндириб қўйишганди. Буни эшитиб хафа бўлиб кетдим.

Жисми жони тўққиз марта жарроҳ тифидан ўтган, баданида соғ жойи қолмаган, ўттиз йилдан буён фақат иякларига тиralганича яшаб келаётган аёлнинг ҳаёти қил устида эканлиги рост. Лекин унинг фақатгина жисми эмас, кўнгли ҳақида ҳам қайғуриш керак эмасми? Ахир, ҳар учрашганимизда Кумушхон ая қишлоғини қўмсаётганини, болаларини соғинганини айтарди. Уларни бир қўриб ўлсам армоним йўқ, дер эди. Мен унинг кўнглида ана шу орзу чироғини ёққим келарди, армонларини ушалишини истардим. Жасорат ўлмайди, у қачон бўлмасин ўз қадр-қимматини топади, бу қадр

топиш тонгги аямизни унуганлар ва унумаганлар хузурида ёришишини истардим. Бу ният назаримда ҳаммасидан баланд эди.

Ҳаяжонимни босолмасдим. Бемор хонасидан бошқалар чиқиб кетишлиари билан хайрлашиш учун ая ёнига бордим.

– Мен бутунок Тошкентга кетаман. Қайтиб Фарғонага келмаганим бўлсин. Сиз нафақат ўзингизнинг, балки менинг ҳам орзуларимни пучга чиқардингиз, – дедим Кумушхон аяга қараб ва эшикка юзландим.

Шунда Кумушхон ая йиглаб, мени орқамга қайтарди.

– Сизни қиёматли синглим деганман, бораман, албатта, бораман.

Аяни кўндирганимдан Ҳалимахон хурсанд бўлиб кетди. Тамара, Матлуба ва мен ўша заҳотиёқ Миндон қишлоғига жўнаб кетдик. Эртага аямизнинг тўй-томушасига республикамизнинг ҳамма жойларидан меҳмонлар таклиф этилганди. Уларни муносиб кутиб олишга тайёргарлик қандай бораётганидан хабардор бўлишга тўйбоши сифатида ҳам бурчли, ҳам мезбон эдик.

Фира-ширада аямизнинг катта ҳовлисига кириб бордик. Дошқозонлар осилган, ҳовли саҳнини икки забардаст йигит текисляяпти, ичкарида Кумушхон аянинг қизи Марҳабат хўжалик хотин-қизлар кенгаши раиси билан хоналарни жиҳозлашяпти. Хоналарга шолчалар солинди, кўрпачалар тўшалди, печка қурилди. Биз ўша уйда тонг оттиридик. Тасаввур қилинг-а, шунча тайёргарлик кўриб, орзиқиб кутилаётганда Кумушхон ая келмай қолса нима бўларди?

Эртаси куни “Тез ёрдам” машинасида шифокорлар кузатувида Кумушхон ая кириб келди. Ҳамманинг эътибори аяга қаратилган. Ҳамма деганим – бугунги шодиёнага тўпланганлар орасида мухбирлар, вилоят раҳбарларидан тортиб, аяни табриклаш учун келган болалар уйлари тарбияланувчилигача бор. Қишлоқ ахли гўё Кумушхон ая ҳовлисига кўчиб келгандек.

Қўш карнай-сурнай, чилдирмаларнинг бадабанги, Раҳима Мазоҳидованинг “Хуш келдингиз” чорлови остида Кумушхон Салоҳиддиновани бундан ўттиз йил бурун чиқиб кетган жонажон Миндон қишлоғига, у учун атаб солинган ҳовли-жойига кўтариб олиб киришаётганида кўнгли бўшашиб, кўзига ёш олмаган одам қолмади.

Ҳалимахон икковимиз бир чеккада бу ҳаяжонли дамларни кузатиб турардик. Ҳалимахон узок қараб туролмади. Қўлимдан ушлади-да, Кумушхон аяни қуршаб олган, дийдорлашаётган давра томон бошлади. Қўлидаги қутичадан “Хурмат белгиси” орденини олиб аянинг кўксига тантанавор тақиб қўйди. Бўлди қарсак, бўлди қарсак. Ҳа, у “Хурмат белгиси” орденини эгасига шифохонанинг кичкинагина палатасида эмас, балки эл-юрт, жамоатчилик олдида топширди.

– Азиз Кумушхон ая, мен бугун сизга халқимизнинг иззат-икроми, ҳайрату муҳаббатини олиб келдим, – дея гап бошлади шоира. – Сизнинг инсоний жасоратингиз олдида элнинг ҳар бир фуқароси, дехқону хунарманди, олиму, ижодкор, ишбоши, элбошиларигача таъзимда бугун. Сизга шахсан Президентимизнинг иззату эҳтиромларини олиб келдим. Пойтахтда ўтган нуфузли йигинларимизнинг бирида Президентимиз томонидан айтилган бир ибратли фикрни такрорлашни истардим. Унинг мазмуни шундай: “Эл-

лик ёшдан ошган одам шошилмоғи керак. У ўзидан кейингиларга нимадир қолдирмоққа, бирор яхшилик қилиб улгурмоққа интилиши керак”.

Азиз онахон, сиз жудаям шошилгансиз. Сиз ҳар кимнинг қўлидан келмайдиган яхшиликни ўттиз ёшга етмай бажариб улгургансиз. Бир эмас, икки эмас, йигирма болани ўлимдан қутқариб қолгансиз, аммо ўзингизни... Мен сизнинг бу аччиқ қисматингизни эъзозлашга арзийдиган тақдир, деб биламан. Ўша йигирма гўдак бугун йигирма навқирон эркак, аёл. Инсоф, адолат юзасидан гапирадиган бўлсақ, шу йигирма бақувват қўллар бугун сизни ардоқлаб, бошларида кўтариб юрмоқлари лозим. Нафақат улар, биз, бошқалар, ҳаммамиз. Кимки имонни, ҳалолликни бош устида кўтарар экан, сизни бош устида кўтармоғи ҳам қарз, ҳам фарзди”.

...Орадан беш ой ўтиб, Наврўз кунларидан бирида Кумушхон ая оламдан ўтди. У қадрланиб кетди. Жасорат унутилмаслигини, яхшилик ерда қолмаслигини, кеч бўлса ҳам унинг қайтими бўлишини ўз тақдирни мисолида кўриб кетди...

...1995 йил. “Гулистон” журналининг ташкил топганига етмиш йил тўлиши муносабати билан таҳририят катта анжуманга тайёргарлик кўрарди. Анжуман арафасида журнал бош мухаррири Тилаб Маҳмудов кўлимга таклифнома бериб, йиғилишга Ҳалима Худойбердиевани таклиф қилишимни айтди.

Биргуруҳижодкора ёллар юбилейни нишонлашучун йиғилаётган “Шарқ” матбаа нашриёти клубига кириб бораётгандик, кимдир Ҳалимахоннинг кўлига бир даста гул тутқазди. “Гулистон” журнали мухаррири ўринбосари Михли Сафаров бошлиқ бир гуруҳ ходимлар шоирани олқишлишади. Мен таҳририят ходимларининг шоирани бу қадар самимий, қизгин кутиб олишаётганидан хурсанд эдим...

Бир куни Тилаб акам ишдан одатдагидан хурсанд қайтди.

– Эртадан бошлаб Ҳалима Худойбердиева бизнинг “Гулистон” журнализмизда иш бошлайди, – деди.

У кишидан ҳар куни янги бир гап эшитардим. Бугун “Хотин-қиз ижодкорлар, айниқса, ёшлар таҳририятимиз эшигини қоқадиган бўлиб қолишибди”, деса, эртаси “Худойбердиеванинг журналга келгани муносабати билан Ўткир Ҳошимов, Саъдулла Ҳакимлар қўнғироқ қилиб табриклишади”, деяр, индинига Ҳалимахон ҳақида яна янги бир хабар эшитардим...

Шу кунлар газета-журналларга обуна вақти яқинлашиб қолган, обуначилар сонини ошириш ҳар бир таҳририятнинг ўқувчилар билан яқиндан мулоқоти, учрашувларига ҳам кўп жиҳатдан боғлиқ эди. Шу мақсадда “Гулистон” журнали ижодий жамоасидан Тилаб Маҳмудов, Ҳалима Худойбердиева ва Асқар Маҳкам сафарга отланишди. Мен ҳам уларга қўшилиб олдим.

Сафарни Бухородан, аниқроғи, Фиждувон шахридан бошладик. Кейин Намангандаги сафар қилдик.

Сафарда одамлар бир-бирини кашф этар экан. Биз маҳаллаларда бўламизми, таълим масканлари талабалари, корхоналар, қишлоқ хўжалиги тармоқлари ишчилари даврасидами, қаерга бормайлик, Ўзбекистон халқ шоири Ҳалима Худойбердиевага бўлган эҳтиром, меҳр ва самимият-

ни кўрардик. Кўнгли беғубор қишлоқ одамлари шоирага бояги-боягидек ҳурмат ва эҳтиром билан қарашарди.

Қарияларнинг Ҳалимахонни иззат қилиб кутиб олишларини, талабаларнинг шоира билан расмга тушиб олиш иштиёқларини, дастхат ёздириб олиш учун узундан-узун навбат кутиб турганларини кузатарканман, шоира ҳамон ҳалқимиз кўзи устида, қалбида эканини туйиб, дилим яйради.

Мен Ҳалимахон билан бирга ўтган сафар кунларимни ҳамон ёқимли хотиралар сифатида ёдимда сақлаб юраман. Бизни бир-биримизга иссиқ кўрсатган, яқинлаштирган лаҳзалар умримдаги энг гўзал кунлар бўлиб қолди. Ҳаётимга Ҳалимахон билан бирга сермазмун сухбатлар, ширин ва гўзал дийдор онлари кириб келаверди. Бу сухбатлар, дийдор онлари бизни бир-бирини соғинадиган, ўзаро тез-тез қўнғироқлашадиган қадрдонларга айлантириб борди.

Менда Ҳалимахон билан бўладиган ҳар бир учрашув, сухбат давралари ни муҳрлаб борадиган кундалик тувиш нияти туғилди.

Қўйида ўқийдиганинг шоира билан учрашувлардаги, дилкаш давралардаги, қолаверса телефондаги сухбатларимиз муҳрланган кундаликларимдаги битиклардан намуналар.

**2012 йил 1 май**

## ҲАЙРАТ

Янги ТошМИнинг ревматология бўлими. Ҳалимахон аввалдан қўнғироқ қилмай келганимдан ачинади.

– Кетаяпман, десангиз-ку, чой дамлаб қўйган бўлардим. Чойсиз гап гапга қовушадими, ҳозир чой олиб келаман, – деб хонадан чиқади.

Ҳеч вақт ўтмай қўлида чойнак билан кириб келади. Мен уни уринтирганимдан хижолат чекаман.

– Чой ичгани эмас, сизни кўргани келдим, – дейман мен. – Биз ўзбеклар шифохонада ҳам ўзбеклигимизни қўймаймиз-да.

Дастурхонда олма, турли шарбатлар, ширинликлар. Ҳалимахон яхши кўрадиган “Наполеон” торти олиб келгандим, кесамиз, пишган товуқни майдалайман, Ҳалимахон нон ушатади, помидор тўғрайди...

– Мана бу таомдан еб кўринг. Ҳозиргина Камола олиб келувди, – дея олдимга буғланган картошка билан ток дўлмасини қўяди.

Биз ундан-бундан татиган бўламиз, чой хўплаймиз, кейин хона бурчагидаги юмшоқ ўриндиққа ўтамиз.

– Дунёда нима гаплар?

– Гап кўп. Шу десангиз бугун Эркин Аъзам қўнғироқ қилиб, “Буюк қушлар” билан табриклади. Мени мақтади, мақтади...

– Сизни нима деб мақтади?

– Э, мени эмас, китобимни, – кулади шоира. – Мақтов ҳам шунаقا бўладими?! Нақ осмонга чиқариб юборди. Энди осмондан ерга тушиб турганимда сиз келиб қолдингиз. Бу гапларни сизга айтаман-да, бошқага

сўзласант, мақтаняпти, деб ўйлади. “Қачон ёзасиз, қандай ёзасиз, сирингизни айтинг”, – деб узок сўзлади. Биз курсдошмиз. Курсдошингдан шундай сўзларни эшитиш одам кўнглини кўтарар, хурсанд қилар экан.

– Ҳа-я, ўзи қачон ёзасиз, қандай ёзасиз?

– Тунда ёзаман. Бир хонада ёлғиз, ўзим билан ўзим гаплашаман, ёзганларимни овоз чиқариб ўқийман, қайтараман, илҳом жўш уриб кетади, яна ёзаман, ёзаман... Шундай кунлардан бирида бошимдаги бир томирим узилиб кетгандай бўлди. Зўриқдимми, ўзимни йўқотиб қўйдим... Қарасам, тонг ёришибди, тонгта ҳамоҳанг менинг ҳам кўнглим ёришиб кетди...

Ҳалимахон сўзлаяпти-ку, хаёлимдан

*...Кундуз юриб ёздим, тун туриб ёздим,  
Ёзганда кўксимга тиг уриб ёздим.  
Дардларимга сиёҳ кор қилмай қолгач,  
Қаламни қонимга ботириб ёздим... –*

сатрлари ўтади.

– Кеча бир танишим мени кўргани келиб кетди. Ажойиб аёл. Эри ичади, ҳеч қаерда ишламайди, ичиб олиб жанжал кўтаради. Оиланинг барча оғирчилиги, болалар тарбияси ёлғиз шу аёлнинг елкасида... Бир вақтлар улар севишиб турмуш қуришган. Энди эса эри яшаб яшамайди, ажрашиб ажрашмайди. Шунақа туташ тақдирлар бўладими, опа, сира ажрашиб бўлмайдиган тақдирлар...

*Дунёсига ўт кетсин,  
Дунёсига эртак ҳайф.  
Унда кўнгли аёлсиз,  
Кетаётган эркак ҳайф, –*

деб ёзгандим шундай тоифа эркаклардан зада бўлган аёл номидан. Аёл дунёси бошқача... Аёл ҳар қандай шароитда ҳам жуфтидан меҳр-муҳаббат кутади, ўнгланишига ишонади...

*Кўкармоқ не, билмасдим бу зумгача,  
Кўклаб кетди майса қиёғимгача.  
Боидан оёқ суйиб разм солди ёр,  
Гуллаб кетди боидин оёғимгача.*

Бу – аёл орзуси! Аёл учун эрининг эътибори, меҳри ҳаводек зарур. Бунга сазовор бўлмаган аёл кўнглини ҳеч нарса билан тўлдириб, чоғлаб бўлмайди...

Биз аёллар:

*Ўйлама бу дунёда шундоқ ўтгувчилармиз,  
Лаҳад эшигигача ишиқни кутгувчилармиз.  
Ё севгидан ой янглиг чарақлармиз умрбод,  
Ё севгига умрбод аза тутгувчилармиз.*

Ҳалимахон бугун бошқача эди. Ўзи билан ўзи мушоира қилаётгандек кўтаринки руҳда эди.

*Осмоннинг тўлин ойи қуйганлар орасида,  
Бехато урар ёни қуйганлар орасида  
Зоҳирни чарақласа, ишонманг ботинида  
Ҳалиманинг ҳам жойи қуйганлар орасида.*

– Кўйинг, ундан демант...

– Нега?! Рости шу! Менинг бошқалардан қаерим кам ёки қаерим ортиқ? Одамлар ҳаётига неки дахлдор бўлса, менинг ҳаётимга ҳам дахлдор бўлиши табиий...

Шоиранинг кайфияти симоб устунидай қалқиб туради...

*Кўрдим боз хас бўлган кунни,  
Баландлар паст бўлган кунни.  
Ҳақ юзига чангол солиб,  
Номард йўлбарс бўлган кунни...*

Назаримда Ҳалимахон ўзини-ўзи ўқигиси, ўзини-ўзи эшитгиси келяпти. Янги китоби сабаб бўлаётган табриклар шоирани ўз ижод ва ҳаёт йўлига бир назар солишга ундаяпти... У кўзларини юмиб, дам очиб, баъзан ўйга чўмид, қуилилиб келаётган сатрлари қочиб кетмасдан қувалаб, тутиб олгиси келяпти.

Бу – ўзидан-ўзи қониқиши, ўзидан-ўзи завқланиш дамлари эди. Бу – ижод қувончи эди. Мен уни жим эшитаман...

Ҳаётимда менга икки ижодкор билан яқиндан мулоқотда бўлиш бахти насиб этди. Бири шоира Ҳалима Худойбердиева бўлса, иккинчиси ёзувчи, олим, умр йўлдошим Тилаб Маҳмуд. Ҳалимахон “Ярим аср ёнма-ён” китобимни алқаб, кўп тилга олади.

– Агар турмуш йўлдошим ижодидан, сўзларидан ҳайратланмаганимда бу китобни ёза олмас эдим, – дейман мен.

Бир куни ишдан қайтсан, мендан аввал уйга келган Тилаб ака болаларимизга бирор овқат пишириб бериш учун ошхонада куймалашиб юрибдилар. Маслаҳатлашиб, шавла қилмоқчи бўлдик. Биримиз сабзи тўғрадик, иккинчимиз пиёз арчдик...

– Хаёлимни бир эртак забт этган, ҳеч тинчлик бермаяпти, – деб қолди Тилаб Маҳмуд.

Мен қанақа эртаклигига қизиқдим. Тилаб ака ҳикояни бошлади. Овқатимиз пишди ҳам, болаларимиз еб-ичиб, ўрниларидан туриб ўз ишларига кетишиди ҳам, идиш-товоқ ювяпман ҳам, Тилаб акам эртакни айтишдан тўхтамас, мен эса эшитишдан завқланар эдим... Ҳозир эртакнинг мазмуни эсимда йўқ. Ёдимда қолгани шуки, икки-икки ярим соат мобайнида Тилаб Маҳмуд менинг ихтиёрим ва эътиборимни ўзига тортиб, тўқиётган эртагига ишонти-



риб, ундан завқлантириб, ҳайратга солганди. Ярим асрлик ҳаётимиизда бундай лахзалар кўп бўлган. Китоб ана шу ҳайратлар меваси эди.

– Тўғри, ҳайрат ижод илдизи. Ҳамма яхши нарсалар ҳайратдан туғилади. Икковимизнинг фикримиз бир жойдан чиқди. Икковимиз ҳайрат ҳақида маслақдошмиз, – дейди Ҳалима ва ўқийди:

*Ҳайрат, кел, кўксимда кўтар қад,  
Мен ёлгиз сеники бўларман.  
Кун келиб ўлсам ҳам мен фақат  
Ҳайратнинг қўлида ўларман.*

2012 йил 19 май

## ЁЗУВЧИНИНГ “ЁЗУФИ”

– Тонг сахарда эшик кўнғироғи жиринглади, – деди Ҳалима. – Қаттиқ ухлаб қолганим учун эшитмабман. Келиним эшикни очса, Ўткир Ҳошимовнинг рафиқаси Ўлмасхон опа турган эмиш. Қўлидаги бир даста гулни келинимга бериб, Ўткир ака мени табриклаб юборганини айтиби. Ўткир Ҳошимовга кўнғироқ қилиб, эътибори учун раҳмат дедим. Шунда у Сирдарёга ижодий учрашувга тайёргарлик кўраётганини айтди, мени бирга боришга даъват этди. Боришга ваъда бердим. Биз кўп учрашувларга бирга борганмиз. Бир-бirimизни тўлдирамиз, биз зўр чиқишамиз...

Ўзбекистон халқ ёзувчиси Ўткир Ҳошимов умрининг охиригача Ҳалимахонга бўлган меҳри, ҳурматини узмади.

У ўлимидан уч ой илгари, оғир бетоб ётган ҳолида ҳам шоирани байрам билан табриклаш, кўнглидаги илиқ гапларини унга айтишга ўзида куч топди, қўйида ана шу мактуб:

*Синглим Ҳалимахонга!  
Ёзувчининг “ёзуги”.*

*Ижодкор қалби электростанциянинг генераторига ўҳшайди. Генератор парраклари оқиб келаётган тиниқ ва пок, лойқа ва нопок сувларни ўзидан ўтқазиб, нурга айлантиради-да, инсонларга тақдим этади. Ижодкор қалби ҳаётнинг гоҳ тиниқ, гоҳ лойқа оқимини ўзидан ўтқазади-да, нурли туйгуга айлантириб, ўқувчига тақдим этади. Қалам аҳлининг пешонасидаги “ёзуги” шу экан... Бу жуда оғир қисмат. Майли, Оллоҳга шукроналар бўлсин. Яна бир карра байрамингиз билан қутлайман.*

Ўткир Ҳошимов. 8.03.2013.

2012 йил 5 июль

– “Грудная хирургия”дамиз, – дейди Ҳалиманинг келини Наргиза қўнғироғимга жавобан. – Аям ҳозиргина юрак операциясидан чиқдилар.

Операция йигирма дақиқа давом этади, дейишувди, негадир бир соат бўлди... Мухими, кутулиб олдилар, оғриқ йўқ. Бу ерда бир кун ётар эканмиз, эртага стационарга жўнатишади...

Кутилмаган хабар. Бу ҳақда ҳеч қанақа гап йўқ эди... Ўзи Ҳалиманинг айтадиган гапидан айтмайдигани кўп... У сирли сандик...

**2012 йил 10 июль**

1-стационар, хирургия бўлими, 38-палата эшиги қия очиқ. Кираман. Аввал Динора, кейин Ҳалимахон билан қуюқ сўрашамиз. Ранг-рўйи яхши, чап кўкрагидаги жароҳат устига ёпиширилган оқ тасмачани эътиборга олмаганда унда беморлик аломатлари сезилмайди.

Бир-биримизга жим қараб ўтирибмиз...

Илова

Бирдан хаёлим қочди... Ҳалимахон билан қачон, қаерда ва қай ҳолатда учрашмай, кўнглимни ҳамиша бир ёруғ нур ва юксак туйғу чулғаб олади. Бугун ҳам ана шундай кайфиятдаман. Унинг муттасил ҳаёт зарбаларида ҳам матонат билан туришидан, бу бошгинаси не тошларга урилиб ҳам омонлигидан ҳайратланаман.

Дунё тўхтаб ва тунаб, тонг қаршилаб ва оқшом оралаб ўтган, ўтаётган одамлар қисмати экан, буюк даҳолар ҳам Ҳалимахон айтганидек, бундан мустасно эмас. Бу ҳаётий ҳақиқатни тан олмай илож йўқ.

Лекин мени ана шундай даҳолардан саналган Ҳалимахоннинг бошқаларга ўхшамаган томонлари ўйга чорларди. Бу унинг сўз қасрини яратишидаги шеърият мусобақасида ўзиб кетгани, гўзал юксакликка кўтарилиганидир.

Баъзида мени шоира бундан кейинги ижодида ҳозирги эришган юксаклиги даражасида ижод қилолмаса-я, деган хавотир босарди.

Ҳаётий ҳақиқатлар эса бунинг аксини айтиётгандай. Узоқ йиллардан буён бир маромда, тўхтамасдан, ҳаётидаги паст-баландликлар, зарбаларга қарамай сермаҳсул ижод қилаётган шоира бундан-да юксак чўққиларни забт этмоғи шубҳасиз...

Унинг шеърияти бирдан ўртаниб кетадиган, ёниб кул бўладиган, жонли вужудни жонсизга, жонсизни жонлига айлантира оладиган қудратдир. Унинг ижоди оламга кўз очиб, бу оламнинг бешафқат зарбаларидан диллари ўксиган, башариятдан меҳр-муруват тиловчи муштипар ҳолат ҳамдир...

Шоира шеъриятнинг ўлмас куёши тафтидан юрак-бағри ўртаниб, замину дунёга сўз сочиб, меҳр сочиб, орзу ва тилак сочиб, ўзи шу орзулари оғушида қовурилаётган ижодкордир. Яна қайтараман, у шундай шеърият қасрини яратдики, ҳозирда бу сўз саройи ичра қалбан қироат қилаётгандар кўпайгандан кўпаймоқда. Шу билан бирга, бу қаср маликасидан қолишадиган жойим йўқ, деяётган “шеърият пешволари” ҳам йўқ эмас. Лекин Ҳалима битта, Ҳалима

танҳо. Ҳа, у “...юксаклик завқидан мастилаб учётган буюк қуш”га айланди. Наҳотки, “...Кўкка кетган бари қушлар ўққа учсалар...”

Шоира Ҳалима Худойбердиева ўзбекнинг чаккасига ярашган гулу райхон. Ҳалқимиз хидлари гуркираб турган райхонини сўлишдан, қуриб қолишдан ҳамиша асраран. Шоиранинг ўзи ҳам бу ҳақда шундай нидо қилади:

*...Сўлишишимиз кеч келсин,  
Сўнишишимиз кеч келсин...*

Балки Ҳалимахондан дард чекинаётгани ана шу тилаклар ижобатидандир. Балки:

*Сўлган боғлар ўрнида яшил-яшил  
Дараҳтлари шовуллаб турган боғлар  
Яратишимиш керак,  
О, менинг қаттиқ жоним!  
Ишонаманки,  
Сен чидаб берасан бу талабларга жисм.  
Юрагимда барглар шивирлаётганга ўхшайди,  
Демак,  
Яратилајсак безавол боғларимнинг  
Илк ниҳоллари куртак ёзаяпти,  
Боғлар гуркираб қад кўтараяпти юрагимда  
Барглари яшил-яшил боғлар... –*

дея боши узра чарх ураётган туйғулардан тикланаётгандир...

Ҳалима бу сатрларни оғришидан анча илгари ёзган эди. Истеъдод эгала-ри бошларидан кечирадиган оғир ҳаёт синовларини азиз-авлиёлардек илга-ридан сезиб каромат қилишармикан-а!

*Оғир хасталикдан уни кўтарди бу шеър,  
Оғир уйқулардан уйготди уни бу шеър.*

Бир ярим ойдан буён шифохонама-шифохона кўчиб, муолажада яшаётган шоирдан дардини ошкор этиб, нолиганини эшитмадим. У тоза қалбли инсон. Унинг шогирдлари, дўсту биродарлари, муҳлислари кўп.

Унинг мунглига ёрдам қўлини чўзиб, яхшиларнинг кўнглига борганинг кўп бор гувоҳи бўлганман. Дунёга яхшилик уруғини сочиб, яхшилик меваларидан тотиб юрган беғубор шоиранинг бошига тушган оғир дард билан сира чиқиша олмаяпман, келиша олмаяпман... Бунинг сабабини, сабабкорларини қидираманми-ей...

– ...Ўзингизни кўп қийнаманг, опаси, – деди бирдан мендек хаёлга чўмиб ўтирган Ҳалима. – Бу йиллар давомидаги руҳий зўриқишилар, асаб бузилишлар оқибати...

Наҳотки кўнглимдан кечაётган ўйларни у сезаётган, эшитаётган бўлса? Балки бу бир-бirimizni сўзсиз тушуниш даражасига етган мулокотdir...

Ҳалимахон бошидан кечирган яхши-ёмон кунлардан бироз хабардорман. Лекин билгандаримдан билмаганларим кўп. Ҳозир у айтган зўриқишлир, асаб бузилишларга сабаб бўлган воқеа, ҳодисалар хусусида кенгроқ маълумот олишнинг хонаси келганди.

Наинки, шоиранинг ўзи ҳам бунга мойиллик билдириб турибди... Лекин бошдан ўтган оғир кунларни эслаш, гапириб бериш bemорга нақадар оғир бўлиши аён. Шунданми, уни ҳам, ўзимни ҳам чалғитаман. Лекин бутун қалбим, руҳим Ҳалимахон дарди билан ёнади... Шу туфайлими, Ҳалимахоннинг ўзи билан эмас, унинг шеърлари билан сирлаша бошлайман:

\* \* \*

*Нолам узун. Нола мени суйса керак,  
Умрим бўйи у кўксимни ўйса керак.  
Менга таъриф керак эрса, тарихчилар  
“Бир нолали най” деб ёзиб қўйса керак.*

\* \* \*

*Мен норасида – ғам, ўсаётган гул,  
Дил ярасида ҳам ўсаётган гул.  
Ўт қўйиб ёқдилар хонумонимни,  
Кул орасида ҳам ўсаётган гул.*

\* \* \*

*Мен кетганда дерлар: “Кетди, баҳт, ииги кетди.  
Бу дунёning бир қиличи, бир тиги кетди”.  
Хеч кимга дил ёролмадим. Десалар маъқул:  
“Дунёдан яна бир сирлар сандиги кетди”.*

Бу ўтли сатрлар шоиранинг таржимаи ҳоли эди. Уни яна ва яна давом эттиришим мумкин... Лекин юрагим кўтармаяпти... Кўнглимга қуилиб, қалбимни қуидириб келаётган бу сатрларники эслаб шу ҳолатга тушган эканман, воқеаларни бошидан кечирган ва шеърий мисраларга ўтирган шоиранинг ҳолатини тушунмаслик мумкин эмас...

– Кеча худди шу пайтда Гулжамол келиб-кетди. “Ёнингизга киришга қийналмадим. Сизга ўҳшаганим учун қизингиз деб ўйлашди”, – дейди у. “Нега шундай бўлди, нега Бухорога бордингиз” – деб жаҳл ҳам қиласи миттичам жўжадек пурпайиб. Баҳшанда опа билан Ибодат Бухородан тинмай қўнғироқ қилиб туришибди. Турсуной опа билан кеча боғланган эдим, роса койиндилар: “Иссик кунда Бухорода пишириб қўйибдими? Қачон ўзингни асрарни ўрганасан”, деб танбех бердилар.



Ҳалима мийиғида кулиб қўяди.

Вақт асрдан ошганди. Хумсонга – дала ҳовлимизга етиб боргунимизча алламаҳал бўлиб кетади. Мен шошиламан. Ташқарида Тилаб акам кутиб турганини айтаман...

– Сизни олиб келганлари учун бир раҳмат, кутиб ўтирганлари учун икки раҳмат, олиб кетаётганлари учун уч раҳмат! – жилмаяди Ҳалима. – Акамнинг пешонасидан ўпид қўйинг, хайр.

*2014 йил 31 марта*

## ИККИ ДАРЁ УЧРАШУВИ

Ўзбекистон Президенти қарори билан Ўзбекистон халқ шоири Мухаммад Юсуф таваллудининг 60 йиллиги юртимизда кенг нишонланаётган дамлар эди. Вилоятларда, пойтахтда шоирнинг оиласи, қариндош-уруғлари билан учрашувлар ўтказилар, радио, телевидение халқ шоири ижодига бағишиланган хотира кечаларини намойиш этарди. Суҳбатимиз беихтиёр шу мавзуга кўчди.

– Мухаммад Юсуф халқимизнинг хурмат-эътиборига чиндан ҳам муносиб ижодкор эди, – гап бошлади Ҳалима. – Шеърлари оддийгина, уни ёзиш ҳар кимнинг ҳам қўлидан келадигандек туюлади. Қани, шу оддий нарсани ёзib кўрайликичи? Бундай халқчил, самимий шоир ҳаётга камдан-кам келади...

– О, қалбимни тирнама, Ҳалима, – дея Турсуной сұхбатни давом эттириди: – Дараҳтнинг бўйи йиқилганда кўриниши рост экан, Муҳаммаджон шоиримнинг нақадар дуркун бўю бости борлигини бугун бутун мамлакат кўриб туриди. Шоиримизнинг “Унутманг, бу кўхна чархи фалакда Ватандан бошқа ҳаммаси майда” деган сўзларини эслаганимда Ватан ҳақида бундан ортиқ сўзлаш мумкин эмаслигига ишонасан.

Ҳалимахон хаяжонланиб, бирдан Мухаммад Юсуфдан ўқий бошлади:

*– Ватан –  
 Юрагимнинг  
 Олампаноҳи  
 Бу дунё  
 Букри бир  
 Жийдангнинг шохи!  
 Кўзим ёши билан  
 Суғориб гоҳи,  
 Кўксимда ўстирган  
 Гулдай севаман...*

Турсуной Ҳалимахонни давом эттира кетди:

*– О, ота маконим,  
 Онажон ўлкам,  
 Ўзбекистон жоним тўшай соянгга.*

*Сенингдек меҳрибон йўқ,  
Сендек кўркам,  
Римни алишмасман бедапоянгга.*

Кейин кўзлари ёшланиб, шоир ҳақидаги хотираларга ўтади:

– Республика Маънавият ва маърифат марказида ишлаб юрган кезларим. Бир куни Муҳаммаджон аёли ва икки жажжи қизалоги билан эшигимдан кириб келишди. Қизлари хонадонимни тўлдириб ўйнаб юришди.

Қайтишаётиб Муҳаммаджон “Менинг бир эрка илтимосимни қабул қиласизми, сизни “Офтобойим” деб чақирсан майлим?” – деди табассумларини чарақлатиб.

Эвоҳ, эвоҳ дейман бугун! Бизни Офтоб сайлаб, нурларга топшириб, ўзи офтобларнинг ўрнига ботиб кетган укам!..

– Турсуной опа, сизни эшитаётиб, Муҳаммаджон билан бўлган бир сафар эсимга тушди, – дейди Ҳалима. Ёш ижодкорларнинг Зоминда ўтказиладиган семинарига боргандик. Дарвоҳе, Гулжамолни ҳам ўшанда қашф этганмиз. Гўзал Зоминни томоша қилдик. Машхур Зомин шаршараси ёнига келганимизда Муҳаммаджон унга узоқ тикилиб қолди ва:

– Бу шаршара кимга ўхшайди? – деди менга қараб.

– Кимга ўхшашини билмадим-у, лекин қиличдек кесиб тушаяпти, – дедим.

У жилмайди ва:

– Бу Ҳалима шаршараси, – деди. – Ҳалиманинг шеърларидек кескир...

Шу-шу шоирлар орасида бу шаршара менинг номим билан боғланиб қолди. Муҳаммад билан яна Зоминга бордик. Шунда у:

– Опа, бугун Ҳалима шаршарасига ўтмаймиз, – деди. – У ёққа ёш ижодкорларни йўлладим. Шаршарани бир томоша қилишсин. Биз қирғизларникига меҳмонга борамиз. Қимиз ичамиз, қарши эмасмисиз?

Кейин бизни ўша ёққа бошлади. Тоғ ҳавоси, совуқ, қимиз ичдик... Мен баттар жунжиқдим, шунда у костюмини ечиб елкамга солди. Биз дардлашдик. У қизларимни ўзим узатишни истардим, дея негадир ўксинди. “Лола, лола” шеъри ўшанда пайдо бўлганди. Одам кетишини сезар экан-да... Тўй кўрмаслик тақдирида бор экан-да...

*Дилда қолди яхши сўз, достон,  
Қолаверди муҳаббатимиз.  
Биз яхшироқ қараб олмасдан,  
Кетди бизнинг Муҳаммадимиз.*

*Сўзларини суйиб олмасдан,  
Багримизга ўйиб олмасдан,  
Кўзларига тўйиб олмасдан,  
Кетди бизнинг Муҳаммадимиз.*



\* \* \*

*Бир арслони ўтди ўзбекнинг,  
Оҳи кўкка етди ўзбекнинг.  
Куёши йиғла, осмон, аза тут,  
Муҳаммади кетди ўзбекнинг...*

\* \* \*

*Биз шошимадик, ҳеч улгурмоққа,  
Бунда балки дил тўлгач доққа,  
Жаннатдами... давр сурмоққа,  
Кетди бизнинг Муҳаммадимиз.  
Дилда қолди яхши сўз, достон...*

– 1998 йили Муҳаммаджонга “Ўзбекистон халқ шоири” унвони берилди, – сухбатни давом эттиради Турсуной. – Табрикламоқчи бўламан, ҳеч пешини тутолмайман. Охири, уйига хат қолдирдим:

*Муҳаммад уммати,  
Юсуф янглигим.  
Анжоним қиммати,  
Шаъни – ёрлигим.  
Суюнчим ёнимда  
Излаб юрибман.  
Ўзни “сен” деб, Сизни  
Сизлаб юрибман.  
Мукофот ярашган  
Бўйларингиздан!  
Ҳаммани эритган  
Куйларингиздан!  
Бутун мамлакатни  
Куйлатганимсиз!  
Мени хавотирда  
Ўйлатганимсиз!  
Билганимни ўқиб,  
Сизга дам солай.  
Губорингиз ювай,  
Ғамингиз олай!  
Сиз элнинг гулисиз,  
Йигитнинг гули.  
Конверт ичидаги  
Исириқ тули.*

Ҳалима:

– Чакириб оламан, қаттиқ чорлайман,  
Кетганлар йўлларин буриб келади.  
Качонлардир қуриб қолган дарёлар,  
Қайтадан фаввора уриб келади.  
Букилиб, йўқликка кетаётганлар  
Гозланиб, қайта бел сириб келади,  
Чакириб оламан,  
Қаттиқ чорлайман  
Тирик дўстларим банд,  
Фоят банд, баъзан.  
Гўрдаги дўстларим туриб келади.  
Хокисор жислмайиб Муҳаммад Юсуф,  
Шавкат Раҳмон томоқ қириб келади...  
Улар тирикларнинг ўрнин билдирамай,  
Эшигимдан бир-бир кириб келади...  
Чакириб оламан...

Бу оддий мушоира эмасди. Бу ўзбекнинг икки бетакрор ижодкорлари-нинг Муҳаммадга аталган дил рози, кўнгил сўзлари эди...

*2015 йил 8 апрель*

Кўриб турибсизки, шоирамиз ҳақида ёзаётган китобимга сўнгги нукта қўйилди. Суюнчисигами, негадир Ҳалимахонни кўргим келиб қолди. Уйига борсам, кенг меҳмонхонасидаги катта меҳмон столи дастурхонида дафтар, китоблар, ёзилган, ёзилмаган қоғоз вараклари ёйилиб ётиди...

Шоира ишлалапти. У вараклаб, синчилаб ўқиб ўтирган қалин дафтарга қизиқиб қолдим. Розилиги билан қўлимга олишим билан дафтар ичидаги вараклардан бир нечтаси сочилиб кетди. Вараклар сарғайиб, эскириб, баъзилари ҳатто ушлашинг билан йиртилиб кетгудек ҳолда эди.

Дафтарда олтмишдан ортиқ публицистик чиқишлиар қораламаси қайд этилган. Булар – мустақиллик куйлари, озод Ватан мадҳи, шоирлик бурчи ва масъулияти ҳақидаги фалсафий ўйлар ва мушоҳадалар, қадриятларимизга, дунё адабиётига бўлган чексиз хурмат-эътибор, болалик хотиралари, дўст-биродарлари ҳақидаги илиқ битиклар, ширин туйғулар...

Сенга тансиқ ва мазали бўлиб туюлган таомни ота-онанг, фарзандларингга илинасан, киши. Мен ҳам Ҳалимадан ўқиганларимни азиз ўқувчи, шоира муҳлислари, сизларга илиндим.

## ҚЎЛЁЗМАЛАР ДАФТАРИДАН

Болалик йилларимни эслаганимда олмазор ҳовлимиз, айвон олдида узун қилиб тортилган патгиламнинг ўрмаги кўз олдимга келади. Ўрмакни

кузувини онам Қаршигул чевар боғлаб (одатда кузувни асосан кайвонилар, ишининг устаси бўлган чеварлар боғлайдилар) биз унинг турини югарардик. Кейин онам “бисмиллоҳир раҳмонир роҳийим” деб ўрмак устига ўтириб тўкишни бошларди. Мен онамнинг ҳар қилич қоқиб бир йўл арков ўтказганида патгиламнинг гуллари каттариб, тўлишиб, очилиб боришини ҳавас билан кузатар, ўзим ҳам у кишининг ёнида ўтириб, патнинг турини чалишардим. Ерда тортилган патгиламнинг ўрмаги икки тарафда ўтириб тўқилади. Онам билан ёнма-ён ўрмак тўқир, ироқи дўппиларнинг ироқисини тикардим. Мана бу тўртликлар ўшандай онларнинг, онамнинг ўрмак тўқиб, дўппи тикиб ғинғиллаб айтган хиргойиларидан эсимда қолгани:

*Ийдиргин мардга мени,  
Куйдиргин мардга мени,  
Оллоҳ, Оллоҳ, зорим эшиш,  
Суйдиргин мардга мени...*

Онамнинг овози ширали, хиргойиси чиройли эди. Бу сатрларнинг маъносини чукур тушунмасам-да уларга қўшилиб хиргойи қилиб ўтирганларимни кечагидек эслайман.

Бувижонлар, онажонларнинг инсон ҳаётида ҳал қилувчи роль ўйнайди, деб биламан. Билмадим, Пушкин энагаси Арина Радионовнадан шундай сехрли эртаклар эшитмаганида бундай юксакликларга кўтариларамиди?! Мухитда гап кўп.

Отамнинг Абдураҳмон бова, Абдумўмин бова, Ражаб бова, Эшон бова каби қадрдонлари ҳар ўн-ўн беш кунда уйимизда китобхонлик қилишар, бу суҳбатларда навоийхонлик, фузулийхонлик, бедилхонликлардан ташқари ишқий, саргузашт достонлар ҳам ўқиларди. Гўрўғли, Кунтуғмиш, Алпо-миш, Авазхон каби қўплаб достонлар отамнинг дўйстлари қатори менга ҳам қадрдон бўлиб қолганди. Чунки бу китобхонликларда достону ғазалларни кўпроқ отам Умматқул Худойберди ўғли ўқир, чунки отамнинг қироати ёқимли, овози баланд эди. Бу овоз ҳали-ҳануз тушларимга кириб туради. Бу китобхонликларда мен доимо отамнинг пинжига кириб, хаёлан Барчинга айланиб Бойчиборга дардимни айтар, достонлар оламида яшардим. Бу достонларда енгилмас куч – Ҳазрати Али ўзи билан “енгсанг сенга тегаман, енгилсанг ўлдираман” шарти билан курашга тушган Зуфунунни енг гар ва уни шу музофотга подшоҳ қилиб қолдириб, ўзи янги музофотларни забт этиш йўлида от солдириб кетарди. Мен Ҳазрат Алининг ёллари бўрон янглиқ гувуллаб кетаётган отининг ҳар елкаси бир музофотни кўтариб кетаётганига ишониб яшардим.

Бу вақтларда отам боғбон, онам пахтачилик агрономи бўлиб ишларди. Мени түққан онам Шарофат Хонназар қизи пахта даласида ўқариқдаги дориланган сувдан ичиб қўйиб, ўттиз беш ёшларида дунёдан ўтганида мен икки ёшга етмаган гўдак эканман. Шунда амаким Умматқул Худойберди ўғли билан холам Қаршигул Хонназар қизи мени ўз тарбияларига олишган экан (бизниkilар қариндошлар билан кудалашган экан). Жуда кичик қолганим учунми, ўз онамни эслай олмайман. Бирор-бир сурати ҳам қолмаган.

Амаким чин отам, холам чин онам бўлиб дунёдан ўтиб кетиши. Отамонамнинг тупроқ-тўшаклари пардан бўлсин, дейман. Назаримда улар ҳали-хануз мени қўллаётганга ўхшайдилар.

Отамнинг тўқ, кўк отлари бўлиб, пешонасида катта оқ қашкаси бўларди. Шунданми, уни “Олақашқа” деб атардик. Биринчи шеъримни ўша отга бағишлиб ёзганман. Баланд, ранги тўқ қорамтири, кўзлари шундай ақлли эдики... Кейин мен умрим давомида бундай отни бошқа учратмадим. Ҳақиқатан ҳам бу шундай бетакрор чиройли отмиди ё болаликнинг кўзлари катта бўлади деганларидай, бу менинг болалик тасавуриммиди, билмайман... Отам билан онам “Илк муҳаббат” китобимни катта меҳр-муҳаббат билан кутиб олганлари эсимдан чиқмайди.

\* \* \*

Мен она томондан қайирмаликман. Ўратепадан юқорига қараб ўрлаганда Шахристонга етгунча ўртамиизда Пашибий, Қипчоқ, Кенгқўл, Қайирма каби беш-олтига нисбатан кичикроқ қишлоқлар жойлашган. Ери қуруқ, ҳосилдор. Қирларида қип-қизил, там-там олмаларининг тозалиги, ширинлигини ҳануз эслаб юраман. Сел олиб кетган жарликлар, тез оқар жилғаларнинг тиниқ сувлари остида тошлари кўриниб турарди. Ўша жилғаларда ялангоёқ сув кечиб юрганларимиз, етолмай қолган олмаларимизни сув оқизиб кетганини ҳалиям тушларимда кўраман. Тепаликлар, сойликларда қовул-каврак, оққиз, сачратқи, қирққиз каби минг хил тоғ ўтларининг иси ҳалиям димоғимга урилиб тургандай. Ҳақиқатан ҳам мен онам пиширган қайирма патирнинг таъмини ҳали-ҳануз ҳеч ерда учратганим йўқ.

Қайирма сўзининг маъноси обдон етказиб ўрганилган хунар, маҳоратдир. Масалан, қайирма патирни ҳар қандай новвой ҳам кўнгилдагидай қилиб ёпа олмайди. Қайирма сўзининг яна бир маъноси ўзига, сўзига қатъий ишонч, қайтмаслик, жўмардликдир. Қадимда бир гуруҳ ўз сўзидан қайтмайдиган одамлар ор талашиб турар жойларидан бош олиб кетишаётганда қайтармоқчи бўлишади. Аммо уларнинг оёқ тираб қаршилик кўрсатганини кўрган бошқа бировлар “қайтарманглар, қайтарманглар” деб йўл очишади. Бу қайсарлик бежиз эмасдир. Қайирма мана шу одамлар келиб жойлашган қишлоқ экан. Болалигимда мана шу маънодаги гаплардан ота-онам ҳикоя қилиб беришарди...

### *Taxҳiriиятдан:*

Ўқиганингиз уибу эссе Ўзбекистон ҳалиқ шоюри Ҳалима Ҳудойбердиеванинг ҳаётига оид лавҳаларни ўз ичига олади. Эссе билан танишиб чиққач, муаллиф билан келишган ҳолда ундан бир қанча бобларни “Ҳалима” сарлавҳаси остида босишига қарор қилдик.



### Оллоёр БЕГАЛИЕВ

1961 йилда туғилган. Тошкент давлат маданият институтини (хозирги ЎзСМ) тамомлаган. Унинг “Сөхрли уйқы”, “Ёлғонга ишонган дараҳат”, “Рангин қорлар”, “Бир булоқ бор”, “Жұнатылмаган мактуб”, “Бекободлик самурай” каби шеърий, настрий, адабий ертаклар түпнамалари нашар этилган.



## Хаёлларим юқланған қайиқ

### Булоқ

Бир булоқ бор, бирор билмаган,  
Балки шундан у менга азиз.  
Уни излаб бирор келмаган  
Ва ўзанин күймаган қазиб.

Ўзи қайнаб, ўзича оқар,  
Балки, билмас дарё, уммонни.  
Суви ҳам оз, юргизолмайди  
Күши тугул, бир тегирмонни.

Лекин, унда мусаффо сув бор,  
Тўлқинлар бор баҳмалдек майин.  
Унда оқиб кетади кўп бор  
Хаёлларим юқланған қайиқ.

Лекин, унда муҳаббат хасми  
Муҳаббат бор ерга бенуқсон.  
Тубсиз эмас бу булоқ, асли,  
Тубсиз унда акс этган осмон.





## Отамнинг уйи

Онамнинг уйи бу, отамнинг уйи,  
Мехру саховатда Хотамнинг уйи.  
Мушку анбар эсар остонасидан,  
Улар ризосидан беҳиштлар бўйи.

Икки дуогўйим, қўшша фариштам,  
Фарзандлар баҳтига қўша қаришган,  
Улар огоҳ доим эзгу ҳар ишдан,  
Улар бор хотиржам фарзандлар ўйи.

Дастурхони очик яхши-ёмонга,  
Шукр этарлар тинчлик ҳоким замонга,  
Мехмон бўлинг, тушса йўл биз томонга,  
Мехмон ташрифи бу хонадон тўйи.

Бундай гўшаларга бўлсин шараф-шон,  
Хар дам талпинади унга қараб жон,  
Ўз уйингдир ўлан тўшагу дармон,  
Озод Ўзбекистон – кўнглимнинг куйи,  
Онамнинг уйи бу, отамнинг уйи.

## Хотира

Бешигида йифгайди бола,  
Овутолмай ҳалак онаси.  
Унинг чарос қўзлари порлар,  
Мисли бир жуфт гилос донаси.

Недир унинг тинчини бузган,  
Топмаганми ё ҳали тинчин?  
Тинмай йиғлар, қилмасдан парво  
На пўписа ва на ўтинчни.

Нега йиғлар? Сўзсиз бу йифи  
Нималарга гинали, гизли?  
Менимча, бу бир бурда жонни  
Йиғлатади хотирасизлик.

Йўқса, нечун, бу сўнгсиз йифи,  
Кимга керак бу сўзсиз баёт?  
Йиғлатади уни ўтмишсиз,  
Келажакдан иборат хаёт.



Унинг мурғак жонига оғир  
Ботар ўтмиш – ёддан форуғлик.  
Ҳеч нарсани сўзламас унга  
Кўз олувчи сунъий ёруғлик.



Бу ҳам ўчар, бироқ боланинг  
Уни ўчмас. (Олсачи дамни.)  
Шунда, она бешик бошига  
Ёқиб қўяр қаламдек шамъни.

Шамъ липиллар экан, боланинг  
Чек қўйилар тинсиз додига.  
У ҳайрат-ла шамъга тикилар  
Ва нелардир тушар ёдига.

## Бу дунёда

### *Шоир Чори АВАЗни эслаб*

Бу дунёда сендан ёдгор  
Ўғлинг қолар, қизинг қолар.  
Тош тупроқли кўчаларда  
Мухрланиб изинг қолар.

Тунларинг кетар сен билан,  
Дунёда кундузинг қолар.  
Менки деб танлаганинг  
Осмонда юлдузинг қолар.

Баҳоринг қолар гул сочиб,  
Хазон сочиб кузинг қолар.  
Бошқага қилгуси насиб,  
Ўйлама ризқ-рўзинг қолар.

Бу дунёга тўймайди қўз,  
Ортга боқиб кўзинг қолар.  
Бир умр бўз тўқиб ўтиб,  
Ёлчимаган бўзинг қолар.

Яқинларинг хотирида  
Нурдай ёруғ юзинг қолар.  
Шеърларингдан макон топган  
Васиятдек сўзинг қолар.



\* \* \*

Чарчаган оталар ухласин,  
Чарчаган оналар ухласин.  
Ором онларида тушларин  
Оппоқ фаришталар йўқласин.

Халал берманг уйкуларига,  
Бехуда баҳсларни бас қилинг.  
Овозингиз тугул, илтижом,  
Юрак урушларни паст қилинг.

Улар ухлар, ўчириб ёддан  
Оғуми ё бол тотганларин.  
Балки, топгандирлар туш аро  
Дийдорини йўқотганларин.

Ўнгларида тутқич бермаган  
Йиллар ортага қайтаётгандир.  
Ё онаси олиб қучоққа  
Унга алла айтаётгандир.

Шаррос ёмғирларнинг остида  
Юргандир ё шаталоқ отиб.  
Ё чанқовуз чалаётгандир  
Олисларга термилаётиб.

Юзларида ўйнаган жилва  
Шуъладан ё табассумидан.  
Улар ухлар, бўлганча холи  
Ташвишларнинг тажассумидан.

Чарчаган оталар ухласин,  
Чарчаган оналар ухласин.  
Ором онларида тушларин  
Ишқнинг ёмғирлари йўқласин.

Уйғонганда тиндирмас ўзин,  
Юзларига боқиб тўйинглар.  
Ажин босган пешонасидан  
Астагина ўпид кўйинглар.



Хайрон бўлсин уйғонган чоғда  
Қирор қўнган сочларин силаб.  
Неча йиллар бўм-бўш қучоқда  
Пайдо бўлган гулдаста билан.



Фарзандларга сарфлаб ўтувчи  
Умри тўлсин кўшиқ, ўланга.  
Мехр тўла юз, кўзларига  
Ҳеч солмасин қайғу кўланка...  
...Ҳеч солмасин қайғу кўланка...

### Тўртлик

Бунчалар қийиндир ишқ топишмоғи,  
Осонроқ ёз билан қиши топишмоғи.  
Хаёлингдан сира кетмовчи меҳмон,  
Дард – қийин ариши, тез ёпишмоғи.

## ҲИҚМАТ

**Обламоқ учун бир қўнгилини нуқул,  
Бошқасизга озор бермоқ номаъқул.**

**Саъдий ШЕРОЗИЙ**



### Хафиза ЭГАМБЕРДИЕВА

1965 ийлда түгилган. Тошкент давлат университетининг (ҳозирги ЎзМУ) журналистика факультетини тамомлаган. Унинг “Кўнгил кўшики” шеърий тўплами, “Коронги тўқай”, “Нахиона” каби насрый китоблари чоп этилган.



## Ёдингни ёд олган лаҳзаси

\* \* \*

Бахтнинг болишига бош қўйдиммикан,  
Ёки ҳасрат ичра тўқдимми, баргим?  
Қайғу чирмовуғи чирмаб рухимни,  
Тошга уриб бошим келдими ёргим?

Оқ отли шаҳзодам эдими, ёрим,  
Ёлғизоёқ йўлда адашдимми ё?  
Бир бутун бўлдикми, биз икки ярим,  
Бахтлисиз, деб, бизни алдашдими ё?

Ортимга боксам гар хатолар бисёр,  
Узилган узумдек ўтмиш мўлтирас.  
Рўпарамда эса кўкка бўй чўзиб,  
Боладек беғубор орзулар турар.

Мен эса турибман кафтимда умрим,  
Кеча ҳам, эрта ҳам бирдек қадрдон.  
Йўқотгим келмайди топганларимни,  
Юрагим, баҳтлисан, дейишса, ишон.

\* \* \*

Чуғурлашдик учта қиз,  
Учдик учта томонга.  
Тақдир бизни ажратди,  
Отди қўйиб камонга.

Йиғилишсак бир яйраб,  
Онам кўнгли хуш бўлди.  
Энди ул кунлар ёраб,  
Энг чиройли туш бўлди.



Йифиламиз учовлон,  
Бўлолмаймиз шодон, шўх.  
Кўнглимизни топарга  
Онамиз йўқ, она йўқ.

Хафа бўлманг, янгажон,  
Қизлар кўнгли тўлмаса.  
Кенг ҳовли ҳам тор экан,  
Уйда она бўлмаса.

Дуога қўл очдик биз,  
Эслаб панд-сўзингизни.  
Қўллаб туринг, онажон,  
Уч она қизингизни!



\* \* \*

Узилган баргларни йифмоқда фаррош,  
Узилган барг каби боқади ювош.  
Узун супургидек узун хаёли,  
Гўё у тирамоҳ аёли.  
Ўтган-қайтгандарни маъюс қузатар,  
Фикрин супургига узатар.  
Кун уриб – сарғайган рўмоли,  
Лаб жуфтлар бор каби саволи.  
Ўйловсиз босилган қадамлар,  
Дунёни тўзитган одамлар,  
Манзилга ошиқкан йўловчи,  
Гап билган, иш билган овловчи,  
Фаррошнинг бор битта саволи,  
“Уволи урмасми, уволи?!.”

\* \* \*

Боҳабармиз бир-биримиздан.  
Бир новданинг икки шохид: сен ва мен  
Ортда қолмоқ истамаймиз: сен ва мен.  
Мақсадимиз улуғ, ният ҳам қутлуг,  
Ўсмок, янада ўсмоқ...  
Боҳабармиз бир-биримиздан,  
Нур ёғса қизғаниб эмамиз,  
Дўл ёғса биттадир кемамиз.  
Ниҳоят, биз кутган кун келди,  
Кўл ушлашиб учсак бўларди,  
Курғур кўнгил завқ-шавққа тўларди.  
Лаҳза, насим кўмагида учдик кўк сари,  
Зумда ортга қайтдик, э, воҳ, новдага эмас,  
Тушдик ер сари.  
Боҳабармиз бир-биримиздан.  
Фақат билмаймиз,  
Энди ким биринчи хазонлар ичра?!.



\* \* \*

Ёдингни ёд олган лаҳзаси,  
Дил тубига туккан бўхчаси,  
Оташнинг бир парча лаҳчаси –  
Хотира!  
Ўзлигинг англатур давлатинг,  
Тахти Сулаймонинг сарватинг,  
Кўзёшингга туртки ғурбатинг –  
Хотира!  
Аччиқми-ширинми сеники,  
Ёдингга оласан кўнишиб,  
Туғилиб, топганинг ичикиб –  
Хотира!  
Истамасдан терган хазинанг,  
Беэътибор босган ҳар зинанг,  
Рози-ризолигинг, зор, гинанг –  
Хотира!  
Ул, айрилиқ исмли нақшдур,  
Юракка ўт қалаб ёқишидир,  
Кечадан эртага боқишидир –  
Хотира!

\* \* \*

Чордана курганча мўйсафид осмон  
Юлдузлардан тасбех ўгирап.  
Ҳасрат қалавасичувалиб, дунё  
Юрагимда чархин йигирап.

Кўз узгани қўймас тобакай,  
Тун кўйлагин оппоқ ямоғи.  
Жим кутишар булутлар ҳар ён  
Бошланишин намчил савоғин.

Тун кўйлагин сўқилар чоки,  
Йўқотади осмон тасбехин.  
Ёш боладек кезиб борлиқни  
Ўйнай бошлар коптогин секин.

Хаёлимнинг маҳзун куйини  
Бузар тонгнинг ташвиш, кутқуси.  
Чарх овозин босиб кетади  
Гўдакларнинг шодон кулгуси.



\* \* \*

Қолдим бу кун тиз чўкиб,  
Сенсиз ўтган кунларда.  
Қандай кетдим мен чўкиб,  
Адоғи йўқ ўйларда?..



Сенсиз ўтган кунларда  
Исмим қўйдим йўқотиб.  
Қоп-коронғи кунларга  
Ташлаб кетдинг ўқ отиб.

Қандай кетдим мен чўкиб,  
Тополмади ҳеч кимса.  
Чиқармидим курашиб,  
Бирорта ҳас илинса.

Адоғи йўқ ўйларнинг,  
Интиҳоси борми, айт?  
Бошлаб катта тўйларни,  
Яхшиси ёнимга қайт.

\* \* \*

Ой ортидан оқди кўзларим,  
Юлдузлар юрагим сувидан бўқди.  
Ноиложлик эккан илинж дарахти  
Туннинг кафтларига япроғин тўқди.

Чарчадим, сукунат исканжасида,  
Минг бир томчи бўлиб, эзилиб кетдим.  
Нега бу ҳаётнинг қоқ панжасида  
Онагинам, сендан узилиб кетдим?

Энди, кўкка боқиб кўзларим толур,  
Маъюс чехранг бўлиб кўринур ой ҳам.  
Бир узун жилғалар изсиз йўқолур,  
Колдирган рўмолинг офтобга ёйсам...



## Турсун АЛИ

1952 йилда тугилган. Тошкент давлат университетининг (ҳозирги ЎзМУ) филология факультетини тамомлаган. Шоирнинг “Зангори овоза”, “Юракдаги сўзлар”, “Ёргуғ кунлар”, “Изтироб остонаси”, “Түн товуши”, “Ёлгизим”, “Уйгоқ сукунат”, “Сокин хайқириқ”, “Ой япраги”, “Гуллаётган юрак”, “Қор шуъласи”, “Қуши пати” каби шеърий китоблари нашир этилган.



## Түйғулар

\* \* \*

Кўзимга беркитдинг сўнгсиз дунёни,  
Наҳот, энди, наҳот, ўзинг-да йўқсан,  
Қайдан сени излай, айтчи, қувончим?

\* \* \*

Сен сари бораяпман тўлиб юрагим,  
Қайларга қочаяпсан шамолдай тўзиб,  
Хой, мен исминида билмас севгилим?

\* \* \*

Кўлда ичилмаган илҳақ бир қадаҳ,  
Кўнгилда адоқсиз ҳижронкаш севги,  
Қоронғи кечада ёлғизман-ёлғиз.

\* \* \*

Дала қоқ белида кетаяпман ёлғиз,  
Теваракда изғир эгасиз итлар.  
Тонг эса теграмда ёришади жим.

\* \* \*

Бунда мен – ёлғизман, унда сен – ёлғиз,  
Ўртада чўзилган ҳижрон поёндоз.  
Иккимизни излар кечиккан севги.



\* \* \*

Узлатга чекинди, севгилим, яна.  
Йўқ, ёлғиз эмасман сира ҳам, ишон.  
Кўнглим чорбоғида гуллаган сиймонг.



\* \* \*

Тун. Бедорман. Ғафлат қучган одамлар.  
Кеча ҳам мудрайди бесас, бенаво.  
Қаърида инграйди Машраб нидоси.

\* \* \*

Ёруғлиқда зулмат кўрар безовта қалбим,  
Ҳаёт йўлларида ўлим экилган, аттанг.  
Чўққилардан нарига ҳеч ўтолмас сасим.

\* \* \*

Қай замондан бери қўрганим ҳам йўқ,  
Овозинг порлайди кўзларингда жим.  
Теваракка боқсам, сенсиз бу баҳор.

\* \* \*

Пойида ўлтиридим, куйиб кетибди дарахт,  
Бир кун учрашгандик, эсла, иккимиз бунда.  
Бузилмай қолибди севги қурган ин, қара.

\* \* \*

Ёмғир қафасида шунча йўл юрдим узоқ,  
Ивидим, музладим, сўнгра босди қалтироқ.  
Юрагимга опичладим сени, севгилим.

\* \* \*

От қўяман яна манзиллар сари,  
Тагин қайларгадир кетиб бораман.  
Бунча эринчоқкан бу танбал йўл ҳам.

\* \* \*

Ай, сенинг ёнингга қимтиниб бордим,  
Ўйчан кўзларингга тикилдим узоқ.  
Бир сўз айтмолмайин қайтдим хўрсиниб.



\* \* \*

Болаликдагидек дарахт панасидан, ха,  
Ўғринчи тикилдим сенга ёниб, қимтиниб.  
Тағин кўзларимда тошар, гуллар ҳаяжон.

\* \* \*

Сен сари учаман бўлиб баҳт қуши,  
Елкангга, бошингга қўнаман, албат.  
Қанотимда, гулим, келтирдим баҳор.

\* \* \*

Учиб бораётган юлдузни кўрдим,  
Жуда нурсиз, жуда порлоқ эди у.  
Кипригимга қўнди ёшдек беозор.

\* \* \*

Дарё соҳилида йўл юрдим узоқ,  
Арслон, йўқ, тулпор пишқирап гўё.  
Тўлқинлар ёлини силагим келди.

\* \* \*

Узун, маҳзун кеча – соғинч кечаси,  
Узоқ, қора кеча – хаёл кечаси,  
Қамишзор тож кияр сахарга қадар.

\* \* \*

Тўлқинда чирпирак қайиқ мисоли  
Сочинг тўфонида адашдим роса,  
Юрагингдан ўзга йўл йўқдек гўё.

\* \* \*

Тунни ухлатмади сира, қилди чок,  
Най чалаётган ой излаган наво,  
Дунёларда ёлғиз, ёлғиз ўтган куй.

\* \* \*

Тераклар барг ёзар, гуллар ўрикзор,  
Майсалар сочида қолган изингга  
Бошини кўтариб боқар мажнунтол.



\* \* \*

Ёлғизликтүйида қолдым мен ёлғиз,  
Бирдан останамдан ҳатлар шаббада.  
Келдингми, севгилим, келдингми, баҳор.



\* \* \*

Кутяпсанми мени, тонг эса узок,  
Туннинг юрагидан кечишим керак,  
Тўлқинларда ёлғиз елкан мисоли.

\* \* \*

Гулларга қўнади ҳуркак капалак,  
Бўсалардан сармаст, ўйноқи раққос.  
Бир зум капалакка дўнсайдим, қани?

\* \* \*

Сенга сирларимни айтдим, мусича,  
Йўқотиб қўйдимку ўзимни-ўзим.  
О, энди қайдаман, айтчи, биродар?

\* \* \*

Эй, момақалдироқ, қайдасан?  
Кўнгли гул ишқида куйган булбул, йўқсанку, ахир?  
Тингляйпман сукунат қўшигини жим.

\* \* \*

Отаётган тонгга эмас, йўқ,  
Ботаётган кунга қарайман гоҳо.  
Умр мусичадай қўним излар саргардон.

\* \* \*

Чараклаган офтоб каби  
Ўриклар гуллаб Қува боғларида  
Кўзларимга баҳш айлади умид шуъласин.

\* \* \*

Секин ўгирилиб юзингга термилдим, севгилим,  
Энг керакли сўзни айттолмай,  
Секин қайрилганча кетдим сендан йироқлаб.



\* \* \*

Сенга кўришамиз, дедим, жимгина,  
Қаерга кетяпсан, дўстгинам?  
Ахир, минг йил бўлди, останангдаман.

\* \* \*

Кўприк соясида ухляяпману бедорман,  
Тепамдан автолар ўтар шамолдай.  
Янги кўйлак кияр учқур умидлар тагин.

\* \* \*

Жуда кеч уйғондим,  
Тушларим диёрида уйғоқ эдим, мен.  
Энди қайга мени элтасан, кундуз?

\* \* \*

Қаёққа қарамай, кўраман ўзимни,  
Эшитилиб турар унсиз овозим.  
Дунё қархисида ёлғиз турибман, наҳот?

\* \* \*

Ваҳимали эди оқшом,  
Тонг нақадар осуда.  
Қайдан келаётир капалак қаноти саси?

\* \* \*

Дўстим олма берди қип-қизил,  
Ухлатмади димоғимга тараалган бўйи.  
Асрлар қаъридан келган севги изҳори мисол.

\* \* \*

Қара-я,  
Кечаги тушларимни изляяпман жонсарак.  
Кўзларимни кўйлак қилиб кийганда шамол.

\* \* \*

Уйғонди юракда ажиб туйғулар,  
Севишим айтаман, дейди, кўнгил ҳам.  
Дунё гўзал, кулбам совуқ ва ҳорғин.

**Абдулла УЛУГОВ**

1960 йилда туғилган. Тошкент давлат университетининг (ҳозирги ЎзМУ) ўзбек филологияси факультетини тамомлаган. “Қиссачилигимиз қирралари”, “Инсон ибратга интилади”, “Асл асарлар сехри”, “Ватан – жон ва тан”, “Қалб қандили” каби китоблари, “Адабиётишуносликка киши”, “Туркий халқлар адабиёти” сингари ўқув қўлланмалари нашир этилган.



## **АФСОНАЛАРНИНГ БАДИЙ ТАЛҚИНИ**

Жаҳон адабиётида Чингиз Айтматов ижоди ўзига хос ўрин тутади. Унинг қисса ва романлари қирғиз адабиётини дунёга танидди ва ўзига хос янгилек сифатида Ғарбу Шарқнинг миллионлаб китобхонлари мухаббатини қозонди. Чингиз Айтматов бу даврда жаҳоннинг энг машҳур адиларидан бирига айланди. Дастребаки асарларидан бири “Жамила”ни Луи Арагон “Дунёдаги энг гўзал мухаббат қиссаси” деб атаган. Чингиз Айтматов ижоди тўғрисида сўз кетса, албатта, ушбу таърифни келтириш анъана тусини олган.

Чингиз Айтматов асарлари инсонни улуғлаши, унинг заҳматкашлиги, яратувчалигини шарафлаши билан эътиборни тортади. Асосий қаҳрамонлари – оддий одамлар. Жамила, Дониёр, Та nabой, Бола, Мўмин чол. Адид ана шу оддий одамларнинг турмуш тарзини кўрсатиб, умуминсоний, маънавий-ахлоқий қадриятлар тўғрисида сўз юритади. “Асрга татигулик кун” қаҳрамонлари Эдигей, Абутолиб, “Қиёмат”да Авдий, Бўстон. Улар нафақат қирғиз, қозоқларнинг, балки барча миллатларнинг адабий тимсолидир. Чингиз Айтматов қаҳрамонларининг машаққатли умр йўлини, кувончу изтиробларини кўрсатиш орқали кишиларнинг инсон сифатида ўз-ўзини англаши ғоят мураккаб жараён эканини гавдалантиради ва инсоният минг йиллардан бери маънавий жиҳатдан улғайдими ёки йўқми, де-

ган муаммо тўғрисида мушоҳада юритишга ундейди. Мутолаа жараёнида фан-техника юксак тарақкий этган ахборот асирида ҳам одамзот аждодларни азоблаган, қирғин-барот урушларни келтириб чиқарган шуҳратпастлик, бойлика ўчлик, ҳокимиятпастлик каби заарли иллатлардан халос бўйлмагани, худбинлик, манфаатпастлик кишиларнинг қон-қонига сингиб кетгани, барча замонлардаги муаммолар ана шу давосиз маънавий-рухий касалликдан келиб чиқаётгани тўғрисида ўйлаб қолади. Адибнинг “Оқ кема”, “Асрга татигулик кун”, “Қиёмат”, “Охирзамон нишоналари”, “Тоғлар қулаётган замон” (“Абадий қаллик”) асарларида ҳозирги даврда умумисоний аҳамиятга эга долзарб ижтимоий-сиёсий, маънавий-ахлоқий муаммоларга эътибор қаратилади. Уларда мавжуд ҳаёт мураккабликлари турли миқёсларда кўрсатилади. Санъаткор инсониятнинг бугунги аҳволи, келажаги тўғрисида мушоҳада юритар экан, ўзи англаған ҳақиқатларга диққатни жалб этиш мақсадида афсона, ривоятларга мурожаат этади, ҳар бир кишининг ҳаёти бутун коинот билан чамбарчас боғлиқлиги, инсоният табиат учун масъул ва жавобгар эканлигини таъкидлайди. Қисса, романларнинг сюжетига сингиб кетган ушбу афсоналарда бугунги кун кишилари учун сабоқ, ибрат бўладиган ҳақиқатлар мавжуд.

Оlam пайдо бўлиши, табиат ҳодисалари, инсониятнинг илк ибтидоси тўғрисидаги хаёлий тўқималар “миф” (асотир) дейилади. Афсона ва миф нимани англатиши солиштирилса, улар мазмун-моҳиятига кўра ўзаро ўхшаш тушунча эканлиги аёнлашади. “Қадимги мифлар” деганда “қадимги афсоналар” назарда тутилади. “Прометей тўғрисида миф” “Прометей тўғрисида афсона” дейилиши хато ҳисобланмайди.

Жаҳон адабиёти тарихи ва замонавий адабий жараёнга назар ташланса, унда афсона, ривоят, мифлар алоҳида ўрин тутгани аён бўлади. “Илиада”, “Одиссея” қадимги юонон афсоналарига асосланса, “Рамаяна”, “Маҳобҳорат” ҳинд, “Шоҳнома” форс, “Алпомиш”, “Манас”, “Қўрқут ота китоби” туркий халқлар афсона, ривоятлари заминида яратилган.

Афсона, ривоят, эртакларда халқ ҳаёти, кишиларнинг орзу-армонлари ва муайян ҳақиқатлар акс этади. Шу боисдан “афсона – тарихнинг асранди қизи” дейилади. XX асрда афсона, ривоятлар санъат ва адабиёт учун мислсиз манба экани янада аёнлашди. Инсоннинг ички олами, қалб жумбоғини очишда ривоят, афсоналарнинг асосий омилга айлангани, асарларнинг энг қизиқарли, ёдда қоладиган жиҳати айнан афсона, ривоятлар билан боғлиқ экани кишини ҳайратга солади. Чингиз Айтматовнинг “Оқ кема”, “Асрга татигулик кун”, “Қиёмат”, “Тоғлар қулаётган замон” (“Абадий қаллик”) тилга олинганида улардаги афсоналар эсга тушади. Аниқроғи, ушбу афсоналар мазкур асарларининг мазмун-моҳиятига сингдириб юборилган. Бугунги кун кишилари тақдири асос қилиб олинган айни асарларда афсона, ривоятлар сюжетнинг муҳим тармоғига айланиб, укубат, изтиробга тўла ҳозирги ҳаёт хусусида ўйлантиради.

Чингиз Айтматов асарлари марказида оддий одамлар туради. Адиб кундалик турмушда дуч келаётган муаммоларини кўрсатиш орқали бугунги

куннинг долзарб масалаларига эътибор қаратади. Ушбу муаммолар барча кишиларга бирдай дахлдор эканлигини таъкидлайди. “Оқ кема” қиссасини “Шоҳдор она буғу”, “Асрга татигулик кун” романини “Найман она”, “Раймали оға...” ва “Чингизхонинг оқ булути” афсоналарисиз тасаввур қилиб бўлмайди. Айни афсоналар асарда бугунги кун кишилари ҳаётини кўрсатишида зарурий унсурга айланган. Томас Манн, Габриэль Маркес ижодида ҳам ривоят ва афсоналар инсоннинг мураккаб руҳий-маънавий оламини ифодалашда ўзига хос восита вазифасини бажаради ва асарнинг бадиий тўқимасида муҳим ўрин эгаллади.

“Оқ кема” қиссаси “Унинг икки эртаги бўларди. Бири ўзиники бўлиб, уни ҳеч ким билмасди. Иккинчисини эса бобоси сўзлаб берганди. Кейин бирор таси ҳам қолмади. Гап шу хусусда” деб бошланади. “Оқ кема”да ҳаёт мураккабликлари, инсон ва табиат, инсон ва жамият муносабатлари, эзгулик ва ёвузлик кураши юксак маҳорат билан тасвирланади ва бу муаммолар хусусида теран фалсафий мушоҳада юритилади. Қиссанинг асосий қаҳрамонлари: бола, унинг бобоси Мўмин, ўрмон хўжалиги бошлиғи Ўразқул ва унинг хотини. Адид уларнинг ўзига хос характеристини очиш орқали меҳр-муҳаббат ва зулм-зўрлик, хокисорлик ва ёвузлик курашини ёритади.

Бола факат бобосига суюнади. Болага, бобосининг Шоҳдор она буғу ҳақидаги эртаги ёқади. Бобоси ўзини Шоҳдор она буғунинг авлоди деб билади. Бола Шоҳдор она буғу тўғрисида бобосидан эшитган эртакни портфелига айтиб беради. Ушбу афсона худди эртак сингари “бу жуда қадимда бўлиб ўтган” деб бошланади. Унда эзгулик ва ёвузлик кураши нақл қилинади. Зўравонлик, шуҳратпастлик, азал-азалдан кишиларни азоблаб келгани кирғизларни қирғин қилган душманларнинг шафқатсизлиги мисолида гавдалантирилади. “Ўзга қабиланинг сўнгги одамигача қирған, молу мулкини тортиб олган киши энг ақлли, уддабурон, ботир саналган замон”да кечган хунрезликлар ҳақидаги бу афсона ўзининг бутун даҳшати билан хаёлни эгаллааб олади. Ўшанда киши қирғинбарот урушлар беҳад фожиали эканини тасаввур қилиб, одамлар ёвузлашганида нақадар тубанлашиб кетишидан даҳшатга тушади. Душманлар қирғизларнинг ер-суви, бойликларини эгальаш учун уларни битта ҳам қолдирмасдан ўлдиришади. Лекин бир ўғил ва бир қиз бола душманлар хужум қилмасидан аввал қўлсават учун пўстлоқ шилишга кетгани боис омон қолади-ю ўрмондан чиқиб, мислсиз фожианинг устидан чиқишади. Душманлар “бу икки болани ўрмонга олиб бориб, шундай қилгинки, шу билан қирғиз зоти тугасин, хаёлга ҳам келмасин, номи абадий ўчсин” деб Чўтири Баймоқ кампирга топширишади. Кампир болаларни тубсиз жарликка итариб юборишидан олдин: “О, муazzзам Энасой дарёси! Кел, энди икки қум заррасини – икки одам боласини ўз бағрингга олгин. Уларга Ер юзида жой йўқ...” деб мурожаат қиласди. Асарнинг айни ўринлари ўқувчини ҳаяжонга солади. Шоҳдор она буғу ҳақидаги афсона бу жиҳатдан “Асрга татигулик кун” романидаги Найман она афсонасига ўхшайди. Унда ҳам кишилар қадимдан бир-бирининг устидан хукмронлик қилиш учун шафқатсизликнинг турли усулларини ўйлаб топишгани хусу-

сида сўз кетади. Мислсиз азобдан ўлмай қолган асир охир-оқибат исмини, ота-онасини, бутун кечмишини унутиб, бошидаги теридан уни халос қилган кишини хўжайнини билиб, ҳар қандай ҳукмини сўзсиз ижро этадиган ҳолатга тушади. Одамлар бир-бирларини ана шундай муте қул – манқуртга айлантиришни исташади. Чингиз Айтматов романда манқуртлик тури шаклларда намоён бўлиши ва у ҳамиша инсоният учун фожия эканини ўз онасини отиб ўлдирган Жўломон ва отасининг вафот этганига қайғурмаган Собитжон, кишиларни қийнаш, азоблашдан ҳузур қиласидиган Тансикбоев хатти-ҳаракатларини кўрсатиш асосида гавдалантиради.

Афсона, ривоятларда инсоннинг пайдо бўлиши, ҳаёти бевосита табиат билан боғланади. Шоҳдор она буғу тўғрисидаги афсонада ҳам бир қабиланинг омон қолишига табиат, ундаги ўсимликлар, жонзорлар сабабчи қилиб қўрсатилади. Шунинг учун табиат онага қиёсланиб, “она табиат” дейилади. “Оқ кема”даги афсонада Шоҳдор она буғу табиат тимсолидир. Одамлар қанчалик зарап етказса-да, табиат одамлардан неъматларини аямайди. Шоҳдор она буғу ҳам кишилар унинг иккита боласини отиб ўлдиришса-да, одам болаларига яхшилик қиласиди. У Чўтири Баймоқ кампирнинг огоҳлантиришига қарамасдан, қирғин қилинган қабиланинг омон қолган болаларини узоқ жойга олиб кетиб, сути билан бокиб, кечалари бағрига босиб, иситиб улғайтиради. Улар фарзанд қўрганида оппоқ қайниндан ясалган, бандида кумуш қўнғироқча жаранглаб турган бешик келтиради. Шоҳдор она буғу Чўтири Баймоқ кампирга: “Одамлар эгизларимни ўлдиришди, мен ўзимга бола излаб юрибман. Шу бола ва қизчани бер. Мен уларга она, улар эса болаларим бўлишади” дейди. Чингиз Айтматов Шоҳдор она буғу тимсолида табиат ва оналик бир-бирига бевосита боғлиқлигини шу тарзда кўрсатади.

“Киёмат” романида Исо алайҳиссаломнинг қатл қилиниши тўғрисидаги ривоятда қатл манзарасини осмонда бир қуш кузатиб тургани таъкидланади. Бу күшни Исо алайҳиссалом ҳам, уни қатл этишга ҳукм этган прокуратор Понтий Пилат ҳам кўради. Понтий Пилат Исо алаҳиссаломга “Бошингда ажал қуши айланяпти” деганида, у оҳисталик билан: “У ҳаммамизнинг бошимизда айланяпти” дейди. Қуш соқчилар қуршовида қатл қилиш учун олиб борилаётган Исо ортидан ўша жойга бориб, атрофни айланиб учиб юради. Понтий Пилат бу ҳолатдан таажжубланиб, ташвишга тушади.

Исо алайҳиссаломни қатл қилишга фармон берган прокуратор ҳам жоҳил мустабид эмас. Исо алайҳиссалом қатл қилинишини истамайди, бундай фармон беришга ботинмайди. Понтий Пилат у билан инсон моҳияти, феъл-автори, эртанги куни тўғрисида сухбатлашади, баҳс-мунозарада ҳукмдорларга хос такаббурлик қилиб, зуғум ўтказмайди.

Чингиз Айтматов Понтий Пилатни ҳамма одамлар каби дунёвий фикр юритиб, аксарият кишилар сингари ўз сўзини ўтказишга ҳаракат қиласидиган инсон сифатида гавдалантиради.

Исо (а.с.) мунозара қилиб, уни аҳдидан қайтармоқчи бўлган прокураторга: “Билиб қўйки, Рим ҳукмдори, охират мен туфайли эмас, табиий

оғатлар туфайли эмас, одам болаларининг душманлигидан келади” дейди. Унинг ушбу сўзларида Шохдор она буғу, Найман она афсоналари ва Исо алайҳисалом тўғрисидаги ривоятнинг мазмун-моҳияти мужассамлашади.

Адид афсона, ривоятларни инсониятнинг маънавиятини кўрсатадиган ўзига хос кўзгуга айлантириб, бугунги кун кишилари билан уларнинг аждодлари ўртасидаги ўзаро боғлиқлик ришталарини кўрсатади. Туркий халқлар фольклорида кийик гўзаллик, нафосат, меҳрибонлик рамзи сифатида таърифланади. Кийикнинг одамлардан жабр чеккани тўғрисида ривоятлар талайгина бўлгани ҳолда, ҳеч бир эртак, афсонада бу жонзотнинг кишиларга жабр қилгани нақл этилмаган. Чингиз Айтматов шунинг учун ҳам бола ва қизчага буғу оналик қилганини кўрсатган. Шохдор она буғу тўғрисидаги афсонада буғунинг ёш бола ва қизчани бағрига олиши ҳар жиҳатдан асосланади. “Қиёмат” романнда она бўри Акбара ҳам кичкин-той Кенжашни кўрганида болалари эсига тушиб, у билан ўйнайди, юзини ялади. Кенжаш у билан ўйнай бошлаганида болаларидан, жуфти Тошчайнардан жудо қилиб, уни манзил-маконсиз қолдирган одамлардан қасос олиш истаги бирдан сўнади. Асарда она бўри Акбаранинг ушбу ҳолати: “Бўри ўрнидан қимиrlамай маъюс кўзлари билан болага термилиб ётар, шунда бола яна орқасига қайтиб, унинг бошини силаб-силаб қўяр, Акбара эса уни ялаб-юлқар, бу болага бениҳоя хуш ёқарди. Бўри юрагида йигилиб қолган барча меҳрини унга тўкиб солмоқчи, унинг бола ҳидларини кўксини тўлдириб-тўлдириб искамоқда. Бу бола менинг қоя тагидаги уямда яшаса қандай соз бўларди, деган ўй ўтди бўри калласидан” деб тасвирланади.

Онанинг меҳри ҳамиша унинг қаҳридан устун келади. Одамларда ҳам, бошқа жонзотларда ҳам кузатиладиган ушбу ғаройиб сир-синоат халқ кўшиқлари, эртак, достон, афсона ва ривоятларида мадҳ этилади. Шохдор она буғу, она бўри Акбаранинг одам болаларига меҳрибонлик кўрсатиши заминида аввало уларнинг табиатидаги оналик ҳисси ётади. Чингиз Айтматов афсона, ривоятлардаги одамлар ва жонзотларнинг айни жиҳатига эътибор қаратиш орқали онани улуғлайди. У шохдор она буғу, она бўри Акбаранинг алам-қайғуси, дарду изтироби, меҳрини қаламга олиш асносида барча оналарнинг дардини кўрсатади. Оналар эса ҳамиша бутун инсониятнинг дарди, ташвиши билан яшайди.

Бадиий асарлар воқеликни худди ўзидай аниқ, равшан, ишонарли ва таъсирчан акс эттиргани билан эмас, балки инсон қалби, руҳияти, ички олами, унинг “мен”ини қанчалик теран тадқиқ этганлиги билан аҳамият касб этади. Чунки айни шу хилдаги асарларда инсон дунёсининг мураккаб сир-синоатлари очиб кўрсатилади. Чингиз Айтматов ҳам афсона ва ривоятларни қисса ва романлари сюжетига сингдириш асносида бугунги кун кишиларининг зиддиятга тўла руҳий оламини тадқиқ этишга интилади. “Оқ кема” қиссасида Шохдор она буғу асраб олган бола ва қизчанинг фарзандлари дастлаб буғуларга тегишимагани, ҳеч ким уларни ҳуркитмагани, ўша пайтларда кишилар буғуга дуч келган жойда отдан тушиб, унга йўл беришгани, ошиқлар севганларини оқ буғуга қиёслашгани таъкидланади.

Аммо бу удум бир бойнинг ўғиллари бошқалардан устунлигини кўрсатиб қўйиш ниятида ўлган отасининг қабрига буғу шохини ўрнатишганидан кейин бошқалар ҳам ўша бойнинг шуҳратпараст ўғилларига тақлид қилиб, мархумлар қабрига буғу шохи ўrnата бошлагани айтилади.

Одамлар азалдан бир-бирларининг бойлиги, мансаб-мартабасига қараб, муомала қилишади. Кўпроқ бадавлат кишиларнинг юриш-туриши, гапириши, турмуш тарзига ҳавас ва таассуб этишади. Бойлар эса бошқалардан ажралиб туриш, атрофдагилардан устун эканини кўрсатишдан ҳеч қачон тийилмайди. Муттасил давом этадиган бу жараён ўз-ўзидан турли муаммоларни туғдиради. Одамлар табиатдаги мувозанатга путур етказиши, фирибгарликни, бир-бирини алдашни “ақллилик мезони”га айлантириши уларнинг бойлик тўплашга ружу қўйиши, шон-шуҳратга интилишидан келиб чиқади. “Оқ кема” қиссасидаги Ўрозқул буғу шохини отаси қабрига ўрнатган бойваччаларга ўхшайди. Афсонада бойваччаларнинг ҳам, ўғилларига катта мерос қолдирган бойнинг ҳам исми айтилмайди. Унда шуҳратпараст, мақтанчоқ, зўравон кимсаларнинг тимсоли шу тарзда умумлаштирилади. Ўразқул бошқалардан устун эканлигини намойиш этишдан лаззатланади. Бунинг учун ўзгаларга зўравонлик қилишдан ҳам тап тортмайди. Барчанинг ўзига сўзсиз итоат қилиши, ҳамма истаклари бажо келтирилишини истайди. Ўразқул фарзанд туғмаётгани учун хотинини айборд санаб, дўпослайди, қайнотаси Мўмин чолни назар-писанд қилмай, сўкиб таҳқирлайди. Ўразқул кишиларни мансаб-мартабаси, бойлигига қараб баҳолайди. У Мўмин чолга: “Муаллиманг ўзи ким бўлибди? Беш йилдан бери устидан битта пальто тушмайди. Фақат дафтар билан, сумка билан кўрасан. Доимо йўлда қўл кўтариб, машина кутгани кутган” дейди.

Ўразқул мансабни бошқаларга хукмронлик қилиш воситаси деб билади. Каттароқ амалдор эмаслиги, овлоқ бир жойда кичкина ўрмон хўжалиги бошлиғи эканлигича қолаётгани уни кўп азоблайди.

Мўмин чол Ўразқул сингари зўравонларнинг адолатсизлиги, зулми ҳакида ўйлаб эзилади. “Одамлар нега шундай бўлиб қолишар экан-а? Сен унга яхшилик қиласан, у сенга ёмонлик қайтаради. Уялмайди ҳам, уялишини хаёлига келтирмайди ҳам. Худди шундай бўлиши лозимдек ҳамиша ўзиники тўғри деб билади. Фақат унга яхши бўлса, бўлгани. Ҳамма унинг атрофида гирдикапалак бўлиши керак. Агар истамасанг, мажбур қиласди” деб изтироб чекади. Ўразқул такаббурлиги, шуҳратпарастлиги билан қирғизлар қавмини қирғин қилиб, Чўтири Баймоқ кампирга бола ва қизчани ўлдиришни буюрган хонга, Найман онанинг ўғлини манқуртга айлантирган золимларга ўхшайди.

“Асрга татигулик кун” романидаги Собитжон характери, дунёқараши жиҳатидан ўз онасини отиб ўлдириган Жўломондан фарқ қилмайди. Уларнинг бири – замонавий, иккинчиси – ўтмишдаги манқурт. Собитжон урфодат, қадриятларни назар-писанд қилмайди. Уларни одамлар ўтмишда эрмак учун ўйлаб топишган, дейди. Отаси вафот этганидан қайғурмайди. Мархумни унинг васиятига кўра Она Байит қабристонига элтиб, дафн этиш-

га қаршилик қиласди. “Узокдаги Она Байит қабристонига олиб бориш шартми? Ўлган одамга қаерга кўмилишнинг нима аҳамияти бор?” дейди. Со-битжон ёшлигидан ота-онасидан узоқда бўлгани, мактаб-интернатда ўқиб, шаҳарда яшаб қолиб кетгани туфайли яқинларига меҳрсиз, урф-одат, таомилларга тушунмайдиган кимсага айланади. “Идорада зарур ишлар қолиб кетяпти, вақт бўлса тифиз. Бошлиқларимиз қабристоннинг узоқ-яқинлигини суриштириб ўтирумайди, ишга фалон куни келасан, бошқасини билмайман, дейди. Бошлиқ нима бўлганда ҳам бошлиқ, ҳар ҳолда, шаҳарнинг шароити бўлак” деб ўзини оқлади.

“Асрга татигулик кун” рамонидаги Раймали оға ва Бегимой тўғрисидаги ривоят севги-муҳаббат мавзусида бўлса-да, унинг ҳам марказида худди Найман она, Шоҳдор она буғу афсонасидаги каби эзгулик ва ёвузликнинг кураши туради. Ушбу ривоятда жоҳил кимсалар севишганларга қанчалик қаршилик кўрсатишгани таъсирчан нақл қилинади. Мазкур ривоят муайян даражада адабнинг “Жамила” қиссасини ёдга солади. Қиссада эри урушга кетган Жамила урушдан қайтган бошқа эркак – Дониёри севиб қолгани ҳикоя қилинади. Ривоятда эса ўн тўққиз ёшли Бегимой олтмишдан ошган Раймали оғани яхши кўриб қолиши билан боғлиқ драматик воқеалар нақл этилади. Қиссада Жамила ва Дониёр бирга кетади. Оқин Раймали оғага эса одамлар “ақлдан озган” деб қарайди. Укаси Абдилхон уни банди қилиб, дарахтга боғлаб ташлайди. Ушбу ривоятда Абдилхон золимлик тимсоли бўлиб кўринади. Жоҳил, золимларнинг бошқалардан фарқли жиҳати шундаки, улар ҳеч қачон ҳақиқатни тан олишмайди, бошқаларнинг ҳам хоҳишистаги, кўнгли борлигига эътибор қилишмайди. Фақат ўзларининг манфатини ўйлашади. Раймали оғанинг укаси Абдилхон, бошқаларни бемалол оёқ ости қилиб кетадиган худбин кимсаларнинг ёрқин образидир. Раймали оға қариндошларидан “Куй қуишлиб келса, куйламоқнинг нима айби бор?” деб сўрайди. Унинг бу саволларига ҳеч ким, уруғ оқсоқоллари ҳам жавоб беролмайди.

“Чингизхонинг оқ булути” қиссаси асосида ҳам афсона туради. Қиссада афсона мисолида шўро сиёсати зўрликка асосланганига ишора қилинган. Чингизхон тўғрисидаги афсона роман сюжетида алоҳида тармоқ бўлса-да, лекин асар умумий руҳига сингишиб кетган. Адабнинг олам ва одам тўғрисидаги фалсафий мушоҳадалари роман сюжетидаги барча тармоқларни, жумладан, ундаги афсона ва ривоятларни яхлит бирлаштирган. Найман она, Чингизхон афсонаси, Раймали оға ва Бегимой тўғрисидаги ривоят умумбашарий нуқтаи назаридан ёритилган.

Чингиз Айтматовнинг санъаткорлиги шундаки, у асарларида шафқатсиз, золим кишилар образини фақат қора бўёқда кўрсатмайди. У бундай кишиларда ҳам озгина бўлса-да, инсоний хусусиятлар мавжудлиги, улар ҳам изтироб чекиши, йиғлашини маҳорат билан очиб беради. Беҳисоб қон тўйкан мустабиднинг кўнгил кечинмалари, армон, изтироблари билан таништириб, унинг инсон сифатидаги мураккаб оламини кўрсатади. “Чингизхоннинг оқ булути” ҳажм жиҳатидан адаб асарларидағи энг катта афсона сана-

лади. Шохдор она буғу, Найман она афсоналарида тўқима қаҳрамонлар образи яратилгани ҳолда, ушбу афсонада тарихий шахс – Чингизхон асосий қаҳрамон сифатида гавдалантирилган.

“Асрга татигулик кун”, “Қиёмат” асарларида ҳаёт ҳодисаларини акс эттириш ва инсон дунёсини гавдалантиришда замонавий жаҳон адабиётидаги илфор тажрибалар мужассамлаштирилган. Бу мазкур асарларнинг композиция ва сюжети қурилиши, унда афсона ва ривоятларнинг жойлаштирилиши, қаҳрамонлар хатти-ҳаракати, кечинмаларининг улар хотиралари билан боғланиши ва энг асосийси, турли характердаги персонажларнинг ички оламидаги зиддиятларга эътибор қаратилишида кўринади.

Ҳаёт ҳар бир кишининг олдига ҳар дақиқада кутилмаган муаммони қўяди. Шунинг таъсирида одамнинг кайфияти, борлиққа, кишиларга муносабатида муттасил ўзгаришлар рўй беради. Шу боисдан “инсоннинг қалби ғоятда нозик” дейилади. Кишининг қалбida эзгулик ва ёвузлик ҳислари бир-бирига жуда яқин туради. Ана шундан қалбда зиддиятли кечинмалар кечади. Инсон ҳар бир нарсадан хавотир олади, иккиланади, шубҳа, гумонга боради. Одам аслида табиатидаги ана шу жумбоқ боис азобланади. Чингиз Айтматов турли характердаги қаҳрамонлар образини яратишида ана шу ҳақиқатдан келиб чиқади.

Адиб барча асарларида инсон дунёсига турли ракурслардан қарайди. У қисса, романларида ўз манфаатини ҳамма нарсадан устун қўйиш истаги кишилар табиатига чукур сингиб кетгани, ҳаётдаги барча муаммолар айнан шундан келиб чиқишини кўрсатади. Чунки ҳар бир одам бутун ҳаёти давомида ўз манфаати сари интилади. Лекин бу ҳеч бир кишининг қабиҳлигини оқлаш учун асос бўлолмайди. Чунки ҳар қандай қабиҳлик жиноятдир. “Тоғлар қулаётган замон” (“Абадий қаллик”) романида табиат ҳам одамларнинг бир-бирига адоватидан азият чекиши тасвирланган. Адибнинг сўнгги асари бўлиб қолган мазкур романда “Абадий қаллик” афсонаси нақл қилинади. Афсонада севишганлар ҳасадчилар фитнаси туфайли бир-биридан айрилгани ҳақида сўз боради. Фитначилар тўй куни келинни “севган йигити билан кечаси қочиб кетди” деб гап тарқатиб, уни ўғирлаб кетишади. Лекин дарёдан ўтишда фитначилар ҳалок бўлиб, қиз омон қолади. У тўй ўтган жойга қайтганида куёвнинг тоғларга бош олиб кетганини эшишиб, ўша томонга йўл олади. Куёвни ҳам, келинни ҳам ҳеч ким тополмайди. Куёв тоғларга кетишидан олдин одамларга: “Буткул одам зотини қарғайман! Одам бўлгандан кўра ҳайвон бўлганим яхши... Дунёда биронта одамни кўргани кўзим йўқ ва бундан буён мени ҳеч ким кўрмайди” деб айтади.

Ушбу афсона асар сюжетини яхлит бирлаштириб туради. Адиб афсона билан боғлиқ саҳифаларда ўзини азоблаган аламли ўйларни ифода этади.

“Охирзамон нишоналари” романида қаҳрамон океан устида иккита қуёш пайдо бўлиб, сувнинг чидаб бўлмайдиган даражада қайнаб кетганини туш кўриши, бу фалокатдан қутилиш учун китлар ўткир учбурчак ҳосил қилганча уфққа қараб сузиши, у кутурган океанда китлар билан ёнма-ён

сузиб бораркан: “Океан қайнаб кетади ва биз ҳаммамиз нобуд бўламиз!” деб бақириши баён этилади.

Бу жониворлар учун энг даҳшатлиси инсон ақли етмайдиган, пайқамайдиган ҳолат, яъни нософ ижтимоий муҳитнинг, одамлар қилган ёвузликларнинг таъсирида дунёвий рух мувозанатининг бузилиши бўлса керак. Афтидан, китлар учун энг даҳшатлиси ана шу... Китлар инсон хулқидаги нопокликларга, шафқатсиз ва даҳшатли ёвузликларга чидай олмайди... Қаҳрамон тилидан айтилаётган айни сўзлар аслида адабнинг азобли ўйлари, унинг дарди, изтироби экани аниқ англашилади.

Одам қандай фикрласа, шу тарзда харакат қиласди. Киши интилиши унинг фикри, ички ўйларга мувофиқ кечади. Чингиз Айтматов ҳам қаҳрамонлари образида айни ҳақиқатни гавдалантиради.

## ҲУҚМАТ

**Гар инсон эқансан, ҳалқ ман-  
драати ўғлида ҳарақат қил,  
тоқи ҳалқ ўз хоҳиш-истаги би-  
лан сенинг хизматингда бўлсин.**

**Мажидиддин ХАВОФИЙ**

\* \* \*

**Мардлиқ қучда ва шамшир  
ӯйнамиш санъатида эмас, мард-  
лиқ ўзни тута билишда ва ago-  
латли бўлишгадир.**

**Саъдий ШЕРОЗИЙ**



## Исломжон ЁҚУБОВ

1961 йилда тугилган. Нукус давлат университетининг филология факультетини тамомлаган. “Ўзбек романни тадрижси”, “Бадиий-эстетик сўз сеҳри”, “Миллий уйғонни даври ўзбек насли”, “Бадиий матн ва эстетик талқин” сингари ўндан ортиқ монография, рисола ва мақолалар тўпламлари нацир этилган.

# АДАБИЙ ТАНҚИД – ДАВР БАРОМЕТРИ

Адабий танқид – давр барометри<sup>1</sup>. Адабиётшунослик обьектида адабий жараён ҳодисалари, бадиий асар кўлами, шакл ва услуб, поэтик тафаккур, жанрларнинг ўрнию имкониятлари, матнда бадиият қонуниятлари қай тарзда намоён бўлиши, ташки адабий таъсир, таҳлил ва талқин йўсинлари акс этади. Баъзан эса, айрим нохуш ҳолатлар олдини олишни қўзловчи амаллар ҳам ўтказилади. Сўзнинг ибратли жиҳатлари илғанади, салмоғи англанади. Ижодкорнинг феноменал қиёфаси, ижоди кашф этилади. Бадиий асарлар яратилиш тарихи, генетик илдизлари, поэтик жозибасию эстетик идеалнинг ифодага кўчган мазмун-моҳияти очилади.

Бинобарин, замонавий адабий танқидчилик етакчи поэтик тамойилларни кашф этувчи, тарғиб-ташвиқ этувчи ва йўналтирувчи соҳадир.

Ўзбекистон Ёзувчилар уюшмаси томонидан 110 шоир, 43 носир, 10 драматург, 41 публицист, 29 адабиётшунос ва мунаққидлар ижодидан намуналарни жамлаган “Озод Ватан саодати” номли беш жилдли китоб “Истиқлол илҳомлари” рукни остида чоп этилди<sup>2</sup>.

Албатта, бешинчи жилдига киритилган адабиётшунос ва мунаққидлар рисолаларини биргина мақолада кўламли тарзда ёритиш осон эмас. Адабий танқиднинг сустлашгани ҳақидаги фикрлар кенг жамоатчиликни безовта қилаётган бугунги кунда сўзни адабий меросга муносабат масаласидан бошлишни лозим кўрдик.

*Тариқат ҳақида* академик Иззат Султоновнинг бешинчи жилдан ўрин олган “Баҳовуддин Нақибанд абадияти” номли мақоласида тариқат мазмуни ва хос хусусиятлари ёритилди. Мақола буюк мутафаккир Нақшбанд шахси ва таълимотига Навоийнинг муносабати муаммосини тушунтириши

<sup>1</sup> Барометр – юнонча *baros* – оғирлик ва *метр* ўлчов бирлиги – атмосфера босимини ўлчайдиган асбоб. (Биз терминни адабий жараёнда кечаттган кайфият-ҳолатлар кўрсаткичи; илмий-адабий жамоатчилик фикр-карапшали мезони маъноларида кўплайдик. И.Ё.)

<sup>2</sup> Озод Ватан саодати. Беш жилдли. Тошкент, ADIB, 2013. (1-жилд: Шеърият; 2-жилд: Наср; 3-жилд: Драматургия; 4-жилд: Бадиий публицистика; 5-жилд: Адабий танқид. Маколада келтирилган иктибослар шу нашрнинг сўнгги жилдидан олиниб, сахифалар кўрсатиб борилди. И.Ё.)

жиҳатидан муҳим қиммат касб этади. Олим диққатининг Навоий, Жомий, Хўжа Ахрор Валий асарлари орқали тариқат пирлари тақдири ва маънавий-ахлоқий қиёфасига қаратилиши тасодиф эмас. Мустақиллик даврида улуғ пирлар ва улар маънавий меросини ўрганиш ўзимизни қайта идрок этиш, ҳаёт тарзимизни ўзгаририш, адабий-эстетик қарашларимизга муайян таҳрирлар киритишга ундади.

Мустақиллик даври Нажмиддин Комиловга эркин ёзиш, тарихий ҳақиқатни рўйирост айтиш учун катта имкон берди. Чунончи, олимнинг “*Тасаввух ва бадиий ижод*” номли мақоласида, тасаввухнинг адабиётдаги ифодаси баркамол инсон, рух озодлиги, ирфоний ғояларга таянувчи сўфиёна концепцияга интилиши, уларнинг ўзаро таъсири ижтимоий-мафкуравий ҳамда эстетик эҳтиёж меваси экани таъкидланади.

Умуман, бадиий сўз санъатида инсонни ўрганиш ва поклаш, унинг қалбини ифода этишга йўналган тасаввух адабиёти деган мавзу мавжуд. Мустақиллик даври адабиёти ўнлаб адабиётшуносларнинг beminnat заҳматлари туфайли ана шу улкан хазинадан баҳраманд бўлиш баҳтига эришди.

**Методология муаммолари.** Бегали Қосимовнинг “*Миллий уйғонии даври ўзбек адабиётини ўрганишининг долзарб масалалари*” мақоласида муҳим методологик муаммолар таҳлилга тортилган. Адабиётшунос давр ва поэтик ижод, замон ва бадиият, анъана ва новаторлик каби нисбатан кам ўрганилган назарий ҳамда амалий масалаларга алоҳида диққат қаратган. Туркий халқларнинг жаҳон цивилизациясидаги ўрни хусусида куйинчаклик билан сўз юритган. Миллий ғоя ҳамда миллий мафкура негизида адабий-сиёсий тазиيқ оқибатлари, юрт истиқболи ҳақидаги ижтимоий-адабий ўй-фиркларини илгари сурди.

Илмий тадқиқот методологиясининг аҳамияти хусусида қайғурган олимлардан бири Абдуғафур Расулов эди. Унинг “*Концепция зарурати*” мақоласида XX аср адабиёт ва санъатидаги “изм”ларга муносабат ифодаланди. Илдизлари теран бўлмаган айрим адабий оқимлар моҳияти тадқиқ этилди. Абдуғафур Расулов адабиётнинг назарий-методологик асоси хусусида узил-кесил концепция яратмаган бўлса-да, адабиёт яхлит ҳодиса экани, ўтмиш адабиётини қайта ўрганиш лозимлиги ҳақидаги принципиал фикрларни илгари сурди.

Баҳодир Каримовнинг “*Бадиий сўзни англиши*” мақоласида мустақиллик даври ўзбек адабий танқидчилиги ва адабиётшунослигининг поэтик мерос ва адабий жараёнга муносабати масаласи ўрганилди. Миллий-эстетик тафаккур намуналарида адабий ҳодисаларни таҳлил қилишдаги услубий турфалик, адабий-назарий концепцияни шакллантириш йўлидаги изланишлар ижод эркинлиги, миллий ўзлик ва ўзбекона қадриятларга эътибор самараси экани алоҳида таъкидланди.

**XX аср ўзбек адабиётини қайта баҳолаши принциплари.** Озод Шарафиддинов “*Адабиёт яшаса – миллат яшар*” номли мақоласига Чўлпон 1914 йилда адабиётнинг ижтимоий моҳияти тўғрисида илгари сурган

фикрни<sup>3</sup> сарлавҳа қилиб танлаган. У ёзувчи адабий-эстетик қарашлари акс этган “Адабиёт надур?”, “Мұхтарам ёзғувчиларимизга”<sup>4</sup>, “Улуғ ҳинди”<sup>5</sup> мақолаларини таҳлилгә тортади. Чунки бу мақолаларда маънавий уйғониш ва маданий ривожланиш борасида ўша давр адабий жараёни олдида кўндаланг турган долзарб муаммоларга жавоб изланган. Ўзбек адабиётига Шарқ ва Фарб беназир тажрибаларини олиб кириш орқали уни илғор фоялар, бадиий малоҳат хисобига бойитишга ҳаракат қилинган.

Абдулла Улуғовнинг “Қабиҳ мактубларни ким битган?” мақоласида “Ўткан кунлар” романида эпистоляр жанр намуналарининг сюжет яхлитлигини таъминлаш, воқеалар драматизмини кучайтиришдаги катализаторлик поэтик функцияси, турли табиатли одамлараро муносабат тасвирида муаллифнинг сўз санъаткори сифатидаги сир сақлаш маҳорати таҳлил этилади. Тухматномалар ёзишдек қабиҳ ишларда Ҳомидга ҳамтовоқ бўлган Умарбек образининг асл моҳияти гипотетик усул орқали очилади.

Матёкуб Кўшжоновнинг “Бир асар қисмати” мақоласида эса, Ойбекнинг “Навоий” романига муносабат масаласида адабий сиёсат ва ижтимоий-эстетик қарашлардаги ижобий силжишлар тадқиқ этилади. Ойбек қирқинчи йилларда оғир қисматга юзма-юз бориб Алишер Навоийнинг аниқ, йирик ва жонли образини яратиш орқали ўша пайтда ўзбек маданиятида юзага келган тарихий кемтикни тўлдирган йирик сўз санъаткори сифатида баҳоланади. Шўро адабий-мағкуравий сиёсатининг улкан истеъодд соҳиблари ва уларнинг ижод намуналарига ғайрли қарашларини инкор этган олим: “Ойбекнинг “Навоий” романи тарихий беллетристиканинг барча талабларига тўла жавоб берадиган асар сифатида майдонга келди... “Навоий” романи тарихий роман жсанрининг мумтоз намунаси”<sup>6</sup>, деб ёзади.

**Шеърият.** ИброҳимFaфуровнинг “Ўзгараётган дунёда шеър сўзи” мақоласида мустакиллик даври ўзбек шеъриятида етакчи ўрин тутувчи Ватан, Истиқлол, Маънавият масаласининг поэтик ифодасига диққат қаратилиди. Ўнлаб шоирларнинг озодлик шукуҳи намоён бўлган лирик асарларига хос умумий ҳамда индивидуал жиҳатлар таҳлилгә тортилади. Бадиий ифоданинг тарихий-ижтимоий воқелик характерига мос поэтик усувлари, образли фикр-кечинма баёни ҳамда шаклий ўзгаришлар тадқиқ этилади.

Мақолада баъзи ёш қаламкашлар шеър сифатида тақдим қилаётган “маҳсулот”ларда кузатилувчи ғўрлиқ, думбуллиқ, уларга ёзилган айrim тақризларда намоён бўлувчи адабий дидсизлик иллатлари ҳақли танқид қилинади. Олимнинг адабий танқидга хайриҳоҳлик назари билан қараш, уни рағбатлантириш, адабий-эстетик саводхонликни янада ошириш, мавжуд кучларни ягона мақсад йўлида уюштириш зарурлиги борасида куйинчаклик билан илгари сурган фикр-қарашлари барча қалам аҳлига дахлдордир.

Нурбой Жабборовнинг “Гўзал ташбех, сирли руҳ” мақоласида нафис

<sup>3</sup> Чўлпон. Адабиёт надур? / Садои Туркестон, 1914, 4 июнь.

<sup>4</sup> Чўлпон. Мұхтарам ёзғувчиларимизга. / Садои Туркестон, 1915, 6 февраль.

<sup>5</sup> Чўлпон. Улуг ҳинди. / Маориф ва ўқитувчи, 1925, 7-8- сонлар.

<sup>6</sup> Ойбек. Бир асар қисмати. -Б. 40.

ва ҳароратли сўзга интиқ миллатдошларимиз шуурини маърифат шуъласи билан нурафшон этиб, кўнгилларда мустақилликни мустаҳкамлаш туйғусини тарбиялашга баракали ҳисса қўшиб келаётган Ўзбекистон Қаҳрамони, халқ шоири Абдулла Орипов фалсафий шеъриятида мумтоз ва замонавий поэзия ютуқлари мужассам экани таҳлилга тортилади.

Тадқиқотчи Абдулла Орипов шеърияти умрбоқийлигини таъминлаб келаётган омиллар: улар замиридаги бетакрор мазмун, гўзал бадиият ва миллий руҳдир, деган жуда тўғри хулосага келади. Бироқ, у шеърияти-мизнинг сўнгги 30-40 йиллик мазмун йўналишини битта адабий сиймо ижоди билангина боғлади. Унинг бағридаги ўзгача йўналишга рағбат билдирувчи адабий йўсинглар истиқболига биркадар ишончсизлик билан нигоҳ ташлайди. Ваҳоланки, анъана ва новаторлик эгиз тушунчалардир. Ҳатто, анъанавийликнинг ўзи ҳам муттасил ўзгаришлар оғушида. Шундай экан, бу икки тушунча шеърият, кенг маънода эса миллий поэтик тафаккурнинг қўш қанотидир.

**Наср.** Хуршид Дўстмуҳаммад “Миллий ҳикоя: изланишилар, ютуқлар, истаклар” мақоласида ҳикоя жанрининг қамров имкониятларини бадиий ижоднинг табиати ҳамда поэтик тафаккур қонуниятлари билан узвийлиқда ўрганади. Мунакқид мазкур жанрнинг шаклланиш ва юксалиш йўлини ўз ўқ томирларидан ажратмайди. Бинобарин, фольклор ва мумтоз адабий мерос, ҳикоячилик ривожидаги XX аср миллий поэтик тажрибалари ҳамда жаҳон адабий мактаблари ютуқларидан ижодий баҳрамандлик уни дунё ҳикоячилигининг ажралмас узвига айлантириди.

Умарали Норматовнинг “Роман кўзгусида миллат тақдиди” мақоласида поэтик тафаккур қамрови ҳамда бекиёс бадиий ифода имконлари жиҳатидан миллий адабиётлар бўй-басти ва юксалиш даражасини белгиловчи роман жанрининг ўзгарувчан табиати хусусида сўз боради. “Ўткан кунлар”, “Кечава кундуз”, “Құмтулуг қон”, “Сароб” сингари бир-бирини тўлдириб, мантиқан давом қилдирувчи романларда тўпланган қимматли тажрибалар – тарихий-маънавий жараёнларни гавдалантириш, мустақиллик йилларида ўзгачароқ шаклий-услубий кўринишларда изчил давом этаётгани социологик жиҳатдан таҳлил этилади.

Афсуски, мунакқид истиқлол даври романлари поэтикаси турли бўғинга мансуб адабиётшунослар томонидан ўрганилгани, бу эзгу ишлар ҳозирда изчил давом қилаётганига етарлича эътибор бермайди. Натижада, “...адабий танқид зиммасидаги бош вазифа – мавжуд роман хирмонини саралашида хийла сусткашилик қиляпти”, деган андак нохолис фикрни илгари суради. Истиқлол даври ўзбек танқидчилиги, хусусан романшунослик жиддий ва ҳақ йўлга чиқди. Эҳтимол, унинг олдида турган айрим вазифалар тўла уddeланмагандир. Аммо, миллий адабий-эстетик тафаккур ривожининг яқин ўтмиши, айниқса салкам чорак асри ҳакида сўз юритганда бундай ноилмий хулосалардан сақланиш зарур.

Қозоқбой Йўлдошев “Роман жанрининг етакчи белгилари ва бугунги ўзбек романларига хос хусусиятлар” мақоласида эътироф этилишича,

мустақиллик даври ўзбек адабиётнинг инсоният тафаккурига қўшган ҳиссаси миллат бадиий тафаккури тараққиёт даражаси нисбатан ёрқинроқ намоён бўлувчи жанр бўлмиш романчилик салмоғи билан белгиланади. Замонавий ўзбек романчилигида тасвирнинг янгича қатламлари ўзлаштирилиб, мазкур жанр бетакрор тимсоллар ҳисобига янада бойиб бораётгани мунаққид синчков нигоҳидан четда қолмайди. Романда муаллиф нияти, шаклий-мундарижавий ўзгаришларга мойиллик, синткрематиклик, алоҳида одамнинг чўнг ва мураккаб ботин оламини миқёсли бадиий тафтиш этиш, полифонизм каби жанр белгилари таҳлил этилади.

Йўлдош Солижоновнинг “Янги аср насири манзаралари” мақоласида эътиборга молик кузатишлар билан бир қаторда: “Агар асар сюжети гоялар, қарашлар, характерлар, гуруҳлар ўртасида рўй берадиган қарамакаршиликлар асосига қурилмаса, бундай асар таъсирчан бўлмайди. Бинобарин, ҳаёт ҳақиқатининг аниқ ва изчил ифодаланиши зиддиятларнинг моҳияти ва ишонарлилиги билан ўлчанади”,<sup>7</sup> қабилидаги фикрлар ҳам илгари сурилади. Бундай ўринларда муннаққид адабий-назарий концепцияси тўла янгиланмагани сезилиб қолади. Адабиётшунос бадиий яратиқларни таҳлил ва талқин этишда яроқсиз қолип ва андозалардан воз кечолмаётгани сабабли айрим ижодкорлар қалби, маънавий-рухий оламига чукур кира олмайди. Чунки “ижтимоий долзарб муаммо”, “мантиқий аниқлик”, “гуруҳлар кураши” сингари талаблар нуқтаи назаридан баҳолаш миллий адабиётимизда бўй кўрсатаётган янгиланишлар – бадиий ҳақиқатни чукур изохлашга заифлик қиласди.

Бахтиёр Назаровнинг “Юксак тарихий эътиқодга муносиб самара” мақоласида Ўзбекистон халқ ёзувчиси Муҳаммад Али қаламига мансуб “Улуғ салтанат” роман-эпопеясининг “Шоҳруҳ Мирзо” номли сўнгти асари тадқиқ этилади. Адабиётшунос олим роман бадиий концепцияси, етакчиғоя ифодаси, фалсафий мушоҳада теранлиги, ҳиссий-экспрессивлик, замонавий рух тасвирини асарнинг аввалги жилдлари билан узвийликда таҳлилга тортади. Шунингдек, тетралогияни Ойбек тарихий романлари билан қиёсан ўрганаркан, устоз-шогирднинг тарихий манбалар устида ишлаш борасидаги муштараклиги қаҳрамонлараро руҳий иқлим яқинлигини таъминлаган, деган холосага келади. Ёзувчининг бадиий тилда меъёрии саклаш жозибаси ҳамда поэтик нутқ товланишлари гўзаллигига диққат қаратаркан: “Асарнинг лирик саҳифалари бамисоли шеърдек ҳиссий, тўлқинли”,<sup>8</sup> деб ёзади.

Бахтиёр Назаров асарнинг қиммати, тарихий-адабий жараёндаги ўрни ҳакида тўхталаркан: “Улуғ салтананат”дек маҳобатли асарнинг яратилиши нафақат адаб муваффақияти, балки у мансуб миллат адабиётидаги ҳодиса... Муҳаммад Алининг “Улуғ салтанат” тетралогияси тарихий роман-эпопеяning барча асосий талабларига жавоб беради ва у ўзбек адабиёти тарихида том маънодаги биринчи тетралогиядир. Адаб ўзбек

<sup>7</sup> Солижонов Й. Янги аср насири манзаралари.-Б. 247.

<sup>8</sup> Назаров Б. Юксак тарихий эътиқодга муносиб самара.-Б. 148.

адабиётида эпик жанрнинг тетralогия типига асос солди, бу масалада ўзбек адабиётининг янги босқичини бошлаб берди... илгор тажрибаларни ўзбек адабиёти мисолида Ўрта Осиё ва умуман, Осиё адабиётида янги манзилга олиб чиқди”,<sup>9</sup> дея ниҳоятда улкан баҳо беради.

Мұхими, юқоридаги эътироф чукур илмий-назарий қарашлар орқали ўз тасдиғини топган. Масалан, адебнинг бош принципи асрлар синовидан ўтган тарихий ҳақиқатга садоқат ва уни бадиийлик билан уйғунлаштиришdir. Роман композицияси пухта ишланган. Ўқувчини тизимли равишида ўзига чорлаб, эргаштириб туради. Асарда реалистик принципларга амал қилиниб, психологик таҳлил ва тасвир теранлаштирилган. Анъанавийлик ва “онг оқими”га хос ифода муштараклиги таъминланган. Психоаналитик тасвир усулидан самарали фойдаланилган. Манзара-ҳолатлар тасвирида жонли ифода назокати ва бадиий деталлар функционаллигига эришилган. Роман финали шиддатли, сиқиқ, теран күчма маъноли ва айни пайтда ишоравий йўсинда поэтик таъсирчан хулосаланган. Пластик ва нопластик образлар дунёсининг ички ҳаракати санъаткорона акс этган. Кўринадики, мақолада кузатилган далиллар теран таҳлил ва талқинга асосланади. Фикр-мулоҳазалар эса ўзининг ишонарли исботини топади.

Адҳамбек Алимбековнинг “Тарихий романчилигимизга бир назар” мақоласида мустақиллик даври ҳалқ маънавияти ҳамда поэтик тафаккурида тарихни романий тафаккур миқёсларида идрок этиш эҳтиёжи қучайгани Бўрибой Аҳмедов, Пиримқул Қодиров, Муҳаммад Али, Саъдулла Сиёев, Омон Мухтор, Асад Дилмурод, Эркин Самандар, Пирмат Шермуҳамедов, Тўлқин Ҳайит, Йўлдош Сулаймон қаламига мансуб тарихий-биографик, ижтимоий-фалсафий ва ижтимоий-тарихий романлар мисолида тадқик этилади. Замонавий ўзбек тарихий романчилиги бадиий таҳлил ҳамда талқин имкониятлари кенглиги, фалсафий мушоҳадакорлик чукурлиги миллий рух ифодаси ёрқинлиги жиҳатидан дунё адабий жараёнига ҳамқадам экани кўрсатилади.

Маҳкам Маҳмудовнинг “Саргузашт адабиётининг бадиияти” мақоласида эса, ўзбек реалистик саргузашт адабиётининг: Омон Мухтор, Тоҳир Малиқ, Асад Дилмурод, Ҳожиакбар Шайхов, Эркин Аъзам, Ҳуршид Дўстмуҳаммад, Шойим Бўтаев, Тиловолди Жўраев, Алишер Ибодинов, Қобил Мирзо, Баҳодир Худойберганов, Қаҳрамон Аҳмад, Одил Абдураҳмон сингари вакиллари яратган ҳикоя, қисса ва роман жанрларига мансуб асарлар ўрганилади. Олим уларнинг поэтик жозибасини мумтоз ва замонавий Шарқ насли, XX аср адабий-ижодий мактаблари тажрибаси ҳамда жаҳон адабиёти намуналари билан қиёсий таҳлилга тортади.

Ўзбек саргузашт адабиёти истиқлол даврида шакл, мазмун, ифода, образ ва талқин нуқтаи назаридан янги босқичга юксалганини ишончли тарзда далиллашга эришади.

**Тарихий драматургия.** Шуҳрат Ризаев “Истиқлол даври ўзбек тарихий драматургияси” мақоласида мустақиллик даври театр санъати мисолида

<sup>9</sup> Назаров Б. Юқсак тарихий эътиқодга муносиб самара.-Б. 163-164.

миллий тарихимизни бадиий ифода этиш маърифий эҳтиёжи қай тарзда қондирилиши, бадиий тадқиқ қилиш асносида ички маърифат, поэтик идрок ва маҳоратнинг ўрни, саҳна асарларини даврий чегараларига кўра таснифлаш, унинг жанрий йўналишларини аниқлаш, саҳналаштирилиш жараёнини кузатиш сингари масалалар ўрганилади.

Шуҳрат Ризаев қисқа вақт оралиғида яратилган ва саҳна юзини кўрган юздан ортиқ тарихий драмаларни кузатаркан, ижтимоий воқелик хамда тарихий образларни бадиий идрок этишнинг ижтимоий-публицистик, тарихий-фалсафий, тарихий-биографик, фалсафий-лирик, фалсафий-психологик, фалсафий-интеллектуал ифода усуллари намоён бўлишини аниқлайди. Давр адабиёти ва санъатида эътиборли ҳодиса бўла олган “Соҳибқирон” (А.Орипов), “Араб Баҳодирхон” (Э.Самандар), “Қора камар”, “Зиёфат” (Ш.Холмирзаев), “Қатагон” (Ў.Хошимов), “Кундузсиз кечалар” (У.Азим), “На малакман, на фариишта” (Н.Қобул), “Занжирбанд шер” (З.Нажмий) каби тарихий асарларнинг ижтимоий-сиёсий ва публицистик пафосини эътироф этади.

**Адабий алоқалар ва бадиий таржима.** Наим Каримов ўзининг “Олтин кўприклар жозибаси” мақоласида адабий алоқалар ва бадиий таржима ҳақидаги ўйлари билан ўртоқлашади. Зотан, миллий адабиётлар тараққиёти жаҳон нафис сўз санъатида пайдо бўлаётган янги поэтик ғоялар, охорли бадиий-услубий изланишлардан ижодий баҳрамандлик негизида кечади. Ўзбек адабиёти жаҳон сўз санъати таркибий қисми ўлароқ, ҳамиша унга муносиб ҳисса қўшган ва бу эзгу ишни муттасил давом эттириб келмоқда. Олимнинг диққати истибод даврида Туркистон халқлари адабиётининг миллий-адабий ўзандаги ривожига имкон берилмаса-да, Фитрат, Қодирий, Чўлпон каби қалби уйғоқ юксак салоҳият соҳиблари бадиий таржима ва адабий алоқалар воситасида фаранг, инглиз, олмон, рус мумтоз хамда замонавий адабиётидан поэтик ғоя, маҳорат сирларини ўрганишига қаратилади.

**Хуроса ўрнида.** Мустақиллик йилларида юртимизда маънавиятимизнинг узвий қисми бўлган адабиётни ривожлантириш, шоир ва ёзувчиларимиз эзгу меҳнатини қадрлаш ва рағбатлантириш, истиқлол адабиёти келажаги ҳақида дастурий йўлланмалар ишлаб чиқишининг давлат сиёсати даражасида изчили тарзда амалга оширилиши ўз самараларини бера бошлади.

Халқ қалбининг ифодачиси, ҳақиқат ва адолат жарчиси бўлмиш адабиёт ҳамда санъат асарларини беш жилдлик мажмуя учун нашрга тайёрлаш ва таҳир қилишдек хайрли ишни амалга оширишда нуфузли таҳир ҳайъати ҳамда фидойи шоир, ёзувчи, драматург, публицист ва адабиётшунос олимлар фаол иштирок этишиди. Юқорида сўз юритилган мажмуага жамланган асарлар замондошларимизни эзгулик, инсоф-диёнат, меҳр-оқибат, бағрикенглик, бунёдкорликка даъват этувчи ҳароратли поэтик фикр-ғоя, самимий ҳамда эҳтиросли туйғуларга йўғрилган. Бу бадиият ҳамда илм-фан дурдоналари ижод аҳли олису яқин тарихий ўтмишдан ибратли сабоқ чиқариб, бугунги мураккаб ва таҳликали давр муаммолари,

башариятнинг эртаси ҳақида ўз сўзини айтишга интилаётганидан гувоҳлик бериши билан қимматлидир.

Шубҳасиз, мустақиллик йиллари кўтарилиган хирмон бағридан энг сара асарларни танлаш, уларни янгича адабий-эстетик мезонлар асосида таҳлил ва тадқиқ этиш шунчаки жўн юмуш эмас. Шу маънода, босиб ўтилган йигирма тўрт йиллик миллий тафаккурнинг ўзига хос сарҳисоби бўлмиш бу мажмуаларни тузувчилар заҳматини тасаввур этиш мумкин. Танланган айrim бадиий асарлар поэтик баркамол бўлмаслиги, адабий-назарий ва танқидий қарашлар ифодасини топган баъзи мақолаларда эса, ҳали тўла маромига етмаган фикр-қарашлар, баҳсталаб ўринлар бўлиши табиий. *Биринчидан*, ушбу йўсиндаги ilk тажриба бўлган ушбу мажмуа ўтган давр оралиғидаги барча асарларни жамлашни мақсад қиласиди; *иккинчидан*, баъзи муносиб муаллифлар, улар қаламига мансуб энг сара асарлар тузувчилар нигоҳидан четда қолган бўлиши ҳам мумкин; *учинчидан*, кўтарган хирмонимиз нуқул нодир жавоҳирлардан иборат, деб ўйлаш ҳам соддалик бўларди. Зотан, вакт синовига дош бериб, миллий адабиётимиз тарихидан муносиб ўрин оладиган баркамол асар яратиш кишидан образли мушоҳада теранлиги, хиссий-эмоционал туйғу самимияти, адабий анъана ва ижодий мактаблар амалий тажрибаю назарий-эстетик қарашларини чуқур ўзлаштириш, адабий-бадиий ифода усулларидан самарали фойдаланишда индивидуал йўл топиш – муттасил изланувчанликни тақозо этади.

Хуллас, мустақиллик даври адабий танқидчилиги адабиётимиздаги етакчи тенденцияларни илғаш, унинг истиқболи учун фойдали тажрибаларни оммалаштириш, ижтимоий-эстетик, умуминсоний бурчини бажаришга кўмаклашиш йўлида масъул эканини унутмаслиги билан ҳам қадрлидир.

## ҲАҚИДАТ

**Ҳақиқатга бўйин эз, танқидни  
тан ол, эшитганингдан қатъий  
назар ҳақиқатни қабуд эт.**

**Фузайл ибн ИЁЗ**



**Жалолиддин  
ЖҮРАЕВ**

1970 йилда туғилған. Тошкент давлат Шарқиүнислиқ институтининг филология факультети Эрон бўлими таомомлаган. Кўплаб қўллэзмаларни нашрга тайёрлаган. Ҳозирда Шарафиоддин Али Яздийнинг “Хулали мутарраз дар фани муаммо ва лугаз” асарининг матний-қиёсий тадқиқини амалга оширмоқда.

## ЎЗБЕК АДАБИЁТИДАГИ ИЛК МАРСИЯ

Амир Темур авлодлари орасида Иброҳим Султон ибн Шоҳруҳ ибн Темур Кўрагоний (1394-1435) ўзига хос мавқега эга бўлган. Манбалардаги қайдларга кўра, Соҳибқирон бошқа амирзодалар катори Иброҳим Султоннинг тарбияси, илм олиши, адабиёт, санъат, ҳарб соҳаси, давлат ишларидан хабардор бўлиб вояга етиши учун алоҳида эътибор қаратган. Турли анжуманлар, ҳарбий ҳаракатлар, элчилар қабули ва давлат аҳамиятига эга маросимларда қатнаштирган. Кейинчалик отаси Шоҳруҳ ҳукмронлиги вақтида ҳам юқоридаги каби тадбирларда бевосита иштирок этганлигини Мирхонд<sup>1</sup>, Фасих Ҳавоғий<sup>2</sup> ва Абдураззок Самарқандий<sup>3</sup>лар ёзиб қолдирган.

Давлатшоҳ Самарқандийнинг билдиришича, Шоҳруҳ Мирзо саройида кўплаб олим ва фозиллар йигилган. Шунингдек, ҳарбий ҳаракатлар чоғида ҳам уларни ўзи билан бирга олиб юрган.

Амир Темур ва Шоҳруҳ сингари Иброҳим Султон ҳам адабиёт, санъат, мусиқани яхши билган ва бу соҳа вакилларининг иқтидорини қадрлаган. Ака-ука Мирзо Улуғбек, Иброҳим Султон ва Бойсунғур Мирзоларнинг адабиёт ва санъат асарлари ҳақидаги ёзишмалари ҳам мавжуд бўлиб бизгача

<sup>1</sup> Мирхонд. Равзат ус-сафо. ўзРФА Алишер Навоий номидаги Давлат адабиёт музеи қўллэзмалар фонди.  
2-ракамили босма китоб.

<sup>2</sup> Фасих Аҳмад ибн Ҷалал ад-дин ал-Ҳавоғи. Муджмали Фасихи. - Т.: Фан, 1980. - С. 149.  
<sup>3</sup> Абдураззок Самарқандий. Матлаи саъдайн ва мажмаи баҳрайн. - Т.: Фан, 1969. - 466-б.

етиб келган. Хусусан, Давлатшоҳ Самарқандий “Тазкираи шуаро” асарида амирзода биродари Бойсунғур Мирзодан мусиқа билимдони Ҳожа Юсуфни сўраб ёзган мактублари ҳақида сўз юритган. Яна Иброҳим Султон ва Мирзо Улуғбек тўғрисида бу каби латифа, ҳикояларлар кўп эканлигини ҳам қайд қилиб ўтган.

Амирзоданинг ўзи ҳам яхшигина шоирлик иқтидори эгаси бўлган ва асарлар битган<sup>4</sup>.

Ёш ва шижаатли темурийзода салтанатнинг Форс вилоятида йигирма йилдан ортиқ ҳукмдорлик қилган. Мазкур даврда Шерозда “Мадрасай дор ус-сафо”, “Дор ул-эйтномий” (етимхона) каби бинолар ва боғ барпо қилганлиги маълум<sup>5</sup>. Унинг кўрсатмаларига биноан темурийлар тарихини ўта тантанаворлик ва бадиий бўёқларга бой тарзда ёритган Шарафиддин Али Яздий “Зафарнома” асарини ёзиб тутатган.

Шунингдек, Иброҳим Султоннинг номи хаттотлик санъати соҳасида қолдирган асарлари боис сулс хатининг устозлари қаторида қадрланади. Бу соҳани у Форс вилоятига келган пайтларида Пир Муҳаммад Шерозидан ўрганган<sup>6</sup>. Иброҳим Султон кўчириган бир нечта Қуръон нусхалари ҳозирда Эрон кўлёзма фондларида сақланади.

Иброҳим Султон ҳомийлигига туркий ва форс адабиётининг ажойиб намуналари яратилди ва нодир нусхалари кўчирилди. Унинг ҳукмдор ва ижодкор сифатида мунтазам адабий анжуманлар ўтказиб турганлиги ҳам маълум.

Қисқа умри давомида Форс вилоятининг ҳукмдори сифатидаги фалияти илм-фан, адабиёт ва санъат соҳалари вакиллари томонидан юксак қадрланган<sup>7</sup>. Шу боис унинг бевакт вафоти қаттиқ қайғу билан, катта йўқотиш сифатида қабул қилинган. Ҳукмдорнинг вафоти муносабати билан марсиялар битилган. Ана шундай марсиялардан бири Ҳофиз Хоразмий ижодига мансуб. Бу марсия туркий тилда ёзилганлиги билан эътиборга лойиқ.

Ҳофиз Хоразмий девони қўлёзмаси 1975 йилда профессор Ҳамид Сулаймонов томонидан Ҳиндистоннинг Ҳайдаробод шаҳридаги Саларжанг музейи шарқ қўлёзмалари хазинасидан топилган. Девонда шоирнинг 9 та қасида, 2 таркиббанд (шундан биттаси марсия), 3 та таржиъбанд, 1 мухаммас, 1052 та ғазал, 2 та мустазод, 31 та қитъа, 12 та робоийси жамланган.

Марсиянинг айrim матн хусусиятлари, шоирнинг ҳаёт йўли, девон тартиб берилган санаси, ўзбек мумтоз адабиёти тарихида энг қадимий марсия намунаси эканлиги хусусида Ҳамид Сулаймонов<sup>8</sup> ва Мўмин Сулаймонов<sup>9</sup>

<sup>4</sup> Қаранг: Маҳди Баёний. Мажмуъи муншаот // Роҳнамои китоб. Шумораи 4. 1340 х/ш.

<sup>5</sup> Қози Аҳмад Кумий. Гулистони хунар. Ба кўشاши Аҳмад Саҳилий Ҳунсорий. Техрон. 1352 х/ш. 30-саҳ; Яна шу муаллиф: Ҳулосаҳои ливавориҳ. Ба кўшаши Эҳсон Ашрофий. Техрон, 1363 х/ш.; Мир Сайид Шариф Роким. ЎзР ФА Абу Райхон Беруний номидаги Шарқшунослик институти фонди. 2731/1 ракамли қўлёзма. 386-39а-вараклар.

<sup>6</sup> Қаранг: Қози Аҳмад Кумий. Гулистони хунар. Ба кўшаши Аҳмад Саҳилий Ҳунсорий. Техрон. 1352 х/ш. 30 сах.

<sup>7</sup> Мир Сайид Шариф Роким. Тарихи Рокими. ЎзР ФА Абу Райхон Беруний номидаги Шарқшунослик институти фонди. 2731/1 ракамли қўлёзма. 386-39а-вараклар.

<sup>8</sup> Сулаймонов X. Ҳофиз Хоразмий / Ҳофиз Хоразмий. Девон. I китоб. - Т.: Ўзбекистон КП Марказий комитетининг нашриёти, 1981. - Б. 3-15

<sup>9</sup> Сулаймонов М.Б. ҳофиз Хоразмий ва ўзбек лирик шеъриятининг ривожи: Филол. Фанлари номзоди ... дис. – Тошкент, 1996. – 160 б.

лар томонидан фикрлар билдирилган. Илмий изланишларда марсия юзасидан хulosалар билдирилган бўлса-да, ҳозирга қадар матн тўлиқ эълон қилинмаган. Марсия матнининг эълон қилиниши ўзбек адабиётида марсия жанри, унинг тарихий тақдиди, бадиияти каби масалалар юзасидан олиб борилажак тадқиқотларда ўзига хос илмий аҳамиятга эга бўла олади.

Марсия тўққиз банддан иборат, таркибанд шаклида ёзилган. Унда муаллиф Иброҳим Султоннинг тарихий ва адабий манбаларда эътироф этилган барча фазилатларини ўқувчи кўз олдида гавдалантиришга ҳаракат қилган. Хусусан, саркарда сифатида эришган ғалабалари, жасорати, сахийлиги,adolat билан олиб борган сиёсати, илм-фан, санъат, адабиёт соҳаси вакилларини қадрлаганлиги эсга олинади. Ўз навбатида бу мотамдан барча қаттиқ қайғуда эканлиги айтилади ва ўша қайғуга ботганларга Иброҳим Султоннинг ўрнига ўғли Мирзо Абдулло қолганлигини билдиради. Марсия муаллифнинг Тангридан Иброҳим Султон руҳини шод қилишини ҳамда Мирзо Абдуллога узоқ умр беришни тилаб қилган дуоси билан якун топган.

Матбуотда илк бор эълон қилинаётган мазкур марсияни нашрга тайёрлашда профессор Ҳамид Сулаймонов Ҳиндистондан олиб келган ксеронусхага ва Ражаб Топарли томонидан Анқарада чоп этилган матнга таяндик<sup>10</sup>.

## Хофиз ХОРАЗМИЙ

### МАРСИЯ

-1-

Бу вафосиз фоний оламда бақони издаманг,  
Дарди жонға эмдидан сўнгра давони издаманг.

Барча ёру дўстдан бегона бўлмоқ бор эмиш,  
Кўруб<sup>11</sup> ушбу ҳолни сиз ошнони издаманг.

Кечаси оламни тийра қилди ҳижрон кечаси,  
Бу коронғу кечада нури зиёни издаманг.

Холи бўлмади кудуратдин чун ою кун юзи,  
Бас, мунунгтак дунёда завқу сафони издаманг.

Сифлаву дунпарвар эрур ушбу даври рўзгор,  
Сифлаву дун илкидин файзи атони издаманг.

<sup>10</sup> Yfrezmli Hafiz'in Divani. Inceleme-Metn-Tipkibasim. Prof. Dr. Recep Toparli. Ankara, 1998. –с. 121-129; Ҳофиз Хоразмий. Девон. Ҳиндистоннинг Ҳайдаробод шаҳридаги Салоржанг музейи хазинасидаги 4298 рақмли кўлёзма. Марсия девонининг 27а-30б-варажларида жойлашган.

<sup>11</sup> Ражаб Топарли нашрида айrim сўзларнинг ўқилишида фарқлар учрайди. Ҳаволада ана шундай фарқлар кўрсатиб борилади. Ражаб Топарлида “корунг”.

Гулшани жаннат бикин чун боғ-боғи жон эрур,  
Тарқ этиб гулшанни, боғи дилкушони издаманг.

Гулистону бўйстон булбуллари қилмас наво,  
Гулистон кезманг, тақи баргу навони издаманг.

Тарқ қилмоқ керак чун оқибат тожу лаво<sup>12</sup>,  
Хақ йўлини издангиз, тожу лавони издаманг.

Форс мулкининг шоҳи, ул форси<sup>13</sup> майдондин<sup>14</sup>  
Борди эрса, ондин ўзга подшони издаманг.

Фатҳу нусратлиғ ул Иброҳим Султон қондадур  
Ким, фироқи захмидин чоли<sup>15</sup> жигарлар қондадур?

## -2-

Куррат ул-айни шаҳаншаҳ Шоҳруҳ хоқон қани?  
Малик ул-мулки Сулаймон, соҳиби фармон қани?

Беша<sup>16</sup> янглиғ бор лашкар шоҳи оламға, vale  
Ул тўқуш кўйинда шер, бешаи майдон қани?

Сони йўқ юлдуз менгиз шаҳзодаларнинг бори бор,  
Нурбахш этган жаҳонга ул маҳи тобон қани?

Зулмат ичра тийра тупроқ янгли қолди<sup>17</sup> оламе,  
Ушбу зулматнинг ичинда чашмаи ҳайвон қани?

Халқи оламға бағишлиғон сафою завқлар,  
Офтоби мулку давлат, сояи Яздон қани?

Чатр<sup>18</sup> ила айвонда бор эрди басе нуру сафо,  
Эмди ул нуру сафолиғ чатар ила айвон қани?

Дарди ҳижрат ўртади мажмуъи олам жонини,  
Эй ҳаким, айлагил бу дарди жонларға дармон, қани?

<sup>12</sup> Лаво – туг, байрок.

<sup>13</sup> Форс – суворий, чавандоз.

<sup>14</sup> Ражаб Топарлида “майдони дин”.

<sup>15</sup> Чол – чукурлик.

<sup>16</sup> Беша – ўтлок, чунгалзор.

<sup>17</sup> Ражаб Топарлида “килди”.

<sup>18</sup> Чатр – соябон.

Бўстонга равнақе бергон ўшул сарви равон,  
Бўлди ғойиб кўздин, эмди равнақи бўстон қани?

Гулистоннинг гуллари бориси қон ёш йиғлаюр,  
Гулистоннинг зийнати, юзи гулхандон қани?

Бордию қолди гулистон бирла боғи ёдгор,  
Сўхта жонларда бўлди дарду доғи ёдгор.

### -3-

Тийра бўлдуқ тушгали ул моҳманзардин<sup>19</sup> жудо,  
Тиф бирла олам олған меҳри анвардин жудо.

Фатҳу нусрат эмдидин сўнг кимга кўргузгай юзин  
Чунки тушди ногаҳон шоҳи музafferдин жудо.

Бахту давлат кимга қўл қобғойу<sup>20</sup> қуллик айлагай,  
Тахт узра ул сазои тожи<sup>21</sup> қайсардин жудо.

Ёйи сочингни туғу ерга чол ўзунгни, эй алам,  
Чун тушубдурсан сипоҳсолори лашкардин жудо.

Туллоғон отлари кечимлар кесиб<sup>22</sup> ким чиқидалар,  
Бўлди ул дамда қиёмат рўзи маҳшардин жудо.

Борчаға эрур муҳаққақ, насх бўлди хатти сулс,  
Қолди тавқеъинда райҳон хомагустардин жудо.

Қилма наққошу музахҳиб лавҳада дебочалар,  
Бу хунарлар қадрини билган хунарвардин жудо.

Бўлди ғамхона ўш эмди борчаға байт ул-фараҳ,  
Ул фараҳ сармояси рухи мансурдин жудо.

Дарди ҳижрондин юраклар қон бўлуб, кўз йўлидин  
Келди юз рангин қилурға ул диловардин жудо.

Эй мусулмонлар, бу дарди ҳижронга не чора бор,  
Охи сўзон бирла йиғламоқдин ўзга зор-зор.

<sup>19</sup> Моҳманзар – ой юзли.

<sup>20</sup> Ражаб Топарлида “топгай”.

<sup>21</sup> Сазои тож – тож мукофоти.

<sup>22</sup> Ражаб Топарлида “кейиб”.

**-4-**

Оҳқим, тушди йироқ ул жон бикин сultonимиз,  
Мулки маъно тахти узра Хисрави хоқонимиз.

Кўз яруки, жон тилаги ул сафои жону дил  
Борди эрса, бўлди мажарух ушбу хаста жонимиз.

Ўртагай эрди бу оҳ ўти фалакнинг шамъини,  
Дам-бадам су сочмаса бу дийдаи гирёнимиз.

Сояи лутфу иноят кимдин ўсунғой<sup>23</sup> киши,  
Чунки ғойиб бўлди кўздин сояи Яздонимиз<sup>24</sup>.

Сонсиз эҳсон қилғучи ул маъдани лутфу карам  
Шоҳимиздин азрилибмиз қайдга бўлғой сонимиз.

Хуш эди ул ҳолким, биз дарди сўзин сўзласак,  
Лутф этиб айтур эди, биз дардлар дармонимиз.

Ўтга йақсоқ дафтари девонни, эмасдур ажаб,  
Чун иёсиз қолди, абтар<sup>25</sup> дафтари девонимиз.

Хори ҳасрат санчилиб кетмас кўнгулдин бир нафас,  
То назардин бўлди ғойиб ул гули хандонимиз.

Дарди ҳижрони олингтак қилди бизларни заиф,  
Оҳ чекмакка тақи йўқдур бу дам имконимиз.

Боримиз банда эдук, ўртада ўзи шоҳ эди,  
Холи хуш эрди, чу барча ҳолидин огоҳ эди.

**-5-**

Кечди эрса гулистони салтанатдин ул жавон,  
Бўлди хористон бикин борча кўзинга бу жаҳон.

Ёз фаслида гулистон гуллари сўлмас эди,  
Ушбу фасл ичра не ёндин бўлди бу гулга хазон.

<sup>23</sup> Ражаб Топарлида “умсунгай”.

<sup>24</sup> Яздон – Худо.

<sup>25</sup> Абтар – давоми йўқ, кесилган

Кўй бирла бўри онинг давринда қардош эрдилар,  
Чун онинг адли эди сахронишинларга шўбон.

Адли бирла халқи олам посини<sup>26</sup> тутмоқ учун,  
Сурат ила шоҳ эдию маъно бирла посбон.

Эмдидан сўнг халқ топғойму омонлик неъматин,  
Адл ила Шерозни қилмиш эди дор ул-амон.

Ишлади дор ул-адолат бергали адл ила дод,  
Чун эди мазлумлар ҳаққига шоҳи меҳрибон.

Шодмон умиди дийдори билан эрдим валие,  
Дарду ғам бўлди насибу бўлмадим ман шодмон.

Оҳи оташбор элиндин сийнанинг ичра жигар,  
Ўтга туғон ул кабобедурки, бўлса хунчакон.

Келтурубдур ушбу шаҳзода фироқи, кўз кўра  
Маҳди олийға қиёматнинг тонгидин юз нишон.

Тифи ҳижрони била хаста жигарлар порадур,  
Раҳм айлаб айтунгиз бу дардга не чорадур?

## 6-

Кўчди эрса дунёдин ул моҳманзар, хушхисол,  
Бор бўлсан офтоби мулку топмасун завол.

Хисрави соҳибқирон, султони аъзам – Шоҳруҳ  
Ким, ўшонинг зоти эрур файзи файзи зулжалол.

Бахт бирла таҳт узра бўлсан ул кишваристон,  
Топди андин муллат чун басе ҳусну жамол.

Ул шаҳаншоҳким эшикини ёстонмоқ била,  
Кеча-кундуз моҳу хуршид айлади касби камол.

Остони иззатининг тупроқиға<sup>27</sup> етмади,  
Нечаким ел бики юкуруб елди жосуси хаёл.

<sup>26</sup> Ражаб Топарлида “йасини”.

<sup>27</sup> Ражаб Топарлида “топракинға”.

Шаръ йўлида алифтак рострав бўлмоқина,  
Дол қаддин қилмоқи эрур намоз этконда дол.

Ул дарахти салтанатга мева бор эрур эрди басе,  
Йўқ эди мундоғ жавонким топса ҳадди эътидол<sup>28</sup>.

Не ажаб, гар бори ғам бирла эгилса шоҳким,  
Моҳи тобон бўлди бу мотам ғами бирла ҳилол.

Кесди олий сарвни тифи ажал ногоҳ, vale,  
Шукрким ким бордур мақомин сақлағон тоза ниҳол.

Эй яратғон, ялғузоқ бу ёш бутоқнинг давлатин,  
Айлагил доим зиёда иззату ҳам хурматин.

-7-

Эй баҳодирлар, аниң инъоми омин ёд этинг,  
Нур берган меҳрга моҳи тамомин ёд этинг.

Субҳи давлаттак онинг анвори юзин соғиниб,  
Айшу ишраг бирла кечган субҳу шомин ёд этинг.

Каҳработак гарчи сарғарди юзунгиз ҳажридин,  
Сиз мудом ул журъаे ёкутфомин<sup>29</sup> ёд этинг.

Коми жонни заҳри ҳижрон талх тутғон орада,  
Шаккарин алфоз ила ширин каломин ёд этинг.

Гулистону чимгон аросинда гашт айласангиз,  
Кабк ё товустак хуррам хиромин ёд этинг.

Рўзи қилғай ҳақ ўзингга равзай дор ус-салом,  
Хаставу мискиnlара қилғон саломин ёд этинг.

Чун эрур шаҳзода Абдуллоҳ ўзидин ёдгор,  
Топмасангиз ўзини, қойиммақомин<sup>30</sup> ёд этинг.

Ашнуғи шаҳзодаву шаҳларни аторғон аро,  
Одил Иброҳим Султоннинг номин ёд этинг.

<sup>28</sup> Эътидол – меъёр

<sup>29</sup> Ёкутфом – ёкутсфат, ёкутга ўхшаш

<sup>30</sup> Қойиммақом – ўринбосар, ёрдамчи.

Темангиз<sup>31</sup> Искандар, Қайсар била Доро сўзин,  
Бу яқинда кечган ул шаҳ эҳтишомин ёд этинг.

Кула<sup>32</sup> урғон гунбади афлоку юлдузлар билан,  
Лашкари хайлу ҳашам турлу хиёмин<sup>33</sup> ёд этинг.

Сафи ҳижо<sup>34</sup> ичра тифи обдорини чокиб,  
Жумла душманлардин олғон интиқомин ёд этинг.

Ёд этинг лутфу карамнинг кони ул шаҳзодани,  
Подшоҳи олам эркан, борчадин озодани.

## -8-

Бандалардин чун жудо тушди эса ул подшоҳ,  
Дуди оҳ ила фалакнинг хаймасин<sup>35</sup> айланг сиёҳ.

Қайда бўлғай ҳоли ул шаҳзодаи олижаноб  
Ким, чекарди рўйу ройидин хижолат меҳру мөх.

Асрุ шарманда бўлур эрди бу хиргоҳи фалак,  
Тўй айлаб тикса эрди гоҳ-гоҳи боргоҳ.

Қони ул султони хушрафтору ширинкор<sup>36</sup> теб,  
Қони ёш ичра мардумдин қилур ҳар дам шиноҳ<sup>37</sup>.

Шаҳзода ҳасрату дарди фироқидин бу кун,  
Пир бўлмай, бас, алиф қадлиғ жавон бўлди дутоҳ.

Арқо гар синса бори ғамдин, эмди не ажаб,  
Чун кўзумизга қўрунмас бўлди ул пўшту паноҳ.

Йўқ туурларашкар бошорғон бош бу дам, не фойда,  
Гарчи бордур юз туман, минг лашкуру хайлу сипоҳ.

Размгоҳу базмгоҳ онинг билан гулзор эди,  
Эмди хористон бўлубтур размгоҳу базмгоҳ.

Билмадук эрди анинг тапғунда бўлуб қадрини,  
Узри тақсирот учун эмди бўлолим хоки роҳ.

<sup>31</sup> Ражаб Топарлида “тинмасангиз”.

<sup>32</sup> Кула – букилган, эгилган.

<sup>33</sup> Хиём – хайманинг кўплиги - чодир

<sup>34</sup> Ҳижо – жанг.

<sup>35</sup> Ҳайма – чодир.

<sup>36</sup> Ширинкор – яхши ишлар килувчи.

<sup>37</sup> Мисрадаги охирги сўзни ўқишнинг имкони бўлмади. Ражаб Топарли томонидан “шиноҳ” деб ўқилган.

Кимдин эмди умсунолим сояи раҳматни биз,  
Хасталардин чун йироқ тушди ўшул зилли илоҳ.

Доимо тушгай ўзининг узри раҳмат сояси,  
Анбиёву авлиёнинг бўлғай ул ҳамсояси.

**-9-**

Ё илоҳо, лутфи хосингни ўзингга ёр қил,  
Жаннати фирдавс ичинда ўрнини гулзор қил.

Гулистону жўйбор ичра чун ўгронгон эди,  
Манзилин жаннати адн – таҳтиҳ ал-анҳор қил.

Оташи хижрон била тутмай ўшони ташналаб,  
Ҳавзи кавсадрин шаробу сокийсин аброр қил.

Яхшиларни яхши кўруб асри хуш асрор эди,  
Сан они яхши асрор, маҳрами асрор қил.

Бахри ваҳдат ичраки гавҳарларингдин, эй карим,  
Рухи покиға ўзининг дам-бадам ийсор<sup>38</sup> қил.

Хаставу мисканлара ғамхор эрди доимо,  
Эмди онларнинг дуосин мунису ғамхор қил.

Равзаи ризвон<sup>39</sup> қилиб доим ўшонинг қабрини,  
Хур ул-айнни<sup>40</sup> лутф этиб, ўзигга ёри ғор қил.

Не тариқа мундаким сарвар<sup>41</sup>, тақи солар<sup>42</sup> эди,  
Юз ўшанча анда ўзин сарвару солор қил.

Ёш бутоқинга ўшанинг ёшлар сонича ёш,  
Рўзи айлаб давлату иззатда бархурдор<sup>43</sup> қил.

Мустажоб айлаб Ҳофизнинг дуосин, эй карим,  
Раҳматингдан бер улуш, сансан чу раҳмону раҳим.

<sup>38</sup> Ийсор – ҳадя қилмоқ, бағишиламоқ

<sup>39</sup> Равзаи ризвон – ризолик боғи

<sup>40</sup> Хур ул-айн – оқ юзли катта-катта қора кўзли гўзал

<sup>41</sup> Сарвар – бошлиқ, йўлбошли

<sup>42</sup> Солар – бошлиқ, йўлбошли

<sup>43</sup> Бархурдор – баҳтли



Аҳмаджон ЧОРИЕВ

1952 йилда тугилган. Қарши давлат педагогика институтини тамомлаган. “Соҳибқирон маънавияти”, “Ҳазрати Башир тарихи”, “Ҳазрати Султон тарихи”, “Султон Мирҳайдар тарихи”, “Ҳазрати Башир маноқиби”, “Истиқлолга юз тутган диёр”, “Маънавият сарчашмалари”, “Диниунослик”, “Маънавиятиунослик”, “Буюклик ва маънавият олами” каби йигирмадан ошиқ асар ва рисолалар муаллифи.

## УЛУФ СИЙМО ҲАҚИДА КИТОБ

Ҳар бир миллатнинг дунёда борлигини қўрсатадиган ҳаёт ойнаси, бу унинг буюк алломалари. “Шу нуқтаи назардан қараганда, заминимизда яшаб ўтган буюк алломаларимиз, мутафаккир боболаримизнинг ибратли ҳаёти ва фаолияти, бемисл илмий-ижодий қашфиётлари бугун ҳам жаҳон аҳлини ҳайратга солаётганини ғурур билан таъкидлаш лозим”<sup>1</sup>.

Мустақиллик бизга “агар миллат ўзининг келажагини ёруғ ҳолда кўрмоқчи бўлса, унинг хотираси хамиша уйғоқ бўлиши шарт” лигини ўргатди. “Ислом дини, бу – ота-боболаримиз дини, у биз учун ҳам имон, ҳам ахлоқ, ҳам диёнат, ҳам маърифат”. “Биз киммиз, қандай буюк зотларнинг авлодимиз?”<sup>2</sup>, деган саволни ўзимизга бериб яшашимиз зарур.

Истиқлол шарофати билан азиз-авлиёларнинг номлари тикланди ва қабрлари обод этилди. Азалий қадриятларимиз: иззат, икром, тавозе, эҳтиром, яхшилар изидан бориш ўгитларига амал қилиш каби эзгу фазилатлар яна бор бўйи билан намоён бўлди.

Хукуқшунос олим, профессор Ақмал Саидов “Ҳазрат Занги ота” ҳақидаги китобни ёзиш билан азизларнинг рухий-маърифий оламидан

<sup>1</sup> Каримов И.А. Юксак маҳнавият – енгилмас куч: иккинчи нашри. – Т.: “Маънавият”, 2013. - 41-бет.

<sup>2</sup> Каримов И.А. Ватан ва ҳалқ мангуболади (Ҳикматли сўзлар ва иборалар тўплами). – Т.: Алишер Навоий номидаги Ўзбекистон Миллий кутубхонаси нашриёти, 2010. – 84-85, 101-бетлар.



яхши баҳралар олаётган шахс сифатида ўзини намоён этди, у зотнинг маънавий фарзанди эканини исботлади.

Китобни вараклар эканман, Ҳазрати Башир, Ҳазрати Султон, Султон Мирҳайдар, Соҳибқирон Амир Темур каби улуғ зотлар, уларнинг тарихи борасида муаллиф билан ҳамфир эканимни ҳис этдим. Китобни қўлимга олишим билан юртимизда яшаб ўтган, ислом оламида машҳур азиз авлиёлар, уларнинг мақбаралари хаёлимда гавдалана бошлади. Ҳолбуки, собиқ иттифоқ даврида миллат тақдири ва эътиқодига муносабат нохолис ва аянчли ҳолатда эди.

Истиқлол эса бундай разил ҳолатларни бартараф этди. Айниқса, Президентимиз Ислом Каримовнинг азиз авлиёлар, алломалар ва буюк саркардалар хаёти ва ижодини

холисона баҳолаш, уларнинг меросини ўрганиш борасидаги бошлаб берган ташабbusлари диққатга сазовор. Зоро, Юртбошимизнинг “Ота-боболаримизнинг, муқаддас аждодларимизнинг қадамжоларини обод этишга, Занги отанинг та-баррук мақбараларини тиклашга бош-қош бўлган, унга муносиб ҳисса қўшган барча юртдошларимга ташаккур айтаман”, – деган фикрлари булярнинг бир исботидир. Занги ота Хўжа Аҳмад Яссавийнинг устози Арслонбоб отанинг аварасидир. Мен Занги ота ва унинг яқин қариндошлари ҳақида кўплаб ривоятлар, хикоятлар эшитган бўлсам-да, бу зот ҳақида тўлиқ маълумотга эга эмас эдим. Мана энди қўлимиздаги ушбу китоб камчиликни тўлдириб турибди.

“Муқаддима”да китобнинг ёзилиш сабаблари ва манбалари қисқача баён этилган.

Бинобарин, уни ёзишда қўлёзмалар, миллий ва хорижий асарлар, тарихий ва илмий манбалар, архив ҳужжатлари ҳамда ҳалқ оғзаки ижоди на-муналарига таянилган. Авлиёлар хаёти, шажаралари, тасаввуф тариқати билан боғлиқ ишончли адабиётлар тадқиқ ва талқин этилган.

“Машҳур шайх, улуғ авлиё, шайхул машойих” номли биринчи боб йи-гирма олтида фаслдан иборат. Унда Занги ота яшаган тарихий давр, у зотнинг таваллуд ва вафот вақтлари, туғилиб-ўсган юртлари, оиласи ва авлодлари, шу жумладан, Анбар она билан биргаликдаги ҳаёти, ботиний ва зоҳирий илм йўлида чеккан заҳматлари, ҳалқ наздидаги юксак обрў-эътибори хусусидаги қизиқарли маълумотлар ҳавола этилган. Жумладан, “Ислами маъноси хусусида” номли фаслда турли қўлёзма тарихий манбалар ҳамда ривоятлардаги маълумотлар асосида Ҳазрат Занги ота исмларининг бешта талқини мавжуд эканига эътибор қаратилган. “Занги ота Ҳимматий” фаслида Занги ота айни шу тахаллус билан шеърлар битгани ҳамда ушбу тахаллуснинг келиб чиқиши сабаблари таҳлил этилган.



“Шеърият ва ҳикматнавислик” фаслида Занги отанинг устозлари Аҳмад Яссавий, Сулаймон Боқирғоний каби машхур мутасавифлар шеърни шон-шуҳрат ёки обрў-эътибор даъвосида эмас, балки маънавий-маърифий эҳтиёж санагани учун ёзганлари таъкидланган. Устозлари изидан борган Занги ота Ҳимматий ҳам шеърни тасаввуф ҳақиқатларини халққа етказиш ва маърифатпарварлик йўлидаги бир восита деб билган.

“Занги отанинг устозлари” фаслида Арслонбоб ота, Хўжа Юсуф Ҳамадоний, Хўжа Аҳмад Яссавий, Ҳаким ота (Сулаймон Боқирғоний) тўғрисида сўз боради. “Занги отанинг халифалари-издошлари” фаслида эса Занги отанинг энг машҳур тўрт халифаси – Узун Ҳасан ота, Сайд ота, Садр ота ва Бадр ота ҳақида маълумот берилган. Қўлёзма ва тарихий манбаларда, хусусан, Алишер Навоий асарларида бу улуғ шайхларга доир баён этилган фикрлар келтирилган. Занги ота силсиласи, ушбу силсиланинг кенжека вакилларидан бири – Султон Аҳмад Ҳазиний тўғрисида фикр юритилган. “Султон Мирҳайдар ота” фаслида эса Занги отадан сўнг тариқат давомчиси сифатида Ҳаким ота томонидан каромат қилинган Султон Мирҳайдар ота ҳақида сўз боради.

Иккинчи боб – “Занги ота мажмуаси – ноёб меъморий мӯъжиза” деб номланган ва ўнта фаслдан ташкил топган. Унда, асосан, Занги ота маҳалласи, қишлоғи, Амир Темур томонидан бунёд этилган Занги ота меъморий ансамбли ҳақида батафсил маълумот берилган. Ҳозирги Занги ота қишлоғига айнан Занги ота томонидан асос солингани илмий-тарихий негизда асосланган. Занги ота мажмуаси бунёд этилишининг тарихий илдизларига на-зар ташланган.

Занги ота зиёратгоҳи улкан тарихий ва меъморий қимматга эга. Шу-



нингдек нодир иншоотлар туркумининг турли даврларда бунёд этилиши ҳисобига юзага келган ўзига хос бебаҳо маданий обидадир. Бугунги кунда ушбу тарихий-меъморий обида Марказий Осиё минтақаси ҳалқлари учун муқаддас қадамжо ҳисобланади. Бу мажмуани ҳар куни беш мингга яқин сайёхлар зиёрат қилади.

Занги ота мажмуасининг тарихи, хусусан, шўролар замонидаги аҳволи тарихий манбалар асосида ўрганилган. Энг муҳими, миллий меъморчилик-нинг мазкур ноёб ёдгорлиги мустақиллик даври меъморчилигига қандай аҳамият касб этаётгани таъкидланган.

“Ҳазрат Занги ота маънавияти” номли учинчи бобда ўн еттига фасл жамланган. Занги ота ва тасаввуф таълимоти ҳақида сўз борганда, тасаввувуф илми ҳақида муайян тушунча ва тасаввурга эга бўлиш тақозо этилади. Шу маънода, “Тасаввуф нима?” деган саволга шарҳ берилган. Тасаввуф босқичлари, авлиёлари, тариқатлари, Яссавия тариқати, тасаввуф ва маънавият, Соҳибқирон ва тасаввуф, Алишер Навоий ва Аҳмад Яссавий, тасаввуфда пир ва муридлик анъаналари, Хўжа Аҳмад Яссавий издошлари, Яссавий ва Нақшбандий тариқатларининг муштарак ва фарқли жиҳатлари каби бир қатор тушунчалар атрофлича тавсиф этилган.

Тасаввуфга доир баъзи бир ёндашувлар хусусида мулоҳаза юритилиб, жумладан, Занги ота яшаган даврда, яъни XII асрда Марказий Осиё рангбаранг, анъаналар туташган ва ўзаро уйғунлашган маданиятлар чорраҳасига айлангани қайд этилган.

Занги ота шажараси: отаси Тожхўжа, бобоси Абдумаликхўжа ва бобо-





шлари халқ орасида ватанпарварлик ва меҳнатсеварлик, адлу инсоф, по- клик ва яхшилик, меҳр-шафқат ва художўйлик каби умуминсоний ғояларни тарғиб қилган.

Тарихдан маълумки, Занги ота ва халифаларининг ҳаракати туфайли Даشت Қипчоқ турклари, Сибирь, Қозогистон, Урал, Волгабўйи, Татаристон, Бошқирдистондаги кўплаб аҳоли исломни қабул қилган.

Тўртинчи боб – “Ҳазрат Занги ота: шахсияти ва фаолиятининг ўрганилиши” деб номланган бўлиб, олтита фаслдан иборат. Аввало, Ҳазрат Занги отанинг каромат ва фазилатлари ҳақида машҳур алломалардан Фахруддин Али Сафий ибн Ҳусайн Воиз Кошифий, Аҳмад Маҳмуд Ҳазиний, мутасаввиф Ҳўжа Аҳор Валий, шоирлардан Махтумкули, Камий Тошкандий, Салоҳиддин Тошкандий ва бошқалар шеър ҳамда хотиралар ёзиг қолдирган. Айниқса, Алишер Навоийнинг “Насойим ул-муҳаббат” асарида, Фахруддин Али Сафий ибн Ҳусайн Воиз Кошифийнинг “Рашаҳоту айн-ил-ҳаёт” номли китобида, Ҳасанхўжа Нисорийнинг “Музаккиру ахбоб” (“Дўстлар ёдномаси”) тазкирасида, Султон Аҳмад Ҳазинийнинг “Жомиъ ул-муршидин”, “Манба ул-абхор фи риёзил-аброр” (“Яхшилар боғларидағи денгизлар манбаси”), “Жавоҳир-ул-аброр мин амвож-ил-бихор” асарларида, Олим Шайх ибн Мўмин Шайх ибн Дарвеш Шайх Азизоннинг “Ламаҳот мин нафаҳот-ил-кудс” асарида, Занги ота ҳақида қимматли маълумотлар берилган.

Занги отанинг баъзи муридлари олиму фозил, иқтидорли шоирлар бўлиб, улар ўз асарларида Яссавий тариқати ғояларини тарғиб этган. Бу асарларда, шу жумладан, Занги ота ҳаёти ва фаолиятига доир маълумотлар баён этилган.

калони Мансур ота орқали бевосита Ҳўжа Аҳмад Яссавийга бориб тақалади. Тасаввуф таълимоти анъаналари доирасида, Занги ота Ҳўжа Аҳмад Яссавий сулуқидаги сўфийлардан бири сифатида, Яссавия тариқатидаги бешинчи шайх даражасига кўтарилган. Китобда Ҳазрат Шайх Занги отанинг таълим услублари баён этилган. Ул зотнинг халифалари ҳақидаги ривоят ва маноқиблардан лавҳалар келтирилган.

Занги отанинг бутун умри Мовароуннаҳр халқлари ҳаётининг оғир ва даҳшатли даврида кечган. Мўғул истилочилари мамлакатни хонавайрон қилиб, халқ оммасини қуллик исканжасига солган бир пайтда Занги ота ва унинг издо-

Шунингдек, ҳалқ орасида нақлу ривоятлар мавжуд бўлиб, улар нафакат оғиздан оғизга, балки манбадан манбага, китобдан китобга кўчиб, бизгача етиб келган.

Мустақиллик йилларида Занги ота тарихини ўрганиш борасида мурайян силжишлар кўзга ташланди. Истиқлол йилларида ушбу мавзуни ёритган Турғун Файзиев, Ориф Усмон, Абдулҳаким Шаръий Жузжоний, Сайфиддин Сайфуллоҳ, Асрор Самад, Нодирбек Ҳасан, Эрик Каримов, Ҳожи Саъдуллоҳ Ҳожи Камолиддин ўғли, Саъдуллоҳ Жамилов каби тадқиқотчиларнинг номларини алоҳида тилга олиб ўтиш лозим.

Занги ота ҳаёти ва фаолияти хорижда ҳам ўрганилмоқда. Дунёning турли мамлакатларида ушбу мавзудаги тадқиқотлар мунтазам эълон қилиб келинади. Китобда француз олимни Терри Заркон, американлик тадқиқотчи Девин Де Вис каби ғарб шарқшунослари, Фуад Кўпрулу, Абдураҳмон Гўзал, Ужак Аҳмет Яшар, Айнур Кочак сингари турк олимларининг асарларига муносабат билдирилган.

Дунёning нуғузли кутубхоналарида, хусусан, Париж Миллий кутубхонасида (Франция), Женева университети кутубхонасида (Швейцария), Берлин кутубхонаси (Германия), Сулаймония кутубхонасида ва Истанбул университети кутубхонасида (Туркия) Занги отага доир маълумотларни ўзида жамлаган ноёб тарихий қўллётмалар сақланмоқда.

Китобга, шунингдек, Қуръони каримдан иқтибос олинган суралар ва оятлар рўйхати, Аҳмад Яссавий, Арслонбоб ота, Занги ота силсилаарининг чизмалари, Занги ота ҳақидаги қўллётмаларга доир муҳтасар маълумотлар, исмлар кўрсаткичи ҳамда айrim сўз ва ибораларнинг изоҳли луғати илова қилинган. Бундан ташқари, қабрларни зиёрат қилиш одоби ва қабр аҳлига салом бериш тартиби каби манбалар асосида тавсиялар тақдим этилган.

Китобдан Занги ота тарихий-меъморий мажмуасининг шўролар давридаги ахволи ва мустақиллик йилларидағи ҳолати акс этган расмлар ўрин олган.

Умуман олганда, ушбу китоб юртимизда яшаб ўтган, Ислом оламида алоҳида ўринга эга авлиё Занги ота шажараси, амалга оширган ишлари, карапатлари ҳақида мукаммал маълумот берувчи асар сифатида қимматлидир.





*Гулбахор  
САИДҒАНИЕВА*

1969 йилда тугилган. Кўйкон давлат педагогика институтини битирган. Унинг “Ёввойи ушишоқ”, “Барибир баҳтлиман”, “Кўшиғимни кутмоқда дунё” номли шеърий тўпламлари нашр қилингган. Марина Цветаева, Наби Ҳазрий, Баҳтиёр Ваҳобзода шеърларини, Патрик Зюскиндинг “Ифор” романини ўзбек тилига таржисма қилган.

## **Жон қушин ул шамъяқи парвона қил**

\* \* \*

Ишқ ёшурди кўнглум ичра ганж пинҳон иста дил,  
Ганжинаи зоҳир манам, турфа исён иста дил.

Ёр жамолидин жамолим меҳрифишон ўлгуси  
Ёр карам айлар чоғидур лутфу эҳсон иста дил.

Ошиқу шамъу саодат мавжлиғ уммон дегил,  
Бул қадар эҳсон ичинда эмди ирфон иста дил.

Гулбахор чоғи мунаққаш лолазор ҳар сорида,  
Ашъоримда суратинг эмди алвон иста дил.

\* \* \*

Фунча бағри чок демишлар, мен каби дил чок йўқ,  
На кўнгулдин, на асаддин, на умрдин бок йўқ.

На гул очмиш, на тутоқмиш, нада ўртар бу кўнгул,  
Равзаи дил кулга ботмиш, ёнғали хошок йўқ.

Кўзларимға ботди оғир шаби ҳижрон қораси,  
Кўзларимға тўтиёдек суртмая бир хок йўқ.



Ғунчанинг умри каби қошимдин ўткай не замон,  
Неча хуршид маҳв ўлғай, туймая идрок йўқ.

Шиддат этсам чиқғали қошинг сари ҳар Гулбаҳор:  
“Эй, Ҳабиб, умринг каби бир шиддати афлок йўқ”.<sup>1</sup>

\* \* \*

Жон дедим, жоним сани, жон санинг жонингдадур,  
Жон илинган жондаги битта пайконингдадур.

Жон дедим, жоним сани, қатраи обингни бер,  
Жоними жондек тирилтмак бори имконингдадур.

Жон дедим, жоним сани, тун-кеча маҳрам бўлуб,  
Жон санга хору адо шамъ каби ёнингдадур.

Жон дедим, жоним сани, борча умрим йўқ ҳисоб,  
Жон яшар лутф айлаган биргина онингдадур.

Жонни қурбон этмаган битта армоним яшар,  
Жон дедим, жоним сани, жон санинг жонингдадур.

\* \* \*

Кўнгул, гулсен, балки сурудсен,  
Балки ёдсен, балки унудсен.

Гаҳи дилкаш, гаҳеки ғамкаш,  
Гаҳи ўдсен, гаҳида дудсен.

Сен, эй, вайрон, сен, эй, бир тоғсен,  
Гаҳеки буд, гаҳи нобудсен.

Тилинг билмай манам сарсонам,  
Мендин айру гаҳида худсен.

Бедил ўлдунг, эй, гул, қароринг йўқ,  
Гаҳи матлуб, гаҳи мардудсен.

<sup>1</sup> Ҳабибулло САИДҒАНИ сатри.



\* \* \*

Менму ошиқ, сенмусен зимдин ошиқ,  
Хайрат ичра онгламон кимдин ошиқ?

Бормумен ё йўқ эрурмен, тонгламон,  
Ким масти ким май қуювчи, онгламон?

Рост қайда, қайда ёлғон фарқи йўқ,  
Хайрат ичра ҳайратимда гарке йўқ.

Қайда асрор, қайда ошкор, бир бу кун,  
Борча хуммор, борча дилдордир бу кун?

Хушменми ё бехушлиғим – даҳшатим,  
Хайрат этдим, ҳайратимдин ваҳшатим.

\* \* \*

Фидо бўлди бу жоним, фидо керакму санга,  
Самоларда видоим, видо керакму санга?

Висолингга гадолар рўйхатига қўшибсан,  
Шафқатингдан жудоман, жудо керакму санга?

Ишқ ўтида ёнганим, ўз-ўзимдан тонганим,  
Тоғдин баланд нидоим, нидо керакму санга?

Сўлди сўлик нигоҳим, йўлларингда нигорим,  
Каҳрабодин безалган ридо керакму санга?

Кузга етди баҳорим, қолмади ҳеч қарорим,  
Бўлдим адo, ниҳоят, адo керакму санга?

\* \* \*

Дарду оташларда ёндим, дуди оҳим чиқмади,  
Қай сори ботди қуёшим, тунда моҳим чиқмади?

Солику сархуш манам, ҳар бир тараф йўлдур манга,  
Қиблага боқдим сахарлаб, қиблагоҳим чиқмади.

Багрим ўтдин қиймалар, бағрима гулдур кийналар,  
Ханжар ур дебким қийналар, кийнаҳоҳим чиқмади.

Биргина жонимни тутдим бори элга дам-бадам,  
Шунча элдин бори битта ғампаноҳим чиқмади.

Мен қаро тундек ўқиндим, ошкоро этмадим,  
Бағрапо чокдек сўқилдим – Хизрироҳим чиқмади.

Гулбаҳор келгай юринг, деб, минг хазонни йўқладим,  
Умр отлиғ равзаемда тонг сабоҳим чиқмади.

\* \* \*

Хос аро ҳолимни сен Мажнун қил,  
Дил аро ишқингни сен макнун қил.

Сол мани ҳажринг аро оташлара,  
Ҳам мани ёр эт балоекашлара.

Солики толибманам, наззора қил,  
Матлуби дилни манга ғамхора қил.

Ҳам мани мансиз этиб олам аро,  
Қил мани яктойе дил ушшоқ аро.

Ўтидин гар кул бўлар ул самандар,  
Қил мани дағи самандардек агар.

Шамъ ўзин қурбон этаркан муттасил,  
Жон қушин ул шамъғаки парвона қил.

Манзила етқизгин ани, тоза дил,  
Ўз-ўзимга ўзлигим оина қил.





**Зухра  
МАМАДАЛИЕВА**

1977 йилда туғилган. Жиззах давлат педагогика институтида (хозирги ЖДУ), Ўзбекистон Миллий университети қошидаги Олий адабиёт курсида ва шу университет аспирантурасида таҳсил олган. Шеър ва ҳикоялари республика матбуотида ҳамда ёш ижодкорларнинг “Қалдиргочим”, “Ватаним деб сени уйғондим” тўпламларида эълон қилинган.

## ИККИ ҲИКОЯ

## МАРОСИМ

Ариймаз кўзини очгани заҳоти ҳалиям тирик эканлигини англаб, “уҳ” тортди. Мана, бир неча ойдан бери силласи куриши учун ўзини овқатдан тияди, бир неча кундан бери эса туз тотмайди, лекин барибир... ҳали-бери ўладиганга ўхшамайди. Асли болалигидан шундай – соғлом ва бақувват эди. Икки укаси ва бир синглиси гўдаклигиданоқ касалланиб нобуд бўлишди. У эса шу соғломлиги туфайли омон қолди. Йигит ёшига етганида ҳам жуфтликка ўзига ўхшаш соғлом қизни танлади. Аникроғи ўзи эмас, томиридаги қони танлади қизни. Унинг исми Аниса эди, икки ёноғи тоғ лоласидан қизил, тани қуёшда пишган буғдой рангидა эди. Тишлари-

### ЗУХРА МАМАДАЛИЕВАНИНГ ҲИКОЯЛАРИ ҲАҚИДА

Жиззахлик ёш адаби Зухра Мамадалиеванинг ҳикоялари адабиёт мұхлисларига кўп ҳам маълум эмас. Боиси камсуқум бу ижодкор республика матбуотида кам кўринади. Унинг танишииб чиқиши учун топширган бир нечта ҳикоялари ўзининг сюжети, воқеалар ривожи ва күтилмаган ечими билан ётиборни тортдики, ёзувчи опа-сингилларимиз сафига яна бир истеъодд өгаси кўшилганига амин бўлдик.

Ҳикоялар сюжети олис ўтмишга, зардушийлик даврига бориб тақалади. Йўқ, Зухранинг ҳикояларида аниқ, конкрет бир тарихий сиймо кўринмайди. Ҳикояларнинг қаҳрамонлари тўқума шахслар. Бу асарларда фақат макон, мұхитгина олис мозийдан дарак беради. Ҳикояларда ҳаракат қилаётган қаҳрамонларни бир сўз билан

нинг оппоқлиги, текислиги форс савдогарлари келтириб сотадиган, қабила аёллари кўрганида кўзлари ёнадиган марваридни эслатар, пешонасидан энсиз тасма билан боғлаб юрадиган қуюқ соchlари қизнинг ҳаракатига монанд тўлғонарди. Киядиган лиbosлари гоҳ яшил, гоҳ сариқ, гоҳ қизил тусда бўларди. Удумга биноан бичими тўғри қилиб тикилган бу лиbosлар қизнинг адл қаддига қуйиб қўйгандай ярашар, фақат ярашардигина эмас, қизга ўзгача жозиба баҳш этиб, ошиғи юрагини тобора кўпроқ ёндиради.

Белига “белбоғи мардон” боғланган йили Наврўз арафасида Ариймазнинг қариндошлари қизнинг уйига бош эгиб бориши-ю, хурсандлик билан қайтишиди. Қизнинг отаси маросимга рози бўлибди. Бу хушхабар Ариймазнинг кўнглига озроқ хавотир ҳам солди. Гарчи у маросимда ҳаммаси рўйирост бўлишини истаса-да, енгилиб қолишдан чўчирди, чунки қизнинг бақувватлиқда ўзидан қолишмаслигини биларди.

Маросим удумга биноан холис кишиникида – қабила оқсоқолининг уйида ўтказилди. Катта меҳмонхонага Эрон гиламлари тўшалган, деворда эса Тангри Хурмузниң Ахурамазда инояти билан Зардуштга етти тимсолда кўрингани тасвиранган эди. Бу дабдаба Ариймаз ва унга ўхшаган “бечора”ларнинг деворини ҳеч қачон безамаслиги аён. Хайриятки, Аниса ўзи каби “бечора”лардан. “Тенг тенги билан...” деганларидай...

Мана, қиз кириб келди хонага. Йўқ-йўқ, қиз эмас, муборак Куёш порлаб чиққандай бўлди гўё. Зардуштга кўриниши берган Хурмузниң етти тажаллийси жонлангандай, ҳаракатга келгандай туюлди йигитга. Қиз Наврўз байрами, яна бугунги маросим муносабати билан ясанган – битта қилиб ўрилган соchlарига баҳор чечаклари таққан, бошига эзгу ният, эзгу сўз ва эзгу амални мужассамлаштирган уч таркли такя – дўппи кўндиригган, эгнидаги хитойи шоҳидан тикилган яшил либоси ошиқ қалбига одатдагидай, балки ундан-да кўпроқ олов ёқиши учун кийилгандай эди.

Ариймаз ихтиёрини бой бермаслик учун бу гўзларликка қарамасликка қарор килди. Йўқса мақсаддан чалғиб, мағлуб бўлиши мумкин. Мағлубият эса нафакат шармандалиқ, балки ҳалокат демак. У қизнинг майин табассум билан бош эгисига енгилгина таъзим билан алик олди-да, қаддини этганча икки қўлини бургут қанотидай кериб, хужумга ва айни пайтда ҳимояга тайёрлана бошлади.

---

*ўзлигини излаётганлар, ўз қадрини англиши ўйлида азият чекаётганлар, умр, адолат ва қондошлиқ моҳиятини билишига интилувчилар деб атаган маъқул.*

Ўз мақсади нима эканини англай олмай қўйналган, охирни отасининг маслаҳати билан Тангритоққа жўнаган Истамин, ўзги Тангритоғдан қайтиб келмаслиги мумкинлигини англаса-да, нажомт фақат мана шу тогда эканига ишонган Бургут баҳодир (“Тангритоққа ўрлаётган ўғлон”), умри давомида ажододлари удумига кўра белгиланган бир қанча маросимларни бошидан кечирган, ота-боболари каби яшаб, ўзидан яшии из – қабиласи удумлари ва одатларини ҳурмат қилувчи фарзандлар қолдириши умидида яшаган Ариймаз, шиикоаткор, исёнкор Азамат (“Маросим”) – буларнинг барис олис ўтмишидаги боболаримизнинг қиёфалариидир.

Зухра Мамадалиеванинг мазкур икки ҳикоясини “Шарқ юлдузи” журналига тавсия этар эканмиз, умидли бу ижодкорга изланишидан тўхтамасликни, толмасликни тилаймиз.

**ЎЗБЕКИСТОН ЁЗУВЧИЛАР УЮШМАСИ НАСР КЕНГАШИ**

– Бунинг нима кераги бор? – кулиб юборди қиз. – Чиқиб айтинг, мен мағлуб бўлдим!

Бу кутилмаган эмас, айни кутилган, орзу этилган сўз эди. У ҳайратдан анграйиб қолди.

– Мендан кучли эканлигинизни биламан, – деди Аниса. – Қабила йигитлари билан қандай кураш тушганингизни кўрганман. Курашиб ўтирганимдан нима фойда, барибир мағлуб бўламан.

“Йўғ-эй? Қачон? Ҳа, бултур Наврўздами? Ахир яқин орада аёл зоти йўқ эди-ку! Демак, у ҳам мени пана-панадан кузатаркан-да!”

Ариймазнинг қўнгли фараҳга тўлди. Ҳовлига чиқди. Безовта бўлиб кутаётган қариндошлари унинг сўzlарини шодумонлик билан қарши олиб, зоҳирان “хафа бўлган” қудаларига тасалли берган бўлишди.

Тўй дабдабали бўлмаса-да, ширингина бўлди. Тўйдаги курашда ҳам күёв қабила йигитларидан кучли эканлигини яна бир бор исботлади.

Тўйдан сўнг янги оила ўзига алоҳида туғ кўтарди.

\* \* \*

Фарзандлари ҳам соғлом ва бақувват, бир сўзли, лекин қайсар бўлиб улғайишиди. Катта ўғли Азамат ақли ва илми билан нафақат қабила ахли олдиди, балки шаҳар қабилалари уюшмасида ҳам обрў топди. Кўзини юмиб, “Авесто” готларини шундай гўзал ўқирдики, ҳазрати Довуд замонидан бери ҳеч ким бундай хушовоз бўлмагандир. Агар шу истеъоди билан бироз итоатгўй бўлганида борми?! Ҳеч ким ундей обрў қозонолмасди!

Оташкада қошидаги мактабни битирар йили уни устозлари ибодатхона коҳинлигига тавсия этишиди. Бироқ у... у Ариймаз ҳозир, айнан ҳозир адo этилишини кутиб ўтирган маросимни инкор этароқ оташкада коҳинларига қарши чиқди. “Зардушт бундай дейиши мумкин эмас, бу элатнинг кўчманчилик даврида ортиқча юқдан қутулиш учун ўйлаб топилган маросим, ҳозир бу одатнинг мутлақо кераги йўқ”, деди. “Жонивору ўсимликни ҳам азиз-авлон қилган зардушт дини инсонни бу қадар хўрламайди”, деди.

Мантиқан унинг сўзи тўғрига ўхшарди. Бироқ ҳар қандай янгилик каби бу фикр ҳам улуғларга ёқмади.

Ўтоғлари аввалига муроса қилишиди. Илохий хукмни ўзгартиб бўлмаслигини, бу табиатнинг қонуни эканлигини, жониворлар орасида ҳам шундай одат хукм суришини далил келтириб, Ахурамазданинг хоҳиши шундайлигини исбот қилишга уринишди. Бироқ Азамат коҳинларнинг, бошқа ёши улуғларнинг, ҳатто ота-онасининг ҳам гапларига кирмади.

– Сизларга Зардуштнинг сўзи эмас, унинг хукми ўлароқ ҳозик бўлган бемаъниликлар керак, аслида унга суюқасд қилиб ўлдирган ҳам ўзларинг! – деди дадил.

Бу анчайин қаттиқ гап эди. Ариймаз ўшанда кўрқанди. Оқсоқоллар боламни ўлдириб қўйишиди, деб ўйлаганди. Бироқ коҳинлар шафқат қилишиб, Азаматни сургунга хукм этишиди. “Қайтиб келсанг, ўлдирамиз”, дейишиди. Йигит эса пушаймонликни хаёлига келтирмасди.

– Энди қаерга борасан, болам? – сўраганди ундан энди аввалги ўтдай гўзаллиги ёнига ёшига яраша улуғворлик ҳам қўшилиб бораётган Аниса.

– Туркутлар қабиласига! – парвойи фалак жавоб берганди ўғли.

– Кўчманчилардан яхшилик кутиб бўлмайди.

– Бу ерда мунофиқ бўлиб яшагандан кўра, бошга тушганни кўрган маъқул. Бегуноҳлиги учун Сиёвуш оловдан ҳам тирик чиқкан экан, – жавоб қайтарди Азамат.

Шу бўйи ўғли бирон йил бедарак кетди. Аниса гарчи эрига билдирмасада, ўғлининг кийимларини бағрига босиб йиглаб олишини Ариймаз яхши биларди. Биларди-ю, билмасликка оларди. Бошқаларнинг “ноқобил ўғилнинг боридан йўғи маъқул” деган “тасалли”ларига сукут билан жавоб берар экан, фарзанди албагта қайтишини юраги сезарди.

Юраги алдамаган экан. Ўғли эрта кўкламда яширинча уйга келди. Елкасига аллақандай ёввойи ҳайвоннинг терисини ташлаган Азамат анча ўзгарган, юzlари қорайган, шундок ҳам бақувват билаклари яна-да йўғонлашган, қоғозу қаламга ўргангандан кўллари дағаллашган эди.

– Қандайсан, болам? – уни кучоғидан қўймай сўраганди ўшанда Ариймаз.

– Маздага шукр. У мени қўллади, – сокин, бироқ аввалгидай қатъият билан жавоб берди ўғли.

– Туркутлар қандай экан? – сўраганди ўшанда Ариймазнинг қизи акасига ҳайрат билан боққанча.

– Кўчманчилардан бекор кўрқар эканмиз. Улардай мард, бир сўзли одамларни кўрмаганман.

– Кўк бўрига сифинаяпсанми? – сўради Аниса.

– Йўғ-эй, – кулди ўғли афтидан онаси кўчманчиларнинг эътиқодини билганидан хайрон қолиб. – Мен Маздага ибодат қиласман. Ҳеч ким менга халал бермайди. Улар ҳатто бизнинг эътиқодга қизиқиб қолишли. Чунки Ахурамазда билан Кўк Тангрининг сифатлари бир-бирига ўхшар экан. Биласизми, мен уларга нима дедим? Аслида Яратгувчи битта, биз билган номлари эса Уни бизга англатувчи турли йўллар, холос, дедим...

– Юринглар, ота, она, сизларни олиб кетаман! – ниҳоят мақсадга ўтди тонг отаётган пайтда Азамат.

– Қаерга, болам? – сўради келганидан бери унга термилиб ўтирган она маъюсгина овозда.

– Бемаъни одатлар йўқ жойга. У ерда ҳам кунимизни кўра оламиз.

– Туркутлар дехқончилик нималигини билишмаса, яrim ёввойи бўлишса...

– Унчалик эмас. Улар ҳам чорва боқишади. Бунинг устига... овчилик яхши экан. Мен камондан отишни ўрганиб олдим.

– Қаерда бўлсанг ҳам, омон бўл, болам. Биз бормаймиз! – деди қатъият билан Ариймаз.

Ўғли ўшанда маъюсгина бош эгиб чиқиб кетганди. Ора-чорада ўшандай яширинча келиб турди. Бу орада қандайдир бир туркут қизга уйланганини ҳам айтди. Охирги келганида ота-онасини бирга юришга қистаб, роса ялинди.

– Ота, она, бошқа кўришмасак керак, – деди у кўзидаги ёшини зўрға тийиб. – Туркутлар бошқа жойга кўчиб кетишашапти. Узоқса. Мен... улар билан кетаман.

– Оиланг билан бирга қайтиб кел, ўғлим. Қилмишингдан пушаймон-лигингни айтсанг, ўтоғалари сени кечиришади. Ватандан узоқса кетиб бўлмайди, – зориллади она.

– Кейин уларнинг бемаъни эътиқодига бўйсунишим керак бўлади, она. Ахир Зардушт ҳам ўз эътиқодини сақлаб қолиш учун Эронга кетишга мажбур бўлмаганиди?

– Сен киму, улуг Хабарчи ким, ўғлим?

– Мен қайтмайман, она!

Ариймаз ўғлига эътироуз билдирамади. Гарчи индамаган бўлса ҳам, ичида унинг сўзларини маъқулларди. Кетаётганда ҳам хотини ва болаларига шу ерда хайрлашишни буюрди-да, ўзи уни пана йўллар билан шаҳар ташқарисигача кузатиб чиқди.

Отасини қуchoқлаб, хўшлашаётган ўғли унга бир гап айтди. Бу гапни Ариймаз кейинчалик кўп эслаб юрди. Шундан кейин ўғли бошқа қайтиб келмади.

\* \* \*

Ягона қизи – Равшаной ҳам акасидан қолишмади. Бўйи етгач, уйга келган совчиларни қайтара бошлади. Маросимда учта йигитни чирпирак қилиб йиқитди. Шундан кейин қабила йигитларидан ҳам, бошқа қабилалардан ҳам уни сўраб келишга хеч ким ботинолмади. Коҳинлар эса Азаматнинг олинмай қолган ўчини унинг оиласидан олишга имкон туғилганидан севинишдими, хар қалай, атайлаб турмушга чиқмай, Мазданинг қонунларини писанд килмади, дея айблаб, Равшанойни оташкада қошидаги сиҳатгоҳга ҳамшираликка жўнатишиди. Кучоғидаги қизининг келин бўлиб эмас, беморлар қошига ҳамшира бўлиб кетаётганини кўрган Анисанинг кўзёши дарё-дарё бўлди. Энди унинг мағрурлигидан асар ҳам қолмаган, шундоқ ҳам фарзанд доги эгтан қадди букилиб, юзидағи ажинлари кўпайган эди.

Ариймаз қизининг нега бундай саркашлик қилаётганини тушунмади. Бироқ нимагадир унинг фикрини маъқуллагиси келарди. Шунинг учун у гарчи фикрини очиқ айтмаган бўлса ҳам, қизига бир оғиз қаттиқ гапирмади. “Тенг тенги билан...” деганлари тўғри. Бу – табиат қонуни. Равшанойга тенг йигит бу шаҳарда йўқлигини Ариймазнинг ўзи ҳам яхши биларди. Агар тенги чиқса, қизи ҳам худди онасидай курашмай таслим бўларди. Ота буни ҳам англарди.

Равшаной итоатгўй ҳамшира бўлиб ишлади. Дам олиш кунлари уйга келганида ҳам, онаси уни йўқлаб борганида ҳам бирон марта ўз хаётидан, ишидан нолимади. Бирон йил шу тахлит ўтгандан кейин қиз ўз-ўзидан ғойиб бўлди. Шифохонадаги ҳамширалар уни қандайдир қисик кўз туркий йигит билан кўришганини айтишиди.

– Яна кўчманчилар. Уларнинг болаларимда нима қасди бор экан? – зорланди она.

Ариймаз эса гарчи буни ошкор билдириласа-да, қизининг қароридан хурсанд эди. “Тенг-тенги билан”, деганлари түгри. Ўша йигит олис юртдан Равшанойни излаб келибдими, демак, унинг тенги. Буни унга томиридаги қони билдириган. Ариймаз табиат қонуни адашмаслигини биларди. Қизи, албатта, баҳтли бўлади!

– Подшоларимизнинг ўзлари туркийлар билан қудалашишяпти-ку, – хотинига тасалли бермоқчи бўлди Ариймаз.

– Менинг орзу-ҳавасларим-чи?! Энди қизимни кўрмайманми?! Унинг болаларини ҳам кўрмайманми?! Биттасини дарди етмаётувдими менга?! – зор-зор қақшади хотини.

– Қўй энди, қаерда бўлсаям омон бўлишсин!

Полапонларини учирма қилиш – қушларга хос. Қарангки, одамзот бунга чидолмас экан. Айниқса, хотини. Равшанойнинг қилмишидан кейин қадди бутунлай букилиб қолди. Ариймазнинг ўзи ҳам эл-уруқقا аралашишга орқилиб, уйдан чиқмайдиган бўлди.

Уларнинг сўнгги умиди – кенжатой эди. Бу бола ўжарлигу эркалиқда акаси, опасидан қолишимаса-да, ота-онасининг ягона умидига айланганлиги учун энди анча сипо бўлиб қолганди. Ота-она Азамат ва Равшанойнинг орзу-ҳавасини шу боладан кўришди. Яхши жойдан қудалашишди. Ўзидай итоатгўй, мўмин-қобил қизни келин қилишди. Унинг болалари ҳам шундай итоатгўй, шундай мўмин-қобил бўлишди. Мактабда номигагина ўқишиди. Отаси, бобосига ўхшаб дехқончилик қилишди. Уйда чорва асраршиди. Шу билан умр ўтиб кетаверди. Неваралар ҳам балоғатга етган заҳоти уйланишди.

Шу пайтларда Аниса бетоб бўлди. Аввалига унинг ўзи ҳам, бошқалар ҳам буни ўткинчи дард деб ўйлашди. Лекин маълум бўлишича, бу бошқача қасаллик экан. Аниса алаҳлайдиган одат чиқарди.

– Кўк бўри, Кўк бўри, – дерди у нуқул олисларга тикилиб. – Болаларимни қаерга олиб кетдинг? Уларни қайтариб бер, Кўк бўри!

Ариймаз бу ҳолга жим қараб туролмади. Оташкада коҳинларини чакиритириб, “Авесто”даги девларни лаънатлайдиган дуолардан ўқитди. Бироқ бу дуолар акс таъсир қиласар, Анисанинг аҳволи ёмонлашиб борарди. Унинг алаҳлаши кучайиб, уззуқун ғойибдаги суҳбатдошига нола қилиб, ийғлайдиган одат чиқарди.

– Кўк бўри, сенга нима ёмонлик қилдим? Болаларимни қаерга олиб кетдинг? Уларни қайтариб бер! Бағримга қайтар болаларимни!

Ариймаз хотинининг умри ниҳояланиб бораётганини сезиб турарди. Шунинг учун иложи борича унинг кўнглига қарашга ҳаракат қиласар, ёнидан жилмай ўтиарди. Бир куни хуши жойига қайтгач, Аниса эрига деди:

– Беҳушлигимда нима деяпман, отаси?

– Нуқул Кўк бўри, дейсан. Қўй, онаси, болаларингдан рози бўл. Ўзингни ҳам қийнама.

– Мен улардан розиман. Лекин сиз ҳам бир нарсани билишингиз керак. Улар... улар мен туфайли туркийлар қавмига қўшилишди.

– Бу нима деганинг?! – ҳайратдан лол бўлди Ариймаз.

Хотини йўталиб, гапиришга қийналди. Ариймаз унга сув тутди. Кейин елкасидан ушлаб, ўрнига ётқизиб қўйди.

– Гапимни эшитинг, отаси. Кейин буни айта оламанми, йўқми, билмайман, – хотини кутилмагандада дадил овоз билан гапира бошлади. – Мен асли турктулар наслиданман.

Ариймаз бу кутилмаган иқордан шошиб, гапини йўқотиб қўйди. Анграйганча ўтираверди. Нихоят, тили сўзга келиб: “Боболарим сенинг аждодларингни яхши билишар эди-ку”, – деди.

– Буни боболарингиз ҳам эслолмайди, – деди Аниса. – Катта бобомнинг отаси туркот йигит бўлган. У ҳам худди бизнинг Азаматга ўхшаб, қавмидан қувилиб, биз томонга келган. Уструшоналик қизга уйланган. Болалигимда ўша бобомнинг хотини – Оша бувим менга чоли Кўк бўри ҳақида айтганларини эртак қилиб сўйлаб берарди. Ўша эртаклар менинг кўнглимга шунчалик жо бўлганки... ўшандан бери Кўк Бўри деганлари ҳамиша менинг хаёлнимда яшади. Йўқ, буни шунчаки хаёл деб бўлмайди. Болалигимда туркийларнинг онаси – ўша Она Бўри аллалаб ухлатганини, тушимга кириб, мени тўлин ойли тунда баланд тепаларга олиб чиққанини, мени ёнига ўтқазиб олиб, ойга қараб чўзиб-чўзиб улиганини биламан. Тўйимиз бўлаётгандада у пешонамдан ўпид, сизга топширган. Фарзандли бўлганимизда болаларимнинг бешиги тепасида увуллаб, алла айтарди. Ўша Кўк Бўри ҳали ҳам мен билан яшайди, ишонасизми?

– Ўзингни уринтирма, хотин, – Ариймаз хотинини тинчлантиришга ҳаракат қилди. – Тангри бизга шу кунларни рано кўрибдими, бу ҳам бежиз эмасдир... Ухла, хотин, кўзингни юм.

– Мен алаҳлаётганим йўқ! – кўзлари чақнади аёлнинг. – Ҳар доимгидан кўра ҳозир хушёроқман... Ҳозир у қариган... Мадорсиз... Ҳатто улишга ҳам ярамайди... Яқинда ўлади... Болаларимизнинг дилига ҳам менинг кўнглимдаги ўша эътиқод ўтиб, уларни туркийларга яқинлаштирган. Шундай, отаси... болаларимиз... болаларингиз мен туфайли ўз қавмини ташлаб кетди. Шундай... отаси. Мендан рози бўлинг...

Хотинининг ёш қуйилган кўзлари мангуга юмилиб борарди.

\* \* \*

Шундан кейинги воқеаларни Ариймаз аввалгидай ҳушёрлик билан эслолмайди. Неварадарнинг болалари ҳам улғайди. Улар ҳам турмуш қуришди, фарзанд кўришди. Лекин уларнинг орасидан ҳеч ким мавжуд қоидаларга қарши бош кўтармади. Ҳаммалари тобора итоатгўй бўлиб боришарди. Одамлар Азамат ва Равшанойни ҳам, ўзларини ҳам унугиб юборишли. Балки Азамат билан Равшаной ҳам улуғ Ахурамазда хузурига равона бўлишгандир? Ахир уларнинг укаси – итоатгўй, мўмин қобил кенжатой ҳам ўтган йили бу дунёни тарк этди-ку. “Йўқ, йўқ, улар ҳаёт, мен тирикман-ку”, ўйларди Ариймаз.

Ариймаз сўнгги яқинидан ҳам айрилганлигини ўша кенжатои вафот этганда сезганди. Кенжатойнинг бор-йўқлиги кўп-да билинмаса ҳам, отасига

суюнчиқ экан. Сўнгги суюнчиқ. Невара-чеваралар Ариймазга яхши қарашди, иссиқ-совуғидан хабардор бўлишди. Лекин суюнчиқ бўлишолмади.

Ариймаз кундузи шаҳарда бемақсад кезиб юрадиган бўлди. Унинг тенгдошлари ё нариги дунёга кетишган ё бўлмаса, болаларини дуо қилиб уйдан чиқмай ўтиришади. У эса... унинг жисмоний соғломлиги ва руҳий беҳаловатлиги муқимликка қўймасди. У шаҳар кезиб, ўзига яқин хотира қидирарди. Шаҳар четидаги оташгоҳ унга ана шундай хотира берувчи маскан эди. Бу даргоҳ қошидаги мактабда ўзи ҳам, болалари ҳам савод чиқаришган. “Авесто”хонлар уларга устоз бўлиб, муқаддас китоб ҳикматларини шарҳлаб беришган. Шу ерда Азамат ўша маросимга қарши чиқиб, нутқ сўзлаган. Шу даргоҳ қошидаги ҳов анави, қизлар тўпланиб турган жойда, сиҳатгоҳда, Равшаной бир йил ҳамшира бўлиб ишлаган. У ҳам гарчи сўз билан бўлмаса-да, амали билан мавжуд қонунларга қаршилик кўрсатган. Ҳозир улар қаерда экан? Соғ-саломатмикин?!

Тунлари Ариймаз бедорликдан қийналарди. Баъзан эса уйқу ҳам бедорликдай туюларди. Унинг Аниаси ёнида Кўк Бўри билан келиб, узокларга – баланд тепаликка олиб борар, Кўк Бўри ойга қараб узоқ увлаётганида эрига қараб: “Қаранг, мунчаям чиройли манзара. Ўшанда туркутлар ёнига кетиш керак эди, отаси”, – дерди.

Чевараларнинг болалари ҳам бола-чақали бўлишганда Ариймазнинг умри нафақат кечалари, балки кундуzlари ҳам уйқу ва бедорлик орасида ўтадиган бўлди. Унинг авлодлари тобора ўзидан кўпайиб борар, Ариймазнинг назарида, кўпайгани сари кичрайиб, майдалашиб боришарди. Ой невара, пан невара деганларининг сони шунчалик кўпайиб кетган эди (Аниса буни кўрганда, балки икки боласининг ҳажрида ўртанганига афсус қиласмиди?), Ариймаз уларнинг бирини иккинчисига адаштириб юборар, бирини исми билан бошқасини чақираверарди. Авлодлар бунга хафа бўлишмас, “бобомизнинг эси киравли-чиқарли бўлиби”, деб кулиб қўйишар, “лаббай”, деб жавоб бераверишар эди. Ариймаз энди аввалгидай шаҳар кезолмас, уйининг остонасида ўтириб, ўтган-кетганни томоша қиласиди.

Тавба, унинг қўзига нафақат ўз авлоди, балки бошқалар ҳам кичрайиб, майдалашиб кетгандай эди. У ўтиради-ю, гўё қўчадан, унинг қўз ўнгидан шарпалар юзиб боришарди. Узун-калта, катта-кичик шарпалар. Фақат ейиш ва ичишга, бир хил кун кечиришга ярайдиган шарпалар. Баски, уларнинг ҳеч қайсиси Ариймазнинг катта фарзандларида бўлолмайди. Йўқ, Ариймазнинг эси оғиб қолмаганди. У ҳамон ўз фарзандларини, Кўк Бўрининг авлоди бўлган Аниасини яхши эсларди. Уларнинг сиймосини авлодларидан қидирарди. Қайсиdir қилиғи уларни эслатса, кувониб кетарди. Афсуски, бундай кувонишлар тобора камайиб борарди. Бу ҳолатга қараб, Ариймаз ўзининг иззати битиб, бу дунёдан кетиш фурсати келганлигини англарди. Англарди-ю, унинг чорасини тополмай ҳайрон эди. Ариймаз имонли зардуштий сингари ўз жонига қасд қилиш учун Ахурамаздан қўрқарди. Шунинг учун сўнгги куни келишини кутишга қарор қилди. Ўша кун эса келақолмай, Ариймазни интизор қиласиди. Пан неваралар ҳам оиласи бўлиб, ўзларининг тугларини кўтаргандари сари Ариймаз-

нинг интизорлиги ошиб борарди. Энди у уйдан ҳам чиқолмас, бироқ ҳали ҳам ақли соғлом, олдига кириб-чиққан шарпаларни кўриш учун кўзлари саломат эди. Шарпалар эса тинмай юришар, туришар, киришар-чиқишар, тирикчилик дардида чумолилар каби тиним билишмасди. “Булар чарчамасмикин, ахир мен яшайвериб чарчадим-ку, бир хиллиқдан зерикмасмикин, – дерди Ариймаз. – Мен аллақачон зерикканман. Баски, жонимни олмасанг, ақлимни олиб, мени бу туссизликдан кутқар”, – деб Ахурамаздага илтижо қиласди. Афсуски, Улуғ Тангрининг қулоғи бу илтижоларни эшитмасди.

Ниҳоят, пан неварасининг катта ўғли бўйига етиб, “белбоғи мардон” боғлаган йили Ариймаз ўша маросим бўлишини англаб етди. У маросимни кун санағ кута бошлади. Овқатдан ўзини тийди. Мана, авлодлари оташкадага чакиртирилди. Ариймаз ўзича тасаввур қилди. Оташкаданинг энг улуғ коҳини – мульбад уларга бу маросим Улуғ Ахурамазданинг хоҳиши билан Унинг Элчиси – Зардуштга ваҳий орқали етказилган илоҳий буйруқ эканлигини, унга қарши чиқиш Яратгандга қарши чиқиш билан тенглигини, бу маросим ҳатто ҳайвонлар орасида ҳам амал қилинишини тушунтирайпти. Авлодлари эса ибодатхонадаги мангу оловга термилганча бир сўз демай, сукутга ботишган.

– Бу ишни бегона авлоднинг биринчи вакили бажариши керак. Бу – муқаддас маросим!

Бош коҳиннинг метин нигоҳи ва иродаси қаршисида Катта Бегона “миқ” этмай бош эгган. Ниҳоят, улар юzlарида розилик аломати зуҳур этган сукут билан бош руҳоний қаршисидан – ўzlари тиз чўкиб ўтирган эроний гилам устидан туришди. Бош коҳин маросим кунини белгилади.

Авлодлар оташхонадан келишгани заҳоти Ариймазга янада меҳрибон бўлиб қолишиди. Кунда бир кирмайдиганлари соат сайин киришар, унинг соғлигини суриштиришар, аёллари турли-туман таомлар келтиришарди. Шунда Ариймазнинг эсига катта ўғли Азаматнинг ўша сўнгги видолашув куни айтган сўzlари тушди.

– Бу маросим гуноҳ, катта гуноҳ! – деганди у. – Бундай гуноҳ қилишдан бизнинг авлодни Ахурамазданинг Ўзи асрасин.

Ариймаз авлодини гуноҳга қўймаслик учун ўша гуноҳни ўзи қилмоқчи бўлди. Ўша кундан овқатга қайрилиб қарамади. Бироқ бандасининг айтгани бўлавермас экан. Маросим куни, барибир, келди.

Ариймазни ибодатхона яқинидаги баланд бинонинг томига олиб чиқишиди. Унинг кўзига ўша қадрдан бино – оташкада кўриниб турарди. Деворларидан путур кетса-да, унча ўзгармабди. Анчадан бери кўрмаганди. Эллик йил бўлдими, юз йил бўлдими, кўрмаганига, Ўзи билади!

У орқасидан Катта Бегонаси итоатгўй ва майда қадамлар билан юриб келаётганини, қадам олишидан оёклари титраётгандигини, бироқ маросим ҳақида ноўрин гапиришга, уни инкор қилишга тарбиясидаги итоатгўйлик йўл қўймаганлигини сезиб турарди.

“Демак, унинг қалбида мен ва хотинимнинг қайсарлиги бор. Лекин уни изҳор этишга журъати йўқ. Майли, ҳеч бўлмаса, қалбида у бундан норози бўлса, кўнглида қилаётган иши нотўғрилигини билиб, ундан нафратланса, мен шунга ҳам розиман!”

– Мен сендан розиман, болам! Бошла! – хаёлан бегонасига мурожаат қилди Ариймаз.

Катта Бегона титраётган ингичка, қувватсиз қўллари билан Катта бобосининг елкаларидан ушлади. Ариймаз беихтиёр кўзларини юмди. Шунда унинг эсига Азаматнинг отасини бақувват қўллари билан қучоқлаб айтган гаплари тушди: “Ота, яқинда Кун ботиш томондан оқ түя минган Халоскор келади ва бундай лаънати маросиму одатларни йўқ қилади. Унга эргашганлар эса саодат топадилар. Бу сўзни Улуф Зардушт башорат этган, ота. Ҳадемай, шундай бўлади, ота, ҳадемай!”

\* \* \*

Ариймаз ўзининг еттинчи авлоди – бегонаси томонида томдан итариб юбориш йўли билан қатл этилган куни Кун ботиш ёқдаги ўша Улуф Халоскор оқ туясига миниб, Ясириб заминига кириб келганди.

## ТАНГРИТОҚҚА ЎРЛАЁТГАН ЎҒЛОН

Истамин кўзини очганда ўтовнинг тепасидаги туйнук – тобдон очиб қўйилган, унда тонгнинг бўзариб отаётганлиги кўриниб турарди. Онаси доим шундай – жуда эрта туради-да, тобдонни очади. Эмишки, тонгда кўк узра учеб ўтаётган Умай она<sup>1</sup> шу туйнукдан ризқ-насиба ташлаб кетармиш.

Йигит ҳозиргина кўрган туши таъсирида карахт эди, кошки эди, кўзини юмса-ю, қайтадан уни кўрса. Шундай қилди ҳам, бироқ энди унинг кўз олдida фақат зулмат кўринди, холос.

Шу онда ўтов эшигининг очилгани эшитилди. Йигит кўзларини хиёл очди. Эшикда отасининг қораси кўринди:

– Турақол, ўғлим, Истамин баҳодир! – боласини эркалаб уйғотди ота. – Бугун овга чиқамиз.

Бошқа пайт бўлганда бу сўздан йигитча учеб кетгудай бўларди, ахир қанчадан бери қабиладошлари билан бирга овга чиқиши орзу қилади. Удумга кўра, овга чиқиши ўғил боланинг йигит бўлганлигидан нишона бепар, биринчи овдан ўлжа билан келиш қабиладошлари мақтоворига сазовор қиласар, қабила аёллари уни куёвликка зимдан “кўз остига олиб” кўйишарди. Бироқ ҳозир йигитча кўрган туши таъсирида узоқ вақт хаёл суриб ётгиси келаётганди. Лекин иложи йўқ, овдан бош тортиб бўлмайди.

Истамин ўтовдан ташқарига чиққани заҳоти димоғига тоғ чечакларининг хиди келиб урилди. Тик турган кўйи ўчоқда пишган иссиққина нонни кавшаб, онаси келтирган бия сутини симирди-да, омонатгина тикланган

<sup>1</sup> Умай она – кадим туркийлар эътиқоди бўйича оила, болалар ва аёлларнинг химоячиси, Кўк Тангрининг рафиқаси бўлган илоҳа, оккуш киёфасида тасаввур килинган.

отхонадан бетоқат ер тепинаётган тўриқ қашқасини олиб чиқди. Эгар-жабдуғини ургач, отнинг бўйнига шапатилаб эркалатди-да, қашқанинг кишинаб қўйишидан завқи келиб, бир сакраб, устига минди.

Қабила эркакларининг писиб бориб ваҳший ҳайвонларга найза отишлари, жайрон овлашлари, камоннинг мўлжалга бехато санчилиши, овқушларининг пастга ўқдай шўнгиши йигитчанинг томиридаги қонни жўшириб юборди. Кўрган туши тамоман эсидан чиқди. Отаси Бургут баҳодир билан қуён, ҳатто олқор овлашди. Отаси мамнун бўлиб унга кўз қисиб қўйди.

Туркийларда исм деганлари одам билан бир умрга қолмайди, у тез-тез ўзгариб туради. Чақалоқ туғилганда табиатсевар бу халқ чор-атрофдан улгу олиб бирон исм қўяди. Масалан, ўғил бўлса, Тўргай ёки Бўрибий, қиз бўлса Юлдуз ё Ойчечак. Кейин эса эркакнинг эл корига ярашига, қиз боланинг қандай оиласа “тушиши”га қараб исми ўзгартилади. Елдирим баҳодир ёки Элбилга бека каби. Лекин Бургут баҳодирнинг исми жисмига муносиб қўйилган экан. Унинг ўткир кўзлари нафақат ов чоғида, балки ёв босгандা ҳам элга кўп хизмат қилди. Шунинг учун унинг исми ўзгартирилмади, балки унинг исмига беклардай “баҳодир” унвони қўшиб айтиладиган бўлди. Бургут баҳодир эса элдошларидан фарқли ўлароқ ўғлини улуғ Турк хоқони номи билан атади. Истамин – юртни қуллик занжиридан озод қилиб, ҳурлик кўкига олиб чиққан, элу юртини тенглар ичида тенг қилиб, не-не юртларни забт этган буюк Турк хоқонининг исми эди. Истамин хоқоннинг акаси Бумин баҳодир билан қилган жаҳонгирликларини туркий аёллар ҳали-ҳамон болаларига эртак қилиб айтиб беришарди.

Истамин кичкина чиройли жайронни кўрди-ю, ихтиёрини йўқотгандай у томонга от бошини бурди. Жайрон эса даштнинг кўм-кўк юлғунлари аро йигитга қараб-қараб, аввал секин, кейин эса тез югуриб кетди. Жайрон бир кўриниб-кўринмай чопиб бораркан, Истамин отасига тортган ўткир кўзлари билан уни таъқиб қиларди. Жайрон ва тулпор бир-бирларидан қолишмай елиб боришар, шамол йигитнинг бўрк остидан тошиб чиққан сочини тўзитар, шоҳ-шабба юз-қўлларини тирнар, бироқ ов шавқига тушган ёш овчи буларни ҳам, қабиладошларидан анча узоклашиб кетганини ҳам пайқамасди.

Бирдан юлғунзор йўқолиб, Истамин бийдай далага чиқиб қолди. Уни ўзи билан эргаштириб келган жайрон худди ер ютгандай ҳеч қаерда йўқ эди. Унинг ўрнида... унинг ўрнида эса... бийдай далада бирдан улкан саройлари бор катта шаҳар пайдо бўлди. Унинг деворлари туркийларнинг ўтови сингари қизил ҳам, сарифу яшил ҳам эмас, оппоқ, худди ёғду таратиб тургандай эди. Ўша улкан саройларнинг биридан... воажаб, Истамин бугун, эрта тонгда тушида кўрган гўзал қиз чиқиб келар эди. Гўзалнинг либослари ҳам нур сочиб тургандай, қордай оппоқ юзи, маъжусийлар сифинадиган қуёшдай сержило соchlари, кўк сингари мовий кўзлари... ё Тангри, мадад бер, одам боласи ҳам шундай чиройли бўладими, ёки бу Истаминга Туркой момо айтиб берган чўпчаклардаги париларданми?

Қиз оёғи ерга тегиб-тегмай, худди Умай Она каби учиб кела бошлади. Йигитнинг қаршисига келган гўзал Истаминнинг алп келбатига, елкасига ташлаган йўлбарс терисига, қуёшда қорайган қўлларига, қоп-қора сочларига, ўт чақнаб турган қисиқ кўзларига ҳайрат ва аллақандай қувлик билан тикилди.

Тушида ҳам зулмат ичидаги ёғду каби худди мана шу қиёфа, мана шу чехра уни таъқиб этган, аммо бир сўз демай ғойиб бўлганди.

– Кетиб қолма! – жон-жаҳди билан пичирлади йигит. – Испинг нима, қаердансан?

Қиз бош чайқаб:

– Нафаҳидам, – деди.

“Тушунмаяпти шекилли”, – ўйлади Истамин ва бармоғи билан ўз кўксига нуқиб.

– Истамин! – деди ва ишорани қиз томонга қаратди:

– Испинг нима? Испинг?

– Ҳа, – қиз тушунди шекилли, қах-қах уриб кулиб юборди. – Равшанак.

– Равшан... ой! – хурсанд бўлиб қайтарди Истамин ва... кўз ўнгидаги еру кўк остин-устун бўлиб кетди. Бир зум ичида гўзал қиз ҳам, у чиқиб келган сарой ҳам, шаҳар ҳам йўқликка сингиб кетди...

Кейин нима бўлганлигини онасидан эшитди. Жайронни қувиб бораркан, отдан ийқилиб, ҳушини йўқотган, анча вақт бийдай даштда қолиб кетган. Эсли оти эса қайтиб келиб, қабиладошларини ўша ерга оборган...

– Ҳалиям Кўқ Тангри<sup>2</sup> асрабди, тўриқ қашқа хабар берибди, – деди Лочин бека ўғлининг устидаги йўлбарс терисини тўғрилаб қўяркан. – Бўлмаса болам бечорани қандай топардик?

Истаминнинг боши айланар, кўнгли эса, аллақандай ғалати хисдан беҳаловат бўлаётганди. Ўғлининг ён томонида чўқкалаб ўтирган Бургут баҳодир ўнғайсизлана бошлади.

– Ҳаммаси яхши эди-я. Истамин биринчи марта овга чиқсаям, абжир йигитлардан қолишмаётганди.

– Бас, етар, – Лочин бека ўғлига қараб гапирса-да, эрига мурожаат этаётганлиги аниқ эди. – Энди ҳеч қаерга бормайди. Бир йил кейин эркак бўлса нима қилибди? Менинг ўғлим ўнта эмас.

\* \* \*

Кўчманчи ҳаёт тарзида туғилиб, вояга етган Истамин тез тузалди. Уч кундан кейин ўтовдан чиқиб, атрофни кузатди.

Кўчманчи туркийлар қишлоғи бир-биридан анча узокда жойлашган ўтовлардан иборат бўлиб, осмондан ёки бирор баландликдан кузатганда кенгликка сочиб юборилган донни эслатарди. Ҳар бир оиланинг чорваси, қозон-ўчоги алоҳида бўлса-да, улар уруғларнинг кичик жамоасига бир-

<sup>2</sup> Кўқ Тангри – қадимий туркийлар эътиқоди бўйича улуг Тангри, ер, осмон, жами мавжудотни яратган кодири кудрат, бургут қиёфасида тасаввур килинган.

лашган, бу жамоа эса айни пайтда қабила жамоасига тегишли бўлиб, бу мустаҳкам тартиб хоқонлик даражасигача юксалиб бораради.

Атроф-жавониб айни кўклам оғушида. Ён-вердаги дала ҳам, ҳув узоқлардан кўринган қирлар ҳам яшил либосини кийиб, дала чечаклари қизларнинг чаккаларини безаган. Ҳув анави ерда Истаминнинг бўй етган амакиваччалари йиғилиб, қиқирлаб алланимани муҳокама қилишганча ўсма қўйишяпти. Берироқда ўн-ўн икки ёшли қизчалар тойчоққа минишни ўрганишяпти. Аёллар бунга эътибор бермай ўз юмушлари билан андармон. Чунки туркийларнинг қизлари балоғатга етгунча рўзғор ишлари билан бирга от миниш, ўқ отиш, ов қилишни билишлари шарт эди. Истаминнинг онаси ўчоққа ўтни ланғиллатганча, шопириб-шопириб сут пиширяпти. Унинг ёнида амакисининг хотини – чечаси ўчоқ қиздириб, нон ёпляпти. Уларнинг атрофида уч-тўрт ёшли болакайлар тол хивичдан от ясад, ўйнашяпти. Анча нарида катта момоси Туркой момо кичик чевараларини қаршисига тўплаб, ниманидир сўзлаяпти. Момонинг гоҳ қўлларини силкитиб, гоҳ бош чайқатиб, гоҳ гавдаси силкиниб гапиришидан болакайларга чўпчак айтаётганга ўхшарди. Эртак Ўғуз Хон ёки Кўк Бўрининг туркийлар қавмини асраб қолгани ҳақида бўлса керак. Истамин ҳам бир вақтлар Туркой момодан шу эртакни эшитган. У шундай айтиларди:

Олис-олис замонларда ёв айёр бўлган экан. У туркийларни заминдан супуриб ташламоқ учун тунда қишлоққа ҳужум қилибди. Ҳаммани битта қолдирмай қиличдан ўтказган ёв тонггача ҳувуллаган қишлоқ оралаб юриб, омон қолганларни излабди. Лекин вайрон бўлган бир ўтов ичида жон сақлаб қолган икки болакай – бир ўғил ва бир қизалоқни топа олмабди. Кўк Тангрининг изми шундай бўлган экан-да. Болалар совуқ ва очлиқдан, кимсасизликдан йиғлаб ўтиришган экан. Шу пайт қишлоққа ёллари қўмкўк бўри кириб келибди. Қўрқанидан қочишини ҳам унуглан болаларни елкасидан беозоргина тишлаб, ўз инига олиб кетибди. Уларни ўзининг сути билан боқибди. Катта бўлишгач, уларга олқор, жайрон овлаб келтирибди. Шу болалар туркийларнинг авлодини давом эттиришибди...

Негадир бу кўз илғайдиган жойларда Истаминнинг тенг-тўшлари кўринмасди. Яна овга чиқишимикин? Ё қир бағрида кўпкари чопишаёт-ганмикин? Балки бирон овлоқ ўтовга кириб, қимизхўрлик қилишаётгандир? Истаминнинг хаёлига ов чоғида уни отдан йиқитган ўша мовий кўз гўзал келди. Юраги ўйнаб кетганини сезди. Воажаб, унинг сурати йигитнинг қалбига муҳрланиб қолган, кўзини юмди дегунча сирли сиймоси гавдаларди. Лекин кўнгил ёриб айтишга бирор сирдош, дарддош қани дейсиз?

Йигит шу кунларда анча ўйчан бўлиб қолган, гўё уч кун ичида улғайиб, ҳаёт, муҳаббат, номус ҳақида ўз фикрлари шаклланиб қолганди. Йўқ, у муҳаббатни зўрлик билан ўлчайдиган, “от чоптириб, ов қилишни қойиллатсанг, ҳар қандай қиз тулпорингга мингашади”, деган тенгдошларининг фикрига қўшилмайди энди.

Истамин шуларни ўйларкан, ўша гўзални соғинганини ҳис қилди.

\* \* \*

Истамин балки исми жисмига монанд бу гўзални унугиб юборармиди?! Агар қиз яна ва яна тушига кириб, уни безовта қилавермаганда. Тушларида энди у аввалгидай шўх-шаддод кулмас, балки сирли ва маъюс жилмаяр, кўринишидан уни интизор кутаётгандай бўларди. Лекин ўша сирли гўзалнинг хаёлига кундан-кун қаттиқроқ боғланиб бораётган бечора йигит, шўрлик ошиқ қаёққа боришни, бошини қаерга уришни билмасди. Ана бийдай дала, сарғайиб бораётган кирлар, ўша олис-олисларгача туркийларнинг ўтовлари яйраб ётибди. Уларнинг бирортасида бу мовий кўзли гўзал йўқ. Уларнинг ҳар бирида кора кўзларидан ўт чақнайдиган, от чоптириб юрадиган сулувлар бор. Лекин бу кўхлик қизларнинг бирортаси Истаминнинг дардига даво бўлолмайди.

Муттасил иштаҳасизлик, тунлардаги бедорлик, тушқунлик ва умидсизлик ўз ишини қилди. Вақт ўтиши билан йигитнинг буғдойранг юзи сарғайиб, та-насини дармон тарк эта бошлади. Унинг кўзларидаги ўт сўниб, қорачиғи хира-лашиб борарди. Қишининг рутубатли кечаларида юраги қаттиқ сиқилган ошиқ ўтовнинг кигизини йигиб ташлаб, кўкрагини зах ерга босгандা сал-пал ҳаловат тайди, буни одат қилгани эса бошига бало бўлди. Иситмаси кўтарилиб, дарди ошкор бўлгач, ота-она росмана талвасага тушиб қолишиди. Энди унга туркона дорилару, шомонларнинг “алас-алас” и ҳам фойда қилмаётганди.

Тушлар эса... тушлар ўша гўзални такрор ва такрор эслатаверар, ҳайҳотки, у сулув ҳам айрилиқми ва ёки бошқа дард туфайлими, тобора хомуш бўлиб борарди.

Ота-она нажот истаб тўрт томонга югуришиди, ота-боболар руҳига қурбонлик қилишиди, шомону баҳшиларга қаратишиди. Мозорларга чироқ ёқишиди, чалпак пишириб, кўшниларга чиқаришиди. Қабиладаги кўпни кўрган кекса дониш-мандлар билан маслаҳат қилишиди. Донолар аввало йигитнинг кўнглидагини билинглар, балки кимгадир кўнгил кўйгандир, дейишиди. Ишқ дарди оғир, давоси эса фақат висолдир, деб тайнинлашди. Лекин ота-она ўғилларини қанча ўртага олишмасин, қанча алдаб-сулдашмасин, Истамин фақат ерга қараб, сукут сақлар, кўзидағи ёшни кўрсатмаслик учун ота-онасининг юзига қарамасди.

Кўклам келгани сари Истаминнинг ҳалокати яқинга ўхшаб туюлаверди.

– Жонлиқ сўйиб, Умай онага қурбонлик қилиш керак. Ўшанда отдан йиқилганда, унга ёмон руҳлар теккан кўринади, болани яхшилаб қонлаш лозим! – нажот йўлинни топгандай деди она.

– Йўқ! – деди қатъий овозда Бургут баҳодир. – Истамин аллақачон йигит бўлган. У энди Умай Онадан эмас, Кўк Тангридан насиба сўрайдиган пайт етди. Бор, чақир уни.

– Нима қилмоқчисиз?

– Чакир.

Ўтовга беруҳ ҳолда кирган Истамин аввал онасига, сўнгра отасига салом берди. Кейин эса уларнинг қаршиисига тиз букиб ўтириди.

– Ўғлим, сенинг кўнглингда бир дард бор, лекин бизга айтмаяпсан, тўғрими?

Бургут баҳодирнинг сўzlаридан Истамин юзи қизариб кетганини сезди-ю, бошини янада эгди.

– Бу балки номус ишидир, балки кўнгил иши, – Бургут баҳодир хоти-нига бир қараб олиб, давом этди: – Ота-боболаримиз Тангридан бир нима-ни тилаган бўлишса, баланд тоққа, Кўк Тангрига яқинроқ масканга чиқиб, Тангрига юзма-юз туриб, кўнгил дардини айтганлар. Сен ҳам шундай қил, ўғлим. Бор, Тангритоққа чиқ. Энг юксак чўққисига ёлғиз ўзинг ўрла. Тила-гингни Тангри беради, ўғлим. Эртагаёқ йўлга отлан!

Истамин бош эгиб, розилик маъносини билдириди ва ўрнидан туриб, ташқарига чиқди.

Лочин беканинг ранги оқариб кетди, Бургут баҳодир ўғлини нақ ажал-нинг қаърига юбораётган эди. Тангритоғ анча узоқ, юксак тог бўлиб, унга одам боласи чиққанлиги маълум эмас эди. Балки ҳали ҳеч ким уни ошиб ўтмагандир? У тогда қандай ваҳшнийлар, газандалар бор, ким билади?

Кўзёшлари юзини ювган бечора она эрига қаратади:

– Нималар қиласяпсиз? – дея олди, холос.

– Охирги нажот шу, онаси. Тангри ўғлини бизга деб берган бўлса, қайтиб келади, йўқса, ҳеч бўлмаса, ҳалокатини кўрмаймиз.

Бургут баҳодир кўзёшини яшириш учун четга қаради.

\* \* \*

Истамин тонгда тетик уйғонди. Бургут баҳодир ўғлини кўксига уч марта босиб, видолашди. Онаси кўзёшларини аранг тийиб йўл хуржунини узатди. У жун ипдан соддагина нақшлар тикилган хуржунни тўриқ қашқанинг усти-га ёпди-да, “Ё, Тангрим!” – деб бир сакраб минди. Тўриқ Тангритоққа, азиз маскан зиёратига бораётганини сезгандек олдинги икки оёғини кўтариб, ос-монга сакради. Отнинг кайфияти йигитга ҳам таъсир қилиб, кулиб юборди.

Кейин шиддат билан от чоптириб кетди. Тонг шабадаси йигитнинг бўрк остидан чиққан ўсиқ сочларини эркалатиб ўйнар, мўйлови сабза урган юзи-га тегиб сийпалар, Истамин эса кўнглидаги ишқ оғриғини унугандай, бо-болари неча марталаб от чоптириб ўтган бу даштларда шамолдай елиб бо-рарди. Кўксидаги пинҳон иштиёқ – боболаридан ўтган жангарилик қонини кўпиртириб, юзларига қизиллик югуртирган, кўзларида яна ўт чақнаётганди.

Уч кунгача хуржун кўзи очилмади. Мехмондўст туркийлар отлиқ сайёхни ўтовга таклиф қилишар, навқирон кўноқ қамчинни кўксига босиб, узр сўрамоқчи бўлса, мезбонлар эшишишни ҳам хоҳламай уни отдан судрагудек тушириб, ўтовга олиб киришарди. Истамин олдига кўйилган сутли ва гўштли таомлардан, ўчоқда пишган нонлардан татиб кўрарди-ю, лекин қимизни қатъян рад этарди.

Истамин кимнинг ўғли эканлигини, не мақсадда йўлга тушганини бил-ган мезбонлардан ёши улуғроғлари “зўрламанглар, йигит зиёратга чиққан экан”, дейишарди. Шундан кейин мезбонлар йигитга бошқа алоҳида ке-лишни тайнлаганча, хуржунига алланималарни солиб беришар, рад этиш-дан фойда йўқлигини билган Истамин кулиб кўяр, миннатдорчилик бил-дириб таъзим қилиб, ҳозиргина танишган мезбонлари билан қучоқлашиб хўшлашарди. Мезбонлар эса унинг уруғидан ёки оғайни қариндошларидан

кимни танишса, ўшани қайта-қайта сўрашар, салом айтишни тайинлаб, Истамин билан қадрдан биродардай хўшлашишарди.

Сафарнинг тўртингчи куни тоғ этагидаги чўпоннинг ўтовида тунаган Истамин отини унга омонат қолдирди-да, елкасига хуржунини ташлаганча, олға интилди.

\* \* \*

Ўнгирдан ўнгирга, қиялиқдан тикликка ўрлаб бораётган Истамининг юраги яна безовта бўла бошлади. Бироқ бу безовталик ёр висолига интиқ ошиқнинг интизорлиги бўлиб, Истаминни янада тезроқ, юқорироқ, илдамроқ юришга ундарди. Белига от ёлидан ўрилган арқонни боғлаб олган ёш забткор арқоннинг нариги учидаги чангакни юқорига отар, у илингач, тортиб-тортиб қўяр, тушиб кетмаслигига ишонч ҳосил қилгач, икки кўллаб арқонга осилганча, оёқларини ишга солиб, юқорига ўрларди. Чиқиб олгач, яна шу ҳаракатни такрорлаб, юксакка интиларди.

Йўлида учраган олқорлар, тоғ капитарлари бу табиат қўноғидан ҳуркиб, ўзларини панага уришар, бироқ уларни овлаш Истаминнинг хаёлига келмас, хуржунидаги қотган нонни жилғага ивитиб еб, яхна гўшту қурут билан қорнини тўйғизарди-да, яна олға интиларди.

Тоққа кўтарилишининг учинчи куни Истамин булутларга яқин келди. Совуқ забтига олди, ҳаво етишмай, нафаси қиса бошлади. Аввалги кучи бўлгандан йигит буларга парво қилмасди, лекин ҳозир вужуди анча заифлашган, чарчоқ ўз кучини кўрсата бошлаган эди. Зиёратчининг рухи тушиб кетди. “Чўққига етиб бормай, ўлсам керак”, – беихтиёр ўйлади у ҳолдан тойиб, каттакон тош тагига йиқилган пайти. – Нега келдим ўзи? Қабилада қанча қизлар бор эди-ку, тушимда кўрган, бор-йўқлиги номаълум бир қизни деб ўзимни ўтга уришим шартмиди? Балки у чўпчаклардаги паридир, одамни эсдан оғдиригувчи жодугардир. Ким билади?”

Кеч кира бошлади. Қорайиб турган чўққи Истаминнинг кўзига балодай кўриниб кетди. Унга қарамасликка ҳаракат қилиб, кичик бир горга кирди. Устидаги йўлбарс терисига ўраларкан, тиши тишига тегмай такиллади. Хуржунига солиб олган чўп-хасак билан олов ёқмоқчи эди, эплолмади. Совуқдан қотиб қолган қўллари унга бўйсунмади. “Тамом, ўламан шу ерда, – ўйлади Истамин. – Алвидо эй ота-она, оғайнин-қариндошлар, мендан рози бўлинглар! Хайр, гўзалим Равшаной!”

Шу пайт ғор оғзидан қандайдир бир ҳайвон ўтиб кетди. Истамин беихтиёр ташқарига мўралади. Катта бир бўри чўққи томон ўрлаб бораради. Йигит бўрининг важоҳатига қараб, ҳайрат ва завқдан қотиб қолди. Тўлин ой ёғдусида унинг чўнг калласи, катта қулоқлари, улкан гавдаси, ҳатто кўм-кўк ёли ҳам аниқ кўринарди. Бўри чўққига жойлашиб ўтириб олди-да, тўлин ойга қараб чўзиб-чўзиб увлади. Туркийларнинг афсонавий онаси бўлган бу жонивор, элатнинг охирги авлодини саклаб қолиб, бир эл бўлишига кўмаклашган бу қутлуғ яратик, Истамин хоқоннинг ҳарбу зарбига, Бумин баҳодирнинг қўшинига кувват берган бу қутлуғ мавжудот кишининг ҳаваси келадиган даражада чиройли эди. Унинг киши этини жунжиктирувчи ваҳшати одам кўнглида даҳшат билан бир-

га завқ ҳам уйғотар, ажабки, қараган киши күзини узолмасди. Ҳарқалай Истамин шундай бўлди. Балки унинг қулоғидаги афсоналар, кўнглидаги эътиқод бунга сабаб бўлгандир. Ҳарқалай, йигит танининг совуқ қотганини ҳам, олов ёқолмаганини-ю, “ўлсам керак” деган тахмини ҳам, “бу ерга нега келдим” деган афсусини ҳам унутиб, бу ажиб манзарадан кўз узолмай қолди.

Кўк Бўри эса ҳамон ойга қараб чўзиб-чўзиб увларди. Нима деб нола қиласяпти экан у Кўк Тангрига? Қайси ҳолидан арз қиласяпти экан? Ё Истаминга ўхшаб ёрини сўроқламоқдами?.. Балки арз эмас, шукроналик бордир бу нолада? “Кўк Тангри, мени аянч мавжудот эмас, чиройли ва кучли бўри қилиб яратганинг учун ўзингга қуллуқ! Мени одамларнинг-да корига ярайдиган, улуғ ва кутлуғ халқнинг онаси этганинг учун Ўзингга шукр! Омон қолиши учун мени восита қилганинг улусни энди ўзинг асрагайсан!”

Бўри увлаб-увлаб секингина пастга тушиб кетди. Сеҳрланиб қолган Истамин анчагача ўзига келомай ўтирди. Фор ичига ой нури тушди. Йигит, ниҳоят, қони жўшиб, танасига иссиқлик юргурганини сезди. Кутлуғ бу ҳолат унга яхшиликдан, яхшилик бўлганда ҳам улуғ эзгуликдан, ёруғ бир баҳтдан дарак берарди. Истамин фор ичидан бир чақмоқ тош топди. Ўтинларни тўплаб ўт ёқди. Тонг отишини бесабр кутаркан, тез-тез чўққига қарап, уфқ ёришса бўлгани, уни шаксиз ишғол этажагига ишонарди. Кўнглида шу ишонч билан кўзи илинди.

Истамин уйғонганида тонг бўзариб келаётганди. Ёқкан ўти ўчган эди. Лекин у энди совқотмаётганди, ҳаво етишмаслиги ҳам қийнамасди. Табиат билан ҳамнафаслик улғайган ўғлоннинг вужуди ердан қувват олиб, обҳавога мослашиб улгурганди.

Тушга қолмай Истамин Тангритоғнинг энг баланд чўққисига чиқди. Тоғнинг мағрур шамоли унинг соchlарини ўйнаб ҳилпиратар, адл қадди-ю, ўқтам вужудига ором бераркан, ғалаба шавқидан маст ва масрур йигит тўрт томонга қаради. Шунда... шунда воажаб, қуида, тоғнинг нариги томонида Истамин жайронни қувиб юрган пайти кўзига кўринган ўша шаҳар, ўша манзара қўр тўкиб турарди. Истамин кўзларини қайта-қайта юмиб-очди. Манзара сароб эмас эди, йўқолмади. Аксинча, шаҳарнинг катта-катта саройлари, баланд минорлари, тому деворлари қуёш ёғдусида нурланиб кўринди. Истамин мақсадга етганини англади. Бу ёғдуларга чўмган юрт – Уструшона эди. Тўғри, Уструшонага бормаслик ҳақида хоқонлик билан аҳдлашув бор. Лекин ошиқ қалби чегараю деворларни, аҳдлашуву битимларни тан олармиди? Унга тоғнинг икки томони эмас, икки-ю, уч дунё бир қадам-ку, ахир.

Ха, Бургут баходир айтганидек Кўк Тангри унинг ниятини берган эди. “Ўзингга қуллуқ, Тангрим!” – кўнглидан шукроналик ўтди йигитнинг. Кейин у чуқур нафас олди ва бор овози билан наъра тортиб, ҳайқирди:

– Равшан-ой-уввввв!

Айни шу пайтда ўша нурафшон шаҳарда яшаётган, қалбига чироқ ёқса ёришмаётган бир қиз – Равшанак “ялт” этиб қаради. Атрофда ҳамма ўз иши билан андармон, садо эса унинг қалбиданми ёки олис-олисданми, келарди. Унинг мовий кўзлари оташхонадаги мангу оловдай аланга сочди. Лаблари бетоқат пичирлади:

– Истамин. Истамин! Хайрият...

*Ойдин НИСО*

*1980 йилда түзилган. Тошкент давлат университетининг (хозирги ЎзМУ) журналистика факультетини битирган. Унинг “Менсизлик”, “Номсиз”, “Қайтиши”, “Ховур” шеърий тўпламлари ва “Ҳаёт дараҳти” қиссаси чоп этилган.*



## **Ўзимничи эди менинг мазмуним**

\* \* \*

Юриб кетмоқдаман  
такдир оралаб,  
Кечиб ўтмоқдаман  
хоҳ сув, хоҳ гирдоб.

Ҳали олдиндадир  
хамма-хаммаси,  
Ҳали бу –  
ҳаётнинг қораламаси.

Гар тўлиб қолмаса  
умр дафтарим,  
Сиёҳи битмаса  
агар дил қаърин.

Чиқиб кетмасам гар  
мен ўз ёдимдан,  
Битта софлик қолса  
шу ҳаётимдан.





Ўшанда умримга  
бергайман сайқал,  
Қолмагай бирор гард  
ё тугун, чигал.

Қирчин ёзукларни  
бўяб шошмасдан,  
Росмана ҳаётни  
кечиргим бошдан.

Ҳали олдиндадир  
ҳамма-ҳаммаси,  
Ҳали бу –  
ҳаётнинг қораламаси...

\* \* \*

Кўғирчоқла асрдошмиз бизлар,  
У жим туриб тушунар мени.  
У жим туриб ақлли сўзлар –  
У сўзлар истасам мен нени.

Мақтов бўлиб эштилади  
Унга менинг кўнгил ёришим.  
Гар койисам, баҳти кулади,  
Ҳазин куйдай тинглар нолишим.

Мен ҳам унга ғамхўр дугона,  
Белгилаб бераман кимлигин.  
Нигоҳини тўғрилаб, яна  
Тартибга соламан жимлигин.

\* \* \*

Осмонимга бостириб кирди қиш.  
Мен – исёнчи дарвеш.

Қишини ҳайдамадим  
печга ўт ёқиб,  
Иссиқ жойда асрамадим  
жонимни.  
Курашдим  
совуқ сув ичига ётиб,  
Тишим тақиллатиб  
кўрқитдим уни.

Олтин ютган каби  
ичимга ютдим,  
Энг қуёшли,  
қайноқ туйғуларимни.  
Таним талон-тарож  
қилмасин дедим,  
Кўз остимга кўмдим  
уйқуларимни.

Қишига қарши чиқдим  
чархлаб ўзимни,  
Қиши кутурди,  
урён жисмим чимчилаб.  
Хузурландим,  
дўқ қилиб унга кўзимни,  
Қишини енгдим охир  
мен унга чидаб.

\* \* \*

Ҳайрон боқма, азизим,  
Қолдирма мени ҳайрон.  
Ҳажрингда ёнган ўзим,  
Ўзимман ёниқ хижрон.

Ҳар айтганим гуноҳдир,  
Гуноҳдир айтмаганим.  
Қара, кўзларим “ох”дир,  
Кўзимда оҳим маним.

Сени куйлаб бўлмайдир,  
Куйлар сени сийратинг.  
Қароғим сенда дайдир,  
Қароғингда сувратим.

Ёмон ўйдан холиман,  
Ёмон ўй мендан холи.  
Мен маъноли сўзлолмам,  
Сен тушингин маъноли.

\* \* \*

Мен – сабргул.  
очилмай турдим,  
Тунлар қўриқлади  
фалак лашкари.





Кунлар кулиб боқса,  
қүёшни урдим,  
Йўқлаб келар мени  
қисматим ҳали.

Ёруғ қисматларни  
туш кўрди ҳар кун,  
Ёнгоқнинг тагида  
ухлаган кўнглим.  
Ғунчадай бойланди  
бағримда тугун,  
Мен – сабргул  
кутдим ва кўндим.

Алдаб ташлаб кетди  
неча фасллар,  
Тулпор шамол:  
“Қувиб ет!” деб қистади.  
Шу мангу заминда  
йиллаб, асрлаб,  
Кутдим, етиб келди  
охир қисматим.

Мен – сабргул.  
очилмай сўлдим...

\* \* \*

Юрагимга  
чўкиб кетди ғам,  
Чўкди қароримга  
қаро тун.  
Мен шундай  
даҳшатли денгизман,  
Ютоқаман,  
ютаман беун.

Кетинг, ҳой, ғаввослар,  
қутқазинг,  
Кутқазинг  
мендан ўзингизни.  
Севиб қолсам,  
қандай асрагум,  
Қандай кузатгум  
мен сизни?

\* \* \*

Сен бор эдинг...

Фош этарди мени  
бешафқат баҳор,  
Мушку анбарларин  
сепиб куларди.  
Дилдан тошар эди  
дилгир қўшиклар,  
Хаёлимни  
хаёлимга ўрадим.

Сен бор эдинг...

Бахт ила бахтсизлик  
чегарасида,  
Ўт қилиб қаларди  
мени қаҳратон.  
Унсиз фарёдлару  
юрак сасидан  
Безиб  
кўзларини очарди осмон.

Сен бор эдинг...

Эритиб ўйнарди  
хисларни қуёш,  
Алар уммонида  
окарди куним.  
Сен бор эдинг,  
мени эшитарди фош,  
Ўзимники эди  
менинг мазмуним.

Сен бор эдинг...

Ҳа, ҳамон  
тескари айланмай яшар,  
Бунда ғала-ғовур  
хеч кимсиз кутб.  
Фақат шафқатлидир  
энди фасллар,  
Менга шафқат қиласар  
мени унутиб.

Сен бор эдинг...





## Шойим ШЕРНАЗАР

1958 йилда туғилған. Унинг “Тун эртаги”, “Соғинч даласи”, “Сунбула” “Күнгил йўл”, “Истара”, “Чанқовуз” каби шеърий ҳамда “Эркак тут қиссаси” ва “Данак магзи” насрый тўпламлари чоп этилган.



## Руҳимни ҳулволар мусафро этар

\* \* \*

Сени асраб яшайди хаёл,  
Ҳисларимни яширад юрак.  
Айтолмасман буни, эҳтимол,  
Айтиш учун буюк куч керак.

Тушларим ҳам хануз безовта,  
Етмайдиган орзуни қувлар.  
Висолингни дил кута-кута  
Хувв панада бўридек увлар.

Истифога чиқар умидим,  
Кутавериб чарчоқдан толди.  
Йўлларингда тош бўлди кўзим,  
Ичимдаги ичимда қолди...

\* \* \*

Тун...  
Ой ёлғиз...  
Мен ҳам ёлғизман,  
Туйғуларим интилар нурга.  
Кўкда қотиб қолган бир бўзман.  
Кўнглим ташна бир кўнгли ҳурга.

Хаёл чексиз...  
Коинот чексиз,  
Нигоҳимга сифмайди хилқат.  
Ҳали қанча айтилмаган сўз,  
Сомон йўли менга йўл кўрсат.

Шивирлайди ёнимда япроқ –  
 Шамолларнинг содиқ тилмочи.  
 Юлдузчалар кўкда минг қуроқ,  
 Сойда ёйиқ оймомо сочи...

\* \* \*

Баҳорнинг нафаси куртакка рағбат,  
 Уюшган томирда югурди қон.  
 Қалдирғоч айвонда ўзингни кўрсат,  
 Жаннатга айланар ўша хонадон.



Варраклар ипида бола хаёли,  
 Турна қанотида орзулар бисёр.  
 Майсани уйғотар хутнинг шамоли,  
 Мени эсладингми, эсладингми ёр?

Тарновлар қўшиғи бошланиб кетар,  
 Деразага чорлов битади ёмғир.  
 Руҳимни ҳулволар мусаффо этар,  
 Очилар бойчечак лабидаги сир.

Туйғулар бокира шудрингга қориқ,  
 Армоним гулини очдингми баҳор?  
 Ҳаммадан, ҳаммадан кўриб сен ортиқ,  
 Мени эсладингми, эсладингми ёр?

Ҳали изгириинлар чекингани йўқ,  
 Шамоллар чимчилаб ўтар вужудим.  
 Ҳислар эшигини чертади буюқ,  
 Кўриб ҳам мен ҳали нимани кўрдим?

Бодом мўғжасидек безовта руҳим,  
 Тафт бериб илитар яна кимим бор?  
 Ўзинг билан бирга қолганда ўзинг,  
 Мени эсладингми, эсладингми ёр?

Тунларнинг адоги тонгга уланди,  
 Қирларда қизғалдоқ кўтарди қадаҳ.  
 Кўнглим тиласа ҳам, нима тиланди,  
 Қандай туйғу экан жондан азизроқ?

Кушлар айтәётир бир-бирига роз,  
 Гулларнинг-гулларга айтар дарди бор.  
 Сендан сўровим бор боз устига боз,  
 Мени эсладингми, эсладингми ёр?..



\* \* \*

Турналарнинг кетиши тилсим,  
Йўл олади тоғлар ортига.  
Тараддудда қалдиргочлар жим,  
Кетаяпти...  
Қаерга?!.  
Нега?!.

Кутиради аёзли бўрон,  
Муз қаҳрини сочиб алаҳлар.  
Кириб келар ёвуз қаҳратон,  
Мағрур кутиб олар дараҳтлар.

\* \* \*

Эски қишлоқ,  
Ёшлик ўтган кез:  
Бирам сўлим, бирам беғубор.  
Хотиралар ташлаб ўтар из,  
У кунларда йўқ эди ғубор.

Чинни осмон,  
Пистоқи дала,  
Орзулардан ясалган варрак.  
Эргаштириб бир гала бола,  
Аттор лўли чалади ҳуштак.

Сўқмоқларни қучган майсалар,  
Олиб борар ҳувв ёшлик томон.  
Ариқ лаби,  
Кумуш жийдалар  
Кутиб олар эски қадрдон.

Чархпалакнинг пақирчасидан  
Обиҳаёт қуйилар гулга.  
Болаликнинг хур кўчасидан  
Хушбўй насим таралар дилга.

Йиллар карвон...  
Бобо ҳам бўлдим,  
Неварага эртак сўзлайман.  
Унинг чақнаб турган кўзидан  
Ўтган ёшлигимни излайман...

\* \* \*

Бу ҳовлида чиқиб улгурған  
Қалдирғочнинг валғажр тили.  
Юлдузлар-ла сұхбат қуришган  
Хилол билан бирга шомгули.

Нозбүйлари анқиган ҳовли,  
Момом рухи кезади бунда.  
Нур әмади толорда тойфи,  
Бобом тафти бордир зангида.

Бу ҳовлида қариган балхтут  
Боболарим бобосин билар.  
Эски дарвозани қоқиб ҳут  
Бу ҳовлиға нур олиб келар...

\* \* \*

Куз.  
Күз ўнгимда тўкилиб борар  
Боғимдаги ғарқ пишган олма.  
Майса рангин суғириб олар  
Мезонларга қанча ёлворма.

Куз.  
Бари сирли, яна аламли,  
Жонланади келганда кўклам.  
Улар билан қайтиб келарми,  
Бахорларга айланиб отам?..

\* \* \*

Юрагимда уйғонди баҳор,  
Хулво қитиқлади дилимни.  
Қўшиғини айтганда анҳор,  
Овунтирдим ўзим-ўзимни...

Қатор қушлар карвонларида  
Учиб кетган эди хисларим.  
Қўнглимнинг туб арконларида  
Ўша қўшни қизни эсладим.

Дарвозасин мис занжирлари  
Армонимнинг зангларин олган.  
Залдорининг оқ гулларида  
Мұхаббатим ранглари қолган.

Хар гал буни эслатар баҳор,  
Хотиралар бунда гуллайди.  
Қўшни қизи ёзиб дил изҳор,  
Турналардан мактуб йўллайди.



***Икром НАРЗУЛЛО***

1974 йилда туғилган. Самарқад давлат университетида таҳсил олган. Шеърлари марказий матбуотда нашр қилингандык. “Вақт изи” шеърий түплами муаллифи.



## **Соғинчга айланган кўзларим**

**Ҳаёт**

Эх, йўлларинг бунча сирпанчик,  
Кўринмайди музларинг кўзга.  
Ҳаёт, шундай қилиқларинг бор,  
Улар ҳатто сиғмайди сўзга.

Тақдир билан бир бўлиб гоҳо,  
Чексиз ситам бошлаб қоласан.  
Шарт юзингга айтсан қусуринг,  
Балки кўзинг ёшлиб қоласан.

Таъна қилгим келмайди сенга,  
Сен ҳам мени қилма маломат.  
Майли, тұхфанг ҳижрондир менга,  
Сен йиғлама, йиғлама фақат.

Ҳаёт, шундай қилиқларинг бор,  
Улар ҳатто сиғмайди сўзга.

**Айтингчи?**

Айтингчи, хувуллаб қолдими,  
Юрагингиз,  
Ёлғизланиб қолгандай  
Ёлғиз юрагим?

Айтингчи,  
 Соғинчдан ёшга тўлдими  
 Кўзларингиз,  
 Соғинчдан ёшлана-ёшлана  
 Соғинчга айланган кўзларимдек?  
 Айтингчи, сизни ҳам  
 Ҳижрон азобладими  
 Эртаю кеч,  
 Мени ҳижрон қилганидек  
 Чексиз азобларга дуч?  
 Айтингчи, кўзларингиз  
 Йўл қарадими,  
 Кўзларим туну кун  
 Йўлингизга термилганидек?  
 Айтингчи, йўлга отландингизми  
 Бир бор  
 Мени кўрмоқ учун,  
 Мен сизни кўрмоқ бўлиб,  
 Юз бор йўлга тушганимдек?  
 Ва, сўнгги бор айтингчи,  
 Тасаввур қилдингиз қандай,  
 Менсиз ҳаётни?  
 Менинг тасаввуримга сифмаган  
 Севгисиз ҳаётни  
 Тасаввур қилдингиз қандай?  
 Айтингчи?



## **Юрак даричаси**

Кўринмасу аммо  
 Қибла томонда  
 Юрагимнинг  
 Бор даричаси.  
 У заррадек,  
 Лек, шу макондан  
 Тинмайин  
 Қайнаб оқар  
 Мухаббат – дунёнинг  
 Мангу чашмаси.



## Армон нима билмасди кўнгил

Майин ели эсар баҳорни,  
Оппоқ ойдин бу гўзал тунда.  
Болаликнинг ширин дамларин,  
Хотирлайман ўлтириб бунда.

Орзу қуши учиб юрарди,  
Она қишлоқ кўчаларида.  
Бахт юлдузи чакнаб турарди,  
Зулмат янглиғ кечаларида.

Армон нима билмасди кўнгил,  
Йироқ эди ишқ балосидан.  
Шўх кўзчалар терарди нукул,  
Кувонч бўгин гуллоласидан.

Э, воҳ, ўша қувончларимни,  
Олиб кетди йиллар бешафқат.  
Бул кун эса қучиб ғамларни,  
У кунларни эслайман фақат.

Армон нима билмасди кўнгил,  
Йироқ эди ишқ балосидан.

## Хайр

Сиз айтдингиз охиста:  
Хайр!  
Мен ишора қилдим,  
Эътиroz қилмай.  
Буни қарангки,  
Қўшиқлардаги каби  
Айрилдик ўлмай.  
Сўнгра кетдик  
Икки тарафга,  
Кетган каби  
Қайтмас сафарга.  
Армон сенинг  
Қариндошларинг  
Ошди яна  
Икки нафарга.

## **Сабр дарахти**

Кўнгил сахро эмас,  
 Экавер кўркмай  
 Сабр дарахтин.  
 Ажабмас, шунда сен  
 Топсанг, дўстгинам,  
 Ҳануз бу одамзот  
 Топмаган баҳти.  
 Кўнгил сахро эмас,  
 Экавер кўркмай  
 Ҳаё гулини.  
 Бу сўлмас бир гул  
 Нур сочиб, албат,  
 Безагувсидир  
 Сўнгги йўлингни.  
 Кўнгил сахро эмас,  
 Яшайвер кўркмай.



## **Сафар**

Эрта тонг.  
 Мен яна отландим сафарга.  
 Ўғлимни уйғотдим,  
 Қизимни уйғотдим.  
 Улар мени йўлга кузатди,  
 Сўзлари ёқимли жарангдор:  
 “Яхши бориб-келинг дадажон!”  
 Сафарга чиқиш ҳам бир синов.  
 Майли, бу ўз йўлига  
 Айтмоқчи бўлганим:  
 Ишонинг дўстлар  
 Боланинг сўзида  
 Илоҳий бир оҳанг бор.  
 У шундай оҳангки,  
 Мехринг жўш урганда сезасан.  
 Ватандан олис юртларга  
 Узоқ вақт кетсанг ҳамки,  
 Жарангти қулогингда,  
 Ўзга юртмас,  
 Юрагингни кезасан.



Маиҳура ШЕРАЛИЕВА

1976 йилда туғилган. Андижон давлат университетининг ўзбек филологияси факультетини тамомлаган. Республика матбуотида адабиётшуносликка оид қатор мақолалари, шунингдек, “Адабиётшунослик лугати” (ҳаммуалифликда), “Бобурнинг андешаси” номли мақолалар тўплами чоп этилган.

## ИЗТИРОБСИЗ ОДАМ ОБРАЗИ

Адабий танқидчилиқда Мурод Мухаммад Дўстнинг “Галатепага қайтиш” қиссасидаги Самад образига у қадар эътибор берилмаган. Инара ва Мазлума воқеалари Самаднинг кимлигини кўрсатади. У ўз ҳузури учун ўзганинг инсонлик шаънини топтаб ўтишдан ҳам қайтмайдиган худбин одам. Бироқ, бизнинг назаримизда, шунинг ўзигина Самаднинг ижтимоий-психологик тип сифатидаги мохиятини очиб бериш учун камлик қиласи. Бадиий асарда воқеа-ходиса, характер ва деталларнинг юзадаги мазмунидан ташқари яна-да чуқурроқ маънолари ҳам бўлади. Шунга кўра, Самад образининг ижтимоий-психологик қиёфаси бир қарашда кўринганидан кўра мураккаброқ. Мазкур образ бутун асар контекстида талқин қилиниши керак. Агар Мазлума воқеасини қисм деб олсан, қисмнинг маъноси унинг бошқа қисмлар билан алоқаси орқали тўлароқ очилади, қисм ўзи ҳам бошқа қисмларнинг мазмунини очишга, тўлдиришга хизмат қиласи. Самад образи ҳақидаги мулоҳазаларимизда биз ана шу нуқтаи назарга таянамиз.

Самад, бош қаҳрамон Ғайбаров билан талабаликдан дўст-қадрдон: “шахар бир, давра бир, хуллас, орадан қил ўтмас қалин ошна эдилар”. Уларнинг даврасида яна Шоир, Абдували-Соқол ва кейинроқ келиб қўшилган, улардан беш-ён ёш кичикроқ альпинист йигит Қобил ҳам бор. Қобил тоғда қор остида қолиб кетиб кўзлари кўрмай қолган. У уйда ўтириб зерикади, хотинига юқ бўлгани учун қийналади, кўпинча археологларга қўшилиб, ўзи билмайдиган

ниманидир қидириб юрган Файбаровнинг олдига шунчаки гаплашгани келиб туради. Аксарият уни Самад машинасида олиб келиб қўяди, кейин қайтариб уйига ташлаб ҳам келади. Ниҳоят, шундай ўтиришларнинг бирида, Файбаров олтин маъбудани топган қуни бу муваффақиятни “ювиш” мақсадида Қобил Париждан келтирилган конъякни олиб келишини сўраб Файбаровга уйининг қалитини беради. Файбаров эса у ерда Қобилнинг хотини Мазлума билан Самадни ноқулай вазиятда учратади...

Ушбу саҳнадаги Самаднинг қиёфаси у ўз қилмиши учун афсусланмайди, қайтага Файбаровга “Менга ҳасад қиласан” дейди. Файбаров унга ҳасад қилмаслигини ҳис қилгач, барибир яна уни ерга уришни, камситишни истайди – Инарани эслатади. Инара воқеаси – Файбаровнинг эски яраси эди. Бу воқеа унинг учун фақат севган қизининг эмас, энг яқин дўсти – Самаднинг ҳам хиёнати эканини мана энди Самаднинг ўз оғзидан эшитиб ўтирибди.

Самад – ўз қилмиши учун маънавий масъулият, жавобгарлик ҳис қилмайдиган одам. У ўз хатти-ҳаракатлари учун ўзини айборд ҳис қилмайди. Бу воқеалардан аввалроқ, қиссанинг “6. Самад” деб номланган бобида Самад хотини Маъсумага Файбаров ҳақида шундай дейди: “Эски ярасини янгилаб қўйдим, мениям жин урган, Инарани гапириб нима қилардим... Айб ўзида, оғзидаги ошини олдириб юради”<sup>1</sup>. Инара воқеасига Самаднинг қараси: “*Айб ўзида, оғзидаги ошини олдириб юради*”. Ҳам дўсти, ҳам севган қизининг хиёнати туфайли Файбаров ҳис қиладиган изтиробнинг унга қизифи йўқ. Файбаровнинг ўзи айборд. Дўстининг хиёнатидан ҳозирча Файбаровнинг бехабарлиги ҳисобмас, воқеанинг аслини Самад яхши билади-ку, қилмиши учун маънавий жавобгарликни ҳис этишга шунинг ўзи етарли. Аммо, Самадда виждан азоби сезилмайди. Бошқа бир дўсти, кўзи ожиз Қобилнинг хотини Мазлумага ўйнаш эканини ҳам Самад худди юқоридаги каби талқин қилса эҳтимол, яъни: “Қобилнинг кўр бўлиб қолгани учун мен айборд эмасман-ку” тарзида.

Шу ўринда, Файбаровнинг малака оширишга келган ўқитувчиларга маъруzasини эслашга тўғри келади. Халқнинг жин ва ажиналарга оид тасаввурлари ҳақида сўзлай туриб Файбаров шундай дейди: “Дейлик, ўша қадимий араблар хотинларининг оғушидан қочиб чиққан жазманларни жинлар эди, деб эълон қилган бўлишлари ҳам мумкин... Дейлик, ўша бадавий эр, минг хиёнаткор бўлса-да, хотинини яхши кўради. Бир тарафдан яхши кўради, кейин турли миш-мишлар тарқалишидан қўрқади. Балки шунда бечора эр осон йўлни тутиб, айбни хотин билан жазманнинг бўйнидан олсаю қандайдир жиннинг устига ағдарса...”<sup>2</sup>.

Самаднинг онгода ҳам шунга ўхшаш психологик ҳимоя механизми шаклланган. Самад шунчалик тубан кетгани билан барибир ўзини яхши кўради, пасткашилиги учун ўзини айблашни истамайди, бошқа бирорни айблаб қўя қолади. У ўз айбини бошқаларга ағдаришнинг ҳадисини олган, яъни гуноҳни Самад қиладию айборд бошқа одам бўлиб чиқади. У, бир томондан, қилаётган

<sup>1</sup> Мухаммад Дўст М. Галатепага қайтиш. – Т., F.Уулом номидаги Адабиёт ва санъат нашриёти, 1983, Б. 122.

<sup>2</sup> Мухаммад Дўст М. Галатепага қайтиш. – Т., F.Уулом номидаги Адабиёт ва санъат нашриёти, 1983, Б. 160.

ишини маънавий-ахлоқий жиҳатдан оқлаб бўлмаслигини яхши англайди, иккинчи томондан, ўзини оқлаш учун сабаб топиб, бунга ўзини ишонтиришнинг уддасидан чиқади, психологик мувозанатини тиклаб олади.

Яхши, у ичдан мувозанатини шу тарзда тиклаб олишга эришди, дейлик. Бироқ бошқаларни бунга қандай ишонтиради? Айбини ҳеч ким билмайди, “тубоҳ йўқ, демак, ўғриям йўқ” қабилида хотиржам бўладими? Бошқалар билганидан кейин-чи? Самад, масалан, Мазлума воқеасидан кейин ҳам Файбаровнинг олдида хижолат тортгани, ўзини айбдор ҳис қилгани йўқ. Бу ерда Самаднинг нафақат психологик, балки ижтимоий қиёфаси ҳам очилади. Файбаровни менсимайди, шунинг учун ундан уялмайди.

Қиссада Самад талабалик пайтларида Файбаровнинг соатини олиб қайтариб бермаган қўшни хонадаги йигитлар ҳақида гап очади. Бир қарашда арзимаган воқеа. Самад бу воқеанинг бир жиҳатига – Файбаровнинг ўзи соатини қайтиб сўрай олмаганига эътибор қиласди. Файбаров эса нима учун ўзлари қайтиб бермаганларига ҳайрон бўлади: “Сўраш шартми, улар шусиз ҳам менинг соатим эканини билишарди-ку? Сабаби бошқа ёқда, Самад. Улар мени менсишмасди, дўстим. Тушунасанми, мендан мутлақо уялишмасди, мен нимаю манави жонсиз девор нима – уларга барибир эди. Лекин менинг девордан фарқим бордай, буни биламан...”<sup>3</sup>.

Мана шу ерда ҳар икки қаҳрамоннинг ижтимоий-маънавий қиёфасидаги жиддий фарқ кўзга ташланади. Самаднинг нуқтаи назари, умуман тўғри. Бироқ ҳаётда инсон ўз ҳакини бировга бериб қўймаслиги керак, деган тўхтам бировнинг ҳақига хиёнат қилмаслик керак, деган қоидага зид келмаслиги лозим. Самад биринчисига амал қиласди иккинчиси ҳақида бош қотириб ўтирумайди. Файбаров эса, аксинча, аввало ўзи бировнинг ҳақига хиёнат қилмаслик ҳақида ўйлади, ўз навбатида бошқалардан ҳам шуни кутади (масалан, бозордаги узумфурууш билан бўлган воқеа).

Самад ўзининг инсоний ҳақ-хуқуқларини яхши билади, уларни кимдир камситишига йўл қўймаслик ҳаётдаги асосий принципига айланган, аммо бошқаларнинг ҳақ-хуқуқини камситмаслик масаласига келганда сурбетлик қиласди, гўё ўша бошқаларнинг ўзи буни талаб қилиб олишлари, бунинг уддасидан чиқолмасалар, тақдирга тан беришлари керақдай. Инара ва Мазлума воқеаларида ўзини айбли ҳис қилмаётган Самаднинг ҳаётий фикри “бу ҳаётда факат кучлиларгина яшаб қолади, факат уларгина яшашга ҳақли”, деган қарашга келиб қолган, “одам одамга бўри” бўлган XX аср биринчи ярми Farb жамиятидаги инсоннинг ижтимоий қарашларини эслатмайдими? Бу ҳолатни файласуф ва социологлар жамият кишилари онгидга энг олий қадриятларнинг қадрсизланиши “ҳамма нарса мумкин” деган қарашга олиб келгани билан изоҳлайдилар.

Самаддаги ҳолат ижтимоий-маънавий мувозанатнинг бузилиши, шахс инқирозидан иборат. У одамлар орасидаги маънавий-ахлоқий қадриятларга амал қилиш бурчини ўз зиммасидан сокит қиляпти. Самаднинг ҳаётий позицияси бизни бундай нуқтаи назарнинг ижтимоий-психологик омиллари ҳақида ўйлаб кўришга ундейди. Қиссадан бунга етарлича жавоб топа оламиз.

<sup>3</sup> Мухаммад Дўст М. Галатепага қайтиш. – Т., F. Ғулом номидаги Адабиёт ва санъат нашриёти, 1983, Б. 117.

Шунга кўра бутун асар контекстидан қаралса, Файбаровнинг Самад ҳақидаги оддий хабари ҳам, у билан боғлик хотиралари ҳам – барчаси Файбаровни Самадга қиёслашга олиб келади. Шунингдек, ҳар иккисини қиёслашда Самад қатнашмайдиган, лекин Файбаровнинг ижтимоий-маънавий позицияси яққол кўринган эпизодлар ҳам муҳим роль ўйнайди. Шундай эпизодлардан бири Файбаров Самаднинг ўрнига маъруза ўқиган мажлис саҳнаси.

Ушбу эпизоднинг мазмун-моҳияти кишилардаги эътиқоднинг айрим жиҳатларини миф ва афсоналар мисолида таҳлил қилишдан иборат. Бу масалага ёндашувда Файбаров ва унинг устози Ҳайкал Фаниевич ўртасида баҳс юзага келади. Файбаров бир пайтнинг ўзида маъруза ўқиши ва Ҳайкал Фаниевичнинг эътиrozларига жавоб беришига тўғри келади. Натижада, баҳс қадимги кишиларнинг тасаввурлари таҳлили бўлибгина қолмай, балки баҳслашувчи томонларнинг, қолаверса, тингловчиларнинг – шўро даври кишиларининг онгидаги “миф”ларга ҳам ишора қила бошлади. Шунинг учун ҳам ёзувчи Аҳмад Аъзам “Файбаров нутқ ирод қилган мажлис саҳнасида авторнинг материалга нисбатан тазиқи ортгани сезилади”<sup>4</sup>, деб ёзган эди. Назаримизда, муаллифни ҳаётда яқиндан билган Аҳмад Аъзам учун Файбаровнинг маърузаси ёзувчи бадиий ниятини “чайнаб бериш” бўлиб туюлган кўринади. Ёзувчини шахсан билмаган, замондошлари ҳақидаги ижтимоий-ахлоқий қарашларидан бехабар ҳар қандай китобхон ҳам ушбу маърузани қиссанинг бошқа қисмлари билан боғлаб тушуниши эҳтимолдан йирок. Масалан, танқидчи Санжар Содик Файбаров маърузасида қатор мантиқсизликлар кўради: “Умуман, исломшунослик бўйича фан кандидати бўлган олимнинг бу қадар музсал, қўпол, тартибсиз, узук-юлуқ лекция ўқиишига ишониш қийин. Иккинчидан, ўз илмий раҳбари, билимли кишилар олдида Файбаровнинг кимга ва нима тўгрисида лекция ўқиётганини билмаган одамдек иши тутиши, афсоналардан четга чиқмаслиги ғоятда файритабиий кўринади”<sup>5</sup>. Қизиги шундаки, Санжар Содикнинг эътиrozлари ушбу эпизоддаги Ҳайкал Фаниевичнинг Файбаровга берган танбеҳларини эслатади: “Маърузани ҳам ёлчитмадингиз. Фанда бунаقا юзакилик кетмайди, ука. Ўргатяпти, деб ўйламанг, лекин шоирлик қилмасдан, исломнинг моҳиятидан келиб чиқиб гапирсангиз бўларди”. Айни маърузада қўйилган муаммога ёндашувда Аҳмад Аъзамнинг муаллифга яқинлиги, Санжар Содикнинг эса Ҳайкал Фаниевич каби Файбаровга, тўғрироғи, муаллифга танбеҳ бериши бизни баҳслашувчи томонларнинг нуқтаи назаридаги фарқ икки авлод дунёкараши ўртасидаги фарқнинг натижаси эмасмикан, деган қарашга олиб боради.

Ҳайкал Фаниевич – “мактабнинг кўпини кўрган”, қатағонлар даврини ўз танасида синаган авлод вакили (“Соддароқ эканман, юбилей кечасида саллали шоирнинг суратини бир арбобнинг суратидан тепароққа илиб қўйибман...”). Шу сабабдан ҳам у Файбаровнинг маърузаси давомида муттасил хавотир билан ўтиради, айниқса, эски ракиби Сотволдиевнинг тинг-

<sup>4</sup> Аъзам А. Даврадан ташкаридан одам. // Китобдан: Масъул сўз. – Т., 1987. – Б. 114.

<sup>5</sup> Содик С. Ёшлар киссачилиги ҳақида ўйлар. // Шарқ юлдузи, 1983, – №2. – Б. 163.

ловчилар орасида ҳозир экани унга тинчлик бермайди: “Хозир Ғайбаров ўзидан мамнун, айтаётган гапини жиддийроқ идрок этмаяпти, мабодо завқи ҳаддан ошиб кетса, *расмийроқ бир сафсата билан уни маҳв этишилари ҳам мумкин*. ...яхиси, сопини ўзидан чиқариш керак, салгина норозилик, салгина таҳдид, яъники, қаттиққўл устоз эркатой шогирдига дашном берди, *уни гоявий хатолардан сақлаб қолди*”.

Ҳайкал Фаниевич ва Сотволдиев билан Ғайбаров ўртасидаги фарқ уларнинг “мактаб кўрган”иу Ғайбаровнинг ёшлиги, “мактаб кўрмаган”идангина иборат эмас. Ғайбаров Ҳайкал Фаниевич мансуб авлоднинг қандай шароитда яшагани, ишлаганини яхши тушунади, бироқ уларнинг ҳали-хануз қатағонлар даври кайфияти таъсирида яшашда давом этаётгани билан келишолмайди. Ҳар икки профессорнинг ўзаро муносабатларида диққат қилиш зарур бўлган жиҳат, Сотволдиев Ҳайкал Фаниевичнинг *гоявий душмани эмас, гоявий хато топиб, зарап етказиши мумкин бўлган рақиби*. Улар орасидаги асосий зиддият илмий нуқтаи назардаги фарқ туфайли эмас, балки манфаатлар ўртасидаги келишмовчиликдан иборат. Ана шу келишмовчиликда шўроча *гоявийлик* ҳар икки томон қўлида ҳам куролга айланиши мумкин. *Гоявийликнинг курбони бўлган Ҳайкал Фаниевич ҳам, ғоявийлик қурбонига айланиш эҳтимолидаги Сотволдиев ҳам айни ғоявийликдан фойдаланиб, унинг воситасида нималаргадир эришиб яшашга ўрганган*.

Ғайбаровнинг ҳар икки профессорга нисбатан кинояси улардаги ана шу номувофиқликни англаш натижасида юзага келган. У “үн беш йил мактаб” кўрганини айтган Ҳайкал Фаниевичга киноя қилмасдан туролмайди, “Баъзан бир қоп туршак ўғирлаб қўлга тушган кимса ҳам кўкрагига уриб, ўзини жабрдийда кўрсатади” дея кесатади. Ёки Ғайбаровнинг шахсига қизиқиб қолган, шогирдликка олиш эҳтимоли бўлган Сотволдиевга ҳам дарров ишона қолмайди. Яхши, бугун Ғайбаровдаги журъат, ўзига хос илмий нуқтаи назарни кўриб, унга нисбатан Сотволдиевда хайриҳоҳлик туғилди, бироқ у эртага “иккиёқлама онг” таъсирида Ғайбаровдан ўзига мослаб бошқа одами ясад олишга уринмаслигига ҳеч ким кафолат беролмайди “Сотволдиев домла ширин сўзга ўрганиб қолган, – дея изоҳ берди Ғайбаров. – Мени хафта ўтмай қувиб юборади”.

Нима учун “ғоявий хато қилиш” эҳтимоли бўлган Ғайбаров ўз маърузаси билан Ҳайкал Фаниевични ҳам, Сотволдиевни ҳам симпатиясига эришади?

“Ислом демонологияси” ҳақида лоф урадиган шўро идеологияси талқини Ғайбаровни қониқтирумайди, унинг учун ғоявийликдан кўра асл моҳият муҳимроқ. У, умуман, мифнинг моҳияти ҳақида ўз талқинини беради. Бу талқинда ўз “мен”и, шахсияти кўринади. Айни шу жиҳати билан иккала профессорнинг ҳам диққатини тортади. Ўз шахсиятини қадрлаган, ўзида алоҳида “мен”ни кўра олган одамгина ўзгода ҳам бошқа бир “мен”ни, шахсиятни кўра олади. Демак, ҳар икки профессор ҳам ўzlари яшаб турган давр шарт-шароитларига қарамасдан, шахсиятини бутунлай йўқотмаган.

Самадда айни хусусият етишмайди, ўзгода ўзига ўхшаш бошқа “мен”ни кўра олмайди, “ўзга” деган тушунча унда айбордorлик, жавобгарлик ҳиссини

үйготмаслиги учун атайин “ўзга”нинг қимматини пасайтиради. Менсимайдиган, писанд қилмайдиган мақомга туширади. Файбаровнинг атрофдагиларга муносабати, қандай мақомда эканидан қатъи назар, инсонда инсонни, ўзга “мен”ни кўра олишга асосланган. Унинг Ҳайкал Фаниевичга, телба Мурод амакига, кўзи ожиз Қобилга муносабатида ана шу нуқтаи назарни кўрамиз. “Инсонда инсонни кўриш” ачинишдан фарқланадиган муносабат. Ҳар қанча киноя қилгани билан Файбаров Ҳайкал Фаниевични бир инсон сифатида тушуна олади, айни пайтда Ҳайкал Фаниевич ҳам Файбаровда ўзга бир “мен”ни кўра олишини, шахсиятига дахл қилмаслигини истайди. Институт директори билан сұхбатда киноясиз гапиролмаслиги ҳам шундан. Киноя Файбаровга шахсиятини дахлсиз сақлаш учун ҳимоя механизми бўлиб хизмат қиласди.

Самад ўзи ишлайдиган институт, умуман, илм ахли орасидаги муносабатлар ҳакида гап очади. “Улар хушомадга ўчроқ. Ақлли ёшларнинг аксарияти ўжар ва худбин, улар иликроқ гап айтиб юбормаслик учун хўроздланишади, гоҳо одобни ҳам унутиб кўйишади. Шу сабабдан баъзи катталар ўз атрофларида гирдикапалак бўлиб юрадиган одобли, аммо бориб турган хашаки ёшларга ҳомийлик қиласидар, уларни қулоғидан тортиб бўлса ҳам, тепага қараб судрайдилар. Бир кун қарабсанки, юксакликка эришган одобли шогирдлар ҳалиги одобсиз, худбинроқ, лекин аслида ақлли ва талантли ёшларнинг шўрини қуритади. Ўзаро қурашларнинг янги босқичи юзага келади”.

Самаднинг гаплари, умуман олганда, тўғри. У шўро даври воқелигининг моҳиятини белгилаган, айрим зиёлиларнинг ижтимоий-маънавий инқирозига сабаб бўлган омилларни яхши тушунади. Шунингдек, Самаднинг ўзи яшаётган, ишлаётган ижтимоий муҳит ҳакида англаганлари ҳали унинг тўғри ижтимоий позицияда эканига далил бўлолмайди. Бу ерда Самаднинг айни воқеликка муносабати ҳам муҳим.

Самад “ўзаро қурашлар”даги ўз позициясини очиқ айтмайди, аммо Файбаровга “Сен ҳам вақти-вақти билан катталарга илиқ гап айтиб туришни унутма” дея маслаҳат бериши қандай позицияда эканини кўрсатади. Қолаверса, юқорида тавсифлаган ҳолатдан у қадар норози эмаслиги сезилиб туради. Самад “ўзаро қурашлар”нинг худди унга дахли йўқдай, вазиятдан ҳеч қандай зарар кўрмаслиги аниқ одамдай гапиради. Сұхбат давомидаги ўзидан мамнун кулгиси ҳам шундан. Маъсумага Файбаров “ҳалигача кимлар биландир олишиб юрган”ини айтиш билан ҳам ўз ҳаётий позицияси оқим бўйлаб сузишдан иборат эканини ошкор қилиб қўяди.

Шу ўринда савол туғилади: нима учун Файбаров маъруза ўқиган эпизодда Самад йўқ? Буни Самад келолмагани учун Файбаровни ўрнига чакиртиришди, деб изохлаш соддалик бўлади. Ёзувчи бу тафсилот орқали “бир ўқ билан иккита қуённи уради” – ҳам Файбаровни Ҳайкал Фаниевич билан тўқнаштиради, ҳам Самаднинг ушбу саҳнада қатнашмаслигини таъминлайди. Самад Файбаров ва Ҳайкал Фаниевич ўртасидаги тортишувда қатнашмаслиги, шуроча ғоявийликка муносабатда нуқтаи назари фарқли бўлган устоз ва шогирднинг баҳсида иштирок этмаслиги керак. Бу нарса, Самад ўз ҳаётий позицияси билан Ҳайкал Фаниевичга ҳам, Файбаровга ҳам

яқин эмаслигини, у бундай баҳслардан, умуман, ташқаридаги одам эканини таъкидлаш учун зарур. Натижада, Самад китобхон онгидаги авлодлар ўртасидаги, дунёқарашлар ўртасидаги тортишувлардан четда бошқа ишлар билан банд одам ҳолида қолади.

Шўро даврининг зулмини татиб кўрганига қарамай, Ҳайкал Ғаниевич ҳам, Сотовлдиев ҳам шўро идеологиясининг иллюзиясидан ҳоли эмас, Ҳайкал Ғаниевичдаги шўроча ғоявийлик васвасасининг бир чеккаси шунга бориб тақалади, яъни у ўз эътиқодида бир қадар самимий одам. Файбаровда эса устозлардаги иллюзияли ғоявийлик йўқ. У англашга, тушунишга уринади: қадим мифларга ишонган одамлар билан иши ва ўйи, тили ва дили бир бўлмаган замондош кишилар ўртасида фарқ қай даражада? Жавобдан кўнгли тўлмаган Файбаров ҳали ёлғонни билмайдиган тўрт яшар Саида, тили ва дили ўртасида фарқ йўқ Маҳанбой, Мурод амаки, Ибодилла маҳсум билан мулоқотдагина таскин топади.

Самадда устозлардаги иллюзия бўлмаганидек, Файбаровдаги эзгу умид ҳам йўқ. Унда катта авлоддаги “иккиёқлама онг”нинг янада юқорироқ дараҷаси кузатилади. Самад шўро даври *ижтимоий муҳитининг адолатсизлигини англагани* ҳолда, ундан норози эмас, изтироб ҳам чекаётгани йўқ. Шунингдек, Самадда *вазиятдан фойда чиқарии истаги* йўқ эмас, тўғрироғи, аллақачон фойда чиқаришга ўрганган, унинг “изтироб чекмаслиги” шундан далолат. Ундаги онгнинг иккиёқлама хусусияти қуйидагича: бир томондан, у шўро тузуми воқелигидаги ижтимоий адолатсизликни яхши англайди, иккинчи томондан, бундан фойда чиқаришга интилади. Агар Самадга хос фикрлаш тарзини назарда тутсак, у ижтимоий муҳитининг адолатсизлигига қўшадиган ўз хиссасини ҳам “ахир муҳитининг адолатсизлиги учун мен айбдор эмасман-ку” тарзида оқлаб олишига шубҳа йўқ. Муҳитнинг моҳиятини жуда яхши тушуниш унга ўз танлови учун маънавий масъулият, жавобгарликни зиммасидан соқит қилишга ёрдам беради.

Юқоридаги мулоҳазалардан келиб чиқиб айтиш мумкинки, муаллиф “Галатепага қайтиш” қиссасидаги Самад образи орқали шўро даврида маънавий инқирозга учраган айрим зиёлилар онгидаги “миф”ларнинг асл моҳиятини таҳлил қилди, шунингдек, улардаги ўз маънавий-ахлоқий танлови учун масъулият ҳис қилмасликнинг ижтимоий-психологик омиллари-ни очиб берди.



**БУЛОҚ КҮЗ ОЧДИ**

*Дилрабо МИНГБОЕВА*

1980 йилда түгелган. Тошкент давлат университетининг (ҳозирги ЎзМУ) журналистика факультетини битирган. “Ёмғиззор” шеърий китоби нашр этилган.



## **Исминг ишқми?**

\* \* \*

Эй, осмон, бепоёнсан, чорлайсан,  
 Бағрингдаги қушман, Ватансан.  
 Нега термиламан ерга мен нолон,  
 Заминга қўнмоқни истайман шу он?  
 Сени соғинаман ерда эй, само,  
 Сени соғинаман кўқда момо-ер.  
 Қўнимсизман.

Эй, дарё, азимсан, мурувватлисан,  
 Интиқларга ҳаёт меҳр берасан.  
 Нега юрагинг тубида яшаган  
 Қумни сувга ташна этасан?  
 Сени соғинаман қўксингда дарё,  
 Сени соғинаман, сахроман гўё.  
 Қақроқман.





Эй, тоғлар, виқорли, юксаксиз,  
Сабок олар бардош ҳам сиздан.  
Нега тошсиз – қаттиқ, ахир, нозик  
Лолаларнинг баргин эзасиз?  
Сени соғинаман бағрингда эй, тоғ,  
Сени соғинаман, қалбим тўла доғ.  
Сўлғинман.

Эй, хаёт, билмайсан вафо нелигин,  
Сени севаман, севаман! Ва, лекин,  
Нега қазосин сезган ташнақалдан  
Отилиб чиққан сўнгги ҳайқириқдек  
Ёлғизман?!

### Шамол ва аёл

Ёзда интиқ кутилган  
мехмондек келдию шамол  
деразадан ўғринча кириб,  
“кутаётир”, деб, килди хаёл.

Ғуссалари каби қоп-қора  
соchlарини йиғиб олдию  
тўшагига бепарво кириб,  
ҳатто қараб қўймади аёл.

Бошин олиб кетди шамол,  
сезмай ўтди буни аёл...

Умр бўйи кутди аёл,  
сезмай ўтди буни шамол...

\* \* \*

Тоғлар – қайик,  
олам тўла қўзёшdir,  
йиғламади,  
кўзларим борми менинг?  
Бир куш эди,  
кўнгил учди,  
сени ичдим –  
маъшуқ бўлдим,  
ҳажр ишқи  
менга тушди.



Севгим – осмон,  
бошим саждада ердир,  
сигмади,  
пешонам йўқми менинг?  
Ишим мени ишқ эди,  
сендан кечиб,  
сени ичдим –  
қўшиқ бўлдим,  
атрофимда  
тўртта томон  
ўйин тушди.



## Кутиш

Қадам товушларинигина эшитиб,  
яшаш мумкин бўлган манзилда  
сўзлашни унутдим!  
Кушлар овозида сени чорлаб,  
япроқлар қарсаги,  
сувлар созида куйлаётган мен!

Ёмғирларда эгиб қаддини  
сариқ соchlарини ёйганча  
сени кутаётган дараҳт мен!  
Борлигимни билармикинсан,  
юрагингга етасан қачон?  
Сен босиб ўтаётган тупроқ мен!

\* \* \*

Узун соғинч соchlарингми?  
У дунёю бу дунёда яшаш ишқми?  
Айрилиққа  
ёмғир этиб сочгил мени,  
не бўлиб унай?  
Кишларингта қўй экиб,  
гуллай, гуллай!

Карвон борар хижрон чўлларидан,  
карбон келар сомон йўлларидан...

Соғинч сенинг соchlарингми?  
Исминг ишқми? Исминг ишқми?  
Бу хайронлик умримни  
бармоғингда қоқиб юбор!



Бир Мажнунлик бўлмаса  
инсонликка қандай кўнай?

Карвон борар хижрон чўлларидан...

### **Каштадўз**

Қисматимни тикиб ҳаёт – матога,  
завқ олар маҳалда,  
қаварган қўлларимга  
қараб йиглайман.

\* \* \*

Ой кезиб юрибди менинг қасдимда,  
тундан қайга беркиниб бўлар:  
ё ёрилтош, ё сўзга?!

Юрагимдир бўм-бўш қадах:  
на муҳаббат ва на май,  
унга фақат шафқат қуйинг.

Қуёшнинг нур-iplари  
ямар дилнинг жандасини  
сўқар чокни –  
санчилар ой ёғдуси оғриқ бўлиб.

Ой кезиб юрибди менинг қасдимда.  
тундан қайга беркиниб бўлар:  
ё ёрилтош, ё сўзга?!

Дилрабо Мингбоева шеърларининг моҳияти “қадам товушларинигина эшиитиб, яшаи мумкин бўлган” сифатга менгзайди. У гоҳ дараҳтга, гоҳ шамолга, гоҳ тақлидчи болага, гоҳ эса қушга айланади:

*Қадам товушларинигина эшиитиб,  
яшаи мумкин бўлган манзилда  
сўзлаши унутдим!  
Күшлар овозида сени чорлаб,  
япроқлар қарсаги,  
сувлар созида куилаётган мен!*

Мазкур сатрларда мисли чинни идии жаранги бордек, ўқигач, қўнглигизда нозик бир садо қолади. Дилрабо Мингбоева бир шеърида: “Бир Мажнунлик бўлмаса, инсонликка қандай кўнай?” – деб хитоб қиласди. Балки бу сўзлар шоирига ижодига энг тўғри таъриф бўлар.

**Фарогат КАМОЛ**



## **Умр ўтаверар дақиқа сайин**

**Мухаммад ЖАЛОЛЗОДА**

### **Ватан**

Сен мен учун ягонасан, ягона Ватан,  
Бағрингда улғайдим, онасан, она Ватан,  
Зардан аъло дурдонасан, дурдона Ватан,  
Гар йиқилсам, парвонасан, парвона Ватан!

Боғи роғли диёр кўпдир ушбу дунёда,  
Барчасидан ўзинг улуғ, ўзинг зиёда,  
Тупроғингдан меҳр топгум, кезиб пиёда,  
Билингайдир сенинг васфинг нурда, зиёда!

Гар кўрмасам, бир кун сени, бўлгайман хумор,  
Тупроғингни кўзга суртгум, айладим тумор,  
Сувинг ичиб шифо топдим бўлганда бемор,  
Шаҳарларинг обод, гўзал айлади меъмор!

Икки дарё орасида гуллаган диёр,  
Меҳр ила муруватли элингдир бисёр,  
Эл-юрт фаровон: кунда тўй, кунда ёр-ёр,  
Сенда мангу янграйдур ўлан ва алёр.

Сен – ўзингсан обод диёр, Шарқда машъал,  
Агар жаннат ерда бўлса, сенсан ўшал!  
Ер шарининг узугига ёқут кўзсан,  
Сен – қалбимнинг истиқболи! Ширин сўзсан!





## УМИД

Нигоҳимга жо бўлдинг офтоб мисол,  
Қаршингда лол бўлиб тош каби қотдим.  
Гўёки чақмоқдек бўлдику висол,  
Рухим аршга чиқди, ўзим йўқотдим.

Яна ўша ҳолат, яна шошилдинг,  
Лаҳзада кўзимдан бўлдингку ғойиб.  
Юракка армоннинг туморин илдинг,  
Танҳо қолар бўлдим бечора ғариб.

Ва, яна ташнилик ҳамроҳим ҳижрон,  
Юрарман мосуво, келолмай ҳушга.  
Кошкийди, мен учун топибон имкон,  
Шояд кирсанг эди, бир бора тушга.

Биламан, чеки бор ҳатто уммоннинг,  
Поёни бор эрур, ўшал сахронинг,  
Аммо, лек, чеки йўқ азоб, ҳижроннинг,  
Мен учун раҳми йўқ кўзи шаҳлонинг.

Умидвор кўзларим сенга интизор,  
Қуш каби талпинар, бечора юрак.  
Балки келармисан, келганда баҳор,  
Умидим узмайман сендан, эй, малак?!

*Андижон*

**Тохир ҲАҚБЕРДИЕВ**

## Табассум қил

Табассум қил, қаҳрингдан кечгил,  
Ўз жонингга берма азият.  
Адоватинг тугунин ечгил,  
Пайдо бўлсин ширин, соф ният.

Табассум қил, умринг узаяр,  
Сафларингда дўстларинг қатор.  
Соғлигингни табассум таяр,  
Тўрт фаслда кўнглингда баҳор.

Табассум қил, дунёning юзи –  
Кирлар тўла лолақизғалдоқ.  
Нур кўрмаган ғорнинг оч кўзи,  
Сен кирганда, нур сочар чироқ.

Табассум қил, дўсту душманинг –  
Дўст бўлишиб ёнма-ён кетар.  
Кўкрагингда ўсан Ватанинг  
Манзилларга қалб билан етар.

### **Ранг-баранг китоблар**

Дарахтлар гуллайди, ранг-баранг, қийғос,  
Болари сўради тотли шарбатин.  
Қанотлар сарғиш ранг, гул чанги – либос  
Сира канда қилмас ширин одатин.

Ранг-баранг китоблар жавондан боқар,  
Ким мени ўқир, деб, кутар интизор.  
Улар ҳам дарахтдай, шарбати оқар,  
Ширасин сўролсанг, умрингдир баҳор.

*Самарқанд*

---

**Тошпўлат НЕЪМАТ**

### **Юрак тори**

Юрак – жуфт тор,  
Чертилса дилдан,  
Кўнгилларни айлагай асир.  
Лек, бир тори узилса бирдан,  
Юрак ва тор қолади басир.

Ҳар юракнинг жуфт тори бордир,  
Ғам, шодликни этар ифода.  
Юракка ишқ ва ҳижрон ёрдир,  
Ҳижрон – оғу, муҳаббат – бода.

Эзгуликни этар тараннум,  
Ул торга гар етмаса озор.  
Юрак торин сайратар ҳар зум,  
Ватан, халқ, дил севган дилдор.





## Борар эдим

Учмоқ бўлсанг, бўлайин қанот,  
Кучмоқ бўлсанг, бўлайин висол.  
Ёнгинангда қолай умрбод,  
Ишқ ахлига шу эрур иқбол.

Гаюрларга сездирмай, асло,  
Рухсорингга тўйгунча боқай.  
Кошки, бўлсанг мен каби шайдо,  
Оташ бўлиб қалбингни ёқай.

Севгимизни сезиб онанг дер:  
“Ким севгилинг?” Айтса ўшал зум.  
Боқсанг қалбинг зимнига дилдор,  
Борар эдим, бош эгиб ўзим.

**Toishkent**

## Ҳанифа УММАТҚУЛОВА

### Унутманг

Умр ўтаверар дақиқа сайин,  
Одимлаб борамиз қарилик сари,  
Ортда қолганларга парво қилмайин  
Кетамиз, сўнг унут бўлади бари.

Кейин яна олға ташлаймиз қадам,  
Янги ҳамроҳлар-ла бўлиб андармон.  
Эски ҳамхонадан, эски сирдошдан  
Кечиб кетганимиз билмаймиз қачон.

Қачондир кўнгилни чулғайди ҳадик,  
Қачондир оқсайди умр карвони.  
Шунда бошимизда турганича тик  
Хисобин сўрайди вақтнинг ҳар они.

Шунда ёдга тушар унут ваъдалар,  
Шунда армон бўлар бой берилган баҳт.  
Қайсиdir кўнгилда бизга аталган  
Сўнг эса йўқловсиз, нураб битган тахт.



Барчаси, барчаси тушади ёдга,  
Гарчи надоматлар, пушаймон бекор.  
Тонггача чироғи ўчмас дарчани  
Сўнгги дамда қоқиб ўтайлик бир бор.



Шу дарча ортида ўтирап кимдир,  
Кимнидир соғиниб, йўлга кўз тутиб.  
Хушёрроқ бўлайлик азиз одамлар,  
Бизлар қўймадикми уни унутиб?..

### **Қўшни кампир ва куз**

Ҳали бошланмади бўрон, довуллар,  
Япроқлар олмади ҳали сарғиш ранг.  
Умрнинг ҳосилин йигар пайтида  
Энг сўнгги япроқдек турибди аранг.

Сувлар зилоллашиб улгурди ана,  
Қирқма шафтолилар етилди хил-хил.  
Унинг юрагида яшар биргина  
Раҳматли чолига нарз қилинган дил.

Саратон тафтини унутди тошлар,  
“Бешик тебрат” ларнинг авжида рақси.  
Жўхорипоядан дўмбиллаб қайтган  
Кўзичоққа келар итнинг ҳаваси.

Бариси ўхшайди бири-бирига,  
Кампир – кузга ўхшар, кузчи – кампирга.  
Девордан бокаман ҳавотирланиб:  
“Кетиб қолмасайди, куз билан бирга”.

*Фарғона*



## Алишер НУР

### Дўстлар, бўлинг саломат

Баҳор келса, қизғалдоқлар гилам тўшар қирларга,  
Дарёларнинг тўлқинлари оро берар дилларга,  
Товусмонанд камалаклар ҳавас қиласр гулларга,  
Баҳор билан бошланади, аслида, баҳту омад,  
Гул ёшликнинг қучоғида, дўстлар, бўлинг саломат.

Қалдирғочнинг қанотида ўйноқлайди шамоллар,  
Булултарнинг оқ отини сўроклайди хаёллар,  
Муҳаббатнинг боғларида хуш ифордир аёллар,  
Аёл борки, кенг оламда тўқис бўлар баҳт-омад,  
Гўзалларнинг ардоғида, дўстлар, бўлинг саломат.

Ўрикларнинг шохларига қўйган оқлик қор эмас,  
Сохта ёлғон, мақтовларга олам аҳли зор эмас,  
Сулувларнинг сунбул сочи жон олгувчи дор эмас,  
Висол сари етаклайди ишқ мулкида баҳт-омад,  
Лаҳзаларнинг қадрин асрраб, дўстлар, бўлинг саломат.

Толбешикдан эшитилар гўдакларнинг овози,  
Алла билан ҳамоҳангдир келинчакнинг дил рози,  
Мард йигитлар иродаси – бургутларнинг парвози,  
Парвоздарнинг калитидир бу дунёда баҳт-омад,  
Юксак-юксак чўққиларда, дўстлар, бўлинг саломат.

### Айтишув

О, вужуд! Юракнинг қўргони,  
Деворларнинг бўлсин мустаҳкам.  
Эзгуликнинг оташ вулқони  
Мулкинг узра уй курсин кўркам.

О, юрак! Туйғулар сарбони,  
Кувонч, шодлик бўлсин йўлдошинг.  
Матонатнинг улкан карвони  
Кўллаб турсин сабру бардошинг.

*Сирдарё*



## Саломжон Менгнор ТЕРМИЗИЙ

### Тўртликлар

\* \* \*

Инсонлик асоси – ақли қалб ҳар он,  
Илм-ла бўлгувси пок ва нурафшон.  
Парваришин боғбон яхши қилган боғ –  
Яшнар, ҳосили ҳам бўлар фаровон.

\* \* \*

Ожизларга етса яхшилик ҳар дам,  
Шодлигу орзудан, асло, бўлмас кам.  
Барака ёмғири шарофатидан  
Сахролар бағрига барқ урап кўклам.

\* \* \*

Сийрат мазмунидир дунёнинг инсон,  
Хаёт моҳияти унда намоён.  
Поя дуркунлиги илдиз туфайли,  
Мағизсиз ҳар данак ер билан яксон.

\* \* \*

Бир майса авжиidan ҳайратда қолсанг,  
Яхшидир тафаккур дўлига солсанг.  
Бахтлисан, яшашдан мақсад ибратин  
Күёшга талпинган майсадан олсанг.

\* \* \*


Комиллик талаби риёзат, заҳмат,  
Илму, маърифату, тафаккур, меҳнат.  
Қудуқ ковлаб, тоза сувга етгунча,  
Учрагай қанчалар гилу тош қат-қат.

\* \* \*

Нафс, бойлик дудидан қорайган ҳар дил,  
Оқармас, ювмаса жасорат, эй, дил.  
Сабр қуйиб турар инсоф сувини,  
Маърифат улашса сарбасар ақл.

*Сурхондарё*





### **Омон МУХТОР**

Ўзбекистон давлат мукофоти лауреати. 1941 йилда туғилган. Тошкент давлат университетининг (ҳозирги ЎзМУ) журналистика факультетини тамомлаган. “Чорлар қуёшилар йўллар”, шеърий тўплами, “Нигоҳ”, “Кушлар ва тушилар”, “Ҳаёт дарвозаси” каби ҳикоялар тўпламлари, “Учқур поездлар”, “Вазифа” сингари қиссалари чоп этилган. “Йиллар шамоли”, “Кўзгу олдидаги одам”, “Минг бир қиёфа” каби романлар муаллифи.

## **Сизга айтадиган гапларим**

\* \* \*

Келдингизу кетдингиз, мана,  
Сиз учун қисматdir куйганим.  
Мен сизни ўйлайман. Ва, яна  
Юрагимга кўчар ўйларим.

Қотган кўзларимда бир нигоҳ,  
Бир табассум. Лабларки, ақиқ.  
Мен ўйларга толиб, баногоҳ,  
Бунинг барин кўраман аниқ.

Ҳис – дард, юрақдаги ғалаён,  
Тонгти қушлар каби бир улфат.  
Лекин, сизга қилмасман баён –  
Бу қандай баҳт, бу қандай кулфат?

\* \* \*

Ёмғир қамчи солди заминга,  
Шамол қоқиб булуут чангини.  
Камалакми, эслатди менга  
Сизнинг кўйлагингиз рангини.

Мен югурдим, осмонга учиб  
Тўкмоқидек юрак зангини.  
Лекин, қолдим булутни қучиб...  
Дарров кийдингизми янгини?

\* \* \*

Йўқ, сиз эмас алдамчи,  
Сиз – самимий, мулойим.  
Лекин тортиб арғамчи,  
Йўлни боғлайсиз доим.

Балки, тортилган қатим,  
Дерсиз, оддий бир шумлик.  
Балки, менинг қисматим –  
Интилишга маҳкумлик...

\* \* \*

Кўзларимдан нур ёғилмайди,  
Бўлганида қалбда суқунлар.  
Сизни айни соғиниш пайти –  
Ёмғирли шу кунлар.

Сиз кириб келасиз, албатта,  
Шундай кунда. Енгил, беозор.  
Ёмғир тиниб, кўзларимдан  
Катта-катта  
Ёға бошлайди кор.

\* \* \*

Иккимиз  
бир-бировдан  
айри.  
Айрилиқ, дегани, шу экан.  
Энди зерикарли боғ сайри,  
На гул қизик, на тикан.

Энди узоқ ерда ўт ёнгандек.  
Менга қийин. Балки сизга қийин.  
Ҳар ҳолда

иккимиз ҳам

уйғонгандек,

Ширин бир туш кўргандан кейин.





\* \* \*

Юрагим  
қандиллар порлаган –  
гүёки қадим бир обида.  
У сиздек санамни чорлаган,  
минг йиллар кўрганча хобида.

Не керак,  
не учун  
бундай хоб –  
қоришган чин ҳолат ва сароб?  
Ҳеч

юрак чекарми  
изтироб –

Шунчалик  
муҳаббат бобида?

\* \* \*

Менга бўйсунмасдан пи chirлар,  
Сизнинг исмингизни лабларим.  
Шунда еру қўкни қучарлар  
Сизга айтадиган гапларим.

Сизга бағишилаган садолар,  
Шунда юрагимдан кўчарлар.  
Сизни деб яшаган нидолар –  
Ногаҳон қуш бўлиб учарлар.

\* \* \*

Шабнам тушиб,  
офтоб остида  
ярақлаган худди найзалар –  
кўтарилилар яшаш қасдида  
ердан бир кун тиниқ майсалар.

Муҳаббат деб аталган бир сас  
майсаларга келар даҳлли.  
Мақтанишни табиат билмас,  
бўлса ҳамки, биздан ақлли.

\* \* \*

Юракни бир олдингми,  
Олавергин жон-жон,  
Юракда бир қолдингми,  
Қолавергин, жон-жон?

Майли, бўлса ҳам арқон,  
Майли, бўлса ҳам занжир –  
Бўйнимга бир солдингми,  
Соловергин, жон-жон?

Мени толдирдингми сен –  
Бўйин эгсам мен фақир?  
Кейин, ўзинг толдингми,  
Толавергин, жон-жон?

\* \* \*

Дераза ортида кечадан буён  
Қор урмокда гирдибод.  
Унут эртакларга  
кириб яна жон,  
Гўё тирилган Ғирот.  
Худди қўл еткудай –  
силамоқ бўлсанг,  
Учқур отнинг ёллари.  
У тураг қаршингда депсиниб дилтанг...  
...Бу –  
кишнинг хаёллари!

\* \* \*

Мұхаббат келгандан.  
ҳаёт мактаби:  
бир боксанг кўркамдир,  
бир боқсанг хароб.  
Сизга юрагини бермаслик каби,  
Сизга юрагини бермоқлик азоб.

Қаршимда жонланган  
саҳро бепоён,  
Мени телба этган,  
мени банд айлар.  
Гоҳ кўксимда рубоб янграйди шоён,  
Гоҳ эса кўксимда инграйди найлар.

Тобакай, бу ҳолат  
этади давом.  
Балки, у мангудир?  
Йўқ менга нажот.  
Сиз – менинг бўғзимда тикилган калом,  
Сиз – менинг кўксимда жойлашган ҳаёт.





### Наим КАРИМОВ

*Беруний мукофоти лауреати, Ўзбекистон Республикаси фан арбоби. 1932 йилда түгилган. Тошкент давлат университетини (ҳозирги ЎзМУ) битирган. Олим ўнлаб китоблар, юзлаб мақолалар муаллифи. Мустамлакачилик даври қўрбонлари хотирасини абадийлаштириши йўлидаги хизмати учун “Эл-юрт ҳурмати” орденига сазовор бўлган.*

## ОТАХОН ШОИР

*(Ҳабибий таваллудининг 125 йиллиги муносабати билан)*

Тарих қаърига кирган мустабид тузум сиёсати Ҳабибий сингари арунавис шоирларга ҳам эркин ижод қилиш имконини бермади. Аруз оҳангларига “колхоз”, “трактор” сингари ўша даврнинг тимсоли бўлган сўзларни қўшишни талаб қилди. Ҳар бир ғазалида “партия”, “коммунизм” сингари сўзлар янграб турмаган отахон шоирлар газета ва журналларига яқинлаштирилмади. Ҳабибий ҳам ўтган даврнинг шундай нафмаларига чидашга мажбур бўлди.

Зокиржон Холмуҳаммад ўғли Ҳабибий 1890 йили Андижон вилоятининг Кўқонқишлоғида дунёга келган. Отаси Холмуҳаммад Муса ўғли шеъриятга, мусиқага, асқияга ҳавасманд эди. Шунинг учун, ўғлини қишлоқда очилган мадрасага берди. Мадрасада, Лутфий, Навоий, Муқимиш ва Фурқат ижодини яхши билган, ўзи ҳам мумтоз халқ қўшиқларини севиб қўйлаган мулла Мамад Аскар ўғли сабоқ берар эди. Зокиржон кейин Андижондаги Жоме мадрасасида, сўнгра Кўқондаги Мингойим мадрасасида билим олди. Аммо, 1906 йилда отаси вафот этгач, таҳсилни чала қолдириб, оиласи бағрига қайтишга ва рўзгор тебратишга мажбур бўлди.

Тақдир одамзотни аёвсиз синовлардан ўтказибгина қолмай, баҳтли учрашувларни ҳам ҳадя қиласди. Ҳабибий покиза, камтар ва камсуқум инсонлиги сабаб, умри давомида маърифат ва маданиятни ардоқловчи, шу оламга мансуб қишилар даврасида яшади, улар саховатидан баҳраманд бўлди. Ҳабибий дунёга келган кезларда Андижонда Абдураззоқ Бимий, Мунтазир, Маманазар қори сингари шоирлар эл оғзига тушган, улар қаламига мансуб ғазаллар Кўқонқишлоққа ҳам етиб борган эди. Кўқонқишлоқ Жалолобод, Арслонбоб ва Бозорқўргоннинг серқатнов йўлида жойлашгани учун санъат аҳли Ҳабибий туғилган қишлоқда қўниб, назм ва наво кечаларини ўтказар эдилар. 1876 йилда туғилган истеъдодли шоир Зокирий сабаб Кўқонқишлоқ

Андижоннинг адабий марказларидан бирига айланди. Ҳабибий, Анисий, Маҳжурий, Фарибий сингари бўлажак шоирлар ана шу адабий мухитдан озиқлана бошлади.

1917 йилдаги воқеаларга қадар ўзбек адабиёти шундай адабий тўғараклар ва давраларда яратилиб, сўнг энг яхши асарлар умумўзбек адабиёти хазинасини бойитиб борди. Бу тўғаракларда навоийхонлик, бедилхонлик, фузулийхонлик ўтказилиб, маҳаллий шоирлар бадиий маҳорат сирларини ўрганардилар.

Ҳабибий ғазалларидан бирида шундай адабий гурунгларни тасвиrlаган:

*Шу кун қилдик ажойиб, янги-янги ошино суҳбат,  
Нечук суҳбат, синиқ дилларга гўё мўмиё суҳбат.*

*Улашиди кунга тун, гаҳ асқия, гоҳи газалхонлик,  
Багишлаб базм элига ранг-баранг завқу сафо суҳбат...*

Зокирий, Маҳжурий сингари шоирлар тез-тез гурунглашиб, мумтоз шоирларнинг асарларини маъно чуқурлиги, шакл сехркорлигидан ҳайратга тушиб, ғазал машқ қилар эдилар. Зокиржон Холмуҳаммад ўғли ҳам шу даврага қўшилиб, ҳаёт маъносини шеърият бўстонидан ахтарди.

Бу ҳақда Ҳабибий шундай ёзади: “Баҳор фаслининг серманзара дамларида дўстим Мамасоли Эрданов хонадонидаги чорпояда ўтириб, дам-бадам устозимиз Қори Зокирдан шеърият илмидан, айниқса, аруздан таълим олардик. У ўз шогирдининг янги битган шеърларини дикқат билан ўқиб чиқар, кузатар эди. Юмалоқ ва чапдаст панжалари билан қалам ушлаб, жиддий тузатишлар киритар эди. Аруз ҳақида сўроқ бошлаб, топган сермазмун, сермаъно сўзларни ишлатишдаги жавобларимизни сабр-тоқат билан тинглар, тўлдирап эди. Ҳар доим у: “Баҳорни бепарволик билан ўтказиб юборма, баҳорда хислат кўп”, дер эди. Мана шу устоз ва Қўқонқишлоқдаги адабий мухит таъсири мени ҳам кўпроқ арузда ижод қилишимга сабабчи бўлган. Менга фасли баҳорнинг кўзни қамаштирадиган манзаралари ажойиб илҳом бахш этган.

Мархум Қори Зокир ака хушқомат, олижаноб, олийҳиммат ва камтара табиатли бўлиб, умрининг охиригача Алишер Навоийнинг мухлиси бўлган. У, айниқса, Навоийнинг “Хамса”сини кўп ўқир эди. Каминага ҳам Навоий асарларини, унинг фалсафий мулоҳазаларини пухта ўрганиб олишда йўлбошли бўлган”.

Шундай устозлардан поэтик маҳорат сирларини ўрганган Ҳабибий ҳам қалам тебратди. Бахтига, Қўқонқишлоққа яқин жойларда Анисий, Улфатий, Сайфий сингари шоирлар умргузаронлик қилишар эди.

Зокиржон Холмуҳаммад ўғлининг ғазаллари шу адабий давра қатнашчиларига манзур бўлгач, 1913 йилда ўзига “Ҳабибий” таҳаллусини олди. Аммо, 1938 йилга қадар бирор шеърини эълон қилиш ёки шеърлар тўпламини нашрга тайёрлашни хаёлига ҳам келтирмай яшади. Шу тарзда ойлар, йиллар ўтди. Ҳабибий ва унинг қаламкаш дўстлари олган ада-



бий билим, улар эришган ижодий ютуқлар овозаси Тошкентга ҳам етиб борди.

1938 йили Алишер Навоийнинг 500 йиллик тўйи муносабати билан Ҳабибий ва унинг қаламкаш биродарлари улуғ шоир меросини ўрганиш, нашрга тайёрлаш учун Тошкентга таклиф этилди. Ҳабибий адабиётшунос В.Дадабоев билан

“Ғазал ва замон мадҳи” деган сұхбатида ҳаётининг юлдузли кунларини эслаб, бундай деган эди: “Мен оддий деҳқон эдим. 1938 йилда мавлоно Навоийнинг 500 йиллик тўйлари муносабати билан Навоий комитети тузылган экан. Шу комитетга Навоий асарларини ўқий оладиган ва тушуниб мағзини чақа оладиган адабиётчи ва адабиётшунослар керак бўлиб, Андижондан беш қишини таклиф этдилар. Бу таклифга биноан ҳамشاҳларим ва сұхбатдошларим шоир Маҳжурий, Улфатий ва Анисиyllар билан камина ҳам Тошкентга келдим. 1938-1941 йилларда Навоий комитетида илмий ходим бўлиб хизмат қилдим. Устоз шоир ижоди билан пухта танишишим, турли қўлёзмаларни ўқиб, мутолаа қилишим давомида ўзим ҳам пича шеър машқ қилдим. 1939 йилда Ёзувчилар уюшмасига аъзо бўлдим...”

Шу давр ичидаFaфур Гулом, Ҳамид Олимжон, Собир Абдулла, Уйғун каби шоир ва фозиллар билан танишиб, улар билан мулоқотда бўлдим. Бу, мумтоз адабий меросимизни пухта ўрганишимга ҳам, шеърият бўstonнига кириб, ижод сирларини эгаллаб олишимга ҳам кўмаклашди. Шулар туфайли мен, Собир Абдулла ифодаси билан айтиш жоиз бўлса, “Деҳқондан чиққан гўзаллик шоири” бўлиб етишдим”.

Ҳабибий адабиётшунос олимнинг: “Сизнинг ғазалларингизни ўқиганда, уларнинг беихтиёр куйга тушиб бораётганини сезиб қоласан киши”, деб бошланган мулоҳазасига жавобан бундай деган эди: “Қўшиқбоп шеърларни мусиқий безаксиз, куйсиз тасаввур этиб бўлмайди. Ҳар қандай яхши ғазал жозибали куйга эга бўлгандагина хонандага илҳом, қўшиқ шайдосига завқ бағишлайди, ғазалнинг умрини узайтиради. Классик адабиётимизда танбур ва дуторнинг мусиқий садолари остида ғазал битилганини, шеърхонлик қилинганини биласиз. Ғазал подшоси Алишер Навоий ижодхонасида эса “Савту ажам”, “Савту наво”, “Шашмақом” куйлари янграб турган... Ана шуларни эътиборга олсак, қадим-қадимдан бери ғазал қонига мусиқа садолари сингиб кетганини кўрамиз. Менинг ғазалларим хақидаги фикрингиз юзасидан шуни айтишим керакки, мен ҳам бошқа қўшиқчи шоирларга ўхшаб ўзимча куйлаб ёзаман”.

Ғазал лирик шеъриятнинг узок тарихга эга жанри. У шу давр мобайнида жиддий ўзгаришларга учрамади. Юқорида такидланганидек, фақат мустабид тузум даврига келиб ғазалдан янги замон гояларини куйлаш талаб этилди. Фикр ва туйғунинг теранлигига асосланган ғазал бекасам тўнини ечиб,

шиорлардан тикилган либосни кийиб олгандек бўлди. Шундай ғазаллар, афсуски, Ҳабибийнинг адабий меросида ҳам йўқ эмас. Шоир аruz табиатини, қонун ва қоидаларини билмаганлиги учун эмас, жорий мафкуравий даврнинг тазиики остида шундай ғазалларни ёзишга мажбур бўлган. Аммо агар “Ғазал ва замон мадҳи” деб номланган сухбатга назар ташласангиз, кекса шоирнинг аruz қоидаларини билгани ҳам, замонавийлик ва бадиий соддаликка “интилган” и сабаблари ҳам аён бўлади. “Арузчи шоир кичик бир ғазални ёзиш учун ғазал қонун-қоидаларини билишдан ташқари, замон талабларини ҳам, ғазалхонларнинг руҳий ҳолатларини ҳам билиши лозим. Халқ шеъри руҳида ё ҳозирги шеъриятимизнинг бармоқ вазнида ёзишнинг қулайлиги деймизми, осонлиги деймизми, шундаки, бундай асарларни катта ҳам, кичик ҳам, колхозчи ҳам, олим ҳам тушунаверади. Арузни эса ҳамма ҳам тушунади, дейиш қийин. Унинг ўзига яраша ўқувчиси бор. Арузчи шоир ўқувчининг маданий савиясини, билимини, таъбини, кўнгил торларини хисобга олиши, шу торларни чертиши керак. Адабиётмизнинг бир бағрида бармоқ вазни, иккинчи бағрида аruz вазнининг бўлиши шоирларимизнинг катта бойлигидир. Мен ҳам шу бойликдан бебахра қолмай, аruz билан бармоқда баравар ижод этишга интилдим. Аммо менинг қалбимни аruz эгаллаб олган. Бунинг сабаби шундаки, мен шеъриятга жазм қилган йилларда шеърий базмларнинг тўрида аruz ўтирад эди”.

Шоир ғазаллари замондошларининг маданий савиясига, билимига мўлжаллаб ёзилган. Ҳабибий кўпни кўрган, доно киши сифатида ғазалларида бу дунёда кураш ҳам, машаққат ҳам, ғолиб ҳам, мағлуб ҳам, заҳар ҳам, новвот ҳам, ўлим ҳам, тухмат ҳам – ҳамма нарса рўй бериши мумкинлигини айтади:

*Кенг жаҳон бўлмиши кураши майдони, билмам, сир надур,  
Шонли инсон бир томону, даҳру даврон бир томон.*

*Бир-бираига найзабозликдур, бани одам, кўринг,  
Илму урфон бир томону, жаҳлу нодон бир томон.*

Ёки:

*Ўйласанг, дунё тилсиму, турли бойлик – коинот,  
Ҳар ким ўз таъбига лойиқ олади заҳру набот.*

*Баъзилар олса наботу баъзилар заҳр олдилар,  
Ибрат ол: ким хоину кимга хиёнат келди ёт.*

Ҳабибий ўқувчидаги ҳаётдаги паст-баланд воқеалар ва кишилар тўғрисида тасаввур уйғотиши билан бирга уларга виждонли, жасур, бир сўзли инсонлар ҳам борлигини айтишни унутмади. У шундай инсонларни эъзозлашда ўзининг шоирлик бурчини кўрди:



*Ақду сўз бирла жаҳон бўстонида инсон азиз,  
Келди бу инсон азиз, андоғки, танды жон азиз.*

*Сўзида бўлса ишончу, аҳду паймонда вафо.  
Қилгуси ҳар жойда бундоқ аҳд ила паймон азиз.*

Шубҳасиз, зиддиятлар, курашлар, хиёнатлардан холи бўлмаган замонда яшаш осон эмас.

Мумтоз ўзбек шеъриятидаги ғазалларнинг ўзига хос хусусиятларидан бири ва муҳими агар улар, чиндан ҳам, юксак шеърият намуналари бўлса, уларда нозик туйғулар билан бирга ҳайратомуз фалсафий маънолар ҳам яширинган. Бу ғазаллардаги айрим байтларнинг мағзини чақсангиз, оламолам маъно чиқади. Халқ узоқ асрлар мобайнида шундай ғазалларни куйлаб келган ва фақат мусикий товланишларидан эмас, балки даставвал улардаги маъно бойлигидан мутаассир бўлган.

Ҳабибий ҳам ўз ғазаллари бағрига шундай фикрларни сингдиришга, замондошлари қалбини эзгу туйғу ва кечинмалар тасвири билан тўлдиришга интилди.

У умри мобайнида жуда кўп ғазал ва мухаммаслар, мусаддас ва таржеъбанд, мурабба, рубоий, маснавийлар яратди. Бу асарларнинг бизга маълум қисми қирқ мингдан зиёд байтни ташкил этади. Унинг кўшиқ сифатида айтилиб келган ғазаллари эса икки юздан ортиқ. Бу кўшиқлар, халқ кутган ғазаллар бўлиб, уларда тингловчи ва ўқувчи қалбига гўзаллик ва эзгулик нурларини сочувчи туйғулар ифодаланган. Бу туйғулар ягона меҳварга тизилиб, бизга шоирнинг ёрга муҳаббат, она замин ва она тарихга хурмат, қадрдон элу юртга садоқат жўшиб турган қалбини намоён этиб туради.

## ҲУҚМАТ

**Дилинг қуимасин ноумидлиқ билан,  
Ёруғ қун түсилгай қаро қечадан.**

**Саъдий ШЕРОЗИЙ**



*Ҳабиб РАҲМАТ*

*Атоқли болалар шоури. 1941 йилда туғилган.  
“Қулоқсиз улоқ”, “Қушлар бозори”, “Ари ва Али”,  
“Кизик совгалар”, “Ботир аскарча” каби ўнлаб ки-  
тоблари нашр этилган. Энг сара асарлари дарслик-  
лардан, антalogиялардан ўрин олган.*



## **Турна кўзли булоқча**

### **ЗАФИЗОН**

Нима кўрса зафизон  
Дарровда илиб кетар.  
Кейин дуч келган ерга  
Апил-тапил беркитар.

Сангигиб-сангиб бир маҳал  
Эсига тушгани чоғ,  
Яширганин очофат  
Қидиради боғма-боғ.

Беандиша, тополмай  
Аламдан жигибийрон.  
Буюрмаган ҳеч кимга  
Ўғирлик мол ҳеч қачон.





## Манзара

Осмон – денгиз,  
Ой – кема,  
Енгил сузиб  
Юрибди.  
Маёқ бўлиб  
Юлдузлар  
Йўл кўрсатиб  
Турибди.

## Булоқ

Турна кўзли булоқча  
Қайнаб ётар биқирлаб.  
Қайнару тошиб кетмас  
Кулган бўлар қиқирлаб.

Тарновчадай йўл очиб,  
Оқиб-чопиб кетади.  
Боғни қўмсауб у томон  
Йўллар топиб кетади.

## Ниҳолга

Нозик ниҳол файз кўшган  
Майдончага бир дунё.  
Мушук, кучук, мусича  
Тунда ўйнап доимо.  
Бир кун чақмоқ чақди-ю,  
Қуйиб берди жалани.  
Хўл бўлишга тоқат йўқ,  
Излаш керак панани.  
Кучук қочди инига  
Қарамасдан сүякка.  
Мушук эса лип этиб,  
Чиқиб кетди илгакка.  
Мусича ҳам бўғотдан  
Олди ёмғир тегмас жой.  
Жала чиқди авжига  
Ариқча ҳам худди сой.  
Ўнқир-чўнкир бир зумда  
Тўлди, қолди қўл бўлиб.  
Ниҳол марддай турарди,  
Қочмай, селда ҳўл бўлиб.



## Адабий ҳаёт

\* \* \*

Ўзбекистон Ёзувчилар уюшмаси Наср кенгашида андижонлик адаби Омина Тожибоеванинг “Шамолларга учган нидолар” тарихий романи муҳокама этилди. Муҳокамада адабиётшунос Маҳкам Маҳмудов, шунингдек, Кенгаш аъзолари Тўлқин Ҳайит, Нўймон Раҳимжонов ва Рисолат Ҳайдаровалар иштирок этишди.

Роман тарихимизда анча машхур бўлган аёл – Бобур Мирзонинг оиласи Хонзода бегимнинг тақдири ҳақида хикоя қилади. Хонзода бегим бобурийлар авлодидаги фожиавий шахс. У укаси Бобур Мирzonинг Самарқанд қамалидан эсон-омон чиқиб кетишига йўл очиб берган, унинг ҳаётини сақлаб қолган ва шу тариқа бобурийлар салтанатининг юзага келишида бекиёс хизмат қилган.

Хонзода бегим Бобур Мирзо вафотидан кейин унинг ўғли Ҳумоюн Мирзо саройида яшайди, бобурийларнинг оқила онахони сифатида эъзоз топади.

Муҳокамада сўзга чиққанлар Хонзода бегимнинг тақдиридаги тарихийлик ва давр эврилишлари билан туташиб кетган нуқталар бадиий асар учун кутилмаган ноёб материал эканлигини қайд этишди ва романда тарихий сиймолар образининг яратилишида қай жиҳатларга эътибор қаратилиши лозим эканлигини таъкидлашди.

“Тарихий шахсларга нисбатан доимо холислик нуқтаи назаридан туриб ёндошилиши керак, – деди Нўймон Раҳимжонов. – Романда тасвириланган тарихий сиймоларнинг шахсияти, табиати, фаолиятларининг миқёси илмда ҳам, бадиий-эстетик тадқиқотчиликда ҳам бамисли очилмаган қўриқ. Улар зукко, закийлар назарини кутиб турибди. Шундай экан, улар ҳақида бир ёқлама фикр юритишдан доимо эҳтиёт бўлмоқ шарт”.

Муҳокамада шунингдек, тарихий даврни ёритишда аҳамиятли ҳисобланган унсурлар – деталлаштириш, романда тасвириланган замонга тегишли бўлган этнографик ва жуғрофик атамалар, тарихий асарнинг тили борасида ҳам фикр ва мулоҳазалар билдирилди.

Наср кенгаши роман қайта ишланиб, ҳар томонлама маромига етгандан кейингина уни нашрга тавсия этишга қарор қилди. Муҳокамада иштирок этган роман муаллифи билдирилган фикр ва мулоҳазалар учун тўпланганларга миннатдорчилик билдириб, асарни қайта кўриб чиқишини ва камчиликларни тузатишини билдириди.

\* \* \*

Уюшмада таникли шоир Минҳожиддин Мирзонинг “Кўклам куртаклари” ва “Гуллаш пайти келди, боғларим” китобларининг тақдимоти бўлиб ўтди. Тадбирда таникли ёзувчи ва шоирлар, адабиётшунос ва адабий танқидчилар, шунингдек, олий ўқув юртларининг талабалари, шеърият муҳлислари иштирок этишди.

Тақдимотни Уюшма раиси, Ўзбекистон халқ ёзувчиси Мухаммад Али очди. Тадбирда Ўзбекистон халқ шоирлари Анвар Обиджон ва Махмуд Тоир сўзга чиқишиб, Мирҳожиддин Мирзо ижодининг ўзига хос томонларига тўхталиб ўтишди. “Минҳожиддиннинг сатрларида самимийлик сезилиб туради, – деди шоира Шарифа Салимова сўз навбатини олиб. – Унинг дастлабки шеърлари бир туркум бўлиб “Ўзбекистон адабиёти ва санъати” газетасида чоп этилгандаёқ адабий жамоатчилик эътиборига тушган, миллий шеъриятимиз яна бир истеъдод билан бойигани эътироф этилган эди. Шундан бери ўтган давр ичida Минҳожиддиннинг ижоди ўсди, бойиди, замонавий адабиётимизда ўз ўрнини эгаллади”.

“Гуллаш пайти келди, боғларим” тўплами шоирнинг шеър ва достонлари, шунингдек, адабий қайдларидан иборат сайланма бўлиб, муаллиф ижодининг дастлабки йилларида ёзилган шеърлар билан бошланиб, “Висол соғинчи”, “Умр фасллари”, “Кўнгил ранглари” каби бўлимларга жамланган турли шеърлари билан давом этган, “Соғинч салтанати” туркуми, “Қайfu гули” ва “Соҳибқирон ёғдуси” достонлари билан бойитилган.

\* \* \*

Бу йил Ўзбекистон ва Қорақалпоғистон халқ шоири Тиловберган Жумамуратов таваллудига 100 йил тўлди. Шу муносабат билан Уюшма жойларда турли тадбирлар уюштириди. Шундай тадбирлардан бири Нукус шаҳрида, Бердақ номидаги мусиқали драма театрида бўлиб ўtdи. Унда кўплаб шоирлар, ёзувчилар ва таржимонлар иштирок этишди. “Оқиб турган дарёдай эди” деб номланувчи ушбу адабий кечада сўзга чиқсан Ўзбекистон ва Қорақалпоғистон халқ шоири Жиянбой Избосканов, шоир Ошиқ Эркин, адабиётшунос олим Курбонбой Жаримбетовлар Тиловберган Жумамуратовнинг ҳаёти ва ижод йўли ҳақида сўзлаб беришди. Шоирдан қолган “Юрак мұхаббати”, “Тўлқинда”, “Дўстлик” шеърий тўпламлари ва достонларида халқона оҳанг ва қорақалпоқ ҳикматлари мужассам. Унинг кўплаб шеърлари куйга солинган бўлиб, санъаткорлар томонидан ҳамон қуйлаб келинади.

